



I. კახეთში

მეჩვიდმეტე საუკუნის დასაწყისში ალაზნის ველი წარმოადგენდა მკიდროდ დასახლებულს, აყვავებულ მხარეს. ასი ეჯის მანძილზე გადაშლილ ველს სიგარძისად რწყავდა XII საუკუნის გასულს დიდი თამარის მიერ აგებული დედოფლის უზარმაზარი არხი, მდინარე ალაზნიდან გაყვანილი; იგი უხვად ანოყიერებდა ველის მარჯვენა მხარეს — კახეთს, ჭიზიყს და უერთდებოდა ისევ ალაზნს შირაქის ბოლოს.

შემოდგომა იწყება. დიდი ხნის მომკილია პურის ყანები. ხორბლის, ფეტვისა და ქერის უხვი მოსავლით სავსეა დაბა-სოფლების ბედლები. კიდევ მოიპოვება ბაღებში კახეთის განთქმული ნესვი და საზამთრო. ბაღებში კი ბლომადაა მსხალი, ვაშლი, ლეღვი და ატამი. ალაზნის ორივე მხრივ სიგარძისად ფერდობ-დაფენებაზე გადაჭიმული მებატონეთა ვრცელი ზვრები უხვად დატვირთულა მწიფე რქაწითლით, საფერავით, მწვანით, თავკვერითა და ბუდე-შურით.

რთველი დაწყებულა. დიდ-პატარიანად შესევიან შინაყმები მწიფე ყურძენს კალათ-გოდრებით და გალესილ დანებით. გამალებული კრეფაა, სიმღერა და ოხუნჯობა. შორიახლოდან მათ დასტრიალებს მოურავის სასტიკი თვალი, ისმის მისი მკექარე ხმა და მუქარა. გოდრებით მოტა-

ნილ ბუნების უხვი ნობათით ივსება უზარმაზარი ნავ-საწ-
ნახლები; შიგ ჩამდგარან ფეხდაბანილი დაკარწახებული
მარჯვე ბიჭები და წნეხენ ყურძენს, ტკბილი ფართო ლა-
რებით ჩადის დიდრონ ქურებში დასადულებლად.

იქვე ზვრებში მაგარ ბოძებზე ნაჭით დაკიდებული სა-
რახე ქვაბებით გლეხის მოახლე-დედაკაცები აღუღებენ
სქელსა და თაფლივით ტკბილ თათარას, ავლებენ შიგ ნიგვ-
ზის, თხილის, ჩირისა და ჩამიჩის მოგრძო აცმებს და აკე-
თებენ მსუქან კახურ ჩურჩხელეს. აქვე ფუსფუსებენ
პერანგა ბავშვები და ხარბად ლოკავენ თითებით ჭოგრებზე
დაკიდებულ ჩურჩხელათა ტკბილ ნაღვენთებს.

იმავე ზვრებში, უზარმაზარ კაკლებქვეშ ფართოდ გაშ-
ლილ ნოხ-ფარდაგებზე ფეხმოკეცით სხედან ან მუთაქა-ბა-
ლიშზე მხარ-თეძოზე წამოწოლილან დიდი ბატონები თავი-
სი ცოლშვილითა და სტუმრებით. შეეჭყევიან გაშლილ
სუფრაზე ნაირ-ნაირ სასმელ-საჭმელს. იქვე ოდნავ მოშო-
რებით შუშხუნებს პრიალა ცეცხლის პირას ხის შამფუ-
რებზე აგებული თხის ან ცხვრის მსუქანი მწვადები. ადრე
დაწურული შუშხუნა მაჭრით ივსება ვერცხლის ბაღია-
აზარფეშები და ჯიხვის ყანწები. სასმისები მარდად გადა-
დის ხელიდან ხელში. ისმის სმურები, მოსწრებული ზმები,
კაფია-შაირები, სუფრული და კახური მრავალყამიერი.
ამათ ეცილება თარის მკენესარე ჰანგები ან დაირას ხმაური
და მათზე აყოლებული სევდის მომგვრელი სპარსული ში-
ქასტა-ბაიათი. დროგამოშვებით დასცხებენ დოლ-დიპლი-
პიტოს, ტაშით და ტურულა-სალამურის ტკბილი ხმებით
შეზავებულს, და ფეხმარდი, მოხდენილი ქალ-ვაჟნი უვლი-
ან იქვე მოლზე მხიბლავი ნარნარით მირზაიას, ლეკურს,
ჩეჩნურსა და დავლურს.

ჩაღდება ქეიფი, მთვარის ციატა სხივებით გაშუქებული.
გულუხვი მასპინძლები მგზავრებსაც კი არ უშვებენ. გზის
პირას გუშაგად მდგარი ფარეშები ეპატიყებიან მათ. ვაი
მას, ვინც არ ეახლება ქეიფში შესულ დიდ ბატონებს.

რთველია, რთველი გაჩაღებული! ღზინობენ კახეთის
დიდი ფეოდალები, ღვინით აღზრდილნი, ღვინით დამთვ-

რალნი, წითელი ღვინით ნაზიარებნი. დინჯი ალაზანი მდორედ მოდენის მოშავო ზვირთებს და შირაქის ქვემოთ გულში იხუტებს თავის უმცროს ძმას, იორს.

იქ, ჩრდილოეთით, ალვანის ვრცელ მინდორზე ობლად აწვდილა ალავერდის მაღალგუმბათიანი თეთრი ტაძარი, ქვის გალავანშემოვლებული და სქელბურჯებიანი. იგი ამაყად დასცქერის მიდამოს.

მზე გადახრილა. მთებიდან დაქანებული შარავნები სავსეა ცხენოსნებით, ქვეითა მგზავრებითა და ჩარდახიანი ურმებით. ეშურებიან ალავერდის დღეობასა და ბაზრობაზე, რომლებიც იწყება ცამეტ სექტემბერს საღამოდან და გრძელდება თითქმის მთელი კვირა. მოსული ხალხით ივსება ალვანის მინდორი. მთისა და ბარის ხალხი, ქალი თუ კაცი, ყრმა და მოხუცი, მოდიან აქეთ, რათა მოილოცონ წმ. გიორგის ხატი, მოიღონ შესაწირავი, დაკლან საღეთო ტარიგი, იღრონ, ილხინონ, გაჰყიდონ ზედმეტი რამ, იყიდონ, რაც ეჭირვებათ, ნახონ მტერ-მოყვარენი და ფრიად ნასიამოვნები თავისი ჯალაბით დაბრუნდნენ შინ.

მოდიან თუშნი, ფშავნი, ხევსურნი, მთიელნი, მოხევენი; მოდიან ოსნი, ქისტნი და ჩეჩნები; მოდიან თავ-თავის სამოსით, გრძელი ხანჯლებით — კალდიმებით და მუზარადფარ-შუბ-ჩაჩქნებით. ზოგიერთს კიდევ მხარს უმშვენებს ყირიმის გრძელლულიანი თოფი, სათუთად გახვეული ნაბდის ბუდეში. ზოგს წელზე ჰკიდია მოგრძო დამბაჩა, ხმალი, კალდიმი. მთებით ჩამოსულ დიაცთა შორის თავის მშვენებით, ნაზი მიმოხვრით ირჩევინ ქისტის ქალები, მათ თავს ჰბურავთ გრძელი მანდილი.

მოეშურებიან სამხრეთით და აღმოსავლეთით კახნი, ლეკნი, ინგილო, ქიზიყელნი, ჯავახნი, ქართლელნი. მოდიან საგაჭროდ სომეხნი, თურქნი, ირანელნი, თათარნი, ებრაელები. მოდიან გრძელი ქარავნები, საქონლით ტვირთულნი. მოდიან ზერდაგნი, ჯორი და აქლემნი. შორითვე ისმის მათი ეყენების, ზანზალაკების ყდარუნ-წკარუნნი. ქარავნები ბინავდება ცალკე უბნებად. ალაგებენ საქონელს ადრევე აგებულ ხის ფარდულებში.

იქ, მოშორებით, ოდნავ ფერდობზე, ერთგულ შინაყმებს ვრცელი მიდამო მოუფენიათ ბამბის, შალის და ფარჩის ფერად-ფერადი კარვებით; ისინი თანდათან იგსება ცოლ-შვილით ჩამოსული თავადაზნაურებით. მათ შუაში კი აუმართავთ ეოლოსფერი ფარჩის ვრცელი კარავი, ძვირფასი ორხო-ხალებით მოგებული. მის წინ ფრიალებს წმ. გიორგის ვარდისფერი სამეფო დროშა, მალლად აწვდილი.

სწორედ ამ დროს გრემში, კახეთის მეფის დიდებული სასახლის ზემო სართულის გრძელ-განიერ აივანზე, საიდანაც იშლება საოცნებო სურათებად კახეთის საკმაოდ დიდი ნაწილი, სხედან ოთხნი დარბაისელნი, ორი მათგანი უკვე ხანში შესული. ესენი არიან: ადამ ანდრონიკაშვილი, აბელიშვილად წოდებული, კახეთის განთქმული სპასპეტი, და შარმაზან ჩოლოყაშვილი — დიდი ფეოდალი, კარისკაცი და თეიმურაზ ბატონიშვილის ლალა. ორიც ჯერ ისევ ჭაბუკნი: სახელოვანი სარდლები დავით ჯანდიერი (ასლანიშვილი) და ნოდარ ჯორჯაძე. ესენი ვერ ეწყობოდნენ თავის მოხუც მეფე ალექსანდრეს, — უდარდელს, მოქვიფეს, მუდამ ნადირობაში გართულს. ნატრობდნენ იმ დროს, როცა მამის ადგილს დაიჭერდა ტახტის მემკვიდრე, ბატონიშვილი დავით, კაცი მამაცი, მხნე, ნიჭიერი და ქვეყნის ერთგული.

— ბატონო შარმაზან! თქვენ კარგად მოგეხსენებათ, რომ ამჟამად ირანის ტახტზე ზის შაჰ-აბაზი, კაცი ფრიად ცბიერი და უნდობელი. მან უკვე ორ-სამ ბრძოლაში ზედიზედ დაამარცხა ოსმალთ სულთანი სელიმ, — ეს ბებერი მელა, დაიბრუნა მამის დროს წართმეული ქურთისტანი და ერევნის სახანო. ამთავითვე სჩანს რომ შაჰ-აბაზ მალე გახდება დიდი მბრძანებელი და სპარსეთის ძალთა განმამტკიცებელი. ხოლო ასეთ კაცთან ჩვენ, ქართველებს, გემართებს რიდი, მეგობრული კავშირი და არა მისი გაღიზიანება, მით უმეტეს, რომ ის არის, თურმე, დედით და ბებით ქართველი, იცის ჩვენი ენა,

ზნე და ადათი. ამიტომ ვფიქრობ, რომ კარგად მოგვეპყრობა, თუ ჩვენ ვაჩვენებთ ერთგულებას.

— მართალი ბრძანებაა, ბატონო ადამ. სწორედ მეც ამას ჩაეჩინებ მეფეს, მაგრამ ვერას გავხდი. სულ თოვლიან მთების გადაღმა, იქ, ჩრდილოეთით, იცქირება მსგავსად თავის განსვენებულ მამა ლეონისა. ასე ჰგონია მეფეს, რომ შორეული მოსკოვი იხსნის ერანის შაჰის ბრწყინებისაგან.

— შემცდარი გუმანია, ბატონებო, — ჩაერია საუბარში დავით ჯანდიერი. — აბა რა დახმარებას გაგიწევს შორეული მფარველი!

— მართალი ბრძანებაა, ბატონო დავით, — მოუქრა სიტყვა ნოდარ ჯორჯაძემ. ბევრად აჯობებს არ გავაბრაზოთ მეზობლები, მეგობრული ურთიერთობა ეიქონიოთ სპარსოსმალეთთან და მთის ხალხებთან. მართალია, ისინი მტრები არიან ქრისტეს ჯვარისა, ხოლო იმავე დროს ეს ეეშაპები — სპარსეთი და ოსმალეთი — დიდად მტრობენ ერთიმეორეს. სწორედ ასეთი რამით უნდა ვისარგებლოთ და ვალღივით მათ შორის მტრობის სახშილი, სანამ რუსეთი გაძლიერდებოდეს. ამასთან ერთად, თუ ერთობა გვექნა ქართველ ტომებს, ლეკნი, ოსნი, ქისტნი, ჩეჩნები და საერთოდ კავკასიონის მთის ხალხები ვერას დაგვაკლებენ, ვერ გაგვიბედავენ ჩვეულებრივ თარეშს.

— ისევე კარგი დაგემართოს, რომ ეგ კეთილი საქმეა, — ქართველ ტომთა ერთობა! — დაიწყო შარმაზანმა, — მაგრამ სადღაა ეს ჩვენი ერთობა?! ისედაც მცირე მესხეთკოლხეთი და ივერია რვა სამეფო-სამთავროდ არის დაყოფილი. ქართლი კახეთს ეომება, იმერეთი — გურია-სამეგრელოს, სამცხე და აფხაზეთი კი ყველას. დიდი თავადები ზომ დაერევიან ერთიმეორეს და ელეტენ... ამ კინკლაობით იწრიტება და ილუპება ჩვენი უბედური სამშობლო... აბა სადღაა დავით აღმაშენებლის, დიდი თამარის და გიორგი ბრწყინვალეს დიდებული ხანა, როცა საქართველო წარმოადგენდა ზარდამცემ სახელმწიფოს მთელ წინა აზიაში და როცა ჩვენი ნივთიერი კეთილდღეობა და სულიერი გა-

ნათლება აოცებდა ბრწყინვალე ბიზანტიას და მთელს ევროპას?! მონღოლთა შემოსევის, მეტადრე ბიზანტიის დაცემისა და საქართველოს დაქუცმაცების დროიდან ჩაესვენა მესხეთ-კოლხეთ-ივერიის დიდების მზე, დადგა ჩვენთვის გლოვისა და გაჭირვება-ტანჯვების შავბნელი ხანა. ამიერიით ძმა აღარ ინდობს ძმას და მამა შვილს. ხომ გახსოვთ, ბატონებო, რა საშინელი შური და მტრობა იყო ამ ჩვენს მეფე ალექსანდრესა და ქართლის განსვენებულ მეფეს დიდ სვიმონს შორის, რომლებიც იყვნენ ურთიერთის ახლო მოყვარენი, ან რა სამარცხვინო საქმეებს სჩადიოდა ჩვენი ბატონი ბოლოს შერიგდნენ ესა და ქართლის ახალი მეფე გიორგი. აგერ ორი დღეა, რაც გვეწვია იგი დიდი ამალით და ამ დილით აღრიან ჩვენმა მეფემ გაიტაცა სანადიროდ.

— ნეტა რას მივაწეროთ გიორგი მეფის მობრძანება? — იკითხა ჯანდიერმა.

— ამბობენ, თითქო ორივე მეფე მოსკოვს გზავნის დესპანთ დიდი არმალანით და რუსეთის ხელმწიფეს სთხოვენ მფარველობასაო, — უპასუხა ადამ აბელიშვილმა.

— ეჰ, — წამოიძახა ნოდარმა. — მაგათ მიმოწერას ადვილად გაიგებს ცბიერი შაჰი აეშაგთა მეოხებით, ისინი ხომ ბლომად ჰყავს როგორც აქ, ივერიაში, ისე მოსკოვის ხელმწიფის კარზე, და ვიცი ხეირს არ დაგვაყრის. ხომ იცით, ბატონებო, როგორ ღალატობდა მეფე სვიმონს მისი მესაიდუმლე კახაბერ ყორღანაშვილი; მაგრამ მოღალატეს თავზე დაატყდა რისხვა ზეცისა: ის გადაჩეხა გელიყარის კლდეზე საჩინო ბარათაშვილმა ამ სიტყვებით: „უკეთუ კეთილ არს ღალატი მეფისა, აწ იხმიე შენცა“.

— სრული ჭეშმარიტებაა, ბატონო ნოდარ, — ჩამოართვა სიტყვა ადამმა, — მე და შარმაზან უკვე მოვხუცდით, იქნებ ვეღარ მოვესწროთ, ხოლო თქვენ, ჭაბუკნი, იხილავთ რა საშინელი რისხვა დაატყდება თავზე ამ პოლიტიკის წყალობით და აეშაგთა ენატანობით ქართლის სამეფოს და ჩვენს აყვავებულ კახეთს! ოჰ, რამდენის ცოლ-შვილი დაობლდება, რამდენის დედა ატირდება! რაღაც ცუდად გმინავს ეს ტიალი გული. მაინც ნატრობს ჩვენი მეფე ალექ-

სანდრე კახეთის აოხრებას, რათა გაუმრავლდეს სანადირონი, და ვიცი, აუხდება კიდევ ეს ნატვრა, თუ ცოცხალი დარჩა... იცოდეთ, ბატონებო, შურს იძიებენ ჩვენზე ცბიერი შაჰ-აბაზ და ოსმალთ სულთანი, აგრეთვე მთის ხალხებიც. ამათ ყველას ფრიად აშინებს დიდი რუსეთის მეზობლობა, რუსის ჯარების ჩვენში შემოყვანა.

— ნეტა რას ბრძანებს ამის შესახებ ჩვენი ნუგეში, ტახტის მემკვიდრე დავით? თქვენ კარგად გეცოდინებათ, ბატონო შარმაზან, როგორც ახლო პირსა და მისი ვაჟის ლალას, — შეეკითხა ფრთხილად ჯანდიერი.

— დავით ბატონიშვილი დიდი წინააღმდეგია მეფეთა ასეთი საქციელისა და აპირებს კიდევ შესაფერი ზომების მიღებას. ხოლო მეუღლე მისი ქეთევან, ეს ბრძენი და სათნო ადამიანი, ეურჩება მის ასეთ ზრახვებს.

— ნეტა რა უნდა იყვეს ეს ზომები, ბატონო ჩემო? — შეეკითხა წყნარად ნოდარ.

— რა გაეწყობა! გეტყვით, რადგან ყველანი მეგულვით ფრიად საიმედონი. დავითს ნებავეს მამის გადაყენება და თავად ასვლა სამეფო ტახტზე, რათა შესაფერისად განაგოს ქვეყანა, — თქვა დაბალი ხმით შარმაზანმა.

— ღმერთმა ხელი მოუშართოს მაგ კეთილ საქმეში! — მიაძახა სამთავემ ერთხმად. — ჩვენც მზადა ვართ აღმოვიჩინოთ ბატონიშვილს შესაფერი დახმარება; მხედრობაც და დარბაზის ყმანიც ჩვენთან არიან.

— წინასწარ ვგრძნობდი, რომ ღირსეული მამულიშვილი ამას მეტყოდით. დიდად გმადლობთ, ბატონებო! ტახტის მემკვიდრე არ დაივიწყებს თქვენს ერთგულებას, — დაამთავრა შარმაზანმა.

— ნეტა რად ეურჩება ქმრის ასეთ კეთილ ზრახვას ბრძენი ქეთევან? — იკითხა ნოდარმა.

— იგი ბრძანებს, — განაგრძო შარმაზანმა, — როჲ მამის წინააღმდეგ წასულს არავის გაემარჯვაო. მას მოჰყავს მაგალითები ებრაელთა წარსულიდან და „ქართლის ეხოვრებიდან“.

ამ დროს გაისმა ბუკის ძლიერი ხმა. აჩქარებით მიუახლოვდა სასახლეს რამდენიმე ასეული ცხენოსანი. იმათ წინ მოუძღოდნენ სანადიროდ მოკაზმულნი და საუკეთესო ბედაურებზე მსხდომნი მაღალი ტანის ჭარბავი მოხუცი, კახეთის თეთრწვერა მეფე ალექსანდრე, მისი საშუალო ვაჟი გიორგი და მისი დისწული, საშუალო ტანის, გამხდარი გიორგი მეათე, ქართლის მეფე. ის სრულებით არ ჰგავდა თავის ღირსეულ მამასა და პაპას. ამათ მოსდევდა დიდი ამალა.

ფართოდ გააღეს ალაყაფის კარები. ახლად მოსულთ შეეგებნენ ტახტის მემკვიდრე დავით თავის მეუღლით, სეფეწულნი და დარბაზის დიდებულნი; ჰკადრეს მეფეებს მდაბალი სალამი და მიულოცეს მშვიდობით მობრძანება; შემდეგ უშველეს მეფეებს ცხენიდან ჩამოხტომა.

— ალბათ ბევრსაც ინანებ, რომ არ წამოხველ ჩვენთან სანადიროდ, შვილო დავით, — ბრძანა მეფემ. აი, ნახე, რაოდენი ნანადირევი მოეკრიბეთ. თუმცა შორს არ წავსულვართ და ხალხითაც მკვიდროდ გაშენებულა ის მხარე, მაგრამ მაინც საკმაოდ ვხოცეთ კურდღელი, ხოხობი, ღურაჯნი და ნიამორნიც-კი. ხოლო ყველაზე უფრო ძვირფასი ნანადირევია ის ფრიად მშვენიერი ფრინველნი. ისინი ვიხილეთ ალონის მინდვრად და დავიჭირეთ ცოცხლები ქორგავაზებით და შევარღნებით, რათა მოვაშენოთ და ვიყოლიოთ თვალის საამოდ. ბაადურ! მოასხი აქ ეგ უცხო ფრინველნი! აჩვენე ისინი ჩვენს საყვარელ შვილსა, მშვენიერ რძალს ქეთევანს და ქებულ სარღლებს.

ბაზიერთუხუცესმა ბაადურ მაყაშვილმა გასცა ბრძანება და მოაყვანიდა თერამეტამდე დედალ-მამალი ფარშევანგი. ისინი ალბათ, მოფრენილიყვნენ, ირანის მხრიდან და შემოსულიყვნენ კახეთის ბოლოს. მათი აფერადებული ტანი და მეტადრე გაშლილი ბოლოები ლაპლაპებდა გადახრილი მზის სხივებზე, ხოლო მათი უსიამოვნო ყივილი ბზარავდა სმენას.

— სწორედ რომ ბედნიერ ფეხზე გვესტუმრა ჩვენი საყვარელი მეფე გიორგი — განაგრძო ალექსანდრემ. — ასეთი კეთილი ნადირობა ფრიად იშვიათია. ამიტომ ყველა ნანადი-

რევიდან, უფრორე ამ უცხო ფრინველთაგან, ნახევარი მიწი-
ლადებია შენთვის, ჩემო ძვირფასო დისწულო.

ამ სიტყვებთან ერთად მოხუცი ალექსანდრე გადაეხვია
გიორგი მეფეს. მან მიუძღვნა შესაფერი მადლობა და ეამ-
ბორა ბიძას სპეტაკ წვერებზე.

— აბა გაშალეთ სუფრა აქვე, წალკოტში დაენაყრდეთ
მცირედ და გავსწიოთ ალავერდისკენ. ხომ იცით, მიტრო-
პოლიტი გველოდება, უჩვენოთ არ შეუდგება ლოცვას! ეკ,
კარგია მცირე დავანება და წაქეიფება ნადირობის შემ-
დეგ! — წამოიძახა ალექსანდრემ და ბაიათის ღიღინით წა-
უძღვა სტუმრებს გიორგი მეფესთან ხელჩაკიდებით. მათ
მიჰყვა მთელი კრებული. ყველანი დასხდნენ მდიდრულ
ნოხებსა და აბრეშუმის მუთაქა-ბალიშებზე კადრების ქვეშ
ფართოდ გაშლილი სუფრების წინ.

გაიმართა კახური ღვინო და ქეიფი გრძელი სუფრულე-
ბით და მრავალჯამიერით. მზე ჩასვლაზე იყო, როცა აიშა-
ლნენ სუფრიდან, შესხდნენ ბედაურებზე და გასწიეს ალა-
ვერდისკენ მხედრული სიმღერებითა და ცხენის ჭენებით.

ლამდება. შორს გაისმის მაღალ სამრეკლოდან ზარების
რეკა. მღვდლებითა და ბერ-მონაზვნებით ივსება ალავერ-
დის ვრცელი ტაძარი. ზეიმითა და გალობით შემოჰყავთ
კახეთის მიტროპოლიტი, რომელსაც მოჰყვებიან ეპისკო-
პოსნი—ბოდბელი, იყალთოელი და გარეჯელი. მლოცველე-
ბით ივსება ტაძრის დიდი გალავანი. თუმც უკვე დროა, მაგ-
რამ არ იწყებენ ლოცვას: ელიან მეფეებსა და სეფეწულთ.

ამ დროს გაისმა ბუკისა და ყვიროსტიკირის მქექარე ხმა,
ნიშანი მეფეთა მობრძანებისა. ალავერდელი თავისი კრე-
ბულით შეეგება მეფეებს ტაძრის კარებთან, მოულოცა
მშვიდობით მობრძანება, ზეიმით შეუძღვა ტაძარში და და-
აბრძანა სამეფო სევანებზე. ამავე დროს მგალობელთა გუნ-
დმა საამოდ დასძახა: „კახეთის დიდებულ მეფეს ალექ-
სანდრეს და ქართლის დიდებულ მეფეს გიორგის მრავალ
არიან წელნი“.

შეუდგნენ საზეიმო ლოცვა-ლიტანიას. მეფე-დიდებულ-
ნი და სამღვდლოება ანთებული კელაპტრებით ხელში უვ-

ლიან ტაძარს გალობით. ამათ წინ მიუძღვით ქალებისა და ვაჟების გუნდი. ისინი გალობენ: „დიდება და ღმერთსა, დიდება! წმინდა გიორგი ცხოველო, შენს სანახავად მოველო“...

გათავდა ლიტანია. შედგნენ მეფე-დიდებულნი, სამღვდელონი და მლოცველი ხალხი. ყველანი მოწიწებით შესცქერიან თეთრად მოსილ მოცეკვავე ქალწულს. ის გატაცებით როკავს, რადგან „მონაა წმ. გიორგისა და ხატი აცეკვებს“.

ამის შემდეგ ხალხის შუაგულიდან გამოვარდება ვაჟი აბურძგნული თმით და არეული ბრიალა თვალებით. დაეცემა წმ. გიორგის უზარმაზარი ხატის წინ. ის ხელთ უპყრიათ ზორბა ბერებს. ვაჟი დაიკრუნჩხება უცნაურად, გადმოსდის პირიდან ღუფი ავზნიანივით, შემდეგ წამოიჩოქებს და იწყებს არეულ ბოდვა-ქადაგს.

შიშითა და მოწიწებით შესცქერის ამ „წმინდანის მოციქულს“ ერთ ალაგას გაკმენდილ-გაქვავებული დაჩოქილი ხალხი, გულდასმით ისმენს მის თითოეულ სიტყვას. ხალხს სჯერა, რომ ამ შეშლილის პირით ქადაგებს თვით წმ. გიორგი და წინასწარ აუწყებს, თუ რა მოელის ქვეყანას.

ქადაგმა არეული სიტყვა-აზრებით ამცნო ხალხს, რომ მომავალ წელს იქნება პურ-ღვინის დიდი მოსავალი, ცხვარისა და ძროხის სიმრავლე, მტერზე გამარჯვება; ხოლო ხალხის დაავადება სახადით. ქადაგის პირით წმ. გიორგი თხოულობდა უხვ შესაწირავებს ტარიგისა და განძის საბით. მორწმუნე ხალხიც, მიწაზე დამხობილი, მხურვალე ლოცვით მადლს სწირავდა „მფარველ“ წმ. გიორგის და აღუთქვამდა დიდ შესაწირავს.

გაისმა ზარების სამხიარულო რეკა. ხალხმა და დიდებულებმა გაიღეს უხვი შესაწირავი. აივსო ალავერდის სალაროს კარადა-კიდობნები შეწირული ოქრო-ვერცხლით, ჭვალ-მარგალიტით, ოქრომკედით, აბრეშუმის ქსოვილებით. იქვე გალავნის გადაღმით ასობით დაიკლა საღვთო ტარიგი: თოხლ-ქედილები და ერკემალ-დეკეულები. ზვარაკთა საუკეთესო ნაწილები, თანაც უამრავი ყველი, ერბო. პური, ხაბიზგინები, ღვინო, ლუდი, არაყი, ნარმა და შალის

საჩოხეები უხვად გადადიოდა გაუმაძღარი მღვდელ-ღიაკ-
ნებისა და ბერ-მონაზვნების ხელში, რის ნაცვლად ხალხს
ურიგდებოდა თითბრისა და ვერცხლის „ნაყურთხი“ პაწია
ჯვრები, ზოგსაც კიღევ ავგაროზები და „ნაწილებიანი“
პაწაწა ხატები.

უკვე მაღალი ვახშობაა. ალვანის გრძელ მინდორს ზე-
მოდან დაქნათის კაშკაშა მთვარე. კარვებ-ურმებთან აქა-იქ
პრიალებს ცეცხლი, დის შემწვარ-მოხარშულის საამო სუ-
ნი. მეფე-დიდებულთა კარვების წინ გაშლილი სუფრებიდან
ისმის სიმღერა-ბაიათები, ჩანგისა, თარისა და დუდუკის
ნაზ-მკვნესარე ხმებით შეზავებული. ბლომად გაშლილა
ურმებთან ლურჯი სუფრები, გაჩაღებულა ღრეობა და
ქეიფი.

ღამისთევია, ნაცნობ-ნათესავთა შეხვედრა, მასლათი და
სიხარული.

ღრეობენ, მზიარულობენ მთისა და ბარის მეზობელი
ხალხები, დღეს ჩამოსულნი ცოლ-შვილიანად და ძმად შეყ-
რილნი ალვანის მინდვრად.

მეორე დღეს ხატობამ უფრო საზეიმო სახე მიიღო. წირ-
ვის შემდეგ ვრცელ მინდორზე გაიმართა სხვადასხვა შე-
ჯიბრება: ბურთი, დავლური, ფარეკაობა, ჯირითი, ყაბახი,
მარულა და ჭიდაობა. შემდეგ გაიშალა სუფრები და დაიწ-
ყო ისევ გაუთავებელი ღვინო, ქეიფი, სიმღერა, ზმა-შაირე-
ბი და ცეკვა-შეშპარი.

ამავე დროს ვაჭარ-ხელოსანთა უბანში იყო გახურებული
ვაჭრობა და საქონლის გაცელა. შორეულ კუთხეთაგან მო-
სულნი ეშურებოდნენ დაეცალათ ხელი, შეეძინათ რაც
სურდათ და გასდგომოდნენ გზას შინისაკენ. ამ დღესვე
იყო გასათხოვარ ქალთა და საცოლო ვაჟთა სინჯვა, შუა-
მავლობა და შარნის მიცემა. თვით დღეობა, ვაჭრობა და
ხალხის ღრეობა გაგრძელდა კვლავ რამდენიმე დღეს, რასაც
ხელს უწყობდა საუცხოო ამინდები...

მესამე დღეს გრემის სასახლის ერთ მომცრო დარბაზში
დილაადრიან ჩაკეტილიყვნენ მეფე ალექსანდრე, მისი ვა-
ჟი გიორგი და ქართლის მეფე გიორგი თავის ერთგული

ვეზირებით, გაემართათ საიდუმლო თათბირი და დაესკვნათ მიმართონ მოსკოვის ხელმწიფეს, აუწყონ შაჰ-აბაზის ოინე-ბი, სთხოვონ მფარველობა და ჯარებით დახმარება.

იმ დღესვე ალექსანდრესა და გიორგის საიმედო ელჩები თიანეთის გზითა და დარიალის ხეობით მიეშურებოდნენ მოსკოვისაკენ დიდი არმადანით დატვირთულნი და დარაია-ში ხვეული მეფეთა პატრუცაგით, რასაც უფროსი მათგანი სათუთად ინახავდა უბის ჯიბეში რუსეთის მეფისადმი მი-სართმევად. ხოლო, რასაც ასე სასტიკად უმაღავდნენ ში-ნაურთ, არ დარჩა ფარული შაჰაბაზის ჯაშუშებს. იმავ საღამოს კახეთის მეფის მასხარა ჯეჯა გურგენა ზაუტა-შვილი ჩუმად გარბოდა თელავისაკენ, რათა თავის ძმის მეოხებით ემცნო განჯაში მყოფ შაჰაბაზის სარდლისათვის, რა „საამო ნობათს“ უმზადებდნენ ყუენს ქართლ-კახეთის მე-ფენი მოსკოვთან მიმოწერით და რუსის ჯარების მოწვევით ივერიაში.

II. კავკასიონის მთებში

ლალი და წარმტაცია ცად ატყორცნილი კავკასიონი, მარადიული თოვლით რომ დაფარულა. მშვენიერია იგი დილით ან საღამო ეამს, დიდი მნათობი სპეტაკს ლაწევებს რომ უღაპლაპებხ; მაღალ მწვერვალთა შორის ობლად ამართულა მხარბეჭიანი მყინვარი. ამაყად დაჰყურებს იგი დარიალის ბნელ პიტალოებს, დაჰყურებს გიჟივით მყვირალ ქაფმორეულ თერგს, კლდეებს რომ ებრძვის, დაჰყურებს ბროლის ჩანჩქერებს, იქ შავს უფსკრულში რომ იმსხვრევიან, დაჰყურებს მარად მღიშარე. ხავერდოვანს ველს.

მშვენიერია ზაფხულობით კავკასიონი! თოვლით ფარული მისი მწვერვალნი, მისი კლდეები, — ჯიხვთა სავანე, არჩეთა, ნიამორთ და არწივების. მისი კალთები მრავალჯიშოან ტყით არის დაბურული. დღითა და ღამით საშიშარია დარიალის ბნელი ხეობა შავი ლოდებით, ციცაბო კლდეებით. ისმის იქიდან შეშლილი თერგის ღრიალი... საოცნებოა არაგვის ველი, მწვანე, ხასხასა და გადაშლილი ფრიალოები.

ზაფხულის მიწურულია. კრიალა ცა, გრილი, მსუბუქი ჰაერი. ვრცელი ფრიალო გოროზად დასცქერის ანანურს, ნუგზარ ერისთავის ციხე-სასახლეს. ყვავილებით აფერადებულ მწვანე ბალახზე თეთრად გაშლილა უამრავი თუშყარი ცხვარი და ხარბად ძოვს ნოყიერ ბალახს. აგერ ცელქად დანაეარდობენ მსუქანი ბუწი, აზმანი და შაშაგი;

ხარბად დასწაფებიან ნოყიერ ბალახს ნერბი, ჭედილა და ერკემალი. მათ შორის დაძრწის მოუსვენრად ქარაბიჭა.

ჭაბუკი მწყემსნი შექუჩულან წყაროსთნ კუნელის ქვეშ, ერთობიან შაირ-ზღაპრებით და მასლაათით. ერთი მათგანი წევს ოდნავ მოშორებით და სიყვარულის ჰანგებით აკენესებს ლერწმის პაწია სალამურს. ეს ტკბილ-მწყვევ ხმები ექსოვება გადახრილი მზის ხასხასა სხივებს და ეფინება შორეულ მთებს.

ამ მხიარული ჯგუფიდან საკმაოდ მოშორებით მაღალ ბალახში ჩაწოლილა თვრამეტი წლის მწყემსი ქალი და მისცემია უცნაურ ფიქრებს. ქალის მარჯვენა ხელი უნებლიედ ეალერსება იქვე მწოლარეს ლუშ ნაგაზ მურას. ის გუშაგობს ცხვარს ბრიალა თვალებით. მწყემსი ქალის გონება ამ დროს განშორებია საყვარელს მთებსა და გარს ევლება მთელ საქართველოს. ფრიად აწუხებს მას ირანელთურქთა თარეშით ილაჯმობილი, რვად დაფლეთილი კოლხეთ-ივერი, ერთ დროს მთლიანი, მძლავრი, დიადი და შემოსეულ მტერთა თავზარდამცემი. ქალს თვალწინ ეხატება მუდმივი ბრძოლა სვიმონ მეფის დროს, ხალხის გადატაკება და ბოლოს ქართლის დიდებულთა ურთიერთშორის შფოთი, კინკლავი. განდიდების ან შურისძიების მიზნით ზოგი მათგანი ეპოტინება თურქეთის სულთანს, ზოგიც კიდევ ირანის შაჰს. ამ დიდ თავადებს თამაშად უჩანთ მშრომელი ხალხის კენესა-ვარამი. სისხლით დაწრეტილ ქვეყანას ნუგეშად მოვლენია დიდი მოურავი გიორგი სააკაძე. ხალხის წიალიდან გამოსული, ხალხისთვის თავდადებული ოცდასამი წლის მთავარსარდალი.

უეცრივ წამოვარდა მურა, დაჰყეფა ბოხი ხმით და სწრაფად დაეშვა ბილიკისაკენ, სადაც ამოდიოდა იარაღასხმული მაღალი უცხო ჭაბუკი და მოჰყავდა შეკაზმული ცხენი. მიუახლოვდა თუ არა ძაღლი, ალერსიანად დაუწყო ლოკვა მგზავრის ხელებს. ქალმაც მალე მიაშურა მას, რაკი იცნო ახლად მოსულში თავისი უფროსი ძმა, მამაცობით განთქმული ლომი ჩრდილელი, დიდ მოურავის ძმად შეფიცული, მესაიდუმლე და მარად თანმხლები.

ერთმანეთის ნახვით უზომოდ გახარებული დაძმა გრძნობით ჩაეკერნენ გულში ერთიმეორეს.

— ხომ კაი ამბავი მოგდის? საიდან მოხვედ ამყამად? — შესძახა ქალმა ალტაცებით.

— ჩემო მშვენიერო ცაროვ! განა შენ მარტო აძოვებ აქ ცხორსა?! სად არის ბაბაი, ქალაუ?

— ბაბაი ავადაა ცხროთი და წივეს ლოგინად. დედა უვლის. აქიმი მგელუკაი ამბობს, მალე მორჩებისო. უმცროსი ძმა ვაჟა ძაუგს გაგზავნეს რალაც საქმეზე; ვფიქრობ, ხვალ დაბრუნდეს. მეღაი დავრჩი ცხორის სამწყესად.

ამ სიტყვებით ქალი გაუძღვა ძმას იქვე თავის ბინისაკენ, მოურბენინა წყაროდან ხელადით ცივი წყალი, გაუშალა სუფრა, დაალაგა პური, ყველი, მაწონი, ცივი ხინკალი, აგრეთვე მიაწოდა რახი, რასაც სიამოვნებით დაეწათა მთიელი. შენაყრდნენ ორივენი.

ლომიმ უამბო დას, რომ დიდი მოურავის დავალებით ის ამოვიდა მთაში ჯარების შესაკრებად, რადგან ელოდებიან ამავე წელს თურქთა ლაშქრის შემოსევას ახალციხიდან და ქართლის აოხრებას. ამიტომ სოფ. ლამისყანასთან და ტირიფონას ველზე მოურავი წვრთნის გლენობას საომრად, ამავე დროს ითხოვს დახმარებას თუშ-ფშავ-ხევსურ-პოხევეთაგან. „ხვალ დილითვე უნდა შეეუდგე საქმეს და, ვფიქრობ, ხუთი-ექვსი დღე მაინც მომიხდება მთაში დარჩენა, — დაუმატა ლომიმ.

ცაროს სიხარულს არ ჰქონდა საზღვარი. წასვლამდე ხშირად ნახავდა ძმას და ექნებოდა საბაბი ესაუბრა ომებსა და ზიდ მოურავზე. ის ამ ქალის თვალში გამხდარიყო უძლეე ზღაპრულ გმირად.

მცირე შესვენების შემდეგ ლომი მივიდა ახალგაზრდა მწყემსებთან, მიესალმა მეგობრულად, უამბო სხვადასხვა ამბავი და მოსალოდნელი ომი თურქებთან.

ამასობაში დაღამდა კიდევ. ცარომ მიაქუჩა ცხვარი, შელალა ფარეხში და გუშავად მიუყენა ფხიზელი მურა, თვითონ კი მიწვა ბულულზე იქვე დადგმულ ჭამბარაში, — უცდიდა ძმას. ქალი კვლავ გაიტაცა ფიქრებმა სამშობლოს

შესახებ. მას უკვე დაებადა აზრი ჩაეცვა ვაჟურად და ხლებოდა დიდ მოურავს. მაგრამ რარიგ შეესრულებინა ეს? ცხვარს ზვალ-ზეგ დაუბრუნდებოდა უმცროსი ძმა ვაჟა; მამაც მალე მორჩებოდა. მაშ ცაროს შეეძლო წასულიყო ჯარში. მაგრამ მოუწონებდა კი ამ გაბედულ აზრს „ბაბაი“ ან უფროსი ძმა?

— თუმცა ქალი ვარ, საუბედუროდ, მარა განა ქალებიც არ იბრძვიან გაჭირვების ჟამს?! განა ცოტაა ამის მაგალითი ბარად და მთაში?! ქისტ-ლევნი რომ დაგვესხმიან ხოლმე, განა ქალები ვაჟებზე ნაკლებ ვიბრძვით?! განა ცოტა საგმირო საქმენი ჩაიდინეს ქალებმა ძველად და ახლა?! განა ცოტალა ლექსია მათზე თქმული?! მაშ მე რადიი დავაშავე?! ვაჟებზე ნაკლები არ მაქვს შალ-ლონე, მათზე ცუდად არ ვისვრი თოფსა ნიშანში, არ ვიქნევ ხმალსა დეკალდისა. მაშ როდისღა გამომადგების ყველა ესენი, თუ არა ეხლა, როს ოსმალეთ ლაშქარი ემუქრის ივერს, დიდი მოურავიც აგროვებს ჯარებს! მაშ ახლა ღროა და მეც უნდა შევეუდგე საქმეს!

ასეთ ფიქრებში გართულ ქალს მიეძინა კიდევც. მისი ოცნება შეცვალა საამო სიზმრებმა ომის შესახებ. ცარომ ვერ გაიგო, როგორ შემოვიდა მისი ძმა, როგორ წაახურა საბანი, თვითონ კი მიწვა იქვე ბულულზე გაუხდელი, გვერდით მიიღო ყირიმული თოფი და წაიხურა ნაბადი, რადგან ღამით საკმაოდ ციოდა იმ სიმაღლეზე.

მეორე დილით აღრე ამოვიდა ვაჟა და მოიტანა მამის უკეთ ყოფნის ამბავი, რამაც მეტად გაახარა და-ძმა. ამით ჩააბარეს ვაჟას ცხვარი, თვითონ კი მგლური ნაბიჯით გასწიეს შინისაკენ.

მართლაც, ხუთ-ექვს დღეში ლომიმ სანაქებოდ შეასრულა თავის დავალებანი, დაემშვიდობა შინაურთ და გაუდგა გზას. ათიოდე ეჯის დაშორებით მას შეეფეთა ჯუზბა-ჯავშანში მჯდარი, იარაღასხმული, შავჩაბალახწაკრული ვილაც პირტიტველა ლამაზი ვაჟი შევარდნის თვალეებით. ჟარ-შუბით ხელში და გადაულობა გზა ამ სიტყვებით:

— შესდეგ, რაინდო! ჩამოხვედ ცხენით!

— ვინ ხარ, თავხედო, სამტროდ მემუქრი?! განა ვერა ჰკნობ ლომი ჩრდილელსა?! — შესძახა ლომიმ მჭექარე ხმით და ცხენიდან გადმოხტა, ფარშუბი იძრო.

— გიცნობ უბადლო ვაჟაკი ხარ. ამიტომაც გიწვევ დავ-
ლურში. მსურს შენზე ვცადო ჩემი ჯალ-ლონე. დახვდი მა-
ჰაცად შენს სამტროდ მოსულ მურთაზ ფალავანს, ქისტეთ-
ში განთქმულს.

ამ სიტყვებით აღმართა შუბი და ისე სწრაფად აძგერა იგი, რომ ლომიმ ძლივს მოასწრო ფარის შეგებება. მთი-
ელმა იგრძნო: მურთაზ ფალავანი ძლიერი მეტოქეა. ის შე-
უდგა ფრთხილ თავგამოდებულ ბრძოლას. ლომიმ მოუქნია
მურთაზს თავისი მაგარი შუბი. ჩეჩენმა აიცილინა იგი საარა-
კო სისწრაფით; ასევე აიცილინა მეორედ და მესამედ ნაძგე-
რი, რამაც ფრიად გააბრაზა ჩრდილელი. მათ შეექნათ ფიც-
ჯული ბრძოლა. შემდეგ ორთავემ გადისროლეს შუბნი და
შეუტიეს ერთმანეთს ხმლებით. მაგრამ ხმლით დავლურმა
ვერ მიაღწია მიზანს. თუმცა ღონით სჯობდა ლომი ჩრდი-
ლელი, სიმარლით ბევრად სპარბობდა მურთაზ ფალავანი.
ამრიგად ისინი აღმოჩნდნენ თანატოლნი. დიდხანს ირკინეს.
ორთავეს ღვარად სდიოდა ოფლი. გაცხარდა ლომი, გამე-
ტებით მოუქნია ხმალი მეტოქეს. მურთაზმა ელვის სისწრა-
ფით მიაგება მაგარი ფარი, ხოლო ვერ გაუძლო მძლავრად
მოქნეულ ხმალს მეტოქის მკლავმა და მძიმე ფარი მაგრად
მოხვდა თავს, გულწასული კაბუკი მკვდარივით დაეცა. მას
მიეფუშა თავს წაკრული ჩაბალანი და შავი, ქუჩუჩა კუ-
ლულნი მოეფრქვა მშვენიერ სახეს. ლომი დააცქერდა მას
და... მრისხანე მურთაზ ფალავანში იცნო თავის და ცარო.
ჩრდილელის გაოცებას არ ჰქონდა საზღვარი... ქალი ეგდო
მიწაზე გულწასული. ლომი გაიქცა, მონახა წყარო, მოარ-
ბენინა მათარით წყალი, ასხურა ქალს და მოიყვანა გონს.
წამოჯდა ცარო ფერწასული, შეასწრო თვალი ძმას და
ღარცხენით ჩაღუნა თავი. ლომი მიუჯდა გვერდით, მოხვია
ხელი და მიიხუტა გულზე. ერთხანს ასე იყვნენ უსიტყვოდ.
შემდეგ ლომიმ მიმართა საყვედურით, ამხილა, რომ ეგეთი
შეუსაბამო ხუმრობა შესაძლოა ცუდად დამთავრებულყო.

ქალი მოეხვია ძმას, დაუწყო ალერსი და სთხოვა პატივ-
ბა. შემდეგ გადუშალა გული და აუწყა თავისი ფარული
ზრახვანი. უთხრა, რომ მისი უდიდესი სურვილია ეახლოს
ვაუად ჩაცმული გიორგი სააკაძეს, რათა მას ერთგულ სამსა-
ხურსა და სამშობლოს მტრებთან ბრძოლაში დალიოს სული.
ის გრძნობს ამისად საკმაო ძალას. თავის გამოსაცდელად და-
ხვდა კიდევ საყვარელ ძმას, მთაში უპირველეს ვაჟაკს, ჩუ-
ბინს და მურთაზ ფალაგანის სახით შემართა საომრად.

— ეს სამოსიცა და საჭურველიც მამასია. ესენი გავიტა-
ცი შინიდან და შევიმოსე ტყეში; შემდეგ გამოგიდექ, მთის
ბილიკებით გადაგიჭერ გზა— დასძინა ცარომ, — ჩემი გუ-
ლითადი თხოვნაა წამიყვანო დიდ მოურავთან, გამხადო მი-
სი განუყრელი მხლებელი.

ლომი ღრმად ჩააფიქრა ამ სიტყვებმა. მასზე იმოქმედა
დის მუდარამ, მეტადრე ქალის იშვიათმა სიმამაცემ ბრძო-
ლის დროს.

— მე როგორღაი გაგაცნო მოურავსა! ვინ არისო, რომ
მკითხავს, რაილა ვამცნო?!

— აუწყე, რომ ვარ შენი ბიძაშვილი გელა ჩრდილელ
და მწადია მასთან სამსახური.

— მერე, ეგ ხომ ტყუილია, ქალაუ! აბა მთიელი როგორ
იტყუებს! რაებსა რომაე!

— ეგ იქნება შენი პირველი და უკანასკნელი ტყუილი.
ამით მიხსნი უდროოდ დაღუპვისაგან. და თუ არ შეისმენ
ამ ჩემს მუდარას, გიფიცავ, ეხლავ ე იმ არაგვში გადავეშ-
ვები და თავს დავიჩიობ, შინ კი არ მივალ გაწბილებული...

ცაროს ასეთმა სიმტკიცემ ღრმად ჩააფიქრა მთიელი. დი-
დი ყოყმანის შემდეგ დათანხმდა, რამაც უზომოდ გაახარა
ქალი. აღტაცებული ცარო მიუარდა ძმას, დაუწყო კოცნა
სახესა და ხელზე.

ლომიმ ჩაიკრა გულში ეს უცნაური ქალი, აკოცა შუბლ-
ზე და დაულოცა სავალი გზა ახალ მძიმე სარბიელზე.

შემდეგ ლომიმ შეისვა ცარო ცხენზე და მზის ჩასვლამ-
დე მიუახლოვდნენ ანანურს. იქ იშოვეს ცხენი. მეორე დღეს
ეახლნენ დიდ მოურავს სოფ. ლამისყანაში.

III. პრის მოთავე

მცხეთიდან დაწყებული დაბა ცხინვალამდე მდ. ქსანით, მეჯუღით და ორივე ლიხვით დასერილა ქართლის შუაგული. ეს უზარმაზარი სივრცე, აღრევე მკვიდროდ დასახლებული, სვიმონ მეფის დროს თურქთა მრავალი შემოსევის გამო, უკვე მეჩვიდმეტე საუკუნის დასაწყისს წარმოადგენდა გაპარტახებულ მხარეს. ამ ნაყოფიერი ვაკე ადგილებიდან აყრილი ქართველი გლეხოზა შეჰხიზნოდა მთებს, ვიწრო ხეებს და იყო დიდ ვასაჰირში. ბევრი მათგანი გაეჟლიტათ ხანგრძლივ ომებში. ბევრიც კიდევ, უმთავრესად ლამაზი ქალ-ვაენი, წარეტაცათ ტყვეებად. ქალებს ყიდდენ მეტწილად პარამხანებში, ხოლო ტყვედ წაყვანილ ვაეებს ძალით აღებიანდენ მაჰმადის სჯულს, მათგან ქმნიდენ შესანიშნავ სამხედრო რაზმებს, შაჰსევეანებსა და იანიჩარებს, რომლებიც წარმოადგენდნენ სულთანის და შაჰის სანაქებო გვარდიას.

მიიღო თუ არა თბილის-ცხინვალის მოურაობა, რცდასამი წლის ჭაბუკი მთავარსარდალი გიორგი სააკაძე მაშინვე შეუდგა შემოსეული მტრების ალაგმვას, შეხიზნული ხალხის გადმოყვანას მთა-ხევეებიდან და ისევ ძველ ბინებზე დასახლებას. ამ მძიმე საქმის შესრულების მიზნით მოურავი ხელს უწყობდა გლეხებს სურსათ-საკვებით, სამოსით, ცხვარით, ხარ-კამეჩით, ხე-ტყით და მცოდნე ხელმძღვანელობით, ხშირად თვითონ მეთაურობდა ამ გადმოსახლებას, არ-

ჩვედა ხალხისათვის შესაფერ მიწა-წყალს და ამხნევებდა მათ.

მართლაც მალე გაჩაღდა მშენებლობა ამ ვრცელ არეზე, განადგურებული დაბა-სოფლების აღდგენა და დაყრუებუ-ლი ნარწყავ არხების განახლება. დიდი მოურავის ასეთი თავდადებით და უძლევი ხმლით გამხნევებული ხალხი ალ-ტაცებით დაუბრუნდა ძველ მამა-პაპურ მიწა-მამულს, მედგ-რად შეუდგა შენებას და ახალი ცხოვრების მოწყობას. ამ უზარმაზარ სივრცეზე ყველგან სრულდებოდა სააკაძის განკარგულება, ყველას ხედავდა მისი მახვილი თვალი. ყველგან ჩანდა შავ რაშზე მიმომფრინავი მთავარსარდალი. ყველას ამხნევებდა მისი ხმა, სიტყვა, მეგობრული კილო და მეტად საამო გმირული სახე.

დილის რიჟრაჟზე ოთხი ვაჟკაცი შეკაზმული ბედაურე-ბით ელოდა ბელადს სოფ. კავთისხევთან, შარაგზის პირას. ესენი იყვნენ დიდი მოურავის ძმადფიცულნი და თანაბრ-ძოლნი გლეხის შვილები: პაპუნა ჩივაძე, პაპუნა ვაშაყაშ-ვილი, თამაზ ქარსიძე და გიორგი ქავთარაძე. ესენი ისხ-დნენ ხის ქვეშ დიდრონ ქვებზე.

— ნეტა რად იგვიანებს ჩვენი გიორგი? რას იტყვი, პა-პუნა? — შეეკითხა თამაზ ჩივაძეს.

— განა რად არის გვიან! ცხრა ეჯის გამოვლა ნოსტედან არც ისე ადვილი საქმეა, ჩემო თამაზ... ზომ ხედავ, დღე და ღამ მოსვენება არა აქვს! სულ ხალხზე ზრუნავს, სულ საწყალი გლეხობა აკერია პირზე, მარად ჟამს იმის საცა-დშია, როგორ დააბინაოს ბარად ეს მთებში შეხიზნულნი და იქიდან ჩამოყვანილი ხალხი, როგორ შეუწყოს ხელი, როგორ დაიცვას შინა და გარე მტრებიდან. აი რას ნიშნავს გლეხის წრიდან გამოსული ადამიანი.

— მართლაც, რომ საარაკო კაცია. ეგ რომ არ გასჩენოდა ნუგეშად ჩვენს გლეხობას, რაილა ეშველებოდათ უბე-დურთ! ზომ სულ ერთიან დაიღუპებოდნენ ამ კლდე-ღრე-ებში ზეტიალით! — ჩამოართვა სიტყვა ვაშაყაშვილმა.

— ახლა ეს დიდი თავადებიც რომ გადიმტერა ამ გლეხ-თა ქომაგობით! საბატონო გლეხები, კარგახანს მთებში შე-

ფარებულნი, ჩამოიყვანა ბარად, დაასახლა ისევ ძველ მიწა-მამულზე და სახაზინო გლეხებად შერაცხა; ბევრი მათგანი კიდევ აზატად აქცია; ამ სახით დიდ ბატონებს გამოაცალა ხელიდან მეწველი ფურნი. ერთი დაკვრით ააფცქვნა ყმა-და მამულიც. ეჭვს გარეშეა, ამით ხელი შეუწყო სამეფო საქმეს, ხოლო დაუძინარ მტრებად გაიხადა დიდი თავ-დანი: ქაიხოსრო ჯავახიშვილი, ფარსადან ციციშვილი. თეიმურაზ მუხრან-ბატონი, ანდუყაფარ ამილახვარი, ზაალ მაჩაბელი, იასე ქსნის ერისთავი და მრავალი სხვანი, — დასძინა გიორგი ქავთარაძემ.

— იქ, სასახლეში, ლუარსაბ მეფის ლალას, შადიმან ბართაშვილს, სისხლი სწყურია დიდი მოურავის. განა ვაჟკაცობის აუგს კაცი დაივიწყებს! მაგან ზომ საცინრად აიგდო მისი ხმალი და ვაჟკაცობა ერევენის ომში! მეტად გათამამდა და ვშიშობ, ფეხი არ წაიმტვრიოს, თუმცა ფრიად ჭკვიანი და უნარიანი კაცია, — დაამთავრა ჩივაძემ.

— ალბათ, თავის იმედი აქვს და მეფენიც დიდად სწყალობენ. ზომ იცით, ვაჟებო, ჩვენმა გიორგიმ თავი ისახელა პირველად დიდი სვიმონ მეფის დროს. მაშინ ძლივს იქნებოდა თექვსმეტი წლისა. სწორედ ამ უბრალო გლეხის შვილს, ველისციხელ შიომ სააკაძის საშუალო ვაჟსა, სვიმონ მეფემ მიუბოძა აზნაურობა, ყმა და მამული, ხოლო გიორგი მეფემ ისე შეიყვარა ეს ჩვენი ძმადფიცული, მეტადრე ერევენის ომის შემდეგ, რომ მიუბოძა თავადობა და მთელი ჯარების უფროსობა. ამრიგად წამოასკუბა თავზე ქართლის დიდ თავადებს და განა ასეთ დამცირებას დაივიწყებენ ისინი?! ესეც არ აკმარა მეფემ: მან ჩვენს გიორგის მისცა მთელი ქართლის მოურაობა. ხალხმაც სამართლიანად შეაფასა ეს იშვიათი სიმამაცისა და ნიჭის ქაბუკი და უწოდა დიდი მოურავი...

— კარგად ამბობ, ჩემო თამაზ, სწორედ ეგრეა, — მოუწონა ქავთარაძემ, — ხოლო ასეთმა განდიდებამ სრულიადაც არ გააზვიადა იგი თავის მდაბიო მოძმეთა მიმართ. პირიქით, რამდენადაც ამაყია ის დიდ თავადებთან, იმდენად თავდაბალია გლეხებთან. ეს ყველამ კარგად უწყით.

ამ საუბრის დროს მათთან ელვის სისწრაფით მიიქრა შავ რაშზე მჯდომი ბეგთარმოსილი, იარაღჭურვილი რაინდი.

— ძმებს გაუმარჯოს, — მისვლის უმაღლეს შესძახა ვაჟებს და სწრაფად გადმოხტა ცხენიდან.

— ღმერთმა გამარჯვება ნუ მოაქვს ჩვენს დიდებულ ძმასა და ერის მოთავეს! — იყო პასუხი.

— გაცდევინეთ, ძმანო! შემაგვიანდა საქმეთა გამო. მაშ ასე: თქვენ ორნივე პაპუნა წადით ტირიფონაზე, დააჩქარეთ რუის გაყვანა დიღლიახვიდან. აუწყეთ ქუქანქო, რომ ამ მომავალ გაზაფხულისათვის მზად უნდა იყოს. ხომ იცით, თუ ის დიდი ველი არ მოიჩწყა მთლიანად, ნაყოფს არ გამოიღებს და ხალხი შიმშილით ამოწყდება. ფუჭად ჩაგვივლის ესოდენი საცადი. ახლად დასახლებული სოფლები კვლავ გატიალდება. ხალხი ხომ გამოდის სამუშაო ბეგარაზე?

— ჰაი, ჰაი, რომ გამოდის დიდი ხალხით; შენი სახელის ხსენება საკმარისია. ხალხი აღმერთებს თავის მოთავეს, დიდსა მოურავს, მხოლოდ...

— რა მხოლოდ, ჩემო პაპუნა?

— უნდა გამოგიტყდე, ულუფამ იკლო. შესამჩნევად შემცირდა პურის მარაგი, მოზღვავებულ ხალხს სამუშაოზე სჭირდება საზრდო. ველით შენს ახალ განკარგულებას.

— ამცნეთ გორში ჩემს მაგიერ სურსათის გამგეს გენო ლომაურს შარშანდელი მარაგიდან მოგცეთ საქირო პური. რამდენი კოდი გეყოფათ?

— ყინვების დაწყებამდე, ვფიქრობ საკმაო იქნება სამი ათასი კოდი.

— ეგრე აუწყეთ. რაზემელთა საქმე როგორ მიდის?

— სანაქებოთ. ხუთასამდე სულ რჩეული ბიჭებია, კარგად გაწვრთნილი სამხედრო საქმეში. ჩუმად დაზვერვა; უეცრად თავდასხმა, იერიშები, შუბ-კალდომის სწრაფად ხმარება, ხმლის ქნევა, თოფის ნიშანში სროლა და უცებ გატანა, — ასეთებში ბადალი არ ჰყავთ.

— კეთილი, ძმანო! ამ ორ დღეში ამოვალ მანდეთ და გამოვცდი ბიჭებს. თქვენ კი, თამაზ და გიორგი, გასწიეთ

ლამისყანაში, ავარჯიშეთ ბიჭები. ორ უამს შემდეგ მეც იმ ამოვალ, ხალხს უთხარით ახლავე შეუდგნენ ხენათესვას-ანეულები არ დარჩეთ დაუხნავი. მეც აქ კავთისხევს მივხედავ და გამოვწევ თქვენკენ, — ამ სიტყვებით გაშოესალმა თავის ძმადდაფიცულთ და გააქროლა მერანი კავთისხევისაკენ.

სწორედ იმავე დღით სხვილოს სასახლეში ანდუყაფარ ამილახორთან შეკრებილიყვნენ სააკაძის მტერი დიდი შემამულე თავადნი: ქაიხოსრო ჯავახიშვილი, ფარსადან ციციშვილი და ზაალ მაჩაბელი. ტახტზე ისხდნენ ფეხმოკეცით და ცხარე კამათი ჰქონდათ. ისინი არ აქცევდნენ ყურადღებას არც თვალწინ გადაშლილ მშვენიერ ბუნებას, არც გაშლილ სუფრას, რაზედაც ეღაგა ვერცხლის სურებით ატენის განთქმული ღვინო და ნაირ-ნაირი საქმელები.

— ხომ ხედავთ, ბატონებო, როგორ დაგვამცირეს და რა დღეში ჩაგვყარეს ჩვენმა საკუთარმა მეფეებმა, ჯერ გიორგიმ და ახლა ლუარსაბმა! — დაიწყო დინჯად გრძელ ხალათში გახვეულმა მასპინძელმა მან გააბოლა ნარგილე და გადაწედა სტუმრებს. — ყეინის მზემან, ბაგრატიონის გვარი ღირსი აღარაა ივერიის მეფობისა, ისე დაეცა და დაჩიოტდა, მეტადრე. გიორგი მეათის შემდეგ. ყველანი ამას სჩივიან, რომ ვილაც უაზნო, ვილაც მდაბიო, გლეხის ნაშიერი, ჯავახიანთ ყმა, ვილაც სააკაძე დაგვისვეს თავზედაო, მისცეს ჯერ აზნაურობა, შემდეგ თავადობა, მთელი ჯარების მთავარსარდლობა და ახლა კიდევ თბილის-ცხინვალის, ანუ უკეთ მთელი ქართლის გამგეობა და მოურაობა... ნეტა რას ნიშნავს ესა! ნუთუ ჩვენ, დიდ თავადებს შორის, ვერ მოინახა შესაფერი კაცი?! ამიტომაც, ბატონებო, ბევრად სჯობია ვაქციოთ ზურგი ასეთ მეფეებს და ვეყმოთ ჩვენს მწყალობელს ირანის შაჰ-აბაზს დიდსა, მხოლოდ მას შეუძლია დააფასოს ჩვენისთანა კაცები, — გაუტარა მეფეზე გულწაყენ თავადებს ასეთი სიტყვა, და უგო მახე მაჰმადის სჯულმძღვანელმა და შაჰის მოკეთებ ცბიერმა ანდუყაფარმა.

— მართალი ბრძანებაა, ბატონო ანდრეაფა, — ჩამოართვა სიტყვა ფარსადან ციციშვილმა. — აღარ გვწყალობენ ჩვენი მეფენი ამ ბოლო ხანებში. მაგათ ჩვენი შერცხვენა და დამცირება სწადიათ. ჩვენს წინაშე განადიდეს ვიღაც გლეხის ნაშიერი, ჩვენი ბატონი და ბრძანებელი გახადეს თავად ჯავახიშვილის ყოფილი ყმა. ხომ ასეა, ბატონო ქაიხოსრო?

— სრული სიმართლეა, ბატონო ფარსადან, სრული სიმართლე, — დაუკრა კვერი ჯავახიშვილმა, — გიორგი სააკაძის მამა შიოში ჩემი გლეხი გახლდათ. ჩინებული გუთნისდებდა იყო და თანაც კარგი ბაზიერი. ახლა თავსაც აღარ მიკრავს, ისე გათავებდდა. პირიქით, მამულებს მედავება კიდევ... ვაჰ, წამხდარო დროვ! — დაამთავრა სიტყვა მწარე ამოხვნეშით.

— ეს ჩვენი შადიმან რადა სდუმს ასე! რად არ მოქმედობს თავის გაზრდილ მეფე ლუარსაბზე, ამ ჩვიდმეტი წლის ძუძუმწოვარზე?! განა ასე მალე დაავიწყდა მოურავის სიტყვები, ერევნის ომში საჯაროდ ნათქვამი, პირში რომ მიახალა: შენს ხმალს ბატონო შადიმან, არა აქვს მკვეთრობაო. იმაზე უფრო გაქირდვა განა შეიძლება?! ეს ხომ თავის მოჭრას ვაუკაცისათვის! — წამოიძახა მაჩაბელმა.

— ეჰ, ჩემო ზაალ! შადიმან ბართაშვილი კარგი მელაა და გესლიანი მორიელი. ის არ შეარჩენს გიორგი სააკაძის ასეთ გაქირდვას. მისთანა დროს უკბენს და დაგესლავს, რომ არ მოელოდეს. შადიმან დიდი ოსტატი კაცია; მან იცის, როდის რა ჩაიდინოს. ახლა სდუმს, რადგან მოურავი საჭირო შეიქნა სამეფოსათვის, თანაც მეფეებს უყვართ იგი. ალბათ, რაღაც მოხერხებით შეაყვარა თავი. გიორგი მეფემ ხომ პირველ კაცად აქცია ეს ნოსტეველი გლეხის ბიჭი, ზოლო ლუარსაბს რომ თვალში ჩაუვარდეს, ხელს არ მოისვამს. ხშირად იწვევს სასახლეში და ისმენს მის რჩევადარიგებას, თითქო მის მეტს ჰკუთ და მოსაზრება აღარ გვქონდეს... — გაათავა უკმაყოფილოდ ფარსადანმა და აზარტეშით შესვა წითელი ღვინო.

— მართალი თქვას კაცმა, ეგ სააკაძე ფრიად დიდი ნიჭის პატრონი ჭაბუკია, მეტად ჰქვიანი და საარაკო მამაცი. ეგეთი გამბედავი და მკვეთრი გონების კაცი არც მინახავს და არცა მსმენია, თუმცა ორმოც წელს უკვე გადავცილდი! — დაიწყო ანდუყაფარმა, შესვა ღვინო და გააბოლა ნარგილე, — ყველას კარგად განსოვით, ბატონებო, რა სასწაული ჩაიდინა მან ერევანთან ომებში, სადაც ვახლდით გიორგი მეფეს შაჰ-აბაზის დასახმარებლად. როდესაც თურქთა სერასკირის ალი-ფაშას ჯარები რიცხვით ჩვენზე სამჯერ მეტი მოგვაწვნენ ორი მხრივ და გვიპირებდა განადგურებას ერანისა და ქართლის ჯარებს, როცა ყველანი შევშინდით და დავიბენით, როცა თვით შაჰი შეერთა და ჩაუარდა დიდ საგონებელში, ხოლო მისი სარდლები სამხედრო თათბირზე ცახცახებდნენ შიშით, მაშინ წამოდგა დინჯად რაზმის უფროსი ოცი წლის მოყმე გიორგი სააკაძე, თაყვანი სცა ყეინსა და გიორგი მეფეს, თავმდაბლად ითხოვა მათგან სიტყვა და ოდეს მიიღო ნებართვა, ხომ გესმით ყველას, თუ როგორ გადაშალა ბრძოლის ველის სურათი, გვამცნო ნათლად ადგილმდებარეობა მტრის ჯართა, ბანაკი, საფარნი და წარმოადგინა თავის გეგმები, რითაც განცვიფრებაში მოგვიყვანა იქ დამსწრენი, უფრორე კი თვით შაჰ-აბაზი. გოცებულმა შაჰიმ მიიწვია თავის წინაშე ეს საარაკო ჭაბუკი დიადი ხახისა და ეამბორა შუბლზე, აჩუქა ათი საცხე ჭიქა, ანუ ათასი ოქრო, და მისცა მაშინვე მოწინავე ლაშქრის, ე. ი. ქართველი ჯარის მთავარსარდლობა. ერანის შაჰის ბრძანებით, ყოველივე მოეწყო სააკაძის გეგმის თანახმად და ხომ ნახეთ, რაც მოხდა! ბრწყინვალედ გავიმარჯვეთ, განადგურდა ოსმალთა დიდი ლაშქარი, თვით სერასკირი ტყვედ ჩაგვივარდა, მასთან მტრის მთელღ ბანაკი, უამრავი განძი და ლარი დაგვრჩა დაეღად. ხომ ნახეთ, რარიგ დააჯილდოვებ გმირი სააკაძე შაჰაბაზ დიდმა და ჩვენც რა უხვად დაგვახანუქრა რომ სააკაძე არ ყოფილიყო მაშინ, იცით, რაი მოგველოდა

ერანისა და ქართლის ჯარებს? ან ტყვედ ჩავარდნა, ან სრული განადგურება!

— ხომ ნახეთ, როგორ მიულოცა ირანის ლომმა გიორგი მეფეს, მიუთითა სააკაძეზე და უთხრა: „აი ეგ საარაკო ჭაბუკი არის სარდალი, დიდი ნებისა, დიდი ჭკუის ადამიანი და კარგად გაუფრთხილდით...“

— ეგ ყველაფერი მართალია, ბატონო ანდრეაფარ, — ხოლო რომ მოგვდგა თავადებს და ძალმომრეობს ჩვენზე, ეგ რაღაა! იმოდენა ყმა და მამული წაგვართვა და მისა-კუთრა სამეფო ხაზინას. შემდეგ კიდეც...

— მოგვითმინეთ, ბატონო ქაიხოსრო, ჯერ არ გამითავე-ბია, — შეაწყვეტინა სიტყვა ჯავახიშვილს მასპინძელმა, — ჰო, იმას მოგახსენებდით, ერეენის ომის შემდეგ გიორგი მეფემ სამართლიანად მიუბოძა იმ საარაკო ჭაბუკს თავადის ხარისხი, სათანადო ყმა და მამული, გახადა მთელი ჯარების სპასპეტად. ლუარსაბ მეფემ მისცა თბილის-ცხინვალის მო-ურაობა და ხომ იცით რატომ! კიდეც შარშან სააკაძე მცირე ჯარით შეიჭრა ჯერ ლეკეთსა და შემდეგ ოსეთში, აიღო მათი ციხე-სიმაგრენი, დაარბია მათი სოფლები, გამოიყვანა მათ მიერ ტყვედ წაყვანილი ხალხი, წარტაცებული ქონება და შეიღანა ისეთი შიშის ზარი ამ მთის ხალხს შო-რის, რომ ვფიქრობ, სამუდამოდ დაუკარგა მათ მაღა ქართლ-კახეთში თარეშისა და ქვეყნის რბევისა. ხოლო რა საშინელ ზიანს გვაძლევდა თავადებსაც კი ეს ორი ონავა-რი ხალხი, ყველამ კარგად უწყით...

— ეგეც მართალია, ბატონო ანდრეაფარ, ხოლო ჩვენ რა სარფა გვაქვს, ჩვენ, თავადებს, რომელთაც გვართმევს ესოდენ ყმასა და მამულს?! — წამოიძახეს გაცხარებით ქაი-ხოსრომ, ფარსადანმა და წამოიჭრენ ზეზე, — ალბათ, შენ ნაკლებ დაისაჯე, ამიტომაც ასე გულარხეინად ბჭობ!

— სრულებითაც არა, ბატონებო, მთელი ტირიფონა წა-მართვა, ხოლო ზაალს კიდეც მეტი; მაგრამ დროებით მაინც უნდა ვსდუმდეთ და შევეურიგდეთ ამაებს. ჯერ სააკაძე ძა-ლაშია, მისი მზე ბრწყინავს, მისი ბამბაც კი ჩხრიალებს. ვაცადოთ დროსა და ეამსა. გადინდება დასავლეთით მისი

ძვეც და მაშინ... ჰო, მაშინ დავაცხროთ თავსა ზედან რის-
ხვა ზეცისა. მანამდე კი ვითათბიროთ, ბატონებო, როგორ
მოვიგოთ გული შამ-აბაზ დიდისა, ამ ერანისა და ივერიის
მბრძანებელისა და როგორ ავიცილოთ თავიდან ის დიდი
საფრთხე, რასაც ამზადებენ ქართლ-კახეთის მეფენი მოს-
კოვთან დაკავშირებით. ყეინის მზემან, კარგს არას გვიქა-
ლის ჩრდილოეთისაკენ ხელის პოტინი! — ამ სიტყვებით
ენაწყლიანმა მასპინძელმა ისევ შეაპარა ქართლის თავა-
დებს თავის ფარული ზრახვანი.

გაიმართა ცხარე კამათი ამ ახალ საგანზე.

ამ დროს კი ხალხის მოთავე უკვე სოფელ ლამისყანაში
ჩასულიყო და ავარჯიშებდა სამხედრო რაზმებს, ზრუნავ-
და ახლად დასახლებულ გლეხობაზე.

სწორედ ასეთი ზრუნვა-თავდადებისათვის შეიყვარა ხალ-
ხმა იგი უზომოდ და უწოდა დიდი მოურავი, რა სახელწო-
დებაც გადაეცა თვით ისტორიას.

ნეტა ვინ იყო ეს საარაკო პიროვნება, ასეთ მძიმე დროს
მოვლენილი ივერიაში?!

„იყო კაცი ესე სრული საქმითა, ძლიერი განზრახვითა,
გონიერი ყოველ საქმეში, ძლიერი, წარმოსადეგი, ტანადი,
დიდი მებრძოლი, უძლეველ და ვისაც იგი ბრძოლას გაუ-
მართავდა, მუდამ ჟამს ამარცხებდა მას და თავის მოპირ-
დაპირე მხედრობას, ვითარცა მხალსა, აღხოცავდა და
განფანტავდა დედამიწასა ზედა“, — ამბობს გიორგი სააკა-
ძეზე მისი თანამედროვე სომხის ისტორიკოსი არა-
ქელი.

„ფშვინავდა მრისხანების დროს, ვითარცა მებრძოლი
ცხენი, და შესაძახებდა, ვითარცა ლომი, ვითარცა გენიის
ფშვინავი ვეშაპი“, — ამბობს იგივე არაქელი.

„გიორგი სააკაძის ერთი შეძახება არედა და ფანტავდა
ჯართა“, — ამბობს პოემაში იოსებ ტფილელი.

იმდროინდელი ევროპიელი მოგზაურის პეისონელის სიტ-
ყვით, სააკაძე იყო დიდი დიპლომატი და ღრმად მცოდნე
ადამიანის გულისა და თვისებათა.

„გარდა ესე მოურავი გიორგი (სააკაძე) იყო მხნე, ახოვანი, ძლიერი ძალითა და შემმართველი უშიში“ — ამბობს ისტორიკოსი ვახუშტი ბატონიშვილი.

ასეთი იყო გიორგი სააკაძე, თავგასულ თავადთა ამლაგმეული და გლეხთა ქომავი.

მზე ჩასვლამდე იყო, ოდეს ლამისყანას მიუახლოვდა ორი ცხენოსანი იარაღასხმული მთიელი. ესენი იყვნენ ლომი ჩრდილელი და ვაჟად ჩაცმული ცარო. ამათ დაინახეს ფერდზე ახლად აგებული სოფელი, უმთავრესად მიწური სახლებით, აქა-იქ იყო დარბაზებიც; მათ ბანებზე ფუსფუსობდნენ ქალები და ბავშვები, მზეზე აშრობდნენ გარეცხილ ხორბალს და აკეთებდნენ საოჯახო საქმეებს. ხოლო მეორე მხრივ ქსნის პირას გრძლად გაბმული რამდენიმე გუთნეული ხნავდა ანეულს. სახრის ტლაშანთან ერთად ისმოდა მეხრეთა ღიღინი. იქვე ახლოს ვრცელ მინდორზე ხდებოდა ჭაბუკ გლეხთა სამხედრო ვარჯიში. რაზმის წინ ცარომ დაინახა შავ მერანზე მჯდომი, იარაღასხმული, შავულვაშა, წვერმოპარსული ჭაბუკი. მისი გოლიათური აღნაგობა, დიადი სახე და არწივის თვალები იპყრობდნენ ადამიანს.

ქალი მაშინვე მიხვდა, ვინც იყო ეს კაცი და გადახედა ძმას. ორივენი გადმოხტნენ ცხენებიდან და ქვეითად ეახლნენ დიდ მოურავს.

— გამარჯობა, ლომი! ხომ კარგი ამბავი მოგაქვს? როგორ არიან მთის არწივნი? — შესძახა სააკაძემ მთიელს.

— ნუ მოგაკლოს გამარჯვება ლაშარის ჯვარმან, ლომისის წმ. გივარგიმ ქვეყნის პატრონო! — უპასუხა ლომიმ. — მამაცად არიან მთიელი ვაჟნი შენი იმედით. ვიყავ ხევსა და თუშ-ფშავ-ხევსურეთს, ვნახევი მათი ბელადნი: ვაჟი, ბერდიი, უჯო და გოგოთური. მზადა ჰყავთ სამი ათასი მამაცნი იარაღით. ნატრობენ ბრძოლას და ელიან შენს ნიშანს.

— კეთილი, შაბაშ შენს მხნეობას, ჩემო ერთგულო, რომ მკირე ხანში ბევრი შესძელ. ხომ არაფერი უჭირთ მთის გმირებსა? ქისტ-ჩეჩენ-ლეკნი ხომ არ ერჩიან?

— სოროში შემძვრალან შენი შიშითა, დიდო სარდალო, მთაში ახლა მშვიდობაა. ცხორი ბევრი ჰყავთ და ძროხა. ბლომად არის აგრეთვე აველი, ერბო-კარაქი, მატყლი და ნადირის ხორცი. პური და ღვინო მოაქვთ კახეთით, ხოლო სკირდებათ თოფი, დამბაჩა.

— დღესვე ვაცნობებ ქალაქში ზაზას, თოფხანის გამგეს, რათა საჩქაროდ გაგზავნოს მთაში ათასი თოფი და ათასი დამბაჩა. ვფიქრობ, ეყოფათ ამ პირველ ხანად. ბევრი ჩვენც არ გვაქვს.

— იცოცხლე მრავალ წელს ერის მოთავევ! ამ ჯერად სრულებით კმარის. დიდად გაახარებ მთის ვაჟებს ამ ნობათით. დენტსა და ტყვიას თვით აკეთებენ, აღმოაჩინეს მთაში მადანი, გოგირდი, გვარჯილა, ბრპენი.

— ეგ კარგი ამბავი მამცნე! მაშ ჩვენც შეგვიძლია ვი-სარგებლოთ მათ მიერ დამზადებული ტყვია-წამლით!

— რამდენიც გწადით; ათას ლიტრობით მოგაწვდიან, თუ კი უბრძანებთ.

ამ ბაასის დროს მოურავმა თვალი მოჰკრა შოლტივით აწვდილ, შეჩაბალახაკრულ ვაჟს. ის გვერდით ედგა ლომის და აფრთოვანებით შესცქეროდა დიდ მოურავს.

— ლომი, ვინ არის ეგ ვაჟი, გვერდით რომ გიდგას?

მოურავის უეცარ შეკითხვაზე დაიბნა მთიელი.

— ეს ჩემი ნათესავია... გელა .ქვია... ბიძაშვილია... ძა-ლად წამამყვანა... მეტად სწადია შენთან ხლება და სამსახური. ძლივსლა წარმისთქვა ლომიმ ეს სიტყვები ნაწყვეტ-ნაწყვეტად და სირცხვილით დახარა თვალები.

— სახეზე ვატყობ, მარჯვე ჰაბუკს ჰგავს. სიამოვნებით ვიღებ მხლებლად, მით უმეტეს, რომ შენი ნათესავია. ხომ კარგად ხმარობს თოფსა და ხმალ-შუბს?

— გადამეტებით, დიდო სარდალო! მე თითქმის მჯობ-ნის. განთქმული ჩუბინია. ტყვიას არ აცდენს გაფრენილ ჩიტს. ხმალსა და შუბსა იქნევს მდევურად, თანაც სისწრა-ფით გელას ვერავინ შეედრების...

— ეგ შენი ქება საკმარისია. დიდად მიხარის. გივის გა-დაეც, რომ გელას მისცეს საუკეთესო ყირიმის თოფი,
3. ს. ქვარიანი

ვერცხლის დამბახა თავის სიათით. მცირედ შეისვენეთ ბანაკში, შემდეგ ორთავე მოდით ჩემთან კარავში: ერთად ვივასშმოთ. მწადს გესაუბროთ საჭირო საქმეებზე.

— ჰო, უენი კენესამე, გეახლებით.

ლომიმ და გელამ მძიმედ დახარეს თავი და ბანაკისაკენ გაემართნენ.

ამასობაში დაღამდა კიდევ. სააკაძემ მოახდინა მცირე განკარგულება, დაშალა რაზმები და გაქუსლა ცხენი თავის კარვისკენ, შესასვენებლად მთელი ღლის შრომის შემდეგ.

IV. სიყვარულის მოჩვენები

უკვე ერთი თვეა, რაც მთების ნებიერი ასული, ვაჟად ჩაცმული, გელას სახელით მუდამ თან ახლავს სააკაძეს. იშვიათი სისწრაფითა და სიზუსტით ასრულებს ყოველგვარ დავალებას, რითაც აღტაცებაში მოჰყავს დიდი მოურავი. ხოლო რაინდის ჯუბა-ჯავშნის ქვეშ ფეთქს უმანკო ქალწულის ჩვილი გული, სავსე სინაზით. სააკაძის დიადი სახე, ახოვანობა, ბრწყინვალე წარსული და მოქმედებანი მეტად ხიბლავენ ამ გულს, აღვივებენ უზენაეს გრძნობას... დიახ, ცაროს შეუყვარდა დიდი მოურავი იმ სპეტაკი გრძნობით, რაც სჩვევიათ მხოლოდ რჩეულთ. გიორგი შეიქნა ამ ქალის ღმერთი, სათაყვანო კერპი. ამიერით ცაროს გრძნობა და ფიქრი მოიცვა სამშობლომ და დიდმა მოურავმა.

მაგრამ მთის ასულის ასეთ უზენაეს გრძნობას, საუბედუროდ ვერ ამჩნევდა ის, ვის მიმართ იყო აღზნებული ეს დიადი ვნება. გმირი სარდალი მზერდა ცაროში უებრო ვაჟს, უზადო რაინდს, მამაც მთიელს გელა ჩრდილელს, და არ უწყოდა, რომ ამ მთიელის გული, ფიქრი, ოცნება და ნორჩი არსება მთლიანად ეკუთვნოდა მას, რომ ეს ქალი, ვაჟად გადაცმული, მზად იყო გაეწირა მისთვის სული და სიცოცხლე.

აი სად იყო ამ მთის ასულის საშინელი ტრაგედია, უსაზღვრო ტანჯვა და უიმედობა!

შემოდგომის თბილი, მზიანი დღე. კრიალა ცა, სუფთა საამო ჰაერი. გორის მიდამო. ქალაქის გვერდით გორიზად ამართული უზარმაზარი ციხე, შორით მოჩანს თოვლით დაფარული კავკასიონის მთები, მათ შორის ამაყად აწვდილა ბუმბერაზი მყინვარი. კარგ ამიდს გარეთ გამოუფენია მშრომელი ხალხი. ხნავენ ანეულს, თესავენ, გაპყავთ რუები, ალაგ კიდევ კრეფენ ყურძენს და საგვიანო ხილს.

დიდი მოურავი შავ რაშზე მჯდომი მიეშურება ტირიფონისკენ; თან ახლავან ლომი, გელა და პაპუნა ჩივაძე. ამ დროს შორით გამოჩნდა მათკენ მომავალი ხუთი ცხენოსანი. წინ მოდიოდა კენარი ტანის ასული, მდიდრულად დარახტულ არაბულ თეთრ რაშზე მოხდენით მჯდომი. გვერდით მოჰყვებოდა ქულაჯიანი პირტიტველა ვაჟი იარაღ-ასხმული. უცებ ბუჩქიდან გამომხტარმა კურდღელმა დააფრთხო ქალის ცხენი. ის გავარდა ელვის სისწრაფით და შორს მიატოვა თანამყოლნი. ისინი ჭენებით გამოუდგნენ მას. მამაცად იჯდა მიმფრინავ რაშზე ქალი და სწევდა სადავეს. დაინახა თუ არა ეს სურათი მოურავმა, ჰკრა დეზი თავის არაბულ მერანს და საოცარი სისწრაფით დაედევნა თეთრ ტაიქს, რათა გადაერჩინა ქალი. მას გამოუდგნენ სხვებიც. მალე მიეფარათ თვალთაგან ორთავენი.

კარგახანს დევნის შემდეგ სააკაძემ, როგორც იქნა, დაუარა თავი, სწევდა სადავეს და თავისი გოლიათური ღონით შეაჩერა დაფეთებული ცხენი სწორედ იმ დროს, როცა იგი თავის მხედრითურთ უნდა გადაჩხილიყო უფსკრულში. მოურავმა სწრაფად გადმოსვა გულწასული ქალი და დაასვენა ძეწნის ჩეროს ქვეშ, მტკერის სიახლოვეს. შემდეგ მოარბენინა იქვე რუიდან მათარით წყალი და ასხურა შეღონებულ ქალწულს, რათა მოეყვანა გონს. რაინდი დააცქერდა მითვლემილ ქალს და მის გაოცებულ თვალებს დაესახა ჯერ უხილავი მშვენიერება. მოფუშოდა თავზე აბრეშუმის თეთრი სიფრიფა მანდილი და მის ნატიფ სახეს შესტრფოდნენ შავი ქუჩუჩა დალაღნი. თეთრად ელვარე დაწვეებს ჩეროს ჰფენდნენ გრძელი წამწამნი.

ამ საოცნებო სანახობამ უცნაურად აატოკა ჭაბუკის გული. აქამდე უცნობი სიტკობა და სიმწვავე ეგრძნო მან. მთელ ტანში დაუარა რაღაც უჩვეულო ქრეოლამ და დააწყებინა უნებური ცახცახი.

ამ დროს წამოჯდა გონს მოსული ქალი, გაოცებით შეაჩერა რაინდის მამაც სახეზე სინაზით ეშხმიბნედილი ყუყუნა თვალები, საიდანაც კრთოდნენ ნაზი ალერსი, სიტკობა და ნეტარება. ამ ციურმა მზერამ ერთაღაგს მილურსმნა გმირი სარდალი, წაართვა ენა და მოძრაობის უნარი. იდგა ის ქალის წინაშე გარინდული და მდუმარედ შესტროფოდა ზეციურ მშვენებას. ეტყობოდა, ქალიც მეტად მოეხიბლა ამ უცხო რაინდის დიდებულ სახეს, აფრთოვანებდას და უსიტყვო ტრფიალს. ტკბილად ატოკდა ნორჩი ქალწულის უმანკო გული. მან დაინახა ვაჟის უკან ერთმანეთზე ლაგამგადაბმული ორი მერანი — შავი და თეთრი. შეიცნო თავის არაბულა, ქალს გაახსენდა უცებ ყველაფერი და შეკრთა საშინლად.

— ვინ ხარ, ვაჟკაცო, ან რად ვარ აქ მარტოდ? სადღა არიან ჩემი ძმა, ჩემი მზლებელნი?

ჩასწვდა მოურავის ყურს ქალის ნაზი, წკრიალა ხმები.

— შენი მონა ვარ მე ამიერიით... შენზე მლოცველი... ქართლის მოურავი... შენ კი ვინა ხარ ეგზომ ტურთა და მშვენიერი? რად მაჯადოებს ეგ შენი სახე და ეგ თვალები?!

აღმოხდა ჭაბუკს ეს სიტყვები ნაწყვეტ-ნაწყვეტად.

ქალს გაელიმა და გაუბრწყინდა სახე ციური.

— „მაშ შენ ხარ თბილის-ცხინვალის დიდ-მოურავი, ქართლის სპასპეტი ფრიად განთქმული? მე შენი ქება ბევრჯერ მსმენია ჩემი ძმისაგან! ზურაბ ხომ შენთან შეფიცულია ძმად და მეგობრად!

— ახლა შევიგენ. შენა ყოფილხარ დიდი ნუგზარის, არაგეთ ერისთვის ასული, შენსა სიტურფეს სპარსთა აშუღნი და ივერიის მუტრიბ-მგოსნები თარსა, ჩანგურზე დამღერიან. მაშ შენ ხარ თამარ, ქართლის ცისკარი, რომლისა ხილვას მე ვნატრულობდი? ვმადლობ განგებას, რამეთუ მომცა ეს შემთხვევა შენ გაგცნობოდი, მემზირა შენთვის

და მომესმინა ეგ ხმა ციური... ნეტარებს სული, მუსიკობს
ენა, ოდეს გიცქერი, ტურფავ ციურო!

თქვა ეს გიორგიმ აფრთოვანებით.

— დაბრძანდით, გმირო! ნაშ შენ ხარ ხიფათისაგან ჩემი
დამხსნელი?! და რომ შენ არა, ხომ გადამჩეხდა ე იმ ჯურ-
ღმულში ის გოყი ცხენი! ო, ამ წუთას მის ბნელ ფსკერზედა
უსულო გვამად მე ვეგდებოდი?!

თქვა ეს ასულმა ალერსიანად და მოუჩრავი გვერდით მო-
ისვა.

— შენ ასწილ უკვე გადამიხადე, რომ შენი მზერის ღირ-
სი გამხადე, გვერდს მომისვი, თანაც მასმინე ეგ ხმა ციუ-
რი, ნაში, საამო... ო, ვიქნებოდი მე ბედნიერი დიდად
უსაზღვროდ, რომ ეგ თვალები, სახე-მშვენიერება ჩემდა
სამზერად გაჩენილიყო! თამარ ციურო! შენს ახლო ყოფ-
ნით, მზერით, საუბრით ნეტარებას ვგრძნობ. ვგრძნობ ახალ
სიცოცხლეს, ჯერ უგემებელს... შენი სიშორე, უნახაობა
მომკლავს, მომიღებს ბოლოს... რაღაც თილისმამ, რაღაც
გრძნობებმა სრულიად შეიპყრო ჩემი არსება... აი ამ გულ-
ში ხატად სენია ეგ შენი სახე... იქნებ ეს არის ის დიდი
გრძნობა, ტრფობას, სიყვარულს რომ ეძახიან?! არ განმიც-
დია დღემდე ეგ გრძნობა. სჩანს, რომ შევიქვენ ველად გაქ-
რილი შენი მიჯნური, ვით ტარიელი ტურფა ნესტანის...
თამარ, მიყვარხარ, ვფიცავ შენს სახელს! ზეცას და ქვესკ-
ნელს შევებრძოლები! არვის დავუთმობ შენს თავს, მშვენიე-
ბავ! შენ მე მეკუთვნი, მე შენი ვარ სამარადისოდ.

ეს სიტყვები დიდმა მოუჩრავმა მეტად მღელვარედ წარ-
მოსთქვა, მერე ერისთავის ასულს შეაშტერდა თავის მგზნე-
ბარე არწივის თვალებით.

ველარ გაუძლო ქალმა ამ მზერას, ცეცხლოვან სიტყვებს
და მწვავე გრძნობებს; უხმოდ მოხვია კისერზე ხელი და
გმირის მკერდზე ის მიესვენა... მათი ბაგენი უნებლიედ დას-
წვდნენ ერთმანეთს და ჩაეტმასნენ მწვავე ამბორით...
ტბილ-სანეტარო იყო ის კოცნა ორი მიჯნურის, ორი
ტრფიალის, ზენარ გრძნობით შეყვარებულის. მათ ფიცი
მისცეს ერთიმეორეს.

ამ სურათს მზერდა ბუჩქში მიმაღვით ერთი არსება. თმებსა იგლეჯდა გამწარებული, იხოქდა სახეს, გულს უდაგავდა ცეცხლი უშრეტი. უსაზღვრო ტანჯვას ის განიცდიდა. ვნებამ და გზნებამ დაუბნელა საღი გონება. აღბორგდა იგი შურისძიებით, ხელი წაავლო კალდიმს ელვარეს, სწადდა ვეფხვივით გადამხტარიყო, გული გაეპო მისთვის, ვინცა მოსტაცა ტრფობის საგანი და ჩაუმწარა ნეტარება. გადაღა ბიჯი, მაგრამ უხილავმა ძალამ ერთი წამით ის შეაჩერა. ფიქრმა შეიპყრო... დაცხრა, დამშვიდდა. საღმა გონებამ და სათნობებამ მის არსებაში დაისადგურა. შორს გატყორცნა ბასრი კალდომი, დაემხო პირქვე, მწარე ცრემლებით დაალტო მიწა...

კვლავ აღერსობენ შეყვარებულნი, არც კი უწყიან, თუ ორ ნაბიჯზე მათ სდარაჯობდა ვნება მღელვარე, შურისძიება, შავი სიკვდილი...

ამ დროს ბედნიერ ქალ-ვაჟს ესმათ ხმაური. მათ დაინახეს თავის მხლებელნი. პირველად მოვიდნენ ლომი და პაპუნა, შემდეგ კი ძმა დათუნა სამი თანმხლები აზნაურით. ხოლო მათ შორის არ ჩანდა გელა და ის არავის გახსენებია. დათუნასა და მის მხლებელთ სიხარულს არ ჰქონდა საზღვარი, ოდეს იხილეს თამარ ცოცხალი და უვნებელი. უსაზღვრო მადლი შესწირეს დიდ მოურავს.

სააკაძემ შესვა თამარი ცხენზე და გააცილა მცხეთამდე. აქ კი შეყვარებულნი დაშორდნენ ერთმანეთს. და-ძმამ მიიწვიეს იგი ანანურს მამის სასახლეში, ხოლო მოურავი ვერ გაჰყვა მათ, აღუთქვა კი მისგლა ხლო მომავალში. უკანასკნელად გააყოლა თვალი თავის ღვთაებას და გასწია ტირიფონასკენ. გულის სიღრმიდან აღმოხდა მწვავე გმინვა, რაც შეამჩნიეს ლომიმ და პაპუნამ, ფარული ღიმილით გადახედეს ერთიმეორეს.

კარგა დაღამებული იყო, როცა გელა დაბრუნდა ბანაკში მწარედ დაქანცული და მაშინვე გაუხდელად მიწვა ლოგინზე. ის კვლავ გაიტაცა ფიქრებმა. ქალის შევარდნის თვალებს და სწრაფ მერანს ვერ გაუსხლტნენ მზერიდან არაბული თეთრი ცხენი და უკან დადევნებული მოურავი.

გელამ ყველაზე ადრე მიიღბინა მათთან, გადმოხტა ცხენი-
დან ცოტა მოშორებით ბაღნარში, მიაბა ხეზე ცხენი, თვი-
თონ კი სწრაფად შეცოცდა ძეწნის სიახლოვეს ბუჩქებში,
საიდანაც ხედავდა ორივე ქალ-ვაჟს და ესმოდა მათი საუბა-
რი. ამან კი ცეცხლი მოუკიდა მთის ასულს და კინაღამ
ჩაადენინა საშინელი მკვლელობა. ცარო მადლობდა ზენას,
რომ არ გახდა ადამიანის მკვლელი და მით არ დაკარგა სა-
უკუნოდ მოურავის მზერა.

— განა ბრალია მისი, რომ არ უყვარვარ?! მე ხომ ვა-
ჟი ვარ, გელა, მის თვალში ვაჟად ჩაცმული. აბა რა იცის
მან, თუ ამ ჯუბის ქვეშ ფეთქს ქალის გული, ამჟამად მწვა-
ვედ შეყვარებული! და თუ მართლაც მიყვარს ის, ქვეყნის
დიდება, უნდა ვცოცხლობდე მისი ბედნიერებით. გმირს
შეუყვარდა მის მიერ გადარჩენილი ნუგზარის ქალი, მშვე-
ნიერი თამარ, ქალსაც ხომ უყვარს იგი! ბედნიერია ორთა-
ვენი. მაშ ჩემი კერპის ბედნიერება არ უნდა მხდიდეს გი-
ჟად და შმაგად, არ უნდა მავსებდეს შურისძიებით! ეს იქ-
ნებოდა ჩემი მხრიდან ნამდვილი ტრფობა. მე ხომ ჩაკვალი
ჩემს არსებაში ქალური გრძნობა იმ დღიდან, როცა ტანს
გავიძვრე დიაცთა ლაბადა, თავს მოვიხადე თეთრი მანდი-
ლი და ვაჟად მოსილმა დავირქვი გელა. სწორედ იმ დღი-
დან ჩემი არსება, ჩემი პირადი ბედნიერება მთლიანად შევ-
წირე ბედშავ ქვეყანას. აი იმ დღიდან ჩემი თავი სრულიად
ეკუთვნის ხალხს და მის მოთავეს... მაშ ჩაკვდი გულში,
წყეულო ვნებავ! ნუ მტანჯავ აგრე. ცეცხლს ნუ მიკიდებ!

წარმოსთქვა ყრულ ეს მწვავე სიტყვები და ლამაზ თვა-
ლებს მოსკდა ცრემლები... უკვე ალიონი იყო, როს ძლივს
წალულა თვალი და ჩაეფლო ღრმა ძილში. საბედნიეროდ,
იმ ღამეს მთავარ ბანაკში არ მისულან მისი ძმა ლომი, არც
მოურავი.

ტირიფონასკენ მიმავალი გიორგის ფიქრი და ოცნება
გარს ევლებოდა მშვენიერ თამარს. მისი გული ჟღერდა
სიყვარულის ზევსურს. ამ დღიდან ნუგზარის ასული შეიქ-
ნა სააკაძის სათაყვანო კერპი, იმას ხედავდა თვალწინ დღი-
თა და ღამით, მას უგალობდა მთელი არსება. ამავე ყოფაში

იყო იქ, ანანურის დიდ სასახლეში ერისთვის ქალიც. ამ ბედნიერ დღიდან მის განუყრელ ფიქრებს შეეცავდა ქართლის სპასპეტი. თეთრი კოშკიდან თამარი გასცქეროდა სამხედრო შარას, მოუთმენლად ელოდა მას, ვინც აღუთქვა მალე მისვლა. ხოლო არ ჩანდა იგი და ქალის ჟუჟუნა თვალებს ცვიოდა ცრემლი მარგალიტებად, რაც დიდ მწუხარებაში აყენებდა მის დედასა და გამდელს. ამათ არ უწყოდენ თამარის გულის საიდუმლო. ნუგზარის ასულს დაეკარგა ძილი და მადა...

დიდი ფიქრის შემდეგ მოურავმა გაანდო გულის საიდუმლო ორს ახლო მეგობარს, ქართლის ორ წარჩინებულ პირს, საუკეთესო სარდლებს, ზაზა ციციშვილს და ალათანგ ხერხულიძეს. გაუგზავნა ისინი შუამავლად არაგვის ერისთავს და სთხოვა ქალი საცოლოდ. გულის ფანქვალით ელოდა ნუგზარის პასუხს.

შემოდგომის ხასხასა დილა. ლურჯად მოკამკამე არაგვის პირას სოფ. ანანურში მთის ფერდობზე ამართულა დიდი ნუგზარის ქვიტკირის ვრცელ სასახლე, თეთრი სვეტებით და ფართო წინგარდით ორივე მხრივ გარემოცული. სასახლის გვერდით მალა აწვდილა ლამაზი კოშკი. იქვე მოჩანს მალაღლი ციხე. სასახლის ზედა სართულის გრძელ აივანზე ნოხებდაფენილ ფართო ტახტზე ფეხმოკეცით ზის არაგვის ერისთავი ნუგზარ, უკვე მოხუცი, ხოლო ფრიალ ქარმაგი, სწევს ჩიბუხს, რაღაც ღრმა ფიქრს მოუცავს მისი ამაყი და მრისხანე სახე. ნუგზარს თავს ადგია ერთგული ციხისთავი ედიშერ გოსტაბაშვილი, შესჩერებია ბატონს თვალებში, ელის ბრძანებას; ხანდაზმით გაჰხედავს მდინარის პირად მიმავალ სამხედრო შარას.

ამ დროს გზაზე გამოჩნდა ორი მხედარი ოთხი შეიარაღებული თანმხლებით. მალე მიუახლოვდნენ ისინი სასახლეს. ეზოს ბჭის კარებთან შეეგებნენ ნუგზარის გუშაგნი და დაეხმარნენ ცხენიდან ჩამოხტომაში. მათვე ჩაეგება ედიშერ, მისი პირით სტუმრებმა ამცნეს ერისთავს თავის ვინაობა.

ნუგზარმა მაშინვე მიიღო ისინი და პატივი სცა ფეხზე ადგომით ქართლის ორ განთქმულ სარდალს, — ზაზა ციცი-

შვილს და აღათანგ ხერხეულიძეს. ორთავენი მიიპატიუა ტახტზე თავის გვერდით. მცირე მოკითხვის შემდეგ, სტუმრებმა მოახსენეს, რომ აქვე საიდუმლო დავალება მთავარსარდლიდან და სთხოვეს მოსმენა დარბაისელი მეუღლის დიოფალ გულქანისა და ვაჟის ზურაბის თანადასწრებით. ნუგზარმა დაითხოვა ციხისთავი და გუშაგნი, იხმო მეუღლე და ვაჟი, ფეხზე ადგომით მიესალმენ მათ სტუმრები. მცირე მუსაიფის შემდეგ ზაზამ ჩაახველა წყნარად და დაიწყა:

— მთისა და არაგვის მბრძანებლო, ბატონო ნუგზარ! ჩვენ გახლავართ შუამავლად მოსულნი თქვენს წინაშე ქართლის სპასპეტისა და მოურავის მიერ. იგი თავდაბლად გთხოვთ მეუღლედ თქვენს მშვენიერ ასულს თამარს.

— ეს რა ესმის ჩემს ყურებს! როგორი ვინ მიბედავს მოყვრობას! ნოსტელი გლეხის ნაშიერი, ვილაც სააკაძემერე, ვინ მისცა მას ესოდენი კადნიერება?!.. — წამოისროლა ბრაზმორევით ეს სიტყვები ნუგზარმა, წამოვარდა ზეზე და გააგლო ხელიდან ჩიბუხი.

— ან თქვენ, ბატონებო, ვიფარ იკისრეთ ჩემდა მიმართ ასეთი დამამცირებელი შუამავლობა?! — განაგრძო ისევ ერისთავმა და წყენით გადახედა სტუმრებს.

— დამშვიდდით, ბატონო ნუგზარ! ნუ გავიწყდებათ, რომ გიორგი სააკაძე დღეს პირველი კაცია ჩვენს შორის. იგი მთავარსარდალია და თბილის-ციხივალის დიდი მოურავი. ნუთუ ასეთი ადამიანი არ არის არაგვის ერისთავის მოყვრობის ღირსი?! — დინჯი კილოთი უპასუხა აღათანგ ხერხეულიძემ.

— ვინც უნდა იყოს! უწინარეს ყოვლისა, ის გლეხის შვილია, მდაბიო. ხომ ვიცით ყველამ, რომ იგი ჯავახიანთ ყოფილი ყმაა, დღეს შემთხვევით განდიდებული!

— არა შემთხვევით, ბატონო ჩემო, არამედ ქვეყნისთვის თავდადებით და საარაკო გმირობით ბრძოლის ველზე განითქვა სახელი დიდ მოურავმა, — უპასუხა მშვიდად ზაზამ და დაუმატა:

— გიორგი სააკაძე დღეს ჩვენსავით თავადია, თანახმად მეფის სიგელისა, და ჩვენ შორის პირველი კაცია ეს უზე-

ნავსი ხარისხი კი სამართლიანად დაიმსახურა მან ქართლის
ორთავ მეფეთაგან თავის პირადი ღირსებით და ზღაპრული
სიმაწავით.

მრისხანე ნუგზარ მცირე ხნით ჩააფიქრა ზაზას მტკიცე
სიტყვებმა, შემდეგ ასწია თავი და უფრო ღინჯად უპასუ-
ხა შუამავლებს:

— პატივცემულნო თავადნო და სახელგანთქმულნო სარ-
დლებო! ვწუხვარ, რომ ვერ ვასრულებ, რაც გწადით! აუწ-
ყეთ თქვენს მომგზავნელს, რომ მთისა და არაგვის დიდი
ერისთავი ნუგზარ ისე არ დაიმცირებს თავს, რომ სიძედ
გაიხადოს ვილაც უაზნო, გლეხის ნაშიერი გიორგი სააკაძე,
თუმცა პირადი ღირსებით ფრიად აღჭურვილი: ეს გახლავთ
ჩემი უკანასკნელი სიტყვა და მას ვერ შეცვლის ძე ხორ-
ციელი.

წამოდგნენ შუამავლები, ამ პასუხით ფრიად შეწუხე-
ბულნი, ჰკადრეს ყველას სალამი და დააპირეს წასვლა. მათ
უხმოდ შეჰყურებდა თვალცრემლიანი დიასახლისი გულქან,
მკაცრი ქმრის მიერ დამუნჯებული. მას არ სწადდა თავის
ჩარევით კიდევ უფრო გაებრაზებინა ნუგზარ, ხოლო უმ-
წეოდ გადახედა ვაჟს.

წამოდგა მოურავთან ძმად შეფიცული ზურაბ, დიდი ვაჟ-
კაცი და უპირველესი სარდალი გიორგი სააკაძის შემდეგ;
შეაჩერა სტუმრები ხელის დაქნევით და ცალ მუხლზე და-
ჩოქილმა მიმართა მამას:

— დიდო ბატონო მამავ! მუხლმოყრით გენუკვის თქვე-
ნი ვაჟი ზურაბ, ნუ გააწბილებთ ამ პატივცემულ თავადებ-
სა და განთქმულ სარდლებს, ნუ გალანძღვთ დიდ მოუ-
რავს, ივერიის გმირ სპასალარს, ნუ გადმტერებთ მას...
აღბათ, მამავ, თქვენ არ უწყით, რომ ამ ხუთი ღლის წინათ
საკაძემ აშკარა სიკვდილს გადაარჩინა ჩვენი თამარ, ოდეს
ის ბრუნდებოდა შინისკენ დათუნას თანხლებით ჩვენ ახ-
ლო ნათესავ ფარსადან ციციშვილის ოჯახიდან. პუჩქიდან
უცებ გამომხტარმა კურდღელმა დააფრთხო არაბულა და
მან გაიტაცა ქალი. თუ არა დიდი მოურავი, უძირო ხრამში
გადაჩეხდა გაგიჟებული ცხენი თქვენს საყვარელ ასულს.

აი ამ შემთხვევამ გააცნო ერთმანეთს თამარ და გიორგი სააკაძე, შეუყვარდათ ერთიმეორე და მტკიცე ფიციით არიან შეკრულნი.

გაოცებული ნუგზარ მისჩერებოდა ვაჟს მდუმარედ, მრისხანე თვალებით, შემდეგ წამოაყენა ზეზე და იხმო თამარ.

კარებთან მოფარებული ქალი ისმენდა ყველაფერს. იგი სწრაფად გავიდა აივანზე, სალამი ჰკადრა სტუმრებს და დაემხო მამის წინაშე.

— ძვირფასო მამავ! დიდ მოურავმა მიხსნა სიკვდილისაგანი ჩვენ გვიყვარს ერთიმეორე, ფიცი მივეცი. შეგვიბრალე ორთავენი! ნუ დაგეტანჯავ! შეიწყალე თქვენი ერთადერთი ასული...

გაბრაზებული ნუგზარ მივარდა ქალს.

— ვითარ გაბედე, შე ურცხვო, ფიცის მიცემა! აბა ვინ მოგცა ამის უფლება, ურჩო დიაცო! ახლავ დაგამწყვდევ ციხეში...

— რაც გწადით, ის ჩაიდინეთ! უიმისოდ ცხოვრება არ შემიძლია! მე მისი ვარ სამარადისოდ!

გაცოფებული ნუგზარ შემოჰკრავს ტაშს. შემოვლენ გუშაგნი.

— გაიყვანეთ ეს მამის ურჩი დიაცი და დაამწყვდიეთ ციხის მაღალ კოშკის ზედა სართულში! გაუფრთხილდით თვალის ჩინივით; არ გაგეპაროთ, ან ვინმემ არ გაიტაცოს, თორემ საკუთარი თავით აგებთ პასუხს! ხომ გესმით! გასწით!

გაფითრებულმა გუშაგებმა ფრთხილად გაიყვანეს თამარ.

საშინლად იმოქმედა ყველაზე ნუგზარის ასეთმა სიმკაცრემ, დუმდნენ ცოლი და ვაჟი, დუმდნენ სტუმრები. ფრიად ნაწყენი ზაზა და აღათანგ თავდახრით გაშორდნენ მასპინძელთ, დაეშვნენ ძირს მაღალ კიბიდან, მოითხოვეს ცხენები, შესხდნენ და გასწიეს გორისაკენ.

V. ქართველი დედის მანდილი

შეიტყო სააკაძემ ნუგზარ ერისთავის უარი, გაქირდვა და თამარის დატუსაღება. შელახულმა თავმოყვარეობამ და ვაუკაცურმა სიბრაზემ შეიპყრო იგი. იდგა ერთხანს მღუმარედ, რადაც ღრმა ფიქრმა მოიცივა მისი არსება. მოურავის მახვილმა გონებამ გადაწყვიტა ქალის მოტაცება. ეს მძიმე საქმე აუწყა თავის ახლო მეგობრებს: ორივ პაპუნას, ლომის და გელას. შეუდგნენ თათბირს, როგორ გაეხორციელებინათ ეს ფრიად სახიფათო საქმე. ადვილი არ იყო ნუგზარზე თავდასხმა და ქალის გატაცება. ასეთი მოქმედება გამოიწვევდა დიდ მსხვერპლსა და სისხლის ღვრას, მით უმეტეს, რომ არაგვის ერისთავს ჰქონდა მაგარი ციხეები და შეეძლო თავის საყმოდან შეეკრიბა უცებ ათასამდე მეომარი. საჭირო შეიქნა ამ მძიმე გეგმის უსისხლოდ მოგვარება. ამის გამო წინასწარ უნდა გაეფრთხილებინათ თამარ და ჩუმად დასცემოდნენ ანანურს სწორედ იმ დროს, როცა ნუგზარ იქნებოდა სადმე წასული. აქ ეს უნდა სცოდნოდათ ადრევე, ამის გაგება კი დაავალეს გელას, როგორც ყველაზე უფრო მოქნილსა და მოხერხებულს.

იმ ღამესვე მიაქროლებდა გელა მერანს ანანურისკენ საიდუმლო დავალებით. უბეში სათუთად ედო მოურავის უსტარი თამარისადმი.

მეორე დღეს შეღამებისას მიუახლოვდა გელა ერისთავის ციხე-სასახლეს, დამალა ცხენი ტყეში, თვითონ კი მივიდა წყაროსთან, დალია წყალი მათარით და შეისვენა მცირედ.

ამ დროს სპილენძის სარწყულით ხელში წყაროსთან გაჩნდა თორმეტი წლის გოგო. გელამ ჰკითხა ვინაობა. გოგო აღმოჩნდა თამარის გამდელის ბაღში. ამ შემთხვევის ისარგებლა გელამ და გაჰყვა ბებიასთან; გაიხმო განზე, აუწყა საიდუმლოდ თავისი ვინაობა და სთხოვა დახმარება. დიდ სიხარულს მიეცა ამის გამგონე გამდელი. მან აიღო ორი ნაზუქი, ერთში ოსტატურად ჩადო მოურავის უსტარი სიფრთხილისათვის, რადგან თამართან მისულთ, გარდა დედისა. გუშაგნი სასტიკად სინჯავდნენ ყველას. გამდელი კდილობდა, მცველთ არ ჩავარდნოდათ ხელში სააკაძის უსტარი და მით არ ჩაფუშულიყო ქალის გატაცების გეგმა. ამიტომ თვითონ წაუღო გაზრდილს ნაზუქები და ხილი ციხის კოშკში. თამარმა გატეხა ნაზუქი, ამოიღო უსტარი, მიიკრა გულზე, აკოცა სამჯერ და მთვარის შუქზე ჩუმად წაიკითხა შემდეგი:

„გადავწყვიტე შენი გატაცება, მოვდივარ რჩეული რაზმით, მამცნე მანდაური ამბები. გეხვევა მარად შენი გიორგი“.

ერისთვის ასულს გაუბრწყინდა სახე. ის გაიტაცა უსაზღვრო სიყვარულმა. ქალმა კვლავ აკოცა უსტარს და სათუთად შეინახა დარაიის სიფრიფა კვართის ქვეშ უბეში, ავგაროზთან. შემდეგ მცირე ეტრატზე ფანქრით დაწერა პასუხად ორიოდ სიტყვა, ჩადო ნაზუქის ნატეხში და გადასცა გამდელს. ამან კი მშვიდობით გამოაპარა გუშაგთ ქალის პასუხი და გადასცა გელას; პირადადაც დააბარა, რაც იყო საჭირო. გელა მოახტა თავის მერანს და გამალებით დაეშვა ქვემოთ.

აფრთოვანებით ჩაიკრა გულში მოურავმა სატრფოს უსტარი და ეამბორა მოწიწებით. შემდეგ გახსნა და გულის ფანქვალით ამოიკითხა შემდეგი:

„მზად ვარ! გამიტაცე ჩემო ყველაფე! მამა ამ დილით წავიდა მთაში საბი დლით ჯიხვებზე სანადიროდ, თან ახლავან გიორგი და ზურაბ. აქ მხოლოდ დედაა, დათუნა და ციხისთავი ასი გუშაგით... ჩაგეკერის გულში მარად შენი თამარ“.

შეუძლებელი იყო დაყოვნება, გარემოება ხელს უწყობდა შეყვარებულთ. დრო კი არ ითმენდა. იმ ღამესვე შეკრიბა მოურავმა ოჯახოცამდე რჩეული ვაჟკაცი, გაჰყო

ოთხ ჯგუფად, თითოში ათ-ათი კაცი; სამი ჯგუფი ჩააბარა ლომის და ორ პაპუნას, ხოლო მეოთხე დაიტოვა თავისთან. გააცნო მოთავეებს თავისი გეგმა: დაავალა იმ დამესვე წასვლა ფრთხილად და ცალ-ცალკე, რათა არ აეღოთ ეჭვი; დაუნიშნა შეკრების პაემანი. თვითონ კი ათი მხედრით და გელას თანხლებით წინასწარ გაქუსლა ანანურისკენ, თან წაიყოლა მარქაფად თამარისათვის დარახტული ბედაური.

მესამე დღეს, ცისკრის ამოსვლის უამს, როცა მთელ სოფელს ეძინა და თვით გუშაგებსაც მოსვლოდათ რული, ციხის გალავნის კარის წინ ნაბადში გახვეულ ორ მძინარე მცველს ფეხაკრეფით მიეპარა ორი შავად მოსილი მხედარი, ჩასჩარეს პირში ნარმის ნახევი, რომ არ ეყვირათ, შეკრეს მაგრად თოკით. შევიდნენ ციხის გალავანში და სწრაფად გაიხდნენ მალალ კოშკთან უკანა კედრით. ამ დროს ფრთხილად მძინარე ნუგზარის ასულს ყურში ჩასწვდა კოტის ხმა. გაალო მყისვე კოშკის სარკმელი და ჩამავალ მთვარის შუქზე გამოჩნდა ქალის მშვენიერი სახე. გელას მოქნილმა ხელმა მარდად შესტყორცნა ტუსალს საბელის კიბე. სწრაფად დაიჭირა იგი თამარმა, გაამაგრა სარკმელის ქვის ფიტონზე და ფრთხილად დაეშვა ძირს. აჰა, გმირმა მიჯნურმა გულში ჩაიკრა თავისი სატრფო. სამივე ფრთხილად გავიდნენ ციხის გალავნის კარიდან და სწრაფად შეეფარნენ ხშირ ტყეს, სადაც ჩაესაფრათ თავისი გუნდი და დაებათ ცხენები, მაშინვე შესხდნენ ცხენებზე და დახშვნენ ღუშეთისაკენ.

ამასობაში ერთმა გუშაგმა, როგორც იქნა, გაითავისუფლა თოკიდან ცალი ხელი, ამოიღო პირში ჩაჩრილი მჩვარი და მორთო ყვირილი. ამ ხმაურის გამო ციხის თავზე იჭექა ბუკმა. ბუკის ხმამ ფეხზე დააყენა ციხე, სასახლე და მთელი სოფელი. ციხისთავისა და გუშაგთ გამწარებას არ ჰქონდა საზღვარი, ოდეს სცვენეს, რომ საბლის კიბით კოშკიდან გაუტაცნიათ თამარ. ედიშერ მიხვდა მაშინვე, ვინც იქნებოდა ამის ჩამდენი. სწრაფად დაადევნა მოურავს მღვერათ ორმოცამდე მხედარი, ზოგიც მთის მოკლე ბილიკებით აფრინა ღუშეთისაკენ, რათა იქაურმა ციხის რაზმმა

შეუკრას გზები. შემდეგ ედიშერ შევიდა სასახლეში უზომოდ შეწუხებული, წარუდგა დიოფალ გულქანსა და დათუნას. ამათ უკვე გაეგოთ ყველაფერი და იყვნენ დამშვიდებით, რადგან გულში თანაუგრძნობდნენ მიჯნურთ.

ამსობაში გათენდა კიდეც. მცირე ხნის შემდეგ შორით მოისმა ბუკ-ნალარის ხმაური. ეს იყო ნუგზარ; ის ბრუნდებოდა შინ კარგი ნანადირევით. მაშინვე მისცეს ბუკითვე ციხიდან ნიშანი და გაეგებნენ დიდ ბატონს... დაღვრემილ სახეთა დანახვაზე ერისთავი მიხვდა, რა უბედურებაც დასტეხოდა თავს. მან გადახედა ამათ საშინელი რისხვით, მოახდინა ფიცხელი განკარგულება, საჩქაროდ შეეკრიბათ და მიშველებოდნენ ხუთასი მებრძოლით, თვითონ კი ასამდე მხედრის თანხლებით და ცხენის ქენებით გამოუდგა მოურავის კვალს.

ამ სახით ორმა გარემოებამ, ე. ი. გუშაგის მიერ თავის აშვებამ და ნუგზარის ერთი დღით ადრე შინ დაბრუნებამ ჩაფუშა მოურავის გეგმა.

მთის მოკლე ბილიკებით გადასულებმა ჩაუსწრეს სააკაძეს დუშეთში და შეუკრეს ყველა გზა. ეს აცნობეს მას ლომიმ და ორთავ პაპუნამ, რომლებიც დახვდნენ თავის ჯგუფებით დანიშნულ ალაგს, დუშეთის ზემოთ. ამრიგად, მოურავი თავისი მამაცი რაზმით მოემწყვდა შუაში, ახლა ან უნდა გადაეცა მამისთვის თამარ, ან ხმლით ხელში გაეკაფა გზა, რაც ითხოვდა უამრავ მსხვერპლსა და ძმათა შორის სისხლის ღვრას.

საჭირო შეიქნა სწრაფი მოქმედება. საჩქაროდ მოძებნეს ბაზალეთის ტბის ახლო მდებარე გორაკზე ბანაკად შესაფერი ალაგი. იგი დაპყურებდა მიდამოს და ზურგით ებჯინებოდა პიტალო კლდეს, რომელშიაც შედიოდა საკმაოდ ვრცელი ბუნებრივი გვირაბი. გვირაბთან დააბინავეს ცხენები. შეაწყვეს შაგნით სურსათი. თვითონ კი ჩასაფრდნენ, სამი მხრივ დაიკავეს საზვერი ალაგები.

ამავე დროს მოურავმა აფრინა მცხეთისკენ გელა და დაავალა ორასამდე მეომრის სასწრაფოდ მოყვანა, ხოლო ფშავებევსურეთისაკენ გაგზავნა ლომი სამასამდე საუკეთე-

სო მებრძოლის მოსაშველებლად. ამრიგად თვით ნუგზარ თავისი მხედრობით ემწყვდებოდა შუაში.

ლომი და გელა გაუსხლტნენ ერისთვის მზევრავთა რკალს და გავიდნენ სამშვიდობოს. თვით ლომად ქცეული მიჯნური იღვა გორაკის წვერზე და აჩჩიცის თვალებით ზევრავდა მიდამოს. გვერდით უღვა თამარ, მისი სიანსლოვე უფრო ამხნეებდა დიდებულ სარდალს.

ამ დროს შორით მოისმა ბუკის ხმა და ანანურის მხრივ სამხედრო გზაზე გამოჩნდნენ მხედრები. მათ წინ საკმაოდ დაშორებით მოაქროლებდა წითელ შერანს გაცოფებული ნუგზარი. უკან მოსდევდნენ ზურაბ და ედიშერ ასამდე მხედრით. მათ უკვე დაინახეს გორაკზე მდგარი სააკაძე თავის სატროფოთი და შემოერთყნენ ალყად, ხოლო ადრევე დაბანაკდნენ არაგვის პირას ბუჩქნარმინდორში.

ნუგზარმა მიუგზავნა მოურავს ედიშერ და სისხლდაუღვრელად მოითხოვა თავის ასული, წინააღმდეგ შემთხვევაში ემუქრებოდა გაყლეტას მთელი რაზმით.

საკაძემ შეუთვალა, რომ თამარსა და მას უზენაესად უყვართ ერთიმეორე. ფიცით არიან შეკრულნი და არ ძალუძთ ცხოვრება უერთმანეთოდ, ამიტომ უფრო ადვილად დასთმობს თავის სიცოცხლეს, ვიდრე თამარს. ბოლოს კვლავ თავდაბლად სთხოვს არაგვის დიდ ერისთავს. ნუ ეურჩება მათ კანონიერ წადილს, ნუ გახდება ძმათა შორის ბრძოლისა და უღანაშაულო ხალხის გაყლეტის მიწეში, ნუ დაიდებს თავზე მათი ცოლშვილის ცოდვას. — „შევრიგდეთ, ბატონო ნუგზარ, და დაგიმტკიცებთ, როგორი სიძვეიქნები თქვენი“ — დასძინა გიორგიმ, — რაც შეეხება ჯარებით გარს შემორტყმას, ამით ნუ მაშინებთ, რადგან მიღებულა ზომები და მზის ჩასვლამდე მთელი არაგვის სარისთავო იქნება გარს შემორტყმული ქვემოდან ქართლის ჯარით, ხოლო ზემოდან ფშავ-ხევსურთა რჩეული რაზმებით. — დააბოლოვა თავისი სიტყვა მოურავმა. სააკაძის ასეთმა პასუხმა უფრო აანთო ბრაზმორეული ნუგზარ, ხოლო იმავე დროს ჩააფიქრა იგი. აშკარად მზერდა, რომ ეს შუღლი იღებდა ფრიად მძიმე სახეს. ზურაბ ემუდარებოდა

მამას, ურჩევდა მოურავთან შერიგებას, მაგრამ ვერაფერს გახდა. ნუგზარმა ხელმეორედ მიუგზავნა ედიშერ და გამოიწვია სააკაძე ხმალში.

მაშინვე ჩაეგება მოხუცს იარაღასხმული სააკაძე. ხელჩაკიდებით მიჰყვებოდა თამარ, უკან მისდევდნენ შეიარაღებული ორთავ პაპუნა ოცი ვაჟკაცი. ყველას სახეს ეჭლო სიღინჯე და განწირულება. მოურავი მიუახლოვდა ნუგზარს, ჰკადრა მამა-შვილს მდაბალი სალამი, აიხსნა იარაღი და დააწყო მათ წინაშე ამ სიტყვებით:

— არავის დიდო ბატონო ნუგზარი არ შემფერის თქვენთან ხმალში გასვლა პირველ მით, რომ ხნოვანებით მამად შემფერიტ და პატივს ვსცემ თქვენს ჭალარას, ხოლო მეორე მით, რომ მამა ბრძანდებით ჩემი სატრფოსი... არ შემფერის აგრეთვე ბრძოლა არც გმირ ზურაბთან, ვინაიდან ძმად ვართ შეფიცულნი და თანაც ძმაა თამარის. ესდებ ამ იარაღს თქვენდა წინაშე, მასთან გენუკვით შეგვირიგოთ და გვეოთ ბედნიერ მე და ასული თქვენი, ან იხმაროთ ძალა თქვენს წინაშე მდგარ უიარაღო მოკეთეს მიმართ.

თქვა ეს სიტყვები დიდმა მოურავმა და ვით მარმარის ლუში ქანდაკი, იდგა მღუმარედ მოხუცის წინაშე ხელდაჭლობილი.

ბრაზმორეულმა ნუგზარმა იშიშვლა ხმალი.

— არ შეგარჩენ, მოურავო, ჩემს შერცხვენას! თუ ვაჟკაცი ხარ, აიღე ხმალი და გავუსწორდეთ ერთიმეორეს!

ამ დროს მოხუც ნუგზარსა და სააკაძეს შორის უეცრივ გაიშალა ქართველი დედის თეთრი მანდილი *.

ქალის მანდილის დანახვაზე შეკრთა ბრაზმორეული ნუგზარ. მიმოიხედა ირგვლივ; მოხუცის მრისხანე თვალებს დაეხატა შემდეგი სურათი:

მის წინაშე დგანან დაჩოქილი, მანდილმოხდილი, ახლად მოსული მეუღლე და თვალცრემლიანი ასული; მათ გვერდით — ცალ მუხლზე დაჩოქილი ორთავე ვაჟი. ყველას სა-

* როცა ქალი მოიხიდა მანდილს და გაშლიდა იარაღ ამოწვილ მოპირდაპირეთა შორის, ესენი მაშინვე შეწყვეტდნენ ბრძოლას და ჩააგებდნენ იარაღს — ამას მოითხოვდა ქართველი ერის რაინდული წესი.

ზეზე კრთოდა ხვეწნა-მუდარა. ამათ უკან კი თავდახრით იდგა გიორგი სააკაძე...

ველარ გაუძლო ზვიადმა ერისთავმა ამ მძიმე სურათს. მოღვა მოხუცის გული. მის თვალებს წასკდა ცრემლი. შორს გადაისროლა ხმალი. დასწვდა, ააყენა მეუღლე, შვილები და აქამდე განუცდელი გრძნობით ჩაიკრა გულში. შემდეგ მიჰგვარა მოურავს თავისი ასული და შეაერთა მათი ხელები. გადაეხვია ორთავეს თვალცრემლიანი, მშობლიური გრძნობით, დალოცა მის წინაშე მუხლმოყრილი შეყვარებულნი, ესენი კი გრძნობით ეამბოვნენ მოხუცის მარჯვენს და აპკურეს უსაზღვრო სიხარულის ცრემლები.

ნუგზარმა მოხვია ხელი სიძე-ქალიშვილს, მიიკრა მკერდზე ორთავენი და საამო ცრემლთა ფრქვევით გასწია დუშეთის სასახლისაკენ. მათ გაჰყვნენ სხვებიც უსაზღვრო სიხარულით აღსავსენი.

არაგვის ერისთავმა მოახდინა განკარგულება და გადუხადა დიდი ქორწილი თავის საყვარელ ასულს და დიდებულ სიძეს.

ამრიგად, სამტროდ მოსულნი მოყვრად შეგროვდნენ ამ დიდ ნადიმზე. ილხენდა მასპინძელი ნუგზარ, ილხენდა დიდი მოურავის მაყრიონი — გიორგის მომხრე ქართლ-მთიელთა რაზმები. დაიკლა ასამდე ცხვარი და დეკეული, გამოცხვა უამრავი პური და ხაბიზგინები, ხოლო ტკბილ-მაგარი კახური საფერავი და რქაწითელი საძი დღე და ღამ აღხენდა მხიარულ სუფრას, რომელსაც ამკობდნენ ბედნიერი ნეფედედოფალი, მასპინძლები და ათასამდე დამხვდურ-მაყრიონი...

VI. შაჰ-აბაზი და ჩიტივან დედოფალი

მეთექვსმეტე საუკუნის ნახევრიდან ირანის სამეფოს სათავეში მოექცა ადერბილერი თათარი ისმაილშაჰი. აქედან იწყება ირანში შიხის, ანუ სეფიდთა, ახალი დინასტია. ამას მოჰყვა მონღოლთაგან დაგლეჯილი, ირანის სახელმწიფოს გაერთიანება და შესამჩნევი გაძლიერება. ზოლო იმავე საუკუნის ბოლო ხანებში ირანის ტახტზე ადის ისმაილშაჰის შვილიშვილი შაჰაბაზ პირველი.

ავიდა თუ არა ტახტზე შაჰაბაზი, მხნედ შეუდგა თურქთა მიერ წართმეული სახანოების დაბრუნებას და ირანის საზღვრების გაფართოებას. ქართლის მეფე გიორგის და კახეთის მეფე ალექსანდრეს ფრიად აშინებდათ ასეთი გაძლიერება ირანისა, რომლის ერთგვარ ხელქვეითობაში იყო აღმოსავლეთ საქართველო, ამიტომ ივერიის მეფენი ჩრდილოეთით იშვერდნენ ხელს და მოსკოვის მეფისაგან ეძებდნენ დახმარება-მფარველობას.

ირანს არავითარი საფრთხე არ მოელოდა არც აღმოსავლეთით და არც სამხრეთით. დიდი ზანია დაემხო მონღოლთა ძლიერება და ურდონი. ერთ დროს მეტად მძლავრი ბაღდადის ხალიფატი იმყამად ქცეული იყო თურქეთის უბრალო სახანოდ და ქიშპობის საგნად. ასეთივე ქიშპობის საგნად იქცნენ მცირე აზიასა და ამიერკავკასიაში მდებარე სომხეთის ყოფილი სამეფო ქურთისტანი და რვა სამეფო-სამთავროდ დაფლეთილი საქართველო.

ამ ლეანასკნელის სამხრეთი ნაწილი, ანუ მესხეთი, თურქებს ეპყრა და ისინი თარეშობდნენ თავისუფლად, ამავე დროს ეძალებოდნენ კოლხეთს. ხოლო საქართველოს აღმოსავლეთ ნაწილს, ანუ ივერიას, ირანი დაპატრონებოდა, ძალით შექპონდა იქ თავისი სჯული და ზნეჩვეულება. ირანის დასავლეთით კი, როგორც ვთქვით, მკვიდრობდა ძლიერი თურქეთი. მან დაამსხვრია მეთხუთმეტე საუკუნეში დიდი ბიზანტია, დაიპყრო მრავალი ქვეყანა და შიშის ზარს სცემდა დასავლეთ ევროპას.

ირანის ჩრდილოეთით კი თვალუწვდენ მინდორ-ველებზე, კასპის, შავი და ბალტიის ზღვებიდან ჩრდილო ოკეანემდე და ურალის ქედგადაღმით ციმბირის უსრულ სივრცეზე იყო გადაშლილი მოსკოვის სამეფო. იგი იმ ხანებში იკრებდა ძალებს და თავისი ფეინის ქვეშ აგროვებდა რუსისა და სხვა ეროვნებათა უამრავ ზალხს. აი ამ ქვეყნის სასწრაფო ზრდა და სამხრეთისაკენ ლტოლვა შიშის ზარს სცემდა როგორც თურქეთს, ისე ირანს. მაგრამ ირანს არ ეშინოდა „ურუსების“, სანამ მისი საზღვრები იყო ყირგიზეთ-ბაშკირეთ-უზბეკისტანის უწყლო, ბიაბანი ვრცელი ველები, კასპის ზღვა და კავკასიონის მაღალი ქედი, რომლის გადმოსასვლელ კარებს იცავდნენ მამაცი ქართველნი და გამაჰმადიანებული მთიელები, ე. ი. ჩერქეზ-ოს-ლეკჩეჩნები. და თუ ივერიის მეფენი გაუღებდნენ იმათ დარილის კარებს, მაშინ წყდებოდა ირანის ბედიც, რადგან ქართლ-კახეთით უჩინდებოდათ რუსებს მოკლე და ადვილად სავალი გზა შუაგულ ირანისაკენ.

ამას საშინლად უფრთხოდა ვერაგი და მრისხანე შაჰაბაზი და ყოველივე ღონეს ხმარობდა, რომ ასეთი მარცხი არ მომხდარიყო. სწორედ ამავე აზრის იყო მისი მეტოქე თურქეთიც, ამასაც ფრიად აშინებდა და აბრაზებდა რუსეთის შეზობლობა შავი ზღვით და მისი შემოსევის საფრთხე ქართველ მეფე-მთავართა მეოხებით.

შეიტყო თუ არა ერთგულ ჯაშუშთა მეშვეობით ივერიის მეფეთა მიმოწერა მოსკოვის ხელმწიფესთან, შაჰაბაზი საშინლად განრისხდა და მაჰმად ფეჰმაბარის წვერი დაიფიცა,

რომ შურს იძიებდა და საარაკოდ დასჯიდა ქართლ-კახეთის მეფეებს. ამისათვის კი შაჰი უცდიდა შესაფერ დროს. იმ ხანად არ ეცალა მას, რადგან ერევანთან ებრძოდა თურქთა სულთანს.

იმავე ხანებში მოხდა კახეთში დინასტიური გადატრიალება; დავით ბატონიშვილმა განახორციელა თავისი განზრახვა, მოაწყო შეთქმულება, შეიპყრო თავისი მამა მეფე ალექსანდრე და ძმა გიორგი, დაამწყვდია ორთავენი თორღას ციხეში და თვითონ გამეფდა. ზოლო გამართლდა ქეთევან დედოფლის წინათგრძნობა: ექვსი თვის შემდეგ მოკვდა დავით; ტახტზე ავიდა ისევ მოხუცი ალექსანდრე.

ეს ამბავიც მაშინვე ჩაუვიდა შაჰაბაზს. მან იმხანად გამარჯვებით დაამთავრა ომი თურქეთთან. შაჰმა იგრძნო, რომ დადგა შურის საძიებლად შესაფერი დრო, რადგან კახეთი ორ ბანაკად იყო გათიშული დინასტიური განხეთქილების გამო.

შაჰმა დიდად დააჯილდოვა საამო ამბის მომტანი შიკრიკი და შეუდგა საქმეს. იხმო მის კარზე აღზრდილი, ადრევე მძევლად წაყვანილი კახეთის მეფის საშუალო ვაჟი, გამაჰმადიანებული კონსტანტინე, მისცა ზუთმეტი ათასამდე საუკეთესო მებრძოლი და გაგზავნა კახეთში ამ სიტყვებით: — „წადი კახეთს, დაიპყარ იგი, მოჰკალ ფიცის გამტენი მამაშენი და ძმა გიორგი, — და კახეთის სამეფო დამილოცნია შენთვის“.

კონსტანტინე ბატონიშვილი გაემართა კახეთს და მოკლე ხანში შეასრულა შაჰის დავალება. ის დაბანაკდა საინგილოში, დაიბარა მამა და ძმა ვითომდა სათათბიროდ.

ივნისის მიწურულთა, კონსტანტინე ბატონიშვილი სპარსთა მხედრობით დაბანაკებულა ქიზიყის ბოლოს, სოფ. ბაზართან. ღამეა, თავის ბანაკში არ სძინავს შაჰის მიერ გამოგზავნილ ბატონიშვილს კონსტანტინეს, იგი ღრმა ფიქრშია წასული.

კონსტანტინემ ვერც კი შენიშნა, თუ როგორ შემოვიდა კარავში მისი ლალა გულბაათ ჰავკავაძე, მშვენიერი სახის ახოვანი მოხუცი.

— შენა ხარ, ჩემო გულბათ? რა იცი ახალი ამბავი? ხომ არ მოსულან გრემიდან დაბარებულნი? — შეეკითხა კონსტანტინე.

— არა ბატონიშვილო! ჯერ არ მობრძანებულა კახეთის მეფე ალექსანდრე.

მხოლოდ მეორე დილით ჩამოვიდა გრემიდან მოხუცი ალექსანდრე მცირე ამალით. მას ახლდა უმცროსი ვაჟი გიორგი. კონსტანტინე ბატონიშვილი მაშინვე მოეგება მამას და პატივით მიიღო თავის კარავში. აქ მამა-შვილს შორის ცხარე კამათი მოხდა — რუსეთთან დაახლოების გამო, შვილი არ იზიარებდა მამის მისწრაფებას და გმობდა მის საქციელს. არა ნაკლებ ცხარობდა მამაც. იგი აღიდებდა მოსკოვის მეფეს და ქირდავდა ვერაჯ სისხლისმსმელს შაჰაბაზს. კონსტანტინე გამოეარდა გარეთ და მისცა მკვლელთ ნიშანი. ისინი შეცვივდნენ კარავში, მოკლეს მოხუცი მეფე ალექსანდრე, მისი შვილი გიორგი და გაელიტეს მთელი ამალი. აღსრულდა ის, რაც სურდა ვერაჯ შაჰაბაზს! შვილმა დავარა მამისა და ძმის სისხლი. კონსტანტინემ გამოაცხადა თავი კახეთის მეფედ.

ელვის სისწრაფით მოედო ეს საზარი ამბავი მთელ ხეთს და უზომოდ აღაშფოთა ხალხი. სცნო ეს საშინელი ამბავი ქეთევან დედოფალმა. ამავე დროს მიიღო შაჰისა და ძმის მკვლელის უსტარი; კონსტანტინე ურჩევდა გაჰკოლოდა მას ცოლად, წინააღმდეგ შემთხვევაში უქადდა სიკვდილით დასჯას. უსაზღვროდ ააშფოთა ეს სათნო ადამიანი კონსტანტინეს მხეცობამ და ურცხვმა თავხედობამ.

ქეთევანმა სასწრაფოდ შეკრიბა კახეთის მღაბიო ხალხის მეთაურნი და დიდებულნი და მიმართა მათ შემდეგი სიტყვით:

— კახეთის ერთგულნი! ხომ ყველას გესმით უღვთო კონსტანტინეს მიერ ჩადენილი მხეცური საქმენი: მის მიერ საკუთარი მამისა და ძმის, — მეფე ალექსანდრესა და ტახტის მემკვიდრე გიორგის, — ვერაგულად მოკლა. მათი ამალისა და კახეთის მრავალ დიდებულთა გაჟლეტა! ესეც არ იკმარა კენმა და იუდამ, მას სწადია ჩემი ცოლად შერ-

თვა და თქვენს სათაყვანო განსვენებულ დავით მევის, ჩემი უბედური ქმრის, სარეცელის წაბილწვა... როდემდე უნდა ვითმინოთ, ძმანო, საზიზღარ მტარვალის მიერ ესოდენ ძალმომრეობა, შერცხვენა და დამცირება! აივსო მოთმინების ფაღლა! დროა, ძმანო, ვიპყროთ მახვილი ხელში და ვიძიოთ შური! დროა დავამხაოთ გალაღებული მტარვალი და მოვსპოთ მისი უსჯულო მხედრობა ერანიდან მოყვანილი! თუ ეს არ ჩავიდინეთ, იცოდეთ, მოგველის აოხრება, ტყვევნა და სიკვდილი. წყეული კაენი და იუდა, რომელმაც გასწირა: საკუთარი მამა და ძმა, შეიღება ხელები მათ უმანკო სისხლში, ვითარ დაგზოგავთ თქვენს უმჯობეს არს, სანამ იგი გამოილაშქრებდეს აქეთ, ჩვენ თვითონ დავასწროთ მას. ძმანო, მეც თქვენთან ვარ მებრძოლა, ვითარ შეფერის ქართველ დედებს ჟამსა განწირვის... მწამს, ძმებო, რომ დიდებული ღმერთი მოგვმადლებს ბრწყინვალე გამარჯვებას! წმ. გიორგი, თეთრ რაშზე მჯდომი, შუბით გაუპობს გულ-მუცელს პირდაღრენილ გველეშაპს, რომელიც მოგრაგნილა სპარსეთის მხრიდან და გვემუქრის ჩანთქმას...

— გაუმარჯოს ჩვენ გმირ დედოფალს! გაუმარჯოს ქართველ დედას! გაუმარჯოს ივერიის ღირსეულ ასულს!!

იგრილა ერთხმად ხალხმა და ალტაცებით გარს შემოერთყა სახელოვან დედოფალს.

— ყველანი მოვდივართ საომრად! მოვდივართ ქვეყნისა და ქრისტეს მტერზე დიდნი და მცირენი! წყეულიმც იყოს, ვინც გვიღალატოს ამ წმინდა საქმეში, ვინც შედრეკს და უკან დაიხიოს! დაემხოს მას ოჯახი! — შესძახა კვლავ აფრთოვანებით ხალხმა.

— გაგვიძედ, დედოფალო, წინ! ხელთ იპყარ ძლევის დროში! სიკვდილი ხალხისა და სარწმუნოების მტერთ! სიკვდილი მტარვალთ!

შესძახეს ალტაცებით კახეთის საუკეთესო სარდლებმა: ქაიხოსრო ომანიშვილმა, დავით ჯანდიერმა, ნოდარ ჯორჯაძემ, ბებურ და ელიშა ვაჩნაძეებმა.

— მოვლივართ ყველანი! ან გავწყდეთ ერთიანად, ან მოვიპოვოთ გამარჯვება! — შესძახეს კვლავ სარდლებმა და შეკრიბეს ორ-სამ დღეში რვა ათასამდე საუკეთესო მებრძოლი. ამ ჯარს გაუძღვა იეთრ რაშზე მოხდენით მჯდომი ოვით გმირი ქეთევან. გაემართნენ ქიზიყისაკენ, სადაც იდგა ბანაკად მამა-ძმის მკვლელი კონსტანტინე თავისი მომხრეებით და ირანის ჯარით.

ბედით განწირული კონსტანტინე ბატონიშვილი ბრძოლის დაწყებამდე მცირე ამალით მიუახლოვდა კახთა ბანაკს ქეთევან დედოფალთან პირადად სასაუბროდ. ამ დროს უეცრად გადმოხტენ ბუჩქებიდან გზის ორივე მხრივ ჩასაფრებული დავით ჯანდიერი და ძმანი ვახნაძენი რამდენიმე საუკეთესო ვაჟკაცი, დაახალეს მამის მკვლელს დამბაჩე-ბი, გადმოაგდეს ცხენიდან და იქვე აკუწეს ხმლით მთელი აქალითურთ.

კონსტანტინეს მოკვლით გამხნევებული ქეთევან თავის მამაცი რაშით ეკვეთა ირანის მხედრობას და გააკლო მუსრი. კახეთი განთავისუფლდა ირანის თარეშისაგან და შვებით ამოისუნთქა. ეს ამბავი მოხდა 1605 წელს.

ეს ბრწყინვალე გამარჯვება ქეთევან დედოფალმა აუწყა შაჰაბაზს და კახეთის მეფედ მოსთხოვა ორი წლის წინ მძევლად გაგზავნილი ბატონიშვილი თეიმურაზ, რომელსაც ახლდა თავისი ლალა შარმაზან ჩოლოყაშვილი.

მიიღო რა შაჰაბაზმა ქეთევანის უსტარი, სცნო კონსტანტინეს დაღუპვა და სპარსთა მხედრობის განადგურება, მის ვაპრაზებას არ ჰქონდა საწლეარი, მაგრამ შეიკავა თავი და მშვიდობიანი გზით არჩია საქმის მოგვარება. მან დაიბარა 13 წლის თეიმურაზ, მიულოცა გამარჯვება და ცბიერად დაუმატა: სწორედ ამის ღირსი იყო მამისა და ძმის მკვლელიო. მისცა შესაფერი დარიგება, დახურა თავზე სამეფო ჯიდა, ჩამოართვა ერთგულების ფიცი, დალოცა და უხვი საჩუქრებით გამოგზავნა კახეთის მეფედ.

გამარჯვებით გალაღებულმა კახეთმა აღფრთოვანებით მიიღო მეფედ ნორჩი თეიმურაზ პირველი, — ეს დავით მეფისა და გმირი ქეთევანის ერთადერთი ვაჟი და ტახტის

კანონიერი მემკვიდრე. საინგილოში შეეგებნენ მას დედა ქეთევან დედოფალი და კახთა დიდებულნი; ზეიმით მიიყვანეს გრემს და აკურთხეს მეფედ ალავერდის დიდ ტაძარში. მცირე ხნის შემდეგ მოჰგვარეს ცოლად ოდიშის ბთაერის დადიანის ასული და ორმოცი დღე იყო მთელ კახეთში გაუთავებელი საქორწინო ზეიმი და ღზინი.

ამავე ხანებში მიიცვალა ქართლის მეფე გიორგი მეათე, რომელიც ადრევე გაიტყუა შაჰაბაზმა ქართველი მხედრობით ერევანთან დასახმარებლად და ნადიმის ღროს მოაწამვლინა ნელი საწამლავით. რამდენიმე თვის შემდეგ ამ საწამლავმა იმსხვერპლა სუსტი აგებულების მეფე. ქართლის ტახტზე ავიდა მისი ვაჟი ლუარსაბ მეორე, გარეგნობით ფრიად ლამაზი და აზოვანი, ხოლო სუსტი ხასიათის და სხვისი სიტყვის დამჯერე.

VII. ორი გვირგვინოსანი

მაისის ბოლო რიცხვებია. აყვავებული კახეთი, ამწვანებული მთები, ზერებითა და ხეხილის ბაღებით შემკული დაბა-სოფლები. ალაზნის გასწვრივ ბიბინებს ნიაგზე პურის ყანები, ყაყაჩოებით შეწითლებული. ცივ-გომბორიდან და შილდა-ყვარელის მთებიდან გიჟძაჟად ჩამორბიან პაწრა მდინარენი, ამირანის ცრემლებად მორაკრაკებენ მთების მკერდიდან ანკარა წყარონი. ტახტი დაუდგამს ფირუზ ცაზე დიდებულ მნათობს, ოქროთი ქარგავს კახეთის ტურფა ბუნებას. საამური დილა იზიდავს გარეთ: დიდსა და მცირეს. ბაღებიდან ისმის ბულბულთა ნაზი გალობა.

ამ დროს გრემის დიდებული სასახლის ვრცელ აივანზე მოჩანს ორი მიმზიდველი სახის მოყმე, მდიდრულად მორთულნი. ერთი უფრო ტანმორჩილი, ჯმუხი და პირტიტველი, 17 წლისა, მეორე-კი — წერწეტა ტანის, ნაზი, 20 წლისა, ახლადაკოვრილი ულვაშებით.

ისინი სხედან თეხმოკეცით, ხალით მოგებულ ლბილ ტახტზე, დაუბჯენიათ მკლავები ოქრომკედლით მოქარგულ ხავერდის მუთაქებზე და ტკბილად მასლაათობენ.

— სწორედ რომ მშვენიერია ეს შენი კახეთი, ჩემო თემურაზ. გრძლად გაშლილი ველი, ზერებით, ბაღებით, პურის ყანებით და სათიბებით აფერადებული, მთა-გორაკები ქოჩორა ტყით დაბურული, მდორედ მავალი დინჯი ალაზანი სიბლავენ მზერას. და ეს ნოყიერი მიწა, დედოფლის

არხით დასერილი, იძლევა ჭირნახულის დოვლათს და სი-
უხვეს. მართლაც რომ სრულიად საქართველოს თვალთა ეს
ტურფა ქვეყანა. თვით კახეთის ხალხი, სიძამაციით განთქმუ-
ლი და ბრძოლაში უპოვარი, ლაღად და მსუყედ გრძნობს
თავსა შენს სამეფოში. სწორედ რომ ბედნიერი ხარ, ბედ-
ნიერი, ჩემო თვისო და მეგობარო! სხვა რაილა გწადს კი-
დევ, თეიმურაზ მეფევ? — წამოიძახა სტუმრად მოსულმა
ქართლის მეფემ ლუარსაბმა და მოხვია ხელი მასპინძელს.

— ერთი რამ მწადს კიდევ, ჩემო ძვირფასო ლუარსაბ!
ბოროტ შაჰბაზის ბრძკალებიდან დასხლტომა და მოწყალე
ძლიერი მფარველის პოვნა.

— შერე, ვინა გყავს ეგეთი, ჩემო თეიმურაზ! თანაც არც
ისე ადვილია ამ მხეცის ბრძკალებიდან თავის დაღწევა...

— თავს კი დავაღწევ, თუ ძლიერი მფარველი და ბატონი
მეყოლა, ჩემო ლუარსაბ.

— შერე, ვინ გეგულვის ასეთი?

— ვინა და დიდი რუსეთი, მოსკოვის ძლიერი მეფე.

— დიდი რუსეთი?! მოსკოვის მეფე?! — გაიკვირვა ლუ-
არსაბმა, — როგორც ვხედავ, შენც პაპაშენის გზას ადგე-
ხარ, ჩემო თეიმურაზ! ფრთხილად იყავ, ფრთხილად! ხომ
კარგად იცი, რომ პაპაშენი, განსვენებული მეფე ალექსან-
დრე, მაგ სახითათო გზამ დაღუპა. — აბა, მამცნე, რით და-
ეხმარა მოსკოვის ხელმწიფე პაპაშენს, როცა გაბრაზებულ-
მა შაჰმა ბიძაშენს კონსტანტინე ბატონიშვილს უბრძანა
მოჰკალ ძმა და მამაშენიო, მანაც, ღვთისაგან წყეულმა, ჩაი-
დინა ეს უსაზღვრო ბოროტებანი! მოსკოვის ხელმწიფეს
კიდეც რომ სწადდეს დახმარება, იმ სიშორიდან ვერ მოგე-
წვდება, ვერას გვიშველის.

— აბა ვიდას მივმართოთ, შენის აზრით, ჩემო ლუარსაბ?
ოსმალეთი კიდევ უარესია ყიზილბაშზე. რვა ნაწილად დაფ-
ლეთილ საქართველოს ეს ორი აფთარი მოსდგომია აღმო-
სავლეთით, სამხრეთით და დასავლეთით, ისინი გვიპირე-
ბენ სჯულისა და ზნე-ჩვეულების შეცვლას, დამონებას. დი-
დი მესხეთი ხომ წარიტაცა სულთანმა და შეუცვალა სჯული,
გაათავრა, ახლა ამასვე უპირებს უბედურ კოლხეთს, ანუ

იმერეთ-გურია-სამეგრელოს და სვანეთ-აფხაზეთს. აქ კი ჩვენ მოგვადგა ლაქუციტა და კულის ქნევით ვერაგი შაპაბაზი და სწადს მთლიანად ჩაგვიგდოს ხელში...

— ნუთუ სხვა გზაი არ მოიპოვება?

— აბა რა გზაი, ჩემო ლუარსაბ? დასავლეთი ევროპა კიდევ უფრო შორსაა ჩვენგან და ვერ მოგვწვდება, მასთან ჩვენსა და მათ შორის გარღუვალ ზღუდედ ჩამდგარა ძლიერი ოსმალები. მან ამ ას ორმოცდაათი წლის წინათ დაამსხვრია ჩვენი მოკეთე და მოკავშირე განათლებული სახელმწიფო დიდი ბიზანტია, დაეუფლა მის ქვეყანასა და ამჟამად შიშის ზარს სცემს ევროპის სამეფოებს: იტალიას, ესპანეთს, საფრანგეთსა და ავსტრიას. აკი მიმართეს კიდევ მათ ჩვენზე ადრე კოლხეთ-ივერიის მეფე-მთავრებმა და სთხოვეს დახმარება! რა გამოვიდა! ჯარების ნაცვლად გამოაგზავნეს პატრები, კათოლიკე ბერები, ლაქუცა ენის მქონენი და ექიმბაშები... აი მათი დახმარება! სხვა ვილაა კიდევ! ვის ძალუძს ჩვენი მფარველობა! არავის, ვარდა თვინიერ რუსეთისა. რუსეთი დიდი, ძლიერი, ჩვენსავით მართლმადიდებელი ქრისტიანე, ამავე დროს ოსმალებისა და სპარსეთის მტერია და მოქიშპე, ამიტომაც გვიპრთებს მასთან დაახლოება და მის ფრთებქვეშ შეფარება. აი ეს არის საქართველოს ერთადერთი გზა! სხვაგვარად კი ჩვენ მოვისპობით, გავნადგურდებით... ამასვე გირჩევ შენც, ჩემო ლუარსაბ. დღესვე დავწეროთ ვედრებითი უსტარი და გავუგზავნოთ დესპანთა ხელით მოსკოვის ახალ მეფე ნიხილს და დიდ ფეშქეშებთან ერთად ვსთხოვოთ დახმარებამფარველობა.

ამ საუბრის დროს აივანზე გამობრძანდა თეიმურაზის დედა, ბრძენი ქეთევან, რაღაც გრავნილით ხელში, მას გამოჰყვა ყურთმაჯებიანი ჩოხებით და მალაყელიანი ჩექმებით ორი უკვე ხანში შესული დარბაისელი; ერთი მათგანი იყო თეიმურაზ მეფის ლალა და მესაიდუმლე შარმაზან ჩოლოყაშვილი, ხოლო მეორე — ლუარსაბ მეფის ლალა შადიმან ბარათაშვილი, ორთავენი ფრიად ცნობილნი ივერიაში თავიანთი ჭკუა-გონებითა და გამჭრიახობით...

დედოფლის დანახვაზე ნორჩი მეფენი სწრაფად წამოიქ-
რნენ და მდაბალი სალამი ჰკადრეს, ხელზე ეამბორნენ.
დედოფალმა მშობლიური გრძნობით აკოცა ორთავეს შუბლზე
და უსურვა დილა მშვიდობისა, შემდეგ დაბრძანდა ტახტზე და
გვერდით მოისვა ორივე მეფე. დარბაისელნი კი ჩამოსხდნენ
ტახტზე მათ პირდაპირ.

— ეგ რა გიპყრიათ ხელთა, საყვარელო დედავ? — შეე-
კითხა ალერსით თეიმურაზ და მიუთითა გრაგნილზე.

— ერანის ბატონის შაჰაბაზის უსტარია, ჩემო ძვირფა-
სო შვილო. ამ დილით მოიღო სპარსეთის ელჩმა სარუხო-
ჯამ, თანაც მოგართვათ ორთავე მეფეს ფეშქაშები.

— ნეტა რას გვამხელს ბებერი მელა?

— სუ! წყნარად, შვილო, ეგრე ნუ ახსენებ ერანის მე-
ფეს. არავინ გაგვიგონოს და არ დაგვლუბოს. შაჰის ჯაშუ-
შებითაა სავსე ეს ჩვენი სამეფო, — ამხილა თეიმურაზს
ოდნავ წყენით და ნელი ხმით ქეთევანმა, თანაც ირგვლივ
მიმოიხედა.

— უმჯობეს არს, დედოფალო, შევიდეთ საიდუმლო
დარბაზში და იქ ვიმსჯელოთ, — ჰკადრა შარმაზანმა.

— სრული სიმართლეა, აგრე აჯობებს, ბატონო, დასძინა
შადიმანმა.

ყველანი შევიდნენ ზომცრო დარბაზში და ტახტებზე
დასხდნენ.

— რას იწერება ცბიერი ყაენი? — კვლავ შეეკითხა დე-
დას დაბალი ხმით თეიმურაზ. — აბა წაგვიკითხე, ჩემო
ლაღავ, — მიმართა შარმაზანს და გადასცა გრაგნილი.

როგორც ქართველი დედის შვილმა, შაჰმა ჩინებულად
იცოდა ქართული ენა. იგი ქართულად სწერდა ივერიის
ორთავ მეფეს:

„მე სრულიად ერანისა, ერაყისა, ქურთისტანისა, რან-
შირვანისა და ივერიის დიდი ბრძანებელი შაჰაბაზ პირვე-
ლი, მიეუწერ ამა როჰიჯსა ჩემს ერთგულ მეფეებს
ქართლისასა ლუარსაბს და კახეთისას — თეიმურაზს,
უსურვებ ორთავეს ხანგრძლივ და ბედნიერ სიცოცხლეს
თავიანთ მშვენიერ სამეფოითურთ.

ჩემო ერთგულო ლუარსაბ და თეიმურაზ! მე, ხდომოსავე-
ლეთის დიდმა ბრძანებელმა, გადავწყვიტე თქვენ ორთა-
ვესთან დამოყვება. მწადის თქვენ შორის ძმური და
მეგობრული კავშირი. მსურს შევიერთო ცოლებად თქვე-
ნი დები, დანი ორთავ მეფისა; მასთან ერთად დაგამოყვ-
როთ ურთიერთშორის და მწადის ახლად დაქვრივებულ-
მა თეიმურაზმა შეერთოს ცოლად ლუარსაბის მეორის
და. ამ სახით, თქვენ, ივერიის მეფენი, გახდებით ჩემი
ცოლისძმანი, ხოლო თეიმურაზი კიდევ ქვისლიც. ამიე-
რით მე, შაჰაბაზ დიდი ვიქნები თქვენ ორთავე მეფის
სიძე, მამა და მფარველი. თქვენ მიიღებთ ჩემგან დიდ
ფეშქაშებსა და შელავათებს. ჩვენ სამნი ერთად გავხდე-
ბით ურთიერთშორის მოყვრობით და მეგობრობით მტკი-
ცედ დაკავშირებულნი, რითაც შიშის ზარს დავსცემთ
სამნი ერთად ჩვენსა და თქვენს სამეფოთა მტრებსა და
ღუშმანებს.

ეს მაღალი აზრი მაგონეს დიდმა ალაჰმა და მისმა ფე-
ჰამბარმა, — იკურთხოს უკუნისამდე მათი სახელი, და
მწამს, რომ ორთავ მეფენი სიხარულით მიიღებთ დიდი
ერანის მბრძანებლის მოყვრობას და მეგობრულ კავშირს“.

ამ უსტარის წაკითხვის შემდეგ მცირე ხნით ჩამოვარდა
სამარისებური სიჩუმე. იქ დამსწრეებმა ერთმანეთს გადა-
ხედეს. სიჩუმე თეიმურაზმა დაარღვია.

— ხედავთ, ბატონებო, რა ხაფანგს გვიგებს ერანის ბე-
ბერი მელა? სწადს ჩვენი შებორკვა, ჩვენი ხელში დაჭერა.
მას ფრიალ აშინებს ივერიის დაახლოვება დიდ რუსეთთან,
ჩვენი მეგობრული კავშირი მოსკოვის მეფესთან. ეს ადრე-
ვე ვიცოდი. ხომ გახსოვს ჩემო ლალავ, რა სიტყვით მომ-
მართა, რა დარიგება მომცა შაჰმა, როცა დამადგა თავს
გვირგვინი და გზზავნიდა კახეთის მეფედ; იყავ მულამ ჩემი
ერთგული და ერიდე იმ სახიფათო გზაზე სელას, რამაც
დალუპა პაპა და ბიძაშენიო... ახლა მოყვრობას გვიპირებს.
რათა გაგვიხადოს თავისი ერთგული, მონა-მორჩილნი.

— ნუ ცხარობ, შვილო! დამშვიდდი... ამეამად ყველამ
უნდა მოვიკრიბოთ გონება და დინჯად განვიხილოთ დიდი

ყენის წინადადება, — წარმოსთქვა წყნარად ქეთევან დედოფალმა და გადახედა იქ დამსწრეთ. — აბა რას გვირჩევთ, ჩვენო ერთგულნო, სიბრძნით სავსენო შადიმან და შარმაზან? — შეეკითხა ქეთევან.

— თვით დიღო ბრძენო და გონებასრულო დედოფალო! ჩვენ რაილა მოგახსენოთ, ოდეს თქვენ თვით უკეთ უწყით, რომ შაჰაბაზს უარი არ ეთქმის, უარით უზომოდ გაფარისხებთ ერანის მეფეს და ჩვენს ქვეყანას დავატებთ თავზე მის საშინელ რისხვას; — წარმოსთქვა დინჯად ბარათაშვილმა.

— ამას უნდა დავსძინოთ, რომ დიდებული შაჰის მოყვრობა და მეგობრობა ცუდი არ იქნება ქართლ-კახეთისათვის, — დაუბრუნა თავის მხრივ ჩოლოყაშვილმა.

— მეც მაგ აზრისა ვარ, ბატონებო! ხოლო თქვენ რას იტყვიან, ივერიის მეფენო? — შეეკითხა ქეთევან დედოფალი.

— ჩემი აზრი ასეთია: უსათუოდ უნდა მივიღოთ ერანის მბრძანებლის მომართვა და დავიმოყვროთ ორივე მეფემ. ხოლო რარიგად უნდა მოხდეს მე და თეიმურაზის დამოყვრება, ეს კი აღარ ვიცი: ჩვენ ხომ ნათესავნი ვართ ერთმეორის! — წარმოსთქვა ლუარსაბმა.

— მართლმადიდებელი ეკლესია სცნობს ნათესაობას შვიდ მოდგმამდე, თქვენ კი ურთიერთშორის მეექვსე მოდგმამდე ხართ მოსულნი. მაშ შესაძლებელია დამოყვრება, თუ კათალიკოსი დაგრთავთ ნებას, — წარმოსთქვა შადიმან.

ამ თათბირის დროს თეიმურაზ დუმდა, არ იყო უარს დამოყვრებოდა ქართლის მეფეს.

მცირე კამათის შემდეგ დაასკვნეს ასე: შაჰაბაზისათვის კავებადნათ მეუღლედ დიდი მაყრიონითა და მზითვით ლუარსაბ მეფის უფროსი და ელენე (ლეილა) და თეიმურაზ მეფის უფროსი და გულსუნდა. ხოლო თეიმურაზს უნდა ეთხოვა ცოლად ლუარსაბის უმცროსი და ხორეშანი. რაც შეეხება მოსკოვთან მიმოწერას და დესპანთა გზავნას, დაადგინეს შეეჩერებინათ საქმე.

ყველანი საკმაოდ კმაყოფილნი გავიდნენ აივანზე. სადაც უკვე გაეშალათ ნაირ-ნაირი ნამზადებითა და საუკეთესო ღვინოებით აფერადებული სუფრა. სტუმრებს მასპინძლობდა ქეთევან დედოფალი, იგი იჯდა ოქროს სევანზე სუფრის თავში. მის გვერდით ისხდნენ ივერთ მეფენი: მარჯვნივ — ლუარსაბ, მარცხნივ კი თეიმურაზი. ზქვე მოიწვიეს და საპატიო ალაგას დასვეს შაჰაბაზის ელჩი სარუხოჯა, რომელმაც ჩინებულად იცოდა ქართული ენა. სუფრაზე დედოფალმა აუწყა დესპანს, რომ ყველანი უზომო სიხარულით ეგებებიან ირანის შაჰის ამგვარ სურვილს და კმაყოფილნი არიან, რომ დაუნათესავდებიან შაჰაბაზს, ეგებ ამ გზით მაინც ალიკვეთოს მტრობა ირანისა ჩვენს მიმართ, — სთქვა დედოფალმა და სავსე ფიალით შესვა მისი სადღეგრძელო.

ყველანი წამოდგნენ და ყანწ-აზარფეშებით შესვეს წარმოთქმული სადღეგრძელო. ამ სადღეგრძელოს დაერთო კახური „მრავალყამიერ“, ყარალაშვილთა მიერ შესრულებული, ამას მოჰყვა „სუფრული“, „მუმლი მუხასა“, „ქართველო, ხელი ხმალს იყარ“. „ვახტანგ მეფე ღმერთს უყვარდა“, „გუშინ შეიღნი გურჯანელნი“ და სხვა მრავალი გალობა. გაჩაღდა ლხინი, რასაც უწყობდა ხელს მხიბლავი მანისი და პატარძალივით მოკაზმული კახეთის მშვენიერი ბუნება, სუფრაზე მსხდომთ თვალწინ ფართოდ გადაშლილი.

ღვინით სავსე ფიალით წამოდგა ესოდენ პატივით წაქეზებული ირანის დესპანი სარუხოჯა, მძიმედ მოხარა ქედი დედოფლისა და ორთავ მეფის წინაშე, შეაქო ისინი მოთაფლული სიტყვებით ქართულ-სპარსულად, გადაუხადა მადლობა თავისი მბრძანებლის ნაცვლად, უსურვა სიკეთე. ბედნიერება და სიამით შესვა მათი სადღეგრძელო. ყველამ ფეხზე ადგომით აღღეგრძელა დედოფალი და მეფენი, რასაც დაერთო საამო ჰანგებად კახური „მრავალყამიერ“ და ნაირნაირი სუფრულეები.

გამხიარულდა სუფრა, სტუმარ-მასპინძელნი მოხდენით ესროდნენ ერთმანეთს ზმებს, შაირებსა და რუბაიებს, კაფიად თქმულებს. ამ ვარჯიშში ყველას სჯობნიდა ლექს-
5. ს. ქვარიაანი.

შაირებში ფრიად დახელოვნებული თეიმურაზ, რაც დიდად ახარებდა ქეთევანს.

„ის ძვირფასი თვალი არის, შემკობილი მურასიო, კახეთისა ტახტს ამშვენებს მეფე თეიმურაზიო“
ესროლა კახეთის მეფეს შადიმან ბარათაშვილმა.

„მოშაირქდ ვარგებულა, ბრძოლაში ხომ ვაყვაცია!
მე კი ვიტყვი გულახდილად: შადიმანი მამაცია“.

უპასუხა კაფიად თეიმურაზმა.

დიდი აღტაცება გამოიწვია სუფრაზე ორივე ლექსმა, განსაკუთრებით თეიმურაზის შაირმა. შადიმან ბარათაშვილმა ამაყად ასწია თავი და გადახედა სუფრას. ნანობდა გულში, რომ ამ სუფრაზე არ იყო მისი ხმლის დამწუნებელი დიდი მოურავი და არ ისმენდა მეფის ბაგეთაგან თქმულს მის ქებას.

„გულადია და დინჯია, მეფის ლალა შარმაზანი,
გაჯიუტდა, — მას ვერ დასძრავს თვით ერანის

ზარბაზანი“...

გადუსროლა თავის ლალას თეიმურაზმა კაფია ლექსი, რამაც გამოიწვია სიცილი და აღტაცება.

ამ შექებით გათამამებულმა თეიმურაზმა მიმართა თავის დედას — ქეთევანს და მეფე ლუარსაბს ასეთი შაირებით: — ის ნაზია, მშვენიერი, ვით ვაზნარის ხეივანი,
ბაგეთაგან შარბათი სჩქევს, ტკბილი სიტყვის

შადრევანი,

ვერსალ ვბოვე მისი დარი, მოველე ერან-ერევანი,
სათნოების ემბაზია ბრძენთა-ბრძენი ქეთევანი.

„მსურს ვაჟღერო ჩანგი, ქნარი და შევაქო

ლუარსაბი,

სრულად... ქართლის ჩაუქ მეფეს მსურს შევასხა

ხოტბა, რაბი...

გახურებულ ბრძოლაშია არ შეიხრის მისი წარბი,
ვერ გაუძლებს... იმას ომში

ვერც თურქი და ვერც არაბი“.

ამ ორმა შაირმა კიდევ მეტი აღტაცება გამოიწვია დამსწრეთა შორის. ითქვა კიდევ ბევრი ზმა და შაირი.

სარუნოჯაც არ ჩამორჩა სხვებს, მანაც წარმოსთქვა ორი რუბია. შემდეგ დაუკრეს თარი, გაისმა სპარსული შიქასტაბაითი, ბოლოს კი გაიმართა ლეკური, დავლური და მირზაია; აცეკვდნენ თეადნი და თვით ჭაბუკი მეფენი.

განსაკუთრებით მოხდენილად ცეკვავდა წერწეტა ტანის ლუარსაბი.

ნადიმი სამხრობამდე გაგრძელდა და დამთავრდა ჯირითით, ნიშანში სროლითა და ჭიდაობით.

VIII. ცხირეთი და ტაშისკარი

გავარდა ხმა: თურქთა სულთანი დიდ ლაშქარს გზავნის ივერიაში. ამ ჯარებს უნდა დაეპყრო პირველად ქართლი. შემდეგ კახეთი, ამრიგად, სულთანს სწადდა მთელი საქართველოს ხელში ჩაგდება, რადგან დიდი ხნით აღრე მის მბრძანებლობაში იყო კოლხეთი და მესხეთი. ივერიას-კი, როგორც ვიცით, ეპატრონებოდა ირანი, ამ დიდმნიშვნელოვანი კუთხის ჩამოცლით-კი სულთანს სწადდა სამაგიერო გადაეხადა შაჰაბაზისთვის და დაესუსტებინა ირანი. ამ მიზნით მან გამოიყენა ყირიმის ბატონი სათარხანი. რომელიც აღრევე გაიწვია დიდი ჯარით ალეპოში ირანის წინააღმდეგ.

სწორედ ეს სათარხანი 30.000 საუკეთესოდ შეიარაღებული კაცით მოულოდნელად შეიჭრა ქართლში. ეს მოხდა 1609 წლის ზაფხულში.

აეშაგთა ჩვენებით, მტრის ჯარი ახალციხიდან უნდა შემოსულიყო ქართლში. გზების შესაკრავად საკმაო ჯარით გაგზავნეს კიდევ ორი სარდალი — ზაქარია და იარალი (მათი გვარები არ არის დაცული მატჩიანეში). ნამდვილად კი სათარხანი შემოიჭრა ყარსიდან, ხოლო მოწინავე რაზმები: სასწრაფოდ გამოგზავნა თრიალეთის გეზით ცხირეთისაკენ, სადაც 'იმ დროს საზაფხულოდ იყო მეფე ლუარსაბი მცირე ამალით. ამ მოწინავე ჯარმა გადმოვლო საბარათიანო, მანგლისი და მიაღვა სოფ. ქველთას. თათრები გზადაგზა აწიოკებდნენ ქართველ მოსახლეობას და ართმევდნენ სარჩოს.

სალამო ეამს ქველთასთან მტრის მოწინავე რაზმებს შეეფეთა. თევდორე მღვდელი. სტაცეს მას ხელი, და გაიგდეს წინ ეტიკად, ცხირეთისაკენ მოკლე გზის მაჩვენებლად.

მტრის რაზმებში მომწყვდეული თევდორე პირველად შეერთა და დაიბნა, ხოლო მალე მოვიდა გონს და გაიმაგრავალი. მან გადაწყვიტა გაეწირა თავი სამშობლოსათვის, გზა კვალი დაებნია შემოსული მტრისათვის, თუმც კარგად უწყოდა, რომ ასეთი ოინის გამო ტანჯვით სიკვდილი მოელოდა.

„ბევრ ღირსეულ ქართველს გაუწირავს თავი ქვეყნის საკეთილდღეოდ, დეე, მეც, უღირსი მონა ღვთისა, ვიყო ერთი მცირედი მათ შორის! ნუ ამირევს გონებას მტრის სასყიდელი, ნუ გამხდის ლაჩრად შიში! ნუ გავხდები მეფისა და ერის მოღალატე! შევალავ უღრან ტყეში ამ ურჯულეობებს, ავურევ გზაკვალს, მანამ ჩვენებიც გაიგებენ ამათ შემოსევას და დახედებიან მომზადებულნი“.

ასე ბჭობდა გულში ხალხის ერთგული თევდორე. მან გადახედა შემოსეულ მტრებს და შეუძღვა იქვე უსიერ ტყეში.

დიდხანს ატარა ეს დაუპატიებელი სტუმრები ტყესა და ღრეში კუნაპეტ ღამეს. ბევრი ღრო დააკარგვინა მათ ამ ხეტიალში. ბევრს ეწვალნენ, მაგრამ ვერ გავიდნენ სწორ გზაზე. ტყეს ბოლო არ უჩანდა. მტერი მიუხვდა ღალატს თევდორეს, სტაცეს ხელი, საშინლად გვემეს თოფის კონდახებით, გაუხეთქეს თავპირი, დაცხრილეს წვეტიანი შუბებით, მოკლეს წამებით ეს ღირსეული მამულიშვილი. მისი უსულო გვამი ხევში გადისროლეს მგლებისა და ყვავყორნების სახრავად.

ამრიგად ემსხვერპლა თავის სამშობლოს თევდორე; მოკვდა იგი წამებით ივერიის მტერთა მიერ. ხოლო ამ სიკვდილით მან ააცდინა მეფეს ტყვეობა, იხსნა აოხრებისაგან მთელი ქართლი და ათასობით ტყვეობა-გაყლეტისაგან თავისი მოძმენი.

მოწინავე ჯარმა, როგორც იქნა, დააღწია თავი უდაბურ ტყეს, გავიდა სამშვიდობოს, დაადგა სწორ გზას და

მიადგა ცხირეთს. თეზმის ხევიდან მტკვრამდე, თითქმის ოცი ეჯის მანძილზე, მთელ ვაკეს მოედო მტრის ჯარი. იგი თანდათან მატულობდა. მას ემატებოდა სათარხანის მთავარი ლაშქარი.

დილით ადრე ცხირეთში მეფის საზაფხულო სასახლის აივანზე გამოსული ორი დიდებული ზის ტახტზე და მუსაიფობენ.

— ბატონო შადიმან, ხომ არაფერი ცნობა გვაქვს იარაღისაგან?

— ჯერ არაფერი, ბატონო ფარსადან. ვფიქრობ ტყვილა დაჰყარეს ხმები თურქთა შემოსევის შესახებ. ახლა იმათ ჩვენთვის არა სცხელათ. ალექოს სულთანის აჯანყებას ნუ ეხუმრები. განა ასე ადვილად დააცხრობენ? შეუძლებელია.

— „შენ პირს შაქარი, ბატონო შადიმან. ხოლო რაღაც არ მჯერა, დაბეჯითებით ამბობენ, ყირიმის ხანმა სათარმათაისი მამაცი ჯარით იერიშით აიღო ალექო და ახლა საქართველოზე მოდის ყარსით, რათა დაიპყროს მთელი ივერია, ხოლო აქედან სამხედრო გზით დაბრუნდეს ყირიმშიო.

— აბა ვინ მოიღო ასეთი უცნაური ხმები?

— ვინ და გასპარაშვილმა. მან ხომ ყველაფერი იცის, დიდი სოვდაგარია და სტამბოლთან აქვს მიმოწერა.

— შეუძლებელია, ჩემო ფარსადან! ლუარსაბ მეფის მასხარას განა რამე გამოეპარება! მისი მკვიდრი ძმა ახალციხის ფაშასთანაჲ და ის ატყობინებს ყველაფერს. იქიდან კი არაფერი მოსულა.

— აბა ვინ დაჰყარა ეს ხმები?

— არ ვიცი კარგად. შეიძლება განგებ ჰქნეს, რაიმე მიზნით, ეს კია, რომ სპასპეტმა მოურავმა სასწრაფოდ გაგზავნა დასაზვერავად და გზების შესაკრავად იარაღი და ზაქარია ათასი კაცით.

ამ დროს მოიბრინა იფრინდამ გულის ხეთქებით და ამოსძახა ქვემოდან:

— ბატონებო, თათრები თავს დაგვესხნენ. ცხირეთისაკენ მოდიან... თავს უშველეთ...

— ვინ გატყობინებს — შეეკითხა აღშფოთებით შადიმან ბარათაშვილი.

— ზაქარიამ და იარალიმ გამომგზავნეს, ბატონო. ორთავე სარდალი ფეხდაფეხ მოსდევს მტერს. თათრები თურქე სხვა გზით წამოსულან; გვერდით ჩაგვიარეს. ახლა თეზმის ხეობით მოდიან.

ამ დროს გამოვიდა აივანზე აბრეშუმის ჯუბის ამარა წერწეტა ტანის ჭაბუკი და შეეკითხა შადიმანს:

— რა ამბავია, ჩემო ლალავ? რა. ცნობა მოგიტანა მაგ მოყვემ?

— ვერ არის კარგი ამბის მომტანი, მეფევ! თათარი შე-
მოპარულა ქართლის საზღვრებში... მტერი თავს გვესხმის.
უკვე მოდიან ცხირეთზე თეზმის ხეობიდან...

ძოახსენა ლუარსაბს გაფითრებულმა შადიმანმა.

— მართლა?! რა ექნათ ახლა? რა გვეშველება?! — წამო-
იძახა ქართლის მეფემ.

ამ დროს აივანზე გამოვიდნენ ქვრივი დედოფალი, ლუ-
არსაბის დედა თამარ რამდენიმე დიდებულის თანხლებით.
გაიხედეს თეზმისაკენ. მთელი ხეობა გავსებულიყო მტრის
ჯარებით.

ამ სანახაობამ შიშის ზარი დასცა მეფესა და დიდებულთ.
ყველანი გაფითრებულნი და ენაჩავარდნილნი შესცქეროდნენ
ერთმანეთს.

ამ დროს სასახლის ეზოში შემოაჭროლა შავი მერანი
გოლიათის აღნაგობის ვაჟკაცმა. იგი სწრაფად გადმოხტა
ცხენიდან და ავიდა აივანზე.

— გვიშველეთ, მოურავო! გვიშველეთ ჩვენო დიდებუ-
ლო სპასპეტო! მტრები შემოგვსევინან! ვილუბებით! გვიშ-
ველეთ! — ერთხმად მიიძახეს ახლად მოსულს მეფემ, ქვრი-
ვმა დედოფალმა და დიდებულებმა.

— არხეინად ბრძანდებოდეთ, მეფევ, დედოფალო და
დიდებულნო! ღმერთია მოწყალე მშვიდობით დავალწევთ
თავს გაჭირვებას! ერთი საათით ადრე გავიგე ყველაფერი
და მივიღე კიდევ საჭირო ზომები. უკვე ვაფრინე კაცები,
სასწრაფოდ დავიბარე ჯარებით იასე და ნუგზარ ერისთავე-
ბი, მუხრან ბატონი, ზაზა და ბაადურ ციციშვილნი, ამირა-

ჯიბ-ხერხეულიძენი და სხვა დიდებულნი. აქაც გვეყავს ორ-სამდე გუშაგი. კავთისხევში კიდევ ხუთასამდე კარგად გაწვრთნილი გლეხთა ჭაბუკნი, ამდენივე ლამისყანასა და ტირიფონანზე. მალე შეგვიგროვდება ორიათასამდე მეომარი, ხვალ დილით კი მოგვეშველებიან დიდებულნი და აზატი გლეხნი ხუთიათასამდე საუკეთესო მებრძოლნი. ასეთი მამაცი რაზმით კი სასწაულებს ჩავიდენტ, — უპასუხა დინჯად გმირმა სააკაძემ.

— აბა რას გვიზამს ეს ერთი მუჟა რაზმი მტრის ლაშქრის წინააღმდეგ, რომლის რაოდენობა თურმე ორმოციათას კაცს აღემატება! — წამოიძახა შეშინებით ფარსადან ციცი-შვილმა.

— არხეინად ბრძანდებოდეთ, ბატონებო! ენდვეთ ჩემს სიტყვასა და გამოცდილებას, — უპასუხა დინჯად დიდმა მოურავმა.

— მტრის მოწინავე ჯარი ექვსიათასს აჭარბებს და შენ შვიდასი კაცით გწადს შეებრძოლო? — შეეკითხა დაღვრემით ბარათაშვილი.

— დიახ, ბატონო შადიმან! როცა სხვა გზა არაა, შვიდასი კაცით უნდა შეეუტით და, იმიდია ვძლევთ კიდევ.

— ეგ კი მეტისმეტია, ბატონო მოურავო! შვიდასი კაცით შვიდი ათასის წინააღმდეგ? — წამოიძახა გაოცებით ჯავახიშვილმა.

— აბა სხვაგვარად როგორ მოვიქცეთ, ბატონო ქაიხოსრო! მტერი კარზე მოგვადგა ჩვენს ძილში და გასაქცევი გზებიც კი შეუკრავს. იარალიმ და ზაქარიამ ვერ შეასრულეს თავისი დავალება. მტერმა გზა უქცია. როგორღა უნდა მოვიქცეთ? ხომ არ დავნებდებით ტყვედ! ცხვრებივით ხომ არ ჩაუვარდებით ხელში! ასეთ დროს გვმართებს თავგანწირული შეტევა. ან გამარჯვება უამრავ მტერზე, ან ნამუსიანი სიკვდილი!.. ხომ იცით, ბატონებო, რა ბრძანა დიდმა შოთამ:

„რა გაჭირდის, მაშინ უნდა გონებანი გონიერსა“

აგრეთვე: „ასი ათასსა აჯობებს, თუ გამორჩევით მქმნელია“.

აი სწორედ ახლა გვიჭირს ჩვენა და ახლა გვმართებს გონებანი. სწორედ ახლა უნდა ვეკვეთოთ თავვანწირვით და ასმა უნდა ვძლიოთ ათასს! — უბასუხა შეშინებულ დიდებულთ სააკაძემ და მიუბრუნდა ლუარსაბს:

— თქვენ-კი, მეფე და დედოფალი, ოდნავაც ნუ შეკრთებით, მტერი ვერას დაგვაკლებს. ამ ორ საათში აქ ვარ გაჩენილი ხუთასი საუკეთესო მებრძოლით კავთისხევიდან.

ამ სიტყვებით ის შურდულივით დაეშვა აივნის კიბიდან. მოახტა თავის შავ მერანს და გააქროლა კავთისხევისაკენ.

მართლაც, ორ საათს შემდეგ დიდი მოურავი ხუთასამდე კაციდ ეკვეთა მტერს. პირველად დაეცა თათრების მოწინავე ჯარს, რომელიც მიდიოდა ცხირეთისაკენ მეფის შესაყრობად. დაამარცხა იგი და ცხვრის ფარასავით შერეკა უმთავრეს ურდოში, შიშის ზარი შეიტახა მტრის ჯარში.

ამ დროს მოეშველა სააკაძეს 500 კაცი სახელოვანი ვაჟკაცი ზაზა ციციშვილი. მოვიდნენ თავისი რაზმით ზაქარია და იარალიც. ამრიგად შეგროვდა სულ ორიათასამდე მებრძოლი. ამ მცირე რაზმით მოურავი უნდა შეებმოდა მტრის 30 ათასს მხედარს, თოფზარბაზნებით შეიარაღებულთ, ეს იყო რაღაც ზღაპრული, დაუჯერებელი ამბავი. ამ სურათმა გაამხნევა ჭაბუკი მეფე; ის მივიდა სააკაძესთან და მის გვერდით დადგა საომრად.

დიდმა მოურავმა გადახედა მიდამოს. დაათვალიერა მტრის ბანაკი, მოისაზრა ყველაფერი. როგორ და რა მხრივ უნდა დასცემოდა მათ და შეუდგა საქმეს. მან რამდენიმე ნაწილად გაყო თავისი მცირე რაზმი და შევარდენივით დაეცა თათრებს იმ მხრიდან, საიდანაც ისინი არ მოელოდნენ. საშინელება იყო ეს თავზე დაცემა. როგორც მშვიერი ლომი, ისე ეკვეთნენ მამაცი ქართველნი მტრის ლაშქარს. სააკაძის საარაკო გმირობამ და მედგარმა ბრძოლამ ყველას ჩაუდგა გმირული სული. დიდი მოურავის შეტევა და მკვექარე ხმა შიშის ზარს სცემდა მტრის რაზმებს. ისინი გარბოდნენ მის დანახვაზე. სააკაძე ლომივით ბღღვინავდა მტრის ლაშქარში, იქნევდა ხმალს და აყენებდა სისხლის ღვართქაფს. მის გვე-

რდით იბრძოდნენ ლუარსაბ მეფე და ზაზა ციციშვილი, მშვენიერად იქნევდნენ ხმალს და მიაპობდნენ მტერს.

შეიქნა მედგარი ხელჩართული ბრძოლა. ორიათასი ქართველი უმკლავდებოდა 30 ათას თათარს. ეს იყო უმაგალითო ომი. შედრკა მტერი, ლდაკარგა მხნეობა. ქართველთ კი ემატებოდათ ძალა და სიმამაცე. მათთან თანდათან მოდიოდნენ და მაშინვე უტევდნენ მტერს ქართლის დიდებულნი თავისი რაზმებით. მოვიდნენ ავრეთვე გლეხთა გაწვრთნილი რაზმებით ორი პაპუნა და ლომი ჩრდილელი. მოეშურებოდნენ დასახმარებლად ნუგზარ და ზურაბ ერისთავნი ორიათასამდე არაგველითა და თუშ-ფშაე-ხევსურით, სადაც სასწრაფოდ გაიგზავნა ცარო. მაგრამ არც მტერი იყო ლაჩარი. მას ჰყავდა შესანიშნავი სარდლები. მათ შორის ყველაზე უფრო ირჩეოდა თავისი სიმამაცით ოსმან ფაშა. იგი ყველაზე უკეთ აწყობდა თავის რაზმებს და მედგარად იბრძოდა. ეს შენიშნა სააკაძემ და ზაზა ციციშვილს უბრძანა მისეოდა მას. ზაზა გაექანა ფაშისაკენ თავისი რაზმით. ფაშა მოეგება მას; შეიქნა დავლური ბრძოლა ამ ორ შესანიშნავ ვაჟკაცს შორის. დიდხანს იომეს თავგანწირვით ზაზამ და ფაშამ. ორთავეს სწადდათ ჩაეგდოთ ხელში ერთი მეორეს თავი. ბოლოს ზაზამ აუკრა ხმალი, დაუქნია სწრაფად თავისი ლეკური და ფაშის თავი გაგორდა ძირს. ზაზამ აიტაცა მოკვეთილი თავი, დაიკავა კბილებით მისი წვერი, გააპო მტრის ჯარი და მიართვა მეფეს.

ამ დროს დიდი მოურავი ამხნევებდა თავის ჯარს, შავს არაბულაზე მჯდომი გადადიოდა ერთი რაზმიდან მეორეში, ახდენდა განკარგულებას, გზავნიდა მაშველ რაზმებს იქ, სადაც უფრო უჭირდათ ქართველთ და უტევდა იქ, სადაც უფრო მაგრად იდგა მტერი. ერთი სიტყვით, სააკაძე თავისი გოლიათის აღნაგობით და ლომივით მქექარე ხმით წააგავდა თვით ბრძოლის ღმერთს, მტრის რისხვად მოვლინებულს.

ახლა კი ველარ გაუძლო ქართველთა სიმამაცეს თათრის ჯარმა. ეს ამოდენა ლაშქარი დაიძრა გორისაკენ. მტერს სურდა ჩაეგდო ხელში გორის მაგარი ციხე, რათა ეთარეშა

მთელ ქართლში. ბრძოლით დაქანცულმა ქართველებმა ველარ შესძლეს მაშინვე უკან დადევნება. სააკაძემ აფრინა კიდეც კაცები ჯარის მოსაწვევად. მცირე შესვენების შემდეგ მოურავი დაედევნა მტერს, ხოლო აღრევე შეუტრა თბილისისაკენ წასასვლელი გზები.

გორისაკენ მიმავალ ლაშქარს წინ შეეფეთა ტერ-სააკა, გორელ სომეხთა ტერტერა. ამ გონიერმა ხუცესმა მაშინვე მოისაზრა, რა ხიფათში ვარდებოდა მთელი ქართლი, თუ ხიდზე გავიდოდა მტერი და გამაგრდებოდა გორის ციხეში.

ტერ-სააკამ გააქროლა ცხენი და აცნობა გორელთ საქმის ვითარება, შეკრიბა ხალხი და თითქმის მტრის თვალწინ აყარა ხიდის ფიცრები და ჩაუჭრა ხარისხები. ამრიგად მოესპო მტერს მტკვარზე გადასვლის სახსარი.

ამ მოულოდნელმა ამბავმა თავზარი დასცა მტრის ლაშქარს. რა უნდა ექნათ? ახალი ხიდის გამართვა შეუძლებელი იყო, რადგან გორის ციხიდან გამოსული რაზმი არ მისცემდა ამის ნებას, უკანიდან ხომ თავისი მამაცი ჯარით აწვებოდა სააკაძე. ამიტომ უკან დახევა ვერ გაებედათ, უკვე იკემეს დიდი მოურავის ძალა.

თათრებმა იწყეს მტკვრის პირისპირ შეყოლა, იმ იმედით, რომ ან ხიდს ნახავდნენ, ან კარგ ფონს. ისინი შეკვყვენ ძარცვით საციციანოს სოფლებს და დაიკავეს ბრბონას ვიწროები ბორჯომის ხეობის სათავეში, ანუ ტაშისკარი. აქ გამართეს ფიცრული ხიდი სახლების ნანგრევებიდან და გავიდნენ გაღმა. აქედან კი აპირებდნენ ახალციხეში გაქცევას, თუ დამარცხდებოდნენ, თუ არა და ღია იყო გზა შუაგულ ქართლისაკენ.

ასე ფიქრობდნენ, ხოლო მათი ფიქრი და განზრახვა ჩაუშხამა სააკაძემ. დიდმა მოურავმა სწორედ განგებ მიდენა მტერი ისეთ ალაგას, სადაც სივიწროვის გამო არ შეიძლოთ გაშლა. აქ, ამ ვიწროებში, ადვილი იყო მტრის ჯარის სრული დამარცხება.

ამ დროს სააკაძეს შეუგროვდა უკვე ექვსათასამდე კაცი. ამ შედარებით მცირე ჯარით ის აპირებდა მტერთან ხელმეორედ შეხებას და მის სრულ განადგურებას. მან აღრევე

შეუკრა მტერს გასაქცევი გზები, თვითონ დაუარა ზემოდან თავი და ორი მხრივ დაეცა თათრებს.

თათრები გაებნენ მახეში. იმათ იწყეს თხრილებისა და სანგრების კეთება.

მიუხედავად ამისა, მტერი იმდენად ძლიერი იყო იარაღითა და რაოდენობით, რომ გამოცდილი საუკეთესო სარდლები: ნუგზარ და ზურაბ არაგვის ერისთავნი, შალვა — ქსნის ერისთავი, ზაზა ციციშვილი და სხვა მრავალნი, არ ეთანხმებოდნენ სააკაძეს და ვერ ბედავდნენ ექვსიათასი კაცით 20 ათასი მეომრისაგან შემდგარი მტრის წინააღმდეგ შებმას. მაგრამ დიდმა მოურავმა თავისი გაიტანა. მან დაუხატა მეფესა და სარდლებს თავისი გეგმა, აუხსნა საომარ ადგილთა მდებარეობა და ყველანი დააწმუნა ქართველი ჯარის სრულ გამარჯვებაში.

მთავარსარდლობდა თვით სააკაძე. ის შეუდგა საქმეს. დილის რიყრაქზე აშალა ჯარი და ჩუმად მიიყვანა მტრის სანგრებზე. მოურავმა უბრძანა მეთოფურთ სროლა. სიომ თოფის კვამლში გახვია მტრის სანგრები. ამ კვამლს მიაცოლა სააკაძემ თავისი ჯარი, გადვიდა თხრილებზე მახვილით ხელში და დაერია მტერს.

ასეთ უეცარ თავდასხმას არ ელოდნენ. ისინი შეიპყრო შიშმა. ამავე დროს ეძგერენ მტერს სხვა ქართველი სარდლებიც თავისი რაზმებით. დასცეს ყიჟინა. შეიქმნა ხელჩართული ომი, ომი მედგარი და ულმობელი. მზის სხივებზე ლაპლაპებდა ქართველების ხმალი და შუბი, სიცოცხლეს უსპობდა შემოსეულ მტერს. სააკაძე გულდაგულ აპობდა მტრის რაზმებს და ახდენდა მათში არევდარევას. მის მკვეთარე მახვილს შეჰქონდა შიში და სიკვდილი.

შიშის ზარმა მოიკვა თათრების ლაშქარი. მან ველარ გაუძლო ქართველთა სიმამაცეს და იბრუნა პირი გასაქცევად. გარბოდნენ ფაშები, გარბოდა მტრის მთელი ჯარი; კაცი, ცხენი, ჯორი, აქლემი აირივნენ ერთმანეთში. მტრებმა უპატრონოდ დატოვეს მთელი ბანაკი, მთელი ქონება. გარბოდა ზარდაცემული მტერი, მაგრამ ყოველი გასაქცევი გზა და ბილიკი წინასწარ იყო შეკრული სააკაძის მიერ.

აქ საშინელი რისხვა დაატყდა მტერს, ისინი თითქმის მთლიანად გაიჟლიტნენ. ტყეებში შემალულ მტერს იჭერდნენ მწყემსი ბიკები და დედაკაცები. სამი დღის განმავლობაში ელიტეს და ატყვევეს თათრები, გადარჩა მხოლოდ 12 კაცი. მთელი მათი ბანაკი და ქონება დარჩათ ქართველებს.

ამას შოგვეითხრობენ იმ დროის მწერლები და ისტორიკოსნი. ამ უმაგალითო დამარცხებამ საშინლად გააბრაზა სულთანი; მან განიზრახა ეძია შური. ხოლო იმ ხანად არ ჰქონდა იმდენი ძალა, რომ კვლავ შემოსეოდა ივერს.

სააკაძის გენიალურმა გონებამ მყისვე გაქვრიტა ყოველივე. ის ეძებდა ამ საქმეში მძლავრ მოკავშირეს. ასეთი იყო შაჰაბაზი, რომელსაც დიდი ომები ჰქონდა ოსმალეთთან. ამის გამო დიდმა მოურავმა აახლა დესპანი ირანის შაჰს, ძვირფას საჩუქრებთან ერთად გაუგზავნა დახოცილი ფაშების თავები და მიულოცა ბრწყინვალე გამარჯვება, თითქო ეს გამარჯვება ყოფილიყოს შაჰის ხმლისა, რადგან ის იმჟამად ეპატრონებოდა ქართლსა და კახეთს.

ირანის შაჰს დიდად ეამა თათრების ჯარის ასეთი დამარცხება, ქართველთა ერთგულება, ხოლო იმავე დროს მის შორსგამჭვრეტ გონებას წარმოუდგა სულ სხვა სურათი. ის მზერდა ქართლში დიდებულ მეთაურს, საარაკო სარდალს, რომლის გენიით ძლიერდებოდა სუსტი ივერი და ხდებოდა საშიშარი. მან მოინდომა სააკაძის ხელში ჩაგდება, ისე როგორც ერთ დროს ჩაიგდო ხელში თეიმურაზ მეფის წყალობით კახეთის საუკეთესო სარდალი ადამ ანდრონიკაშვილი.

IX. დიდი მოურავის ნაღიმი

ბრწყინვალე გამარჯვებამ ცხირეთ-ტაშისკართან და უამრავი მტრის განადგურებამ ფრიად შემატა სახელი და ღირსება ერის მოთავეს გიორგი სააკაძეს. პირადი მტრებიც კი აღუმდნენ მის მიმართ, ქართველი ხალხი სომ აღმერთებდა თავის მხსნელს. ლუარსაბ მეფემ ისე დაიხლოვა „დიდი გიორგი“, რომ უიმისოდ ერთ ღღესაც ვერ ძლებდა.

სამი თვის შემდეგ მოურავმა მიიღო შაჰაბაზისაგან დიდი მადლობა თათრების ჯარების განადგურების გამო, თანაც უამრავი საჩუქარი: ოქრო, თვალ-მარგალიტი, ძვირფასი ხალათები და ნოხ-ფარჩეული. ხარობდა გმირის გული, იშვებდა მისი ბედნიერი ოჯახი. ხარობდნენ მისი მეგობარ-ძმადფიცულები. ხოლო ყველაზე უფრო აღტაცებული იყო უიმედოდ შეყვარებული მთიელი მამაცი ქალი ცარო — ვაჟად მოსილი, ის მუდამ თან ახლდა სააკაძეს და ფრიად ისახელა თავი ორთავ ბრძოლაში.

დამშვიდდა ქართლი; შეუდგა მყუდრო შრომასა და ცხოვრებას. ხალხმა გაშალა ფრთები გმირის წყალობით. ველარ აწუხებდნენ მას გარეშე მტრები და შინა მძარცველნი. ყირიმის ხანის დიდი ლაშქრის ერთი დაკვრით განადგურებამ შეაფრთხო სულთანი და ოსეთ-დაღესტანი, ფრიად ჩააფიქრა ირანიც.

ამ დიდი ბრძოლის შემდეგ გავიდა თითქმის ერთი წელი და დილითვე შეიქნა მზადება სოფ. ნოსტეს, გიორგი სააკაძის

კაძის ოჯახში. მშვენიერ ბაღში კაკლებქვეშ მწვანეზე გაეშალათ რამდენიმე წყებად გრძელი სუფრები; ორივე მხრივ დაეფინათ ნოხები; მათზე დაეწყათ ხავერდის ბალიშ-მუთაქები.

სუფრის შუაში ყვავილნარით შემკული მარმარილოს აუზიდან ჩქეფდა წითელი ღვინის შადრევანი; იქვე ეკიდა ვერცხლის თასები და კულა-აზარფეშები. საჯალაბოში უზვად ამზადებდნენ ნაირ-ნაირ საკმელებს ხელმარდი ხაბაზნი. აცხობდნენ თორნეებში შოთებსა და მამიჯვარის ლავაშებს. დიდრონი გოზაურებით ამოღებული ხიდისთავის განთქმული ღვინო ცივდებოდა აუზებში. ყველაფერს სწვდებოდა ორივე დიასახლისის, რძალ-დედამთილის, გმირის დედისა და მეუღლის თვალი და გონება; მათი მეოხებით ჯარასავიო ტრიალებდნენ ფარეშ-შიმუნგარნი.

მეტად მზიარული იყო დიდი მოუტრავი, ის იძლეოდა განკარგულებას, დიდებულ ნადიმს უმართავდა იშვიათ სტუმრებს.

თითქმის უკანადა იქნებოდა. მაისის ფირუზა ციდან მზიარული მზე დანათოდა გაშლილ სუფრას. ცქრიალა სზივები ლალისფრად აელვარებდნენ ღვინის შადრევნის შხეფებს.

კოხტად იყო მორთული ბაღის წინ ამართული ქვიტკირის ვრცელი სასახლე და შვიდსართულიანი თეთრი კოშკი, საიდანაც იშლებოდა საოცნებო სურათებად შუა ქართლი*.

ამ დროს მოისმა საბხედრო სიმღერა. გმირული ჰანგები გუგუნით ეფინებოდა ამწვანებულ მთა-გორაკებს და ზრიალებდა ჰაერში. თანდათან ახლოვდებოდა საამო ხმები. აჰა. გაიღო ალაყაფის კარები და სასახლის ეზოში მოხდენით შემოაქროლა თეთრი მერანი ერთმა ქაბუკმა. იმის ლამაზ სახეს ამკობდა ახლად აშლილი წვერ-ულვაში.

* ეს დიდი მოუტრავის მაღალი კოშკი და მის წინ მდებარე ფართო სიბი, ფიქრის ქვად წოდებული, ჩემი თვალთ ვნახე 1913 წლის ივლისში.

იმჟამად ვიყავ მიწვეული გორის მაზრის ახალქალაქში ვასო თარხან-მოუტრავის მიერ რათა წამეკითხა ადგილობრივ კლუბში ლექცია დიდი მოუტრავის შესახებ და წავიკითხე კიდევ.

...თარხან-მოუტრავები არიან გიორგი სააკაძის შთამომავალნი.

ეს იყო ლუარსაბ მეფე.

მხიარული მასპინძელი მიეგება იშვიათ სტუმარს და ორ-თავენი ძმურად გადაეხვივნენ ერთმანეთს. მეფე ლუარსაბს ახლდა ბრწყინვალე ამაღლა. ამათაც დიდი პატივით მიეგება გიორგი სააკაძე, სასახლის ფართო აივანზე შეუძღვა ძვირფას სტუმრებს. მათ შეეგებნენ დიასახლისნი და თავდაბლად მოიკითხეს. ყველანი დასხდნენ ნოხებით მოფენილ გრძელ მერხებზე. გაიმართა ტკბილი მუსიკა.

სტუმრები თანდათან მოდიოდნენ. ეზოს გარემო აივსო მათი ცხენებითა და შინაყმებით. დიდი მოურავი უმართავდა ნადიმს მთელ ქართლს. აქ იყვნენ მოწვეული თავის ცოლ-შვილით ქართლის დიდებულნი. აქ იყო ცხირეთის გმირი ახოვანი ზაზა ციციშვილი, აქ იყვნენ განთქმული ვაჟკაცი კახაბერ, ალათანგ და პაატა ხერხეულიძენი, ამირაჯიბნი, ამილახვრები, ქსნის ერისთავი იასე, მაჩაბლები, თეიმურაზ მუხრან-ბატონი, ციციშვილები, ჯავახიშვილები, ბარათაშვილები. აქ იყო ძველი ომების გმირი ნუგზარ ერისთავი თავისი მამაცი ვაჟებით. აქ იყვნენ აზნაურნი, საუკეთესო მამულიშვილნი. უხვ მასპინძელს მოეწვია მდაბიო ხალხი, გლეხნი.

მცირე ხნის შემდეგ სტუმრები ბაღში მიიწვიეს.

საუცხოო სურათს წარმოადგენდა ამ ვარდ-ხეხილით შემკულ ბაღში ეს ფერადი მაუდ-ხავერდის კაბა-ქულაჯებითა და აბრეშუმის ჯუბა-შარვლით დართული ვაჟები, ზოლოციდევ უფრო წარბეჭანი იყვნენ ივერთ ასულნი.

ამ ქალებს მასპინძლობდნენ სააკაძის დედა და მეუღლე.

დასხდნენ სუფრაზე. გაჩაღდა ქართული ლხინი, ზჳა და სიმღერა. მუტრიბნი სხვადასხვა საკრავზე შეწყობით გალობდნენ ქართულ ჰანგებს. იქ მოშორებით კვნესდა თარი და აღმოსავლური შიქასტა-ბაიათი. იქვე დუდუკის ხმები ატკბობდა ქეიფს. სუფრებს შორის დაქროდნენ მალხაზი მწდენი და მარდად აწვდიდნენ წვეულთ ღვინით საცხე სასმისებს.

გამხიარულდნენ სტუმრები. მასპინძლის აღტაცებას არ ჰქონდა საზღვარი. ყველაზე უფრო მხიარულობდა სუფრის.

თავში მჯდომარე ჭაბუკი მეფე. მას გვერდით უსხდნენ: მარჯვნივ თვით მასპინძელი დიდი მოურავი, ხოლო მარცხნივ — ნუგზარ ერისთავი. ოქრო-ვერცხლის თასები, ყანწები და აზარფეშები გადადიოდა ხელიდან ხელში. თამადა მოსწრებულად ამბობდა სმურებს. გუგუნებდა ქართული „მრავალყამიერ“ და სუფრულები.

ამ დროს აელერდა სინაზით სიმები და ჰაერში გაიწკრიბა ციურმა ხმებმა. უსაზღვრო სიტკბო და სინარნარე კრთოდა ამ საოცნებო ხმებში. უკრავდა და გალობდა მშვიდნიერი ცირა. უცებ შეწყდა სტუმართა საერთო მუსიკა. შეწყდა სხვა საკრავთა ჟღერა და სიმღერა. ყველანი იქცნენ სმენად და მზერად. ქალწულის გრძნობით სავსე ხმები ყველას სწვდებოდა გულში, ბადებდა უსაზღვრო სიტკბოსა და ნეტარებას. მეფემ მიაპყრა თვალნი მომღერალ ასულს. მის წინ დაისახა იშვიათი მშვენიერება; აქამდე არ ეხილა ლუარსაბს ასეთი სიტურფე, სინაზე და სინარნარე. ატოკდა მძლავრად ჭაბუკი მეფის გული, მან იგრძნო აქამდე განუცდელი ტრფიალი.

აჰა, შეწყდა ზეცის ჰანგები! ხოლო კიდევ დიდხანს იყვნენ ჩუმად იქ დამსწრენი ამ საოცნებო ხმებით გარინდულნი! ბოლოს გაისმა ყოველი მხრიდან მგზნებარე ვაჟა და მოწონება.

ნეტა ვინ იყო ეს ტურფა არსება? ვინ მოხიბლა სტუმრების გული? ეს იყო გიორგი სააკაძის და მაკინე. მისი საოცნებო სიმშვენიერე ცნობილი იყო მთელ ივერიასა და ირანში. მის სიტურფეს ამკობდნენ აღმოსავლეთის მგოსნები, მის მშვენიებას დამღერდნენ აშულნი და მუტრიბნი.

მეფემ მოისურვა მაკინეს ახლოს ხლება და მისი ხელით ღვინის მირთმევა. მასპინძლის ბრძანებით ქალი ეახლა მეფეს, დაიხოქა მის წინაშე მორცხვად და მიართვა ღვინით სავსე ოქროს ფიალა. ლუარსაბმა წყნარად გამოართვა თასი და დალია ქალის სადღეგრძელო, თანაც შესტრფოდა ამ ზეციურ მშვენიერებას. მაკინეს დაეხარა თავი, ტურფა სახეზე გაშლოდა ვარდებად მორცხვობის სიწითლე. ქალმაც მოკრა თვალი ჭაბუკ მეფეს. ატოკდა ქალწულის ნორჩი გული. მან იგრძნო აქამდე განუცდელი სიტკბო და ნეტარება.

ნადიმი დამთავრდა ნაირნაირი ცეკვა-შუშპარით. ლეკური, სამაია, მირზაია, დავლური და ჩეჩნური ცვლიდნენ ერთიმეორეს. მოხდენით დაქროდნენ ხავერდოვან მოლზე ხელგამოღობილი ახალგაზრდები. საზანდრისა და დოლ-სალამურის ხმაზე სრიალებდნენ მათი ფეხები. აგერ უცებ შეინავარდა ეშხზე მოსულ ქაბუქმა მეფემ. მის წერწეტა ტანს და მიმზიდველ სახეს დაშვენდა ლეკური. გაიწვია საცეკვაოდ მშვენიერი მაკინე. ვით ჯეიჩანი ყელმოღერილი, გაუსხლტა ქალი წინ და მომჯადოებელი სინარნარით იწყო გოგმანი. მოცეკვავე ცირას ქუჩუნა თვალები და ოდნავ პობილი პაწა ბაგენი სახავდნენ ზეციურ ამულს. გრძნობით ატაცებული, ზარხოში მეფე შევარდენივით უვლიდა ქალს ირგვლივ და მოხდენით უსვამდა თეთრყელიან მესტებში გაკრულ ფეხებს.

გათავდა ცეკვა. მგზნებარე ტაში და მოწონება იყო პასუხად. აიშალნენ სუფრიდან. ისევ გაიშალა ბალის სხვადასხვა ალაგს კაკლებქვეშ ბალიშ-მუთაქებით მობნეული ნოხ-ფარდაგები და მათზე დამსხდარ სტუმრებს მიართევს ხმელი ხილი, ოქროს სურებით ცივი ვეფინი და შარბათი.

ზოგნიც კიდევ ნუნუას მოტრფიალენი, ისხდნენ მოშორებით და შუშხუნა მწვადების მოლოდინში შესდგომოდნენ ახალ ქეიფს დუღუკის საამო ხმებზე. ხოლო სტუმართა დიდი უმეტესობა მიეზიდა სასახლის წინ ეზოში გამართულ ჭიდაობას ზურნით. ქართლის ზორბა ფალავნები დაეტაკნენ ერთიმეორეს; ღვინით შეხურებულნი არ ზოგავდნენ თავს და აუარება მაყურებელთა წინაშე ცდილობდნენ გამოეჩინათ თავისი ძალღონე, სიმარღე, ხერხი და ფანდები. გაკეთდა მოჭიდავეთა ირგვლივ ფართო წრე. ფალავნებს აქეზებდნენ მათი მომხრე თავადნი და უხვად აძლევდნენ ჯილდოს გამარჯვებულთ. ისმოდა გამხნელება-მოწონების ხმები. ყველანი, დიდი თუ მცირენი, გლეხი თუ თავადი, ერთრიგად შეეპყრო ამ სანახაობას. შელამდა კიდევ, მაგრამ არ თავდებოდა ეს საამო ვარჯიში, ახალი ფალავნებით გაუხოველებული.

მხოლოდ ერთი ქაბუჯი არ იღებდა მონაწილეობას ამ საერთო გატაცებაში. ის ჩუმად განშორებოდა ამ წრეს, წასულიყო ბაღის ბოლოში და იქ, რუს პირად, ხის ქვეშ, ქორთა მღელღოზე მხარეთმცოდნე მწოლარე მისცემოდა რაღაც სანუკუარ ფიქრებს. მისი მგზნებარე ოცნება თავს ევლებოდა მშვენიერ ასულს. ვაჟის წინაშე თითქო გამქრალიყო ყველაფერი: ეს ტურფა ბუნება, რუს ჩქრიალი და თვით ბადრი მთვარე თავისი ნაზი სხივებით. არ ესმოდა არც იქვე ბუჩქში მჯდომ ბულბულის საამო სტვენა. ის გაეტაცა მხოლოდ ერთ ფიქრს, ერთ ოცნებას. ვაჟის გული ჩქროლავდა საამოდ. ნეტა რა იყო ეს? უბრალო გატაცება, თუ სიყვარული? ვერ გაერკვია ქაბუჯს. თვალწინ განუშორებლივ ედგა ქალის ღვთაებრივი სახე, მისი ნარნარა როკვა-შუშპარი; ვაჟის სმენას ახლაც აკრთობდა ტურფა ასულის ხმები. ამ დროს ქაბუჯმა მეფემ თვალი მოჰკრა ეოლოსფერ კაბას, რამაც გაიქროლა შორიახლოს და მიიმალა უსურვაზით დბურულ თალარში. მან მყის შეიცნო ქალი, წამოდგა და გაეშურა მისკენ. მოუარა გვერდით და ფრთხილად შეიხედა ფოთლებ შორის. ქალი იჯდა მერხზე მდუმარე და შეტრფოდა გაბადრულ მთვარეს ცრემლიან თვალებით. თითქო სთხოვდა, თითქო ავედრებდა რაღაცას. მთვარის ციატა სხივები აშუქებდნენ ქალწულის სახეს და იხიბლებოდა უზომოდ. ედარ გაუძლო ქაბუჯმა მეფემ ამ მშვენიერებას და ფეხაკრეფით შევიდა თალარში. ქალი შეკრთა, უნებლიედ შეჰკვილა ოდნავ და წამოდგა. მან დააპირა თალარიდან გასვლა. წინ გადუდგა ქაბუჯი მეფე ანთებული თვალებით.

— სად მიხვალ, მშვენიერო! ვერ გაგიშვებ, ჩემო მხიბლავო ანგელოზო! მიყვარხარ, ტურფავ! ჩემი გული შეუბორკავს შენდამი ტრფობას...

ამ სიტყვებით ლუარსაბმა სინაზით მოხვია წელზე ხელი დარცხვენილ მაკინეს.

— მიბოძეთ ნება გავიდე, დიდებულო მეფევ! ივერიის გვირგვინოსანს არ შეჰფერის ეგზომ დასცინოს თავის უბრალო მხევალს, — წარმოსთქვა ქალმა ოდნავ წყენით და

ფრთხილად გააშვებინა ხელი. ჭაბუკმა მეფემ მოიდრიკა ცალი მუხლი ჭალის წინაშე.

— მიყვარხარ, მშვენიერო მაკინე, ვფიცავ ზენას! მიყვარხარ დიადი გრძნობით, არ ძალმიძს უშენოდ ამ ქვეყნად ყოფნა! მომაჯადოვა უცნაურად შენმა სახემ, შენმა თვალებმა, შენმა სიმღერამ. არ მსურს შენს მეტი ვინმე! შენ უნდა გახდე ჩემი მეუღლე და დედოფალი ივერიისა.

— აბრძანდით, მეფევ! არ შეგფერით მუხლმოყრით ყოფნა მხევლის წინაშე... ნუ მეხუმრებით, დიდო მეუფევ!

— არ გეხუმრები, ტურფავ, ვფიცავ შენს თავს, ასულთა შორის უნაზესო! არ გეხუმრები, ვფიცავ სამშობლოს, შენს თავს, ტურფა ჩემს ივერიას, არ გეხუმრები, ო, ვფიცავ, მზეო, დიდი დავითის, დიდი თამარის და სხვა დიდებულ ჩემ წინაპართა სულსა და ხსოვნას! მიყვარხარ და მწადს გამომყვე ცოლად! მწადს, რომ გაგიყო მეფის გვირგვინი...

— მეფევ, ლუარსაბ, სად ბრძანდებით! — უცებ დაარღვია მყუდროება, ვილაც მოხუცის დანჯღრეულმა ხმამ.

— ღვთის რისხვა შენა! ერთ წუთს არ მაცლის, რომ მართოდ დავრჩე, დავტკბე სიცოცხლით და სიყვარულით — წამოიძახა გაბრაზებით ჭაბუკმა მეფემ.

— ეგ ვისი ხმაა, ვინ გეძახის? — შეეკითხა ნელი ხმით მაკინე.

— შადიმანია, ჩემი ლალა, ჩემი ჯალათი... თან დამდეგს ყველგან როგორც ლანდი, როგორც აჩრდილი!

— მეფევ ლუარსაბ! — ყვლავ მოისმა საკმაოდ ახლოს მოხუცის ხმა.

— აქ ვარ, მოვდივარ! — მიაძახა მეფემ, გამოეთხოვა ჭალს სინაზით და გავიდა თალარიდან.

ქალი-კი კარგახანს დარჩა ფარულ ალაგას მძიმე ფიქრებით გარემოცული.

იმ დღიდან მეფემ მოუხშირა სიარულს მოურავის ოჯახში, აგრეთვე პატიუბდა თვით სააკაძეს ოჯახობით, უმართავდა საგანგებო ნადიმებს. მეფის ასეთი დაახლოება შურით ავსებდა მოურავის მტრებს.

ლუარსაბ მეფე ებრძოდა თავის გულისთქმას, მაგრამ ვერას ხდებოდა. მას უფრო და უფრო იპყრობდა მძლე-

თა-მძლე სიყვარული. ამიერიტ მაკინე იქცა მის სალოცავ ხატად. მეფემ უარი თქვა ოდიშის მთავარ დადიანის ასულზე, რომელზედაც იყო დანიშნული. ამ საქციელით ფრიად ააშფოთა თავისი დედა თამარ და ქართლის დიდებულნი. უახლოესი პირნი შეეკითხნენ მეფეს ამ უცნაური საქციელის მიზეზს. პირველ ხანებში ლუარსაბი იყო მდუმარედ და არ აძლევდა პასუხს არავის, თავის საყვარელ დედასაც კი, რომელსაც სცემდა უსაზღვრო პატივს. ბოლოს გაუმჟღავნა მათ გულის საიდუმლო, აუწყა გადაჭრით, რომ უყვარს მოურავის და მაკინე, უმისოდ სიცოცხლე არ შეუძლია.

ამ ამბავმა თავზარი დასცა ყველას. ბევრი უშალეს ჭაბუკ მეფეს მოეშორებინა თავიდან ეს უცნაური ფიქრი, რომ უბრალო აზნაურის ქალი არ არის მისი საკადრისი, რომ ამით იმცირებს თავს და არცხვენს მთელ სამეფოს. ყოველივე იყო ამაო. მეფის არსება მეტად შეეპყრო მწვავე გრძნობას. იგი ვერ სთმობდა მშვენიერ მაკინეს.

მაშინ შეუჩნდნენ მისი მესაიდუმლენი, შადიმან ბარათა-შვილი და სახლთუხუცესი ფარსადან ციციშვილი, ურჩიეს მეფეს სააკაძის და აეყვანა ხასად და მით მოეკლა ვაჟური ვნება. ლუარსაბმა დიდად იუარა ასეთი უგვანო წინადადება და სასტიკად გაკიცხა ამის მოქმელნი. მას არ სურდა ამ სამარცხვინო მოქმედებით. უაღრესი შეურაცხყოფა მიეყენებინა ივერიის დიდებული გმირის ოჯახისათვის, მასთან ხომ ფრიად დაახლოებული შეიქნა სულიერად. ლუარსაბმა გადაწყვიტა მაკინეს ცოლად შერთვა; ამის გამო გაუგზავნა სააკაძეს მოციქულნი.

ამ ამბავმა უზომოდ შეაწუხა დიდი მოურავი. ის არ მოელოდა ამას. მეფესა და მას შორის ფრიად დიდი მანძილი იყო შთამომავლობით, რასაც უმთავრესი ყურადღება ექცეოდა იმ დროს ყველგან. სააკაძის ძლიერმა გონებამ უცებ განჭკვრიტა საქმის ვითარება, აშკრად მზერდა, რა განხეთქილებას წარმოშობდა ქართლში ასეთი შეუსაბამო დამოყვრება, ან რარიგ ისარგებლებდნენ ამ მოქმედებით მისი მტრები და ამხედრებდნენ ქვეყანას მის წინააღმდეგ. დიდი მოურავი გრძნობდა, რომ ამას მოჰყვებოდა მისი ოჯახისა

და სააკაძიანთ გვარის დაღუპვა. მან უარით გაისტუმრა მეფის მოციქულნი და აუწყა ამის საპატიო მიზეზებიც.

მოურავისაგან უარის შეთვლამ ფრიად გააცხარა ქაბუჯო მეფე. მან კვლავ გაუგზავნა დესპანები და შეუთვალა, რომ უზომოდ უყვარს მისი და, მაკინესაც უყვარს იგი, უერთმანეთოდ სიცოცხლე არ შეუძლიათ, ამიტომ ნუ ურჩობს, ნუ აუბედურებს ორ შეყვარებულ ადამიანს! და თუ კიდევ უარი მივიღე, მაშინ ხმალმა უნდა გადაწყვიტოს საქმე, ან შენი სისხლი უნდა დაიღვაროს, ან ჩემიო.

მეფის ასეთმა შემოთვლამ კიდევ უფრო ააშფოთა მოურავი, იგი მიეცა ღრმა ფიქრს. მძიმედ უღელავდა გული დიდ მამულიშვილს. ეს გული კარგს არას ეუბნებოდა მას. რა უნდა ექნა?! ის ჩავარდა ორ ცეცხლ შუა: უარის თქმით მტრად იკიდებდა მეფეს, თანხმობით-კი მთელი ქართლის დიდებულნი ხდებოდნენ მისი მტრები. ორივე შემთხვევაში გმირს აღარ ედგომებოდა ქართლში. ის უნდა გასცლოდა თავის საყვარელ სამშობლოს. დიდი მოურავი გმობდა თავის უკუღმართ ბედს, კრულავდა იმ დღეს, ოდეს პირველად მოიწვია ნადიმზე ლუარსაბ მეფე და აჩვენა თავისი და. საშინლად სწუხდა სააკაძე; მასთან ერთად წუხდა მთელი ოჯახი. მეფის მოციქულნი კი ურჩევდნენ დათანხმებას, რადგან უარის თქმით საუკუნოდ გადიკიდებდა ლუარსაბს.

დიდ ფიქრსა და ყოყმანს შემდეგ მოურავმა, როგორც იყო, გადაწყვიტა ეს ფრიად მძიმე საქმე და შეუთვალა თანხმობა, მხოლოდ წინასწარ მოსთხოვა დედა-შვილს, ე. ი. მეფესა და ქვრივს დედოფალს, ფიცის სიგელი, რომ ამ ქორწინებით არა-რა ევენებოდათ მას, მის ოჯახს და გვარულობას, არც მის დას მაკინეს; რომ მოურავის პირად მტერთა ენის სისინი ვერ იმოქმედებდა მეფე-დედოფალზე და რაგინდ ლალატი შესწამონ სააკაძეს, ლუარსაბ არ დაუჯერებს მათ.

გაგზავნილმა დესპანებმა ამცნეს მეფეს მოურავის თანხმობა და პირობა. ლუარსაბის სიხარულს არ ჰქონდა საზღვარი. მან მაშინვე გაუგზავნა სააკაძეს ფიცის სიგელი და დაიწერა ჯვარი მაკინეზე ქვათახევის დედათა მონასტერში...

X. ლალატი

საშინელი თავზარი დასცა ლუარსაბ მეფის საქციელმა ქართლის დიდ თავადებს. მოურავეთან მეფის დამოყვრება მათ მიიჩნიეს თავიანთ უზომო დამცირებად და სააკაძიანთ გვარის უსაზღვრო განდიდებად. განსაკუთრებით კი ბრაზობდნენ მათი ცოლები და ასულნი.

— როგორ, ქა! ვილაც სააკაძის გომბიო ვიწამოთ დედოფლად?! უნდა ვეახლოთ და ვემთხვიოთ ხელზე?! ნუთუ ასე დაეცა ბაგრატიონთა დიდებული გვარი?! ნუთუ ასე დაეკნინდით ქართლის დიდი თავადნი? ისიც აღარ გვაკმარეს, რომ ქართლის დიდებულთ თავზე წამოასკუბეს სპასპეტად ვილაც გლეხი, მდაბიო გიორგი სააკაძე, ახლა კიდევ მისი და გახადეს ივერიის დედოფლად! ჰოი, ჩვენო შერცხვენავ! ჰოი, ქვეყნის დამცირებავ! თამარ მეფის ტახტზე ზის თურმე ვილაც გლეხის ნაშიერი! ეს რაღაც დაუჯერებელი ამბავია! ეს ზღაპარია! — გაიძახოდნენ გამწარებით თავადის ქალები, აქეზებდნენ თავის ძმებს, ქმრებსა და მამებს ლუარსაბ მეფისა და დიდი მოურავის წინააღმდეგ.

ამ ქალთა თავმოყვარეობა უადრესად შელახული იყო უმთავრესად მით, რომ ლუარსაბ მეფემ დაიწუნა ისინი, დაიწუნა ოდიშის მთავარ დადიანის ტურფა ასული და ითხოვა ცოლად „ვილაც სააკაძიანთ გოგო“.

— ან ჩვენ, ან გიორგი სააკაძე და მისი და! ან ქართლის დიდი თავადნი, ან სააკაძიანთ გვარი! — გაჰკიოდნენ ისინა.

ქალების ასეთ უცნაურ განგაშს აპყვა ქართლის თავად-აზნაურთა დიდი უმეტესობა. მათ მოახდინეს საიდუმლო შეთქმულება გიორგი სააკაძის წინააღმდეგ. ამ შეთქმულების სული და გული შეიქნენ დიდი მოურავის უძინარი მტრები შადიმან ბარათაშვილი, ქაიხოსრო ჯაფახიშვილი და ფარსადან ციციშვილი.

მოხდა საიდუმლო კრება და თათბირები. დაადგინეს: გააშვებინონ მეფეს, ნებით თუ ძალით, უღირსი მეუღლე და მოსრან სრულიად სააკაძიანთ გვარი. ეს სატანური გეგმა უნდა განეხორციელებინათ მას შემდეგ, როცა მეფე საკმაოდ მოიკლავდა ჟინს.

ამ თავადებს შორის იყვნენ თითო-ოროლა ისეთნი, რომლებიც ურჩევდნენ თავის მოძმეთ ხელი აეღოთ მოურავის ღალატზე, რადგან ამ დიდი ადამიანის დაღუპვით ისინი საშინელ განსაცდელში აგდებდნენ მთელ ქვეყანას.

— ფრთხილად, ძმებო! შესდექით! ნუ აყოლიხართ ქალების სიტყვას და ბრმა გულისთქმას! ნუ ჩაიდნთ ისეთ საქმეს, რაც უსაზღვრო ზიანს მიაყენებს ჩვენს სამშობლოს! ნუ ჩაიდნთ ხალხის საწყენ საქმეს! გიორგი სააკაძისთანა დიდი სარდალი და ქვეყნის ერთგული პიროვნება მხოლოდ ერთი იბადება მრავალ საუკუნეში. გახსოვდეთ, ძმებო, რომ ორი პირდაღრენილი ვეშაპი ემუქრება ჩანთქმას უბედურ საქართველოს: აღმოსავლეთით მძლავრი სპარსეთი, რომლის სათავეში სდგას შაჰაბაზ დიდი, ხოლო სამხრეთით და დასავლეთით კიდევ უფრო ძლიერი ოსმალეთი. შესდექით, ძმებო! ჩააგეთ ქარქაშში შურისძიებით ამოწვდილი მახვილი!“—ამბობდნენ ამ სიტყვებს შეგნებული პირნი.

ამაოდ ჩაიარა ამ გონიერულმა რჩევამ. გააფთრებული თავადნი, მეტადრე კი მათი ცოლშვილი უფრო და უფრო აღვივებდნენ შურისძიების სახმილს და თხოულობდნენ გიორგი სააკაძის სისხლს. ეს ბოროტი და ბეცი არსებანი არად აგდებდნენ ქვეყნის კეთილდღეობას, ოღონდ-კი ბინძური ღალატით აღედგინათ თავისი შებღალული ვიწრო პატივმოყვარეობა.

გადაწყდა დიდი მოურავის ბედი. გიორგი სააკაძის და-
ლუბვით მახვილი ესობოდა გულში მრავალტანჯულ იე-
რიას...

გავიდა მეფის ჯვრის წერიდან ათი თვე და შეუდგნენ
მოქმედებას ბოროტი არსებანი, განსაკუთრებით კი შადიმან
ბარათაშვილი, ფარსადან ციციშვილი და ქაიხოსრო ჯავა-
ხიშვილი; ესენი ასისინდნენ ლუარსაბის წინაშე და არ აძ-
ლევდნენ მოსვენებას, იგონებდნენ დიდ მოურავზე ათას-
გვარ ჭორს, სწამებდნენ მეფის ღალატს და აძულებდნენ მის
თავს. გაჭრა ბოლოსა და ბოლოს შხამიანმა ენამ; მათ ჩაიგ-
დეს ხელში სუსტი ხასიათის ნორჩი მეფე და მოამზადეს
ნიადაგი სააკაძის დასამხოვად.

ავგისტოს მიწურული. კოჯორი. მეფის სასახლე. დილაა.
შეყვარებულნი განმარტოებულან ბაღში, სხედან მერხზე და
შესტრფიან მშვენიერ ბუნებას, რომელიც მომხიბვლელად
იშლება მათ წინ. მიჯნურნი ხან ჩაეკვირან ერთმანეთს
მწვავე სურვილით, ხან ეფიცებიან მარადიულ სიყვარულს.
ქალ-ვაჟის მშვენიერ სახეს აელვარებს უზომო ბედნიერების
შარავანდელი.

— მიყვარხარ, ჩემო ყველავე! ჩემო მაკინევე! ვფიცავ, მეყ-
ვარები საუკუნოდ!

გრძნობით ეუბნება ვაჟი და მწვავედ უკოცნის ქალს მარ-
ჯნის ბაგეს და მომხიბლავ თვალებს.

— მიყვარხარ, ჩემო სამოთხევე, ჩემო სიცოცხლე ლუარ-
საბ! მიყვარხარ, ჩემო მეუფევე გვირგვინოსანო! ვფიცავ შენს
თავს, მეყვარები. სამარადისოდ... მეყვარები, სანამ მიდგია
სული, სანამ ფეთქს ჩემი სიცოცხლის დამარი! — ეფიცება
ქალი და სინაზით უკოცნის მეუღლეს ღაწვებს და აკოკრე-
ბულ უღვაშებს.

ხოლო არ უწყიახ ნეტარების ბურუსში გახვეულ ქალ-
ვაჟთ, რა შხამიანი გველი გუშაგობს მათ. ის წამომჯდარა
სასახლის აივანზე, თვალს არ აშორებს ორ შეყვარებულს.
მისი მოღუშული სახე გაგონებს დემონს, გესლს ანთხევენ
მისი ჭროდა თვალები.

— მალე წაგამწარებ, გლეხის გომბიოვ, მაგ ნეტარებას! მალე წაგამწარებ. მოურავო, ესოდენ თავხედობას, ფარფაშს, ბატონობას! არ შეგარჩენ ჩემს საჯაროდ შერცხვენას! უკვე დგება შენი და სააკაძიანთ გვარის განკითხვის უამი, — ფიქრობს გუნებაში ის და არ აშორებს თვალებს მეფეს და მის ტურფა მეუღლეს.

— სად არიან, ნეტა, ის ოხრები, ქაიხოსრო და ფარსადანი თითქო გუშინ სადამოს უნდა მოსულიყვნენ თავისი რაზმით, — გაიფიქრა კვლავ და გადახედა შარას. შორით გამოჩნდა ორი მხედარი, რომლებიც სწრაფად მოაგელვებდნენ ბედაურებს. ის დააცქერდა კარგახანს. ამ ორ მხედარში იცნო, ვისაც ელოდა.

— მადლობა ღმერთს! მოდიან! — წამოიძახა აღტაცებით და ჩაეგება კიბეზე.

— ბატონ უადიმანს ვახლავართ! — წამოიძახეს ახლადმოსულებმა და გადმოხტენ ცხენებიდან; ისინი ჩამოართვეს გუშაგებმა და გაატარ-გამოატარეს, რათა შეშრობოდათ ოფლი.

— მარტოდ მოხვედით? — შეეკითხა წყნარად სიხინა ხმით უადიმანი, როცა შეიწვია ისინი დაბლა სართულის მცირე სენაკში.

— არა, თან მოგვდევეს ასი რჩეული ვაჟყაცი, იარაღჭურვილნი, წვრილ რაზმებად დაყოფილნი. ამ ღამით იქნებიან ყველანი ჩასაფრებულნი დანიშნულ ადგილებზე.

— კეთილი. ზაალ სადღაა?

— ვერ გეახლათ უქეიფობის გამო.

— ხომ არ იგონებს? იქნებ მოურავის ეშინიან?

— არა, ბატონო უადიმან. ნამდვილ ავად ვახლავთ. ჩვენი თვალით ვნახეთ. თავის მხრივ გამოგვაყოლა ოცდახუთო კაცი. აქ როგორღაა საქმე, უადიმან, კიდევ ჯიუტობს მეფე?

— ფრიად. რარვიად არ შევუჩნდი, ვერას გავხდი, მეტად უყვარს ის შეჩვენებული დიაცი. ახლაც ბაღში სხედან და ალერსობენ.

— მაშ როგორღა მოვიქცეთ? როგორ გავაშვებინოთ ცოლი? რარივ ჩავიგდოთ? ხელში ჩვენი მტერი და შემარცხვენილი მოურავი? — შეეკითხნენ ისინი შეწუხებულნი.

— უნდა მივიტანოთ კვლავ საერთო იერიში, უნდა დავემუქროთ ტახტიდან გადმოგდებას.

— და თუ ამითაც ვერას გავხდით, მაშინ რაღა ვქნათ, მეტადრე თუ ყველაფერი აცნობა სააკაძეს, ხომ დავიღუპებით ყველანი ცოლშვილიანად?

— არა ვგონებ, მანდამდე მივიდეს საქმე. ვცდოთ კიდევ მედგარი იერიში მეფეზე და თუ კვლავ გაჯიუტდა, მაშინ...

— რა მაშინ? — შიშითხენ შადიმანს ორთავენნი.

— ჰო, მაშინ... დავატუსალოთ მეფე, მოვკლათ ნაძალადევი დედოფალი და ამოვწყვიტოთ სრულებით სააკაძიანთ გვარი... ქართლის მთელი თავადობა ჩვენკენაა, ნუგზარ ერისთავის გარდა! ის, ეჭვი არაა, სიძეს დაუქერს მხარს, — წარმოსთქვა ჩურჩულით შადიმანმა.

— არც ეგ თქვენი ბააკა ხერხეულიძეა საიმედო პირი.. ხომ იცით რაებს რომავდა ამასწინათ და გვეჩურჩულებოდა: ხელი არ ახლოთ მოურავსო, არ დაღუპოთ ქვეყანაო. მთელი ქართლის გადამრჩენიაო, უპირველესი ქარდალიო, მაგისტანა კაცი საუკუნეებში მხოლოდ ერთი იბადებოდა და სხვა ამისთანები.

— ეგ მართალია, ჩემო ფარსადან, ბააკა არაა საიმედო, ეს მეც კარგად ვიცი, ხოლო ის ვერაფერს გვიზამს, თანაც არაფერი იცის ჩვენი შეთქმულებისა, — დაამშვიდა შადიმანმა.

ამ საიდუმლო საუბრის დროს ვილაცამ ფრთხილად დააკუნა სენაკის კარი.

— ბატონო შადიმან! მეფე გეძახით, სასახლის აივანზე ბრძანდება, — მოისმა გარედან გუშაგის ხმა.

— ახლავე მოვალ, — მიაძახა შადიმანმა და გავიდა.

მძიმე ნაბიჯით ავიდა კიბეზე და ჰკადრა სალამი ტახტზე მარტოდ მჯდომ მეფეს. შემდეგ ჩამოჯდა იქვე მოფენილ სკამ-ლოგინზე.

— ჩემო ლალავ, რას იტყვი ახალს? — შეეკითხა მეფე მხიარულად.

— შენს მშვიდობასა და დღეგრძელობას, ქართლის მბრძანებლო! — იყო ბარათაშვილის პასუხი.

— რა ისმის სამეფოს კუთხეებიდან? რა ისმის დიდ-მო-ურავისაგან, ჩემი ცოლისძმისაგან?

— კარგი ვერაფერი, მეფევ! ქართლი კვლავ დრტვინავს შენს წინააღმდეგ. იგი დღემდე ვერ შერიგებია თავის ესოდენ დამცირებას, უგვარო დედოფალს. ხოლო მოურავს ლაღად აუწევია ქედი, დასცინის ქართლის დიდებულთ და მბრძანებლობს მთელ სამეფოში; ხალხი მას უსმენს, მხოლოდ მას ცნობს მეფედა და არა დიდებულ ბაგრატიონთა შტოს, კანონიერ გვირგვინოსან ლუარსაბ მეორეს! ლამის ნამდვილ მეფედაც ეკურთხოს; ხმები დადის ასეთი, — გაუტარა გეს-ლიანად შადიმანმა.

— ჰე, დაიწყე ისევ შენებურად! ნუთუ ვერ გაძეხ კი-დევ მოურავის მტრობით! განა რა დაგიშვა ასეთი! მხო-ლოდ ის იყო, რომ არ მოგიწონა მამაჩემის დროს ერევენის ომში ხმლის მკვეთრობა... მას შემდეგ რამდენი დრო გავე-და, რამდენმა წყალმა ჩაიარა, ხოლო შენი გული არ დაცხ-რა და კვლავ ბორგავს შურისძიებით... აბა რას აუტყდი ქვეყნისთვის თავდადებულ ადამიანს! — მიახალა წყენით ლუარსაბმა და წამოდგა.

— არა, მეფეო, ჩემთვის შვილზე უძვირფასესო და ესო-დენ ზრუნვით აღზრდილო! სცდებით. მათქმევეინებს ამეებს შენს წინაშე არა სააკაძისადმი მტრობა და შური, არამედ შენდამი სიყვარული და ერთგულება. როგორც ლალა, მა-მობილი და იმავე დროს ქვეშევრდომი, ვალდებული ვარ მოვახსენო მეფეს სრული სიმართლე, ვამცნო, რა ხდება ირგვლივ იმ ბედნიერ დღიდან, ოდეს განსვენებულმა მამა-შენმა მეფე გიორგიმ და ბრძენმა დედოფალმა თამარმა მცვენეს ყველაზე სანდოდ, კეთილ ინებეს და გადმომცეს აღსაზრდელად შენი თავი, შვიდი წლის ყრმა, დიახ, იმ ბედ-ნიერი დღიდან მივეცი ფიცი თავსა ჩემსა ვიყო მარადის შენი გუშაგი, შენი თვალი და ყური... და აჰა, მეფევ, მას შემდეგ პირნათლად ვასრულებ ჩემს უზენაეს მოვალეობას, ვფიცავ შენს მზესა! — წარმოსთქვა გრძნობით შადიმანმა და ხელმანდილით მოიწმინდა თვალებზე მომდგარი ცრემლი.

გველის დაშაქრულმა სისინმა და ნიანგის ცრემლებმა უნებლიედ იმოქმედა კაბუჯ მეფეზე და მოუღბო გული. ის შეეკითხა ლალას უფრო დამშვიდებით.

— განა დასაჯერია, რომ დიდმა მოურავმა ჩაიღინოხ რაიმე ცუდი ჩემს წინააღმდეგ!?

— დიდო მეფეო, აბა ყური ამ ლექსს. აი რას გვამხელს იგი:

„როცა უგვანი ამალდეს, საომრად დაიყბედებსა,
კარებსა დასცემს, თემს შესჭამს გლეხთა გადასცევთს

ქედებსა“...

განა ამ სიტყვებში არ არის გამოსახული დიდი სიბრძნე და სიმართლე? ამალდა კაცი იგი უგვანი, გიორგი სააკაძე, ისახელა თავი ომებსა შინა, დასცა და დაჩაგრა დიდგვაროვანი პირნი, თავადნი ქართლისანი, ჩაიგდო ხელთა მთელი სამეფო, ხოლო გადასცვითა ქედნი გლეხთა ზედმეტი შრომითა ხიდ-ბოგირების და შარაგზების კეთებით, აგრეთვე ჯებირების აგებით მდინარეთა გასწვრივ...

— დიახ, ჩემო ძვირფასო ლალავ, ამალდა კაცი იგი სარდალი თავის პირადი ღირსებით, თავის უზენაესი ნიჭით, გამირობის, მხნეობის და შრომაუნარის მეოხებით, ისახელა თავი ომებსა შინა თავის საარაკო მამაცობითა, აჯობა ფრიად ამა უგვარომან ყველა დიდგვაროვანთა ქართლისათა, მოღრიკა მათი ამაყი ქედი მეფისა ტახტის წინაშე, იხსნა უსაზომო ხიფათისაგან ერი ივერიისა სათარხანის შემოსევის ჟამსა, ოდეს შეკრთნენ და დაიბნენ ყველა დიდგვაროვანნი ქართლისანი, ექვსი ათასი კაცით გაანადგურა მან შემოსეული მტრის ორმოცი ათასი მებრძოლი და მთელი მათი ქონება დაასაკუთრა სამეფო ხაზინას. დასცა შიშის ზარი ივერიის მტაცებელთა — ოსებსა, ლეკებსა და მოღრიკა ისინი ჩვენსა წინაშე; გადმოიყვანა მთებსა და ვიწრო ხევებში შეხიზნული ხალხი, ყოველმხრივ შეუწყო ხელი და დააბინავა ისინი ქართლის გაპარტახებულ მიწა-მამულსა ზედა. ბოლოს ვიდასთვის აგებს კაცი იგი უგვაროი ვზებსა, ხიდებსა და მდინარეთა ჯებირებსა, თუ არა იმავე ხალხისთვის, თუ არა მთელი სამეფოს განსაღიდებლად?! და აი

ასეთი კაცის აუტს კადრულობს მეფის ლალა, ტახტის ერთ-
გული შადიმან ბარათაშვილი! ჩემო კარგო მამობილო, გაგე-
ჯონება ისიც, თუ რას ამბობს ხალხი ბრძნულ ლექსში:

— «ათასად გვარი დაფასდა, ათიათასად ზრდილობა,
თუ კაცი თავად არ ვარგა, ცუდია გვარიშვილობა».

აი უზენაესი სიბრძნე! ამ ლექსით ხალხმა გვარიშვილობაზე
აიწილ მაღლა დააყენა ადამიანის პირადი ღირსებანი, რითაც
ღმერთმა თუ განგებამ ასე უხვად დააჯილდოვა შენგან აწუნე-
ბული, ხოლო ქვეყნისთვის თავდადებული და მდაბიო ხალხის
მიერ უდიდეს გმირად სახული მოურავი გიორგი სააკაძე, მდა-
ბიოთა წრიდან გამოსული.

ჭაბუკი მეფის ასეთმა სიტყვებმა ენა ჩაუგდეს მგესლავს.
შადიმან დუმდა კარგახანს, დაიბნა, აღარ იცოდა რა ეთქ-
ვა. ღრმა ფიქრებმა შეიპყრო იგი. შემდეგ აღახენა ბაგენი.

— ისმინე, მეფევ, დიდ გონიერო, რომ ეგეთი კაცი არ
შესდგება შუაგზაზე, ქართლის მეფეთა უხვი წყალობით
იგი სრულიად ახალგაზრდა შეიქნა ქართლის სპასპეტი, მთე-
ლი ჯარების მთავარსარდალი, სამხედრო ვეზირი და თბი-
ლის-ცხინვალის მოურავი; ის არ შესდგა ამა დიდების სა-
ფეხურზე: მან მოიწადინა მეფესთან დამოყვრება და აჰა
შეიქმნა ქართლის გვირგვინოსნის ცოლისძმა, მან თავისი
და მაკინე დასვა ივერიის დედოფლად... და განა აქ მაინც
შეჩერდება ეგ პატივ-დიდების მოყვარე ადამიანი?! არა, მე-
ფევ! არ დაიჯერო... მას სხვა სწადია, სულ სხვა რამ...

— რალა სწადია კიდევ ამაზე მეტი?— შეეკითხა მეფე ცნო-
ბისმოყვარეობით და ოღნავ შეკრთომით.

— დიახ, მეფეო, იმას სწადია სულ სხვა რამ, — გაიმეო-
რა შადიმანმა და გადახედა ლუარსაბს.

— აღარ იტყვი, ადამიანო, რალა სწადია კიდევ?! — შეე-
კითხა მეფე ნაწყენი კილოთი.

— ვერ მოგახსენებ, მეფეო! საუბედუროდ ჩემდა, უკვე
დავკარგე შენს თვალში რწმენა. მეფის ლალას შადიმან ბა-
რათაშვილს ამიერიით აეხადა პატივი, ხოლო მის სიტყვას
ნღობა... დღეს ქართლის დიდებულნი, ბაგრატიონთა ტახ-

ტის ერთგულნი ბერჯნი და ფარნი დაჩრდილა მღაბიო ში-
ოშის ნაშიერმა, ჯავახიანთ ნაყმევმა გიორგი სააკაძემ... ღღე,
ჩვენი კაკალი სდუმს, მაგის ბამბაც კი ჩხრიალებს... ჩვენ
ვილა ვართ, ივერიის თავადნი!

— რას ნიშნავს, შადიმან ჩემო, ეგეთი საუბარი! რა სა-
ჭიროა ეგეთი მიკიბულ-მოკიბული სიტყვები! სტქვი, ადამი-
ანო, თუ რაიმე იცი!

— მე არას მოგახსენებ, მეფევ! რა საჭიროა! სულერთია,
არ დაიჯერებ... დეე იმათ მოგახსენონ, ვინც გვეწვიენენ ამ
ერთი საათის წინათ.

— მართლა, ველარ გკითხე, ვინ არიან ისინი? თვალი
მოვკარი ბალიდან.

— ისინი გახლავან ქართლის უპირველესი თავადნი და
ტახტის ფრიად ერთგულნი, ფარსადან ციციშვილი და ქაი-
ხოსრო ჯავახიშვილი. ისწრაფიან შენს ნახვას და ელიან
ბრძანებას; იმათ ბევრი რამ იციან და მოგახსენებენ.

— სთხოვე ორთავეს აქვე, აივანზე.

სწრაფად დაეშვა კიბეზე მოხუცი შადიმან და მცირე ხნის
შემდეგ ამოუძღვა ორივე თავადს. ამათ შორიდანვე ჰკადრეს
მეფეს მღაბალი სალამი.

— ჩემს ერთგულ ფარსადანსა და ქაიხოსროს გამარჯვე-
ბა! — მიაძახა მეფემ ახალმოსულთ.

— გამარჯვება ნუ მოაკლოს ღმერთმა და წმ. გიორგიმ
ივერიის მეფე ლუარსაბს! — იყო პასუხი ორთავესგან.

მეფემ თავზიანად მიიღო ისინი, დასვა თავის სიახლოვეს
და მოიკითხა მათი ცოლშვილი. შემდეგ შეეკითხა, რა ამ-
ბები ხდება შუაგულ ქართლში.

— ვერაა კარგი ამბები, ბატონო მეფევ! შეურაცხყოფი-
ლი ერი ბორგავს, გულს იცრუებს თავის მეფეზე, არ მოს-
წონს მისი საქციელი, ჰკადრა ფარსადანმა.

— განა ასეთი რა დავაშვე ერის წინაშე?

— შფოთავს თავადი და აზნაური, გლეხი და სულიერი
მამა, დიღო ბატონო! — დაიწყო ჯავახიშვილმა. — ღღემდე
ვერ მოინელეს ის ზღაპრული ამბავი, რაც მოხდა გასულ
წელს. გავბედავ და მოგახსენებ, რომ ისინი ღღემდე ვერ

შეეგუენ გლეხის წრიდან გამოსულ თავის ახალ დედოფალს...

— გავბედავ და მოგახსენებ, მეფეო, რომ ბევრგან უკვე დაიწყო საიდუძლო მიმოთქმა და შეთქმულებაჲ კი მეფის წინააღმდეგ, — გააწყვეტინა სიტყვა ჯავახიშვილს და მოახსენა მეფეს ხმადაწევით ციციშვილმა.

— როგორ თუ შეთქმულება?! განა რას მიპირებენ?! — შეეკითხა ლუარსაბ შეშფოთებით.

— ფრიად ცუდ რასმეს, მეფეო!

— რასა? მოკვლას? ტახტიდან ჩამოგდებას?! —

— დიახ, ტახტიდან ჩამოგდებას! ეს არის, მეფევე, ერის წადილი, მოახსენა გაბედვით ციციშვილმა — მოურავს კიდევ მთელი ოჯახობით უპირებენ სრულიად ამოჟლეტას. არ ინდობენ არც ახალ დედოფალს...

ამ მძიმე, უეცარმა ამბავმა გარინდა ლუარსაბი, იგი ღრმად ჩაფიქრდა გაფითრებული.

— ჩვენცა კიდევ ვალდებულად გავხადეთ თავი გზლებო-დით აქ, კოჯორში, და მოგვეხსენებია ეს არასაამო ამბები ჯერ შადიმანისთვის და მერე თქვენთვის! — თქვა ორივემ. ამ დროს აივანზე გამობრძანდა ქვრივი დედოფალი თამარ, ლუარსაბის დედა, და მისი დედამთილი, დიდი სვიმონ მეფის ქვრივი დედოფალი გულშარა, — სამოცი წლის მხნე და კარმაგი მანდილოსანი, ორთავე ფრიად განათლებული იმ დროის მიხედვით, ხოლო გულშარა იყო მეტად განთქმული თავისი ენამჭევრობით და დიპლომატიური ნიჭით, ერთ დროს მისი პირით ხონთქარი მოლაპარაკებას აწარმოებდა ერანის შაჰთან. ეს ივერიის დედოფალი იყო გაგზავნილი სულთანის მიერ შაჰაბაზის წინაშე დიპლომატიური დავალებით.

ორივე დედოფლის დანახვაზე უცებ წამოდგნენ ყველანი და ჰკადრეს მდაბალი სალამი. მეფემ დაუთმო მათ თავისი ტახტი და დააბრძანა მოწიწებით. მცირე მოკითხვის შემდეგ ჩამოვარდა სიჩუმე. დუმილი დაარღვია ლუარსაბის დედამ.

— მაპატიეთ, ბატონებო! უცებ ყური მოვკარ თქვენს საუბარსა. ვინ ემუქრება ჩემს შვილს ტახტიდან გადმოგდებას, ფარსადან?

— ერის დიდი უმეტესობა, ჩემო ხელმწიფევ, დღებულ თავადთაგან დაწყებული უბრალო გლეხამდე. ავერ ათი თვე გადის იმ საბედისწერო დღიდან და აქამდე ვერ შერიგებიან მეფის უფერო ქორწინებას. არ სცნობენ დედოფლად მღ. ბიო ოჯახიდან გამოსულ მანდილოსანს. მოურავის და. ერი შფოთავს და დრტვინავს; იგი ფრიად დამცირებულად გრძნობს თავს, — მოახსენა ციციშვილმა.

— ტაძრებშიაც მრავალ ალაგას წირვის ბოლოს ხუცები არ იხსენიებენ ახალ დედოფალს, თითქო მეფე ლუარსაბ უცოლო ბრძანდებოდეს, გიხსენიებენ მხოლოდ თქვენ ორთავეს, ჩემო ხელმწიფენო, — ჩაურთო სიტყვა ჯავახიშვილმა და გადახედა შადიმანს.

— მაშ როგორ მოვიქცეთ, ბატონებო? რა სალბუნი დავსდოთ ამ იარას? — შეეკითხა დინჯად გულშარა დედოფალი.

— თქვენ უკეთ უწყით, ბრძენო ხელმწიფევ! — მოახსენა ორთავემ.

— ჩვენც შეიძლება ვიცოდეთ ამ სენის კურნება, ხოლო გვწადის ვისმინოთ თქვენს ბაგეთაგან ერის აზრი და ლტოლვა, — დინჯად წარმოსთქვა ისევ გულშარა დედოფალმა და მკვეთრად დააქჳერდა ახლადმოსულ თავადებს, შემდეგ გადახედა შადიმანს, იგი ღუმდა ამ საუბრის დროს. იმათ ვერ გაუძლეს ასეთ გამხვრეტ მზერას და ჩალუნეს თავი.

— ერის ლტოლვა და სურვილი აშკარაა; ან მეფე ლუარსაბ და დედოფლად მისი შესაფერი მეუღლე, ან სხვა მეფე ბაგრატიონთა გვარიდან, — იყო ორთავეს პასუხი.

— მაშ სახუმაროდ აღარ ყოფილა საქმე! ჩანს, მზადდება შეთქმულება და აჯანყება! — წარმოსთქვა ცხარედ ლუარსაბის დედამ.

— სრული სიმართლეა, ჩემო ხელმწიფევ. რაღა დავიმალოთ, ერის აღშფოთება მეტად სახიფათო სახეს იღებს, — უპასუხა ფარსადანმა.

— მერე, მოურავი რას შვრება?! ნუთუ ვერა მზერს ამებს?! — შეეკითხა გულშარა.

— დიახ, ჩემო ხელმწიფევ, იგი მზერს ყველაფერს; კარგად იცის ყოველივე, ხოლო...

რა ხოლო? საჭევი, ნულარ ფარავ. ჩემო ფარსადან! გვამცნე, გვამხილე ყოველივე მეფესა და დედოფალთ, ერთ-კულებაში ჩაგეთვლება! — წააქეზა ისევ გულშარამ.

— მიმძიმს თქმა ჩემო ხელმწიფევე, ფრიად მიმძიმს. შოთან ბრძანა: ზოგან თქმა სჯობს უთქმელობას, ზოგან თქმითაც დაშავდებისო. ვშიშობ, ამ თქმით, ამ გამკლავნებით არ გაწყენიოთ თქვენ და მასთან ერთად დიდი ზიანი არ მივაყენო ჩემს თავსა და ოჯახს. ჩემი მტერიც კი ნუ ჩაუგდოს ღმერთმა ხელში მძვინვარე მოურავსა! მომსპობს დედიან-ბუდიანად! მომსპობს! გამაქრობს!

— ნუ გეშინიან, ჩემო ფარსადან, სთქვი ყოველივე გულახდით! ნურას დაგვიფარავ! — გაათამამა თამარმა.

ფარსადან წამოდგა, მიიხედ-მოიხედა, სახეზე გამოისახა გამწარება, შემდეგ მიუახლოვდა მეფე-დედოფალთ და მოახსენა თითქმის ჩურჩულით:

— ნება მიბოძეთ, ჩემო ხელმწიფენო, უფრო ფარულად მოგახსენოთ ყველაფერი! აქ, აივანზე, სვეტებსაც კი ყურები ასხია, თუ გაგვიგო, მე მარტო კი არა, თქვენც ვერ ასცდებით დიდ ხიფათს.

ყველანი შევიდნენ მეფის საიდუმლო სენაკში და ჩაიკეტეს კარები.

— ახლა სთქვი, ფარსადან, რაშია საქმე? — უბრძანა გულშარამ.

— უნდა მოგახსენოთ, ჩემო ხელმწიფენო, რომ ერის შფოთსა და ამბოხებას თვით მოურავი უწყობს ხელსა.

— როგორ თუ მოურავი? — გაიოცა მეფემ.

— დიახ, მოურავი! თავის მომხრეთა მეშვეობით, ის საიდუმლოდ ბჭეუბებს თავადაზნაურთ მეფის წინააღმდეგ.

— ეგ შეუძლებელია. ცილისწამებაა! აბა რა სარფაა მოურავის მხრივ ჩემს წინააღმდეგ ამხედრება?! — წამოიძახა მეფემ.

— ალბათ, აქვს რაიმე მიზანი, ჩემო ხელმწიფევე! — ჩაერია საუბარში ჯავახიშვილი.

— აბა რა მიზანი უნდა ჰქონდეს გიორგი სააკაძეს?! სხვა თუ არა, საკუთარ დას ხომ არ გასწირავს?!

— თავის პირად სარგებლობისათვის მოურავი მზად არის ვასწიროს არამცთუ და და სიძე, არამედ თავის ცოლი და შვილებიც-კი — დასძინა ციციშვილმა.

— ნეტავ რა მიზანს აღწევს მოურავი ასეთი საქციელ-ლით! — შეეკითხა გულშარა.

— იგი ამღვრევს წყალს, რომ თევზები იჭიროს, ჩემო ზელმწიფევე! — უპასუხა ჭაიხოსრომ.

— რა თევზები! რატომ ეგრე მიკიბულ-მოკიბულად უბ-ნობთ ერთავენ! — მიაძახა მეფემ წყენით, — სთქვით პირ-დაპირ საქმის ვითარება!

— საქმე შემდეგშია ჩემო ზელმწიფევე! სააკაძის ზრახვა-ნი ფრიად შორს მიდიან, მას აღარ აკმაყოფილებს არც სპა-სალარობა, არც მოურავობა. მას, სწადია მეფის გვირგვინი... ის ზომ მეფეა უგვირგვინო, მდაბიო ხალხის თვალში! მაშ რაღა უშლის ხელს, რომ დღეს თუ ხვალ გვირგვინიც იკურ-ოხოს სვეტიცხოვლის ტაძარში.

— ეგ ცილისწამებაა, ფარსადან! განა დასაჯერია მილა-ლატოს ჩემმა ცოლის ძმამ, ძმასავით საყვარელმა მოურავ-ქან, რომელიც ასე დააწინაურეს ჩემმა პაპამ და მამამ?! ვულს არ ეკარება ეგ სიტყვები! — წამოიყვირა მეფემ და წამოვარდა.

— წყნარად, მეფევე! წყნარად, ბატონო! არავინ გაიგო-ნოს, — გააფრთხილა შადიმანმა და დადუმდა ისევ ღრმა ფიქრებში ჩაფლული.

— ნუ გავიწყდებათ, მეფევე, რომ მთელი სამეფოს ჯარე-ბის უფროსი სააკაძეა! მის მიერ გაღმოსახლებული ანატი გლეხობა და თუშ-ფშავ-ხევისურეთი მის მზეს ფიცულობენ, ბევრი თავადის, აზნაურის და სასულიერო პირთა გული მოიგო ცხირეთ-ტაშისკართან საარაყო გამარჯვებით. გარდა ამისა, მის გვერდით ბურჯად ამართულან მისი სიმამრი და ცოლისძმა ნუგზარ და ზურაბ ერისთავნი არაგველთა მხედ-რობით! მაშ რაღა უშლის ხელს? იგი მზადაა! ხოლო უცდის დროსა და ჟამს. როგორც-კი აფრიადდება აჯანყების დრო-შა მეფე ლუარსაბის წინააღმდეგ ქართლის თავად-აზნაურ-თა მიერ და წარმოადგენენ მეფედ სხვა რომელიმე პირსა,

იმ წამსვე მოურავი აამოძრავებს თავის რაზმებს, ჩააქრობს აჯანყებას და გამოაცხადებს თავს ივერიის მეფედ. აი მისი ფარული ზრახვანი! — წარმოსთქვა დინჯად და ხმადაბლა ციციშვილმა.

— მეფე ლუარსაბსა და მის მეუღლეს რაღას უზამს? ან ჩვენ ქვრივ დედოფლებს სად გადაგვკარგავს?! — წამოიძახა გაოცებით ლუარსაბის დედამ.

— მოგახსენებთ, ჩემო ხელმწიფენო. მეფე ლუარსაბსა თვის მეუღლით და თქვენ, დედოფალო, მოურავი ადვილად ჩაგკეტავთ სამუდამოდ რომელიმე ციხეში ან მონასტერში. მადლი უფალს, ასეთები ხომ ბლომადაა ჩვენს კურთხეულ ქვეყანაში, — წარმოსთქვა ისევ დინჯად და ხმადაბლა ციციშვილმა.

ფარსადანის სიტყვებმა ფრიად დიდი გავლენა იქონია მეფე-დედოფალზე. ისინი დუმდნენ კარგახანს ღრმად ჩაფიქრებულნი. დუმილი დაარღვია მოხუცმა დედოფალმა.

— შენ რაღას იტყვი, ბრძენო შადიმან?! როგორ მოგწონს ეგ ამბები? რათ სდუმხარ, რად არ იღებ ხმას?!

— დიღო დედოფალო! მე რაღა მეთქმის! მადლი უფალს. თვით გაიგონეთ ყველაფერი სხვების ბაგეთაგან. ჩემს სათუთად გაზრდილს, ქართლის მეფეს აღარ მოსწონს ჩემი რჩევანი, ჩემი მხილებანი და გაფრთხილებანი; დაგვარგე ნდობა მეფის წინაშე იმ დღიდან, ოდეს დაიახლოვა მოურავი და გახადა დედოფლად იმის და. ძოდან გამეციხა სასტიკად. ოდეს ვკადრე და ეჭვი შევიტანე სააკაძის ერთგულებაში. ღმერთმა ხომ იცის, ჩემგან არ იყო მოგონებული. არამედ მაუწყეს ყოველივე ამ დილით ქართლის ამ ორმა დიდებულმა, მეფისა და ტახტის ერთგულმა თავადებმა. ახლა რაღა მოვაგვაროთ, მეც აღარ ვიცი... ნათქვამია: „წამხდარსა საქმეს რას არგებს მერე თითზედა კბენანი“ — წარმოსთქვა მღელვარედ ბარათაშვილმა და მოიწმინდა თვალზე მომდგარი ნიანგის ცრემლები.

შადიმანის მღელვარე სიტყვებმა აუჩვილეს გული ორთავ დედოფალს. იმათ უმადურად გადახედეს ლუარსაბს; ამას ჩაეჭინდრა თავი და იყო გარინდული. ხანდაზმით აღმოხდე-

ბოლა ხოლმე გულიდან მძიმე ოხვრა. შფოთავდა ქაბუკი ჭეფე.

— აქ ნათლად ჩანს ყველაფერი. ეჭვის შეტანაც კი შეუძლებელია! მოურავი გვალატობს, ეს აშკარაა. მას ხელში აქვს ძალაუფლება და რაცა სწადია, იმას ჩაიდენს. ახლა საჭიროა კარგად მოვისაზროთ, რა ზომები მივიღოთ თავდაზნაურთა და საერთოდ ქართლისა ერის დასამშვიდებლად. რას იტყვი ამის შესახებ, შადიმან, ჩვენო ბრძენო ვეზირო და მესაიდუმლევ? — წარმოსთქვა ლუარსაბის დედამ.

— მე ნურას მკითხავთ, დედოფალო! ისევ ამათ ჰკითხეთ, ბატონ ფარსადანსა და ქაიხოსროს, ისა სჯობია. ჩემმა რჩევამ უკვე დაკარგა ფასი მეფის თვალში.

— რა საჭიროა ამდენი თავბატიეი, ჩემო შადიმან! განა შენმა გაზრდილმა მეფემ არ იცის შენი ერთგულება და ბრძნული რჩევანი?! აბა ვინ არის ქართლის ტახტის წინაშე უპირველესი ვეზირი, თუ არა შადიმან ბარათაშვილი, სამეფოს ერთგული გუშაგი და თავდადებული! გვამცნე, გვიჩიე რამე! — შეაქო გულშარა დედოფალმა.

— რალად მეკითხებით, როცა თქვენ უკეთ იცით, ბრძენთა-ბრძენო დედოფალო, როგორ უნდა მოვიქცეთ ასეთ პირობებში! — უპასუხა თავდახრით ბარათაშვილმა.

— ჩვენ ვფიქრობთ, რომ ლუარსაბ მეფემ უნდა გაუშვას ნაჩქარევად შერთული ცოლი, მდაბიო წრიდან გამოყვანილი, და ითხოვოს შესაფერი მეუღლე, რათა დააცხროს ამ საქციელით ერის აღშფოთება და ამბოხი, ხომ ასეა?! — შეეკითხა შადიმანს მოხუცი დედოფალი.

— დიახ ჩემო ხელმწიფევ. სრული ჭეშმარიტებაა, ხოლო ეგ არ კმარა, საჭიროა კიდევ სხვა ზომების მიღებაც.

— აბა რა ზომებისა გვამცნე ბარემ, — შეეკითხა დედოფალი თამარ.

— როგორ გგონიათ, დედოფალნო. განა მოურავი მოუწონებს ლუარსაბს ეგეთ უპატიო მოქცევას მისი დისადმი? ნუთუ არ უწყით, რა მოჰყვება ამას?

— რა, ბრძენო შადიმან? მოურავის განდგომა და აჯანყება, არა? — შეეკითხა გულშარა.

— დიახ, დედოფალო! თქვენის ბაგენით ლალადებს უზენაესი ჭეშმარიტება. მოურავი თავის ცოლშვილით უნდა შეეწიროს ბაგრატიონთა გვირგვინს და დიდებას; მასთან ერთად მთელი სააკაძიანთ გვარი; ამას მოითხოვს ქართლის სამეფოს კეთილდღეობა! — წარმოსთქვა დინჯად და ხმადაბლა ბარათაშვილმა.

შადიმანის სიტყვებს კვერი დაუკრეს ქაიხოსრომ და ფარსადანმა.

სამარისებური სიჩუმე ჩამოვარდა მცირე ხნით. საშინლად ბორგავდა ჭაბუკი მეფის გული. ის ატანდა ძალას თავსა, რომ ბოლომდე მოესმინა შადიმან ჯალათის საშინელი განაჩენი.

— ვინ შეაბამს ეჟვანს კატასა? ვინ დაიქერს ველად გავარდნილ ტაიქსა, ვინ შესძლებს ფრთხილი და მძლავრი მოურავის ხელში ჩაგდებას?!

— მხოლოდ ის, დედოფალო, ვინც მას მიენდო და დამოყვრა. მოურავი უნდა მოიტყუოს აქ რაიმე საბაბით თვით მეფე ლუარსაბმა. აქვე უნდა დავესხათ თავზე მძინარეს და მოვუღოთ ბოლო. ამავე დროს უნდა გაველიტოთ სააკაძის ცოლშვილი და ახლო ნათესავნი; აგრეთვე უნდა ჩავიგდოთ ხელში ნუგზარ ერისთავიც მთელი ოჯახობით და ჩავალპოთ სადმე შორეულ ციხის ბნელსა ნესტიან ჯურღმულში, — თქვა ისევ შადიმანმა.

ახლა კი გაუწყდა მოთმინების ძაფი რაინდ მეფეს და წამოიჭრა ზეზე უსაზღვრო აღშფოთებით.

— როგორ? დავისხა თავზე ლაფი?! ეულალატო ამ დიდებულ ადამიანს და ბოლოს მევე მხდით სამარცხვინო მზაკვრობის იარაღად?! მე, მეფე ლუარსაბმა, მოურავის სიძემ, უნდა მოვიტყუო იგი აქ, კოჯორში, და მოგაკვლევინოთ ვერაგულად, ამოგაჟლეტინოთ მისი ცოლშვილი?! ერთი მიბრძანეთ, ვინა გგონივართ? მეფე ივერიისა, ბაგრატიონთა დიდებული გვარის მემკვიდრე, თუ ვილაც ბინძური, ცრუ, მატყუარა, მზაკვარი და საზიზლარი ჯალათი?! ან ჩემს აღმზარდელს, ლალა შადიმანს ვეთარ აღმოხდა ბაგეთაგან ასეთი უწყისო რამ?! ასეთ სამარცხვინო რამეს არ ჩავიდენ არასდროს.

— წინააღმდეგ შემთხვევაში შეს თვითონ, მეფევ, მთელი გვარეულით ვახდები მსხვერპლი მოურავის ზვიადობისა, მიიძახეს აქეთ-იქიდან.

— არ მჯერა ეგ ზღაპრები! გულს არ ეკარება ეგ სიტყვები. მოურავი ერთგულია მეფისა და ერის! ის არ არის მოღალატე! მას არ იტაცებს პატივ-დიდება! იგი ზღაპრული გმირია, დიდი სარდალი და ქვეყნისათვის თავდადებული! ყოველივე ეს ღრმად სჯერა ამ ჩემს გულს! — წაიძახა მეფემ გაცხარებით.

— მაშ ფიცი გნებავთ, მეფევ! აჰა, ქრისტეს ჯვარი და სახარება! ვფიცავართ სამნივე ამ წმინდა ჯვარსა და სახარებაზე, რომ რაცა ვსთქვით, მართალია ყველაფერი და თუ ტყუილს ვაშობდეთ, ვუგონებდეთ ასეთ რამეებს მოურავსა, მაშინ გვრისხავდეს ღმერთი და წმ. გიორგი, ასე დაგვიმხოს ოჯახი და ამოგვიწყვიტოს ცოლშვილი. — ამ სიტყვებით მოურავის უძინარმა მტრებმა ძირს დაამხვეს ქუდები მეფის წინაშე.

მორწმუნე ლუარსაბი უზომოდ გააოცა სამი დიდი თავადის ფიცმა, იგი გაშრა, გაშტერდა... ამ გულწრფელსა და კეთილ ადამიანს უცებ დაეკარგა ყველაფრის რწმენა, მის ქვეშ იწყო რყევა იატაკმა, ის ბარბაცით გამოვიდა ვარეთ და ღონემიხდილი მიჰდა აივნის კუთხეში. ჰაბუკის თვალებს უნებლიედ წასკდა მწარე ცრემლები...

მეფეს გამოჰყენენ ორთავე ღედოფალი.

ამრიგად ვადაწყდა დიდი მოურავის ბედი. მეფის სახელით იგი სასწრაფოდ დაიბარეს კოჯორში, ვითომ და სანადიროდ. გმირის სამივე მოსისხლე მტერი გამარჯვებულის სახით გავიდა მეფის დარბაზიდან. ისინი შეუდგნენ თავის ბნელ სამზადისს.

ამავე დროს ფეხაკრეფით გავიდა მეორე პატარა ოთახიდან მეფის ფარეშთუხუცესი ბააკა (იგივე კახაბერ) ზერხეულიძე, დიდი მოურავის ერთგული პირი. ოქსინოს საღვთარდის უკან ფარულად მდგომი, იგი ისმენდა ყველაფერს.

— ოჰ, ბედშავო მოურავო! რაეპს სჩადიან შენი მტრები! გაიფიქრა გულში და ლანღივით გაქრა ოთახიდან.

ქვეყნის დაუცხრომელ ზრუნვაში იყო დიდი მოურავი, როს მიიღო მეფის სახელით მოწვევის ბარათი. მან არ იცოდა არაფერი, რადგან ყოველივე მოხდა მის ჩუმად, თვით კოჯორში. იგი მაშინვე გაეშურა კოჯორს ერთი მხლებლით, მივიდა გვიან ღამით და მოისვენა თავის ბინაზე.

მეფეს აცნობეს სააკაძის მოსვლა. მტრები მოემზადნენ თავზე დასაცემაჲ. დილის რიყრაყზე ეცნენ თავისი რაზმებით მოურავის სადგომს, შემოერტყნენ გარს, დასცეს ყიფინა, დაუშინეს თოფები. ისინი იწვევდნენ გარეთ სააკაძეს უშვიარი ლანძღვა-გინებით. ბინიდან არ ისმოდა ბაიბური. უცებ გაიღო კარი, გამოვარდა გარეთ მოურავის მხლებელი მამაცი პაპუნა ჩივაძე, სააკაძის ჯუბა-ჯავშნით და იარაღასხმული, მოახტა იქვე უბელო ცხენს, გააპო მტრის რაზმები და გაქუსლა ნოსტესაკენ.

მოდლატენი შეცვივდნენ სახლში, მაგრამ იქ არ დახვდათ ის, ვისაც ეძებდნენ.

განთიადის უამს ვიღაცამ წყნარად დაუკაკუნა კარი. მუდამ ფრთხილი სააკაძე მაშინვე წამოვარდა და შესძახა:

— ვინა ხარ?

— გიორგი, თავს უშველე! მეფემ გასტეხა ფიცი... გილატეს. მოდიან მტრები შენს მოსაკლავად...

ძლივს მოასწრო მოკეთემ ეს სიტყვები და გაიჭრა სიბნელებში.

გმირმა ჩაიკვა უცებ ჯუბა, შემოირტყა ხმალი, ელვის სისწრაფით გამოვარდა გარეთ, მოახტა თავის მერანს და გააქროლა ცოლშვილისაკენ.

დიდი მოურავის მხსნელი იყო ღირსეული მამულიშვილი კახაბერ ხერხეულიძე.

გაათრებული მტრები გამოუდგნენ სააკაძის კვალს. მათ აღრევე შეკრეს ყოველმხრივ გასაქცევი გზები, სურდათ ხელში ჩაეგდოთ მოსაკლავად ქვეყნის მხსნელი.

მზე ჩასვლაზე იყო, ოდეს უზომოდ დაღლილი სააკაძე მივარდა შინ. ის იყო მთლიანად ოფლში გაწურული. სახეზე აღმური ასდიოდა. ტანისამოსი დაფლეთოდა ტყესა და ჯაგებში

ცხენის ჰენებით. ამ სანახაობით შემოფოთებული ცოლშვილი შემოეხვია გარს.

— თავს ვუშველოთ! მტრები მოგვდევენ ფეხდაფეხ... გვიღალატეს... მეფემ გასტეხა ფიცი! აუწყა მათ გიორგიმ ძღვლვარე ხმით.

— აბა მოემზადენით! ჩქარა შევეფაროთ ტყეს...

შეიქნა ფაცაფუცი. სააკაძის ღირსეული სახლობა უცებ მიხვდა ყველაფერს. მოემზადნენ საოცარი სისწრაფით და გასწიეს ტყისაკენ. მოურავმა მოახდინა განკარგულება თავის შინაყმებში და გამოუდგა ცოლშვილს.

კუნაპეტი ღამე იყო, როს ავარდა საშინელი ალი. ამ დროს იქვე მთაზე კლდის პირას იდგა დიდი მოურავი, ის დაცქეროდა ამ საზარელ სურათს. იქ, დაბლა იწვოდა მისი სასანლე და კარმიდამო, ცეცხლის ალში ინთქებოდა მის მიერ მონაგარი მთელი ქონება... უსაზღვრო სევდა და ბრაზი მოაწვა გულზე. გვირის თვალები ცრემლით აივსო. სააკაძე ღიღზანს იყო ქანდაკივით გაქევაებული და უცქეროდა იმ მხარეს, სადაც უღმობელი სტიქიონი ნთქავდა მის სიყრმის შენაძენს, ამოიოხრა მწარედ...

— „რისთვის?! რა დავაშავე ასეთი?! განა ეს არის ჩემი ღვაწლის, ჩემი თავდადების სამაგიერო?!“

ფიქრობდა დიდი მოურავი და არ აშორებდა თვალს მძვინვარე ხანძარს.

ამასობაში ერთგულმა შინაყმებმა მოჰგვარეს ცხენები. სააკაძე, მიზი ცოლშვილი და მხლებელნი შესხდნენ ცხენებზე და გაუდგნენ გზას. მავრამ საით უნდა წასულიყვნენ, როცა ყველა გზა იყო შეკრული, თანაც მეფის სახელით გააცა ბრძანება: ვინც დაიჭერდა დიდ მოურავს და მოუყვანდა მკვდარს ან ცოცხალს, მიეცემოდა ფრიად კარგი ჯილდო. გამოჩნდნენ მსურველნი. ისინი ჯგუფად ესაფრებოდნენ სააკაძეს და სურდათ მისი ხელში ჩაგდება. ფულმა გაიტაცა მრავალნი. ოქრომ დაუკარგათ სინდისი და ნამუსი.

საკაძის გონებამ უცებ მოისაზრა ყველაფერი. მან კარგად იცოდა ყოველი გზა და ბილიკი. გასწია იმ გზით, სადაც

ნაკლებ მოელოდა მტრის შეხვედრას. ამრიგად მიადგნენ მცხეთას. ბნელი ღამე იყო, მოურავმა ჩაგზავნა კაცები და შეიტყო, რომ ხიდი მტრებს უკავიათ და ფრთხილად დაარაჯობენ. ის მოერიდა პირდაპირ შებმას, მოძმეთა სისხლის ღვრას. მან არჩია ამ კუნაპეტ ღამეში განსაცდელში ჩაეგდო თავი, წვრილი ცოლშვილი და ფონით გასულიყო მტკვარში. მიადგნენ მდინარეს; იგი ფართოდ გაშლილიყო მათ წინ და მრისხანედ მიაგორებდა მოშავო ზვირთებს. სააკაძემ გაამხნევა ყველანი. კაცებმა შეისვეს მხრებზე ბავშვები და შეუდგნენ გასვლას.

— ნუთუ დიდი მოურავის ცოლი უნდა შეუშინდეს რასმეს?!

შესძახა გამირულად ნუგზარის ასულმა და პირველმა შეცურა ცხენი აზვირთებულ მდინარეში. მას მიჰყვნენ სხვებიც. ცხენები თითქმის დაიმაღნენ წყალში. გონიერი პირუტყვი ფრუტუნით მიააობდნენ ზვირთებს და მიცურადნენ წინ. რამდენიმე ხანიც — და ყველანი მშვიდობილად გავიდნენ გაღმა თავით ფეხამდე დალუმპულნი. აღარ შეჩერდნენ აქ, გასწიეს საჩქაროდ, რომ არ მოესწროთ მდებარებს, რადგან მოატანა კიდევ გათენებამ. ათ ეჯს იქით იწყებოდა ნუგზარ ერისთავის სამფლობელო; იქ აღარ იყო საშიში.

გასცდნენ თუ არა საზღვარს, ჩამოხტენ მდელაზე არაგვის პირას, ააგზნეს დიდი ცეცხლი, გაიძვრეს სოველი ტანსაცმელი და ჩაიცივეს მშრალი. მთელი დღე-ღამის უძმელნი შეეძინენ მცირე საუზმეს. ამავე დროს მოურავმა აფრინა გელა ნუგზარ ერისთავთან და ამცნო თავზე დატეხილი საზარო ამბები. გელამ გააქროლა თავისი სწრაფი მერანი დუშეთისაკენ, სადაც ამ დროს იყო ნუგზარ თავის ცოლშვილით.

სცნო თუ არა გელასაგან ეს საშინელი ამბები, მეფის შერ ფიცის გატეხა და სამარცხვინო დალატი, არაგვის დიდმა ერისთავმა ფიცხლავ შეკრიბა თავის საყმოდან ორასამდე საუკეთესო ვაჟკაცი და თავის ორთავე ვაჟითა ზურაბ-დათუნათი შეეგება ლტოლვილთ.

მხურვალედ გადაეხვიენენ ერთმანეთს სიძე-სიმამრი და სიძე-ცოლისძმები, აგრეთვე მამა-შვილი და და-ძმანი. შემდეგ მოხუცმა დაკოცნა შვილიშვილები და ტკბილად მიესალმა მოურავის მხლებელთ, რომელთა შორის იყვნენ ორთავე პაპუნა, ლომი ჩრდილელი, გელა და რამდენიმე ერთგული ფარეში.

ყველანი დასხდნენ იქვე მდელიზე და გაბეს საუბარ მათ წინ მითამაშობდა გიჟმაყად არაგვი და ულიმოდა გაშლილ მიდამოს.

მაგრამ ეს ბუნების სიტურფენი სრულებით არ იზიდავდნენ ამ დროს იქ მსხდომთ; ისინი უგულოდ შეექცეოდნენ ნაირ-ნაირ სანოვაგეს, რაც უზვად ელაგა მათ წინ გაშლილ სუფრაზე ნუგზარის განკარგულებით. ყელშიაც არ გადასდიოდათ ვერცხლის კულა-აზარფეშებით მიწვდილი ცივი კახური. ყველანი მოეცვა უსაზღვრო პოლმას და მწარე ფიქრებს. ბორკავდა მოხუცი ნუგზარ. იგი ფეხმოკეციით იჯდა გაშლილ სუშმახზე სიძე-ასულს შორის, ხავერდის მუთაქაზე დაბჯენილი, და ქშინავდა. ვერ შერიგებოდა ასეთ საშინელ უმადურობას, გავლენიან თავადთა ბოროტებას, უხასიათო მეფის მუხანათობას, ვერ შერიგებოდა დიდი მოურავის მთელი ოჯახით სასიკვდილოდ გამეტებას, მისი ქონება-მონაგარის გაალაფებას და სახლ-კარის გადაბუგვას.

— განა ეს არის, ჩემო ძვირფასო სიძევ, შენი ამდენი შრომა-ამაგის, შენს გმირულ საქმეთა, ცხირეთ-ტაშისკარის ომთა, მეფის და ქვეყნის საარაკოდ გადარჩენის საზღავი? იჯილდო-დიდების ნაცვლად შავი უმადურობა, ფიცის გატეხა და ღალატით მთელი ოჯახის ამოწყვეტის სურვილი?.. რა გწადის ახლა, ჩემო შვილო?

— გაცლა, სამშობლოდან გარდახვეწა... სხვა გზაი არ მივის, ბატონო ჩემო. — უპასუხა ნაღვლიანი ხმით მიუჩაემმა.

— როგორ?! ხუმრობ განა, თუ მართალს უბნობ, ჩემო სიძევ?!

— არა, ბატონო! მართალს მოგახსენებ... სხვა გზაა არ არის...

— როგორ, გიორკი?! განა მართლა აპირებ მოშორდე შენს ნაამაგარ ქვეყანას, გაექცე სამარცხვინო მტრებსა და მუხანათებს?! ეგ ხომ ლაჩრობაა! არა, ეგ არ შეგფერის ცხირეთისა და ტაშისკარის გმირს დიდ მოურავს!.. ნუთუ ასერიგად შეუშინდი უსუსურ მეფე ლუარსაბს, გესლიან გველთა და ჯაბანთა შადიმან ბარათაშვილს და ფარსადან ციციშვილს? მერე მე და ჩემი მამაცი შვილები დავიხოცენით, განა?! შენი გამეტება და შერცხვენა ხომ იმავე დროს დიდი არაგვის ერისთავის მთელი ოჯახის გამეტებაა და თავის მოჭრა! არა, ჩემო საყვარელო სიძევე, მაგას ნუ იქმ! ეგ არ შეგფერის! მე თამამად შევძლებ ჩემი საყმოდან გაშოფიყვანო ორიათასამდე საუკეთესო მებრძოლი, თუშ-ფშავ-ხევსურეთიდან შეგვიძლია მოვიმხროთ სამიათასამდე მამაცი მეომარი, ისინი ხომ დიდად დავალებული არიან შენგან. ორიათას კაცამდე კიდევ შენცა გყავს ქართლში შენ მიერ საომრად გაწვრთნილი ნაამაგარ გლეხთა შვილები, რომლებიც თავს დასდებენ შენთვის. მაშ რაღა გინდა კიდევ! ეს შევიღიათასი საუკეთესო მხედარ-მეომარი ჩვენი სარდლობით უღრის ლუარსაბ მეფის ოციათას ჯარისკაცს. ქართლის მეფეს ხომ ასე უცებ ძლივს შეუძლია შეჰყაროს ხუთი ან ექვსი ათასი კაცი. მაშ ახლავე შევეუდგეთ საქმეს, ვობრუნოთ პირი გაცოფებული მტრისკენ, დავამხოთ ფიცის გამტეხნი და მოღალატენი! შევემუსროთ ბაგრატიონთა უღირსი ყლორტი და მისი ბოროტი ვეზირანი, ხოლო ივერთა ტახტზე დაესვათ სხვა უფრო ღირსეული! ხომ გესმის, ჩემო სიძევი! მაშ მომე ხელი და ახლავე შევეუდგეთ საქმეს..

ნუგზარის სიტყვებს კვერს უკრავდნენ მისი მამაცი ვაჟნი ზურაბ და დათუნა, ორივენი აქეზებდნენ საომრად გიორკი სააკაძეს და თხოულობდნენ მუხანათთა სისხლის დაღვრაჲს.

— არა, ჩემო სახელგანთქმულო მამავ და მამაცი ძმებო!—დაიწყო დინჯად მოურავმა. არა, ეგ არ ეგების და არ მოუხდების ჩვენს ივერს... ვერ ჩავიდნენ მაგ მძიმე საქმეს... ვერ გადავკიდებ ძმებს ერთიმეორეს, ვერ დავღვრი მოძმეთა სისხლს... ვერ შევკლებავ წითლად ქართველების სისხლით ჩემ მიერ გადარჩენილ სამშობლოს... მას ვერ გავეუთხ-

რი სამარეს და ვერ გავხდი საფლელად ქვავეუორნებისა. ეგ ძმათა ბრძოლა უზომოდ გაახარებს და ფრთებს შეაახამს ივერიის მტრებს: ოსმალთ, სპარსებს და ლეკებს, აღძრავს მათ უმაძღარ მადას ჩვენი ერის ჩასანთქავად... მერე ზომ მოისრა ქართლი და კახეთი! მესხეთ-კოლხეთი ზომ კარგახანია, რაც ჩაბლუჯული ჰყავს ოსმალეთს. ამრიგად ზომ მოისპო მთელი საქართველო! არა, ჩემო საყვარელო მამავ და ძმებო! ასეთ საქმეს არ ჩავიდენ არასდროს! შოწყალედ გთხოვთ თქვენცა დაიცხროთ გული... უმჯობეს არს სააკაძისანთ გვარი შეეწიროს ტურფა ივერს, ვიდრე ქართლ-კახეთი დაიმზოს გიორგი სააკაძის მიზეზით! ეს არის ჩემი ურყევი აზრი.

მოურავის პასუხმა ფრიად ჩააფიქრა მოხუცი ნუგზარ და მისი ვაჟები. სუფრაზე ჩამოვარდა ხანგრძლივი დუმლი, ხოლო ამ დუმილს არღვევდა არაგვის ცელქი ჩქრიალი და ხის ფოთლებში შემალულ სირთა ლალი ჭიკჭიკი.

— მაშ რა გწადს, შვილო გიორგი? სად გასურს წახვიდე? ვის შეეფარვი? შეეკითხა ნუგზარი ხანგრძლივი სიჩუმის შემდეგ.

— სხვა გზაი არ მივის, მამავ, თვინიერ ერანისა. უნდა წავიდე სპარსეთს და შევეფარო შაჰაბაზს, რომელიც მიცნობს ერეენის ომის დროიდან და ახლა კიდევ ამ ორი წლის წინ დიდად მოვიგე მისი გული თათართა ჯარის დამარცხებით ცხირეთსა და ტაშისკართან.

— მაშ, თუ აგრეა, ჩემო შვილო, მეც შენთან ვარ მთელი ოჯახით! ამიერთ მეც ვტოვებ ჩემს საყმოს, მამულს, ციხე-დარბაზებს, ამ მშვენიერ მთებს, ჰალებს, მდინარეს და ამ სიბერის დროს მოვდივარ შენთან ერანს შორეულს! ამიერთ აღარ მწადს მორჩილად ვიყუე და ქედი მოვუხარო ფიცის გამტეხს, მუხანათ მეფეს და მის ქეშიკებს! ამიერთ, დიდო გმირო ივერიისავ, შენთან დარჩება, მკვდარი თუ ცოცხალი, მოხუცი ნუგზარ თავის შვილებით... ვლოცავ, შვილო, შენ მიერ არჩეულ გზასა და შარას... კურთხეულ იყოს შენი განზრახვა, მამულისთვის თავდადებულო!

წარმოთქვა მღელვარედ ეს სიტყვები არაგვის ერისთავმა, ვრძნობით ჩაიკრა გულში თავისი საამაყო სიძე და ეამბოჯა სახეზე თვალცრემლიანი... შემდეგ მოხუცი გადაეხვია თავის ასულს და ბავშვებს, ბოლოს კი თავის ვაჟებს. ასევე მოიქცნენ ზურაბ და დათუნაც. ნუგზარ ერისთავის ასეთმა ქცევამ აუჩუყა გული ყველა იქ დამსწრეს და აღვრევიანა ცრემლი.

მზე ჩასვლაზე იყო, ოდეს აიშალნენ სუფრიდან ყველანი, შესხდნენ ცხენებზე და გაუდგნენ გზას ღუშეთისაკენ.

აქ მიეგება მათ დიოფალი გულქან და სიყვარულით ჩაიკრა გულში დიდი ხნის უნახავი ქალი, სიძე და ბაღიშები.

ორი დღის შემდეგ მათ შეუერთდნენ სააკაძის დედა, დარბაისელი თამარ, და უფროსი ძმა ბეჟან მთელი სახლობით; ესენი გაუსხლტნენ მტრებს ფელის ციხიდან. ამათ მშვიდობით მოსვლამ დიდი სიხარული გამოიწვია.

დაყოვნება აღარ შეიძლებოდა. მტრები თანდათან მაგარ სალტეებით კრავდნენ მოურავის გასაქცევ გზებს, ემზადებოდნენ თავზე დასაცემად. მაშ ან უნდა ატეხილიყო სასტიკი ბრძოლა, ძმათა შორის სისხლის ღვრა, ან უნდა გასცლოდნენ დროით. ნუგზარმა მოახდინა განკარგულება საგზაო ნუზლის შესახებ, აგრეთვე ამცნო საქმის ვითარება და მისცა სათანადო დარიგება თავის უფროს ვაჟს გიორგის, რომელიც იმ დროს იყო ანანურს და აპირებდა იქვე დარჩენას. ნუგზარმა მოიწვია თავის საყმოდან თანმხლებად ათასამდე საუკეთესო ვაჟკაცი, კიდევ ორიოდ დღე და აჰა აიყარნენ მთლიანად და გაუდგნენ შორეულ გზას. ისინი თიანეთით უნდა გადასულიყვნენ კახეთში. აქედან კი უნდა გადაეჭრათ ქიზიყ-საინგილო, შემდეგ გადაივლიდნენ რანშირვანს და ჯულფის გზით ჩავიდოდნენ თეირანში, სადაც იმქამად იმყოფებოდა შაჰაბაზი.

ასეთი იყო ლტოლვილთა გეზი.

დიღმა მოურავმა არ მოისურვა ენახა და გამომშვიდებოდა თავის მეგობარ მთის არწივთა და კახეთის განთქმულ სარდლებს. გმირის გულის ქრილობა, უმადურობა — დაღაღით გამოწვეული, იყო ფრიად მწვავე, არ სურდა მათი

ნახვით კიდეც უფრო მძაფრად ეგრძნო ეს იარა. ამიტომ ლტოტილებმა საჩქაროდ გადავლეს მთა და გადასერეს კახეთ-ქიზიყი. მხოლოდ მცირე ხანს შეისვენეს ალავერდის ტაძართან და ბოდბეს მონასტერში, შემდეგ გადაჭრეს საინჯილო და მიადგნენ მტკვარს, სადაც თავდებოდა ივერიის საზღვარი და იწყებოდა რანი, ანუ განჯის სახანო. შეჩერდნენ აქ და შეისვენეს მცირე ხნით. ხოლო მტკვარში ფონით გასვლამდე ლტოლვილი ქართველები მობრუნდნენ პირით ივერიისაკენ, დაიხოქეს და სამჯერ ეამბორნენ სამშობლო მიწას. ნუგზარ ერისთავმა-კი აიღო პეშვით შავი მიწა, ჩაყარა ქისაში და ჩაიდო უბეში ამ სიტყვებით: „მოხუცი ვარ, იქნებ უცხო ქვეყანაში მომეღოს ბოლო, ველარ კიხილო ჩემი სამშობლო! დეე, ამ ერთ მუჭა მიწამ, კუბოში ჩაყრილმა, მისალბუნოს მიცვალებულს შორ ქვეყანას!“

ამ სიტყვებთან ერთად ნუგზარს მოადგა თვალზე ჭრემლები. მას მიბაძეს სხვებმა, ჩაიდვეს უბეში ნარმაში გახვეული სამშობლოს მიწა. შემდეგ შესხდნენ ცხენებზე, შეაცურეს წყალში და მშვიდობით გავიდნენ ფართოდ გაშლილ მტკვარზე, ხოლო ბარგი ნავებით გადაიტანეს. ლტოლვილნი დაადგნენ ირანის შარას და გამალებით გაქუსლეს ცხენები.

XI. ირანში

სამშობლოდან გადახვეწილი დიდი მოურავი ოჯახობითა და ნათესავ-მეგობრებით გასცილდა ჯულფას, ისინი შევიდნენ შუაგულ ირანში. ვზადაგზა ქართველთა თვალწინ იშლებოდნენ მეტ წილად ტიტველა მთა-გორაკებით მოცული ვრცელი ტაშირნი, სადაც ნაირნაირი მცენარით ირანის ხალივით აფერადებულ სარწყავ ველ-მინდვრებს ცვლიდა ხრიოკ უდაბნოდ ქცეული ურწყავი ალაგები. თვალუწვდენ სივრცეზე მოჩანდა მხოლოდ მშით გადამწვარი ქვიშა და მოყვითანო კლდენი, რომელთა შორის აქა-იქ ზღაზნით მოქანაობდა ზანზალაკების წკარუნ-ქლარუნით საქონელით დატვირთული აქლემთა გრძელი ქარავანი. შორითვე ჩანდნენ ამ უდაბნოს ცოცხალ ხომალდთა აწვდილი ყელნი და ქიმერის თავები.

ერთი თვის მძიმე მგზავრობის შემდეგ ივერნი მიუახლოვდნენ ირანის დედაქალაქ ისპაჰანს, სადაც იმჟამად იმყოფებოდა ჰამადანიდან ახლადდაბრუნებული შაჰაბაზი. მან აღრევე გაიგო თავის ერთგულ აეშაგთა და განჯის ხანის მეშვეობით, რაც მოხდა ქართლში, სცნო ლუარსაბ მეფის მიერ ფიცის გატეხა, უდიდესი გმირის დევნა მოსაკლავად და მისი იძულებითი გადმოხვეწა ირანში. ამ ამბებმა გაახარა ვერავი შაჰი. მას დიდი ხანია სწადდა როგორმე ჩაეგდო ხელში ეს დიდი სარდალი, რათა მისი მეოხებით ადვილად ვანეხორციელებინა თავისი ფართო ზრახვანი ირანის გან-

დიდების შესახებ. იმ ხანებში შაჰს ჰქონდა კიდევ დიდი ომები აღმოსავლეთით ავღან-ყანდაარსა და ჩრდილო-ინდოეთის მიმართ, ხოლო სამხრეთით ერაყში თურქთა წინააღმდეგ. არც ერთი მხრიდან შაჰაბაზს არ მოსდიოდა სანუგეშო ამბები. მისი ჯარები ვერ უძლებდნენ მტრების გაბედულ იერიშებს და ზედიზედ მარცხდებოდნენ. სულთანი ართმევდა შაჰს ქურთისტანს და მეტადრე ერაყს დიდ სავაქრო ქალაქ ბაღდადით, ხოლო სინდნი და ავღან-ყანდაარნი უკრავდნენ გზას ინდოეთისკენ, რითაც საგრძნობ ზიანს აყენებდნენ ირანის ვაჭრობა-მრეწველობას. ასეთი უამური ამბები საშინლად აბრაზებდა შაჰს და დიდ საგონებელში აგდებდა.

სწორედ ამ დროს შემთხვევამ მიაყენა კარზე ივერთა უძლევი გმირი გიორგი სააკაძე ას ოცამდე მამაცი ქართველით. ადვილი გასაგებია, რარიგ გაახარებდა შაჰაბაზს ეს ამბავი! მაშინვე შეაგება უპირველესი დიდებულნი, უხვი საჩუქრებით და უამრავი სურსათით, ათ ეჯზე მოახლოებულ დიდ მოურავს და იშვიათი პატივით შეიწვია ქალაქში.

ახლადმოსულ ივერთ საუკეთესო სახლები მიუჩინეს ბინებად, ხოლო მსახურად დახელოვნებული ყულნი.

მეორე დღეს-კი ირანის ბატონმა ინება და მიიღო სადარბაზოდ დიდი მოურავი და მისი თანმხლები სარდლები.

შაჰაბაზის ორსართულიანი დიდებული სასახლე ირანული სტილით აგებული. სასახლის წინ ვრცელი ეზო, უკან— დიდი უმშვენიერესი ბაღი. ხეხილ-ყვავილნარით და ანკარა შადრევნებით შემკული. სასახლის ქვედა სართულში უზარმაზარი თეთრი სარკოვანი დარბაზი, მდიდრული ხალებით მოგებული, მეტად ხელოვნური ჩუქურთმებით შემკული და ოქრო-ვერცხლით მოვარაყებული. ხოლო მაღალი ჭერი და კარ-სარკმელთა ჩარჩო-თალები მოეკირწყლათ პატარა სარკეებით. ისინი უცნაურად ელვარებდნენ სარკმელებში შემოქრილ მზის შუქზე.

შუა დარბაზში მომალლო ამბიონზე დაედგათ ოქროს სამეფო ტახტი, ძვირფასი ქვებით მოოჭვილი. მის ირგვლივ რამდენიმე წყებად იდგა მდიდრული სავარძლები და მომც-

8. ს. ქვარაიანი.

რო ტახტები პატარა მაგიდებით. დარბაზის კედლებს ამკობდა ფერადი სურათები, საუკეთესო მხატვართა მიერ შესრულებული, ირანის ზღაპრულ გმირთა ბრძოლა-ნადირობის შესახებ, ძველი დროის დიდი მგოსნის ფირდოუსის „შაჰნამედან“. აგრეთვე აქა-იქ იყო ჩართული ირანის სამეფო დინასტიის შაჰინ-შაჰების დიდი ფრესკები და მინანქრები, იშვიათი ხელოვნებით შესრულებული. დარბაზის კუთხეებში კი მარმარის ჩუქურთმიან სვეტებზე იდგა ჩინეთ-ირანის ფაიფურის ძვირფასი ვაზები, სავსე ვარდ-ყვავილთა თაიგულებით, მათი საამო სურნელი ათრობდა დარბაზს.

ამ დიდებულ დარბაზს აერთებდა ეზოსა და სასახლის სხვა ოთახებთან დიდი კარი, რომელსაც ეფარა ოქსინოს ფარდა კრეტსაბმელით; ხოლო მეორე კარი იყო წინა ეზოდან შემოსასვლელი ვრცელი ელამონით, სადაც გუშაგობდნენ ეჯიბ-ამირი და ყულალასარი შეიარაღებული რაზმებით. მესამე კარი კი იყო თვით შაჰის ოთახებსა და ბარებში გასავალი. მას გუშაგობდნენ თვით ირანის დიდებულნი და შაჰსევანები, საუკეთესო იარაღით ჭურვილნი.

ამ დიდი დარბაზის ერთ კუთხეში პატარა ტახტზე იჯდა ფეხმოკეცი ირანის ორი დიდებული: ფეიქარ-ხანი და ამირგურ-ხანი, ათამაშებდნენ ქარვის აცმას და მასლაათობდნენ დაბალი ხმით ახლადჩამოსულ ქართველებზე. ორთავე მოსაუბრე ხანდაზმით ჩამოისევამდა მარჯვენა ხელს ინით შელებილ გრძელ წვერზე, ჩაფიქრდებოდნენ ოდნავ და ისევ განაგრძობდნენ მუსაიფს. არ ახარებდა მათ „დიდი გურჯის“ შემოხიზვნა მამაცი ქართველებით. ისინი თითქო წინასწარ გრძნობდნენ რაღაც ხიფათსა და დამცირებას. დიდი მოურავის საგმირო საქმენი და სამხედრო გენიოსობა შიშსა გვიდა ორთავ წარჩინებულ სარდალს, როგორც ესენი, ისე ირანის სარდლობის მეტი ნაწილი დიდ საგონებელში ჩაეგდო ამ ამბავს, მეტადრე შაჰაბაზის მიერ სააკაძის ასე დიდებით მიღებას, ხოლო თვით ირანის შაჰი არ იზიარებდა ამათ ფარულ ზრახვებს.

სწორედ ამ დროს მისცეს ნიშანი. ფართოდ გაიღო შიგა კარები და სახეიმოდ მორთული მრავალრიცხოვან ამალით

გარემოცული შემოვიდა ამაყი სახით და დინჯი ნაბიჯით ახოვანი შაჰაბაზი. იგი მოწიწებით დააბრძანეს სამეფო ტახტზე. ირგვლივ დასხდნენ დიდებულნი ხარისხის მიხედვით.

შაჰაბაზს ფართო შუბლი ჰქონდა, ოდნავ თეთრად სირმული შავი წვერი და დიდრონი ულვაშები. სიღრმიდან მკვრეტი შავი თვალები. თითქო ძვრებოდნენ ადამიანის სულში და იპარავდნენ მის ფარულ ზრახვებს. მზაკვრული გამოხედვა ჰქონდა შაჰაბაზს, ამ სისხლისმსმელ ტირანს. ამჟამად კი შაჰის სახე კმაყოფილებით აღსავეს იყო. მას თავს ეხურა ძვირფას თვლებით შემკული ოქროს თავჯი, რომლის წინა მხრივ შუა ალაგს ენთო დიდი ბრილიანტი. მისი კამკაშა მოლურჯო სხივები ათას ფერებად ციალებდა მზის შუქზე; შაჰაბაზს ხელთ ეპყრა მსხვილი ფირუზ-მარგალიტებით მოოქვილი ოქროს სფერო და ფაენი. წელზე ერთყა იშვიათი თვლებით შემკული ოქროს ხმალი, ტანს ემოსა ბისონი. ზემოდან-კი ჰქონდა მოსხმული საფირონითა და ბივრილიონით შემკული სიასამურის სამეფო გრძელი აბა.

მყის შეწყდა ხმაური. ჩამოვარდა სამარის სიჩუმე. ყველანი განერთხნენ შაჰის წინაშე თაყვანის საცემად, შემდეგ წამოდგნენ და მოწიწებით შესცქეროდნენ ირანის ბატონის სახეს, ელოდნენ მის ბრძანებას. შაჰმა მოავლო დარბაზს თავისი მახვილი მზერა და უხმოდ მისცა ნიშანი ეჯიბ-ამირს.

ანაზლად გაიღო ეზოდან შემოსასვლელი კარები და დარბაზში შემოვიდა მწყობრად, მოხდენით, ფოლადის ჯუბა-ჯავშან-მუზარადში ჩამსხდარი და იარაღასხმული ორმოცამდე მხედარი, რომელთა მამაცი სახე, არწივის თვალები და გოლიათის აღნაგობა შიშის ზარს დასცემდა მტრის რაზმებს. ამას წინ მოუძლოდა ყველაზე უფრო მამაცი და ბუმბერაზის აგებულების 29 წლის ვაჟაკი. ეს იყო თვით დიდი მოურავი, ხოლო დანარჩენნი — მასთან გადმოხვეწილი რჩეული ივერნი. გმირს მარჯვნივ მხარს უმშვენებდა ახოვანი მოხუცი. მის სუფთად მოპარსულ ღაღაღა დარბაისელ სახეს ამკობდა თეთრი დიდრონი ულვაშები, ხოლო მარცხნივ

მოკყებოდა ზორბა ტანისა და იშვიათი მოყვანილობის 27 წლის მამაცი ქაბუკი, შვეარდნის ელვარე თვალებით. ესენი იყვნენ არაგვის ერისთავი და მისი ვაჟი ზურაბ.

ქართველთა შემოსვლაზე ერთბაშად წამოდგნენ ფეხზე დაბრაზში მსხდომი ირანის დიდებულნი. დიდ მოურავსა და ივერიის განთქმულ სარდლებს ფეხზე ადგომით პატივისცა თვით ირანის შაჰმა. ამ იშვიათმა სანახაობამ მიიპყრო ყველას მზერა. ისინი დიდად გააოცა ივერთა გოლიათურმა ტანადობამ, მამაცმა სახემ, ამაყმა მზერა-მიმოხვრამ და სამხედრო ჩაცმულობამ. ყველამ უნებლიედ იგრძნო მათდამი კრძალვა და პატივისცემა. განსაკუთრებით ვერ აშორებდნენ თვალს ქართლის ეროვნულ გმირს და მის სიმამრ-ცოლისძმას. ამავე დროს ოქსინოს სალაფარდებით ფარულ დარბაზის ზემო ქორედთაგან ნაზი წკრიალით გაისმა გაოცების და აღტაცების ხმები: ესენი იყვნენ შაჰის ჟურთფესი არიფნი, მათ ჰქონდათ უფლება ენახათ საზეიმო დარბაზობა და ქორედებში ჩამსხდართ ეცქირათ სალაფარდის მიჯვრიტებიდან. აი ეს ქარემის კეკლუცნი უზომოდ მოხიბლა, გაოცა და საამოდ ააღელვა ივერიის მშვენიერ ვაჟკაცთა ხილვამ. ქართველები დინჯად მიუახლოვდნენ სპარსეთის ყინს და ჰკადრეს მდაბალი სალამი. დიდმა მოურავმა მიაპყრო თვალნი შაჰაბაზს და მიმართა შემდეგი სიტყვებით: „თქვენ გეახელით ივერიიდან ლტოლვილი ქართველნი. თქვენს წინაშე შორი გზით მოვსულვართ მუხანათობითა და ბოროტებით სამშობლოდან დევნილნი და გენუკვით, სპარსეთის ბრძანებელთ. თქვენს ჰერქვეშ შეფარებას, ხოლო ამის მუქაფად იძღვენით ჩვენი მარჯვენა და ბასრი მახვილი თქვენი მტრების შესამუსრავად!“

ამ სიტყვებით აღტაცებულმა შაჰაბაზმა მოხვია ხელი დიდ მოურავს, უბრძანა მადლობა და დასვა იქვე ტახტზე თავის სიახლოვეს. ასევე პატივით მოეპყრა ნუგზარს, ზურაბს და სხვა სახელოვან ქართველთ, მიუძღვნა ყველას ძვირფასი

ხალათები და მრავალი საუნჯე, აღუთქვა მათ თავის წყალობა და მფარველობა.

შაჰის ბრძანებით მოართვეს სტუმრებს და დამხვდურთ ოქროს სურებით ცივი შერბეთი და ოქროს სინებით სხვადასხვა ტკბილეული მომცრო მაგიდებზე, რომლებიც იდგა ტახტ-საეარძელთა წინ.

გაიმართა ტკბილი მუსაიფი ირანულ-ქართულად, რადგან შაჰაბაზმა, როგორც ქართველი დედის შვილმა, კარგად იცოდა ქართული ენა. შაჰი უმთავრესად დიდ მოურავს ესაუბრებოდა, ჰკითხავდა ივერიის ვითარებას და ცხირეთ-ტაშისკარის ბრძოლის ამბებს, სადაც სააკაძემ გაუფლიტა სულთანს 30 ათას მეომართაგან შემდგარი ლაშქარი. ეს გარემოება დიდად ახარებდა ირანის ბატონს, რის გამო ახლაც კიდევ განუცხადა პირადად თავისი გაოცება ასეთი საარაკო გმირობისათვის, მიუძღვნა მადლობა და დაჰპირდა დიდ წყალობას; შემდეგ შაჰი მიუბრუნდა ნუგზარს, ზურაბს და სხვა ქართველებს, ყველას მადლობა გადაუხადა აღნიშნულ ომებში მამაცად ბრძოლისათვის და აღუთქვა დიდი საგანძური.

დამთავრდა საზეიმო დარბაზობა, ქართველნი დიდი მადლობით გამოეთხოვნენ ირანის ბატონს. შაჰაბაზი წამოდგა ფეხზე, გადადგა წინ რამდენიმე ბოჯი და ამ სახით პატივი სცა იშვიათ სტუმრებს. ამავე დროს მან მიიწვია ყველა ქართველნი მათთვის საგანგებოდ გამართულ დიდებულ ნადიმზე სასახლის დიდ წალკოტში და უხვი მასპინძლობა გაუმართა.

იმავ საღამოს მთელი ქალაქი განათებული იყო ჩირაღდნებით. ქუჩებში გაისმოდა მოქეიფეთა ხმები, ხოლო მოედნებზე გაემართათ შუშხუნების სროლა და სმენას ატკბობდა ტკბილი საზანდარი, აშულთა მიერ შიქასტა-ბაიათით შეზავებული.

გახარებულმა შაჰმა დიდი საბოძეარი გასცა გლახაკთა და ქვრივ-ობოლთათვის დასარიგებლად.

გავიდა ათიოდ დღე ლხინსა და ქეიფში. შაჰი არ ზოგავდა უხვ წყალობას გადმოხვეწილ ქართველთა მიმართ; განსაკუთ-

რებით უხვად აჯილდოებდა ოქრო-ვერცხლითა და თვალ-მარგალიტით დიდ მოურავს, რომლისგანაც მოელოდა შესაფერ გარჯასა და სამსახურს.

შაჰ-აბაზმა დაუთმო ქართველთ კეთილქაეროვანი გრილი და ფრიად ლამაზი აგარაკი, დედაქალაქიდან სამიოდ ეჯის მანძილზე მდებარე. ეს აგარაკი თავისი ამწვანებული ველმინდვრით, ცქრიალა მდინარით, ანკარა წყაროებითა და ტყით დაბურული მთა-გორაკებით მეტად წააგავდა ქართლის ბუნებას, ხოლო კირით თეთრად შელესილ ერთ-ორ სართულიანი აგურის სახლები ფართო ბანებით, წინგარდებითა და პაწია ბალ-ყვავილნარით გარემოცულნი გააგონებდათ ირანს. აი ამ ჯანსაღ და მშვენიერ კუთხეში შაჰის ბრძანებით დააბინავეს ოჯახობით დიდი მოურავი დ მისი ქართველნი. შაჰმა მიუჩინა მათ უხვი ულუფა და უზრუნველყო ტან-ფეხით, სურსათ-სანოვაგით, ოთხფეხი საქონლით, აგრეთვე ყულებით, ე. ი. მხეველ-ფარეშებით. ქართველებმა მალე გააბეს ნაცნობ-მეგობრობა ირანის დიდებულთა შორის და ზოგიც დაემოყვრა კიდევ მათ, ე. ი. შეირთეს ცოლად მათი ქალები, რადგან მოურავის ამაღაში ერივნენ უცოლონი. ქართველთა დაბინავების ათი დღის შემდეგ შაჰ-აბაზმა მოიწვია სასახლეში დიდი მოურავი, შეხმო თავისი სასახლის მომცრო დარბაზში, ჩაკეტა კარები, მოისვა გვერდით ტახტზე, დაუყვავა ვერაგმა თავისი მოთაფლული ენით. ამცნო ფრთხილად ირანის ჯარების მძიმე მდგომარეობა აღმოსავლეთით და სამხრეთით, გაახსენა დაპირება დახმარების შესახებ და უთხრა:

— ივერიის ქებულო გმირო! სწორედ ახლა მჭირდება შენი და შენი მამაცი ქართველების ხმალი და ვაჟაკობა. ახათქვენ იცით, როგორ გაამართლებთ დაპირებას!

საკაძმეს ადრევე შეეტყო ირანთა ჯარების მრავალჯერ დამარცხება ავღან-ყანდაარსა და ერაყ-ქურთისტანში, ამიტომ დღითიდღე ელოდა შაჰისგან ასეთ საუბარს. ყეინის სიტყვების შემდეგ მოურავი წამოდგა, დაიღო ხმალზე მარჯვენა ხელი და მოახსენა:

-- ერანის მბრძანებლო! ჩვენ, აქ გადმოხვეწილი ქართვე-

ლები მზადა ვართ ვიბრძოლოთ თქვენს ჯარებში, შევესრულებთ, რასაც დაგვავალებ.

სააკადის პასუხმა გაახარა შაჰი. ის მოეხვია მოურავს, ჩაიკრა გულში, აკოცა და შესძახა ალტაცებით: „იცოცხლე, დიდებულო გურჯო! შაბაშ მაგ შენ სიტყვას! იგი სალბუნად დაედო ამ გულის მძიმე წყლულსა და შთაანთო შიგ იმედის შუქი! აჰა, აღმართე, დიდებულო გურჯო, ეგ უძლევი ხმალი ჟრანის მტერთა მიმართ! დამიმარცხე ურჩნი და მბრძოლნი: აღმოსავლეთით ძლიერი სინდეთი და ავღანყანდაარი, ხოლო სამხრეთ-დასავლეთით სპარსეთის ძველი მტერი და რისხვა ოსმალეთი! იძიე შური მათზე! დამიბრუნე წართმეული ქვეყნები: ერაყი და ქურთისტანი, გაანადგურე თაეხედნი! აღადგინე გზა შუაგულ ინდოეთისაკენ, რათა მოითქვას სული სპარსეთის ხალხმა და ამრიგად, გმირო, ასახელე მთელ ღუნიანზე ერანის დროშა! ამის მუქათად კი, გურჯო ზღაპრულო, შენ გახდები ჩემს შემდეგ ერანში პირველი კაცი, ეეზირთბატონი, სპარსთა ჯარების დიდი სპასპეტი, შირაზ-ერაყის ძლიერი ხანი და თუ-კი გწადს, გახდი კიდევ მთელი ივერიის მეფედ, მბრძანებლად... ოლონდ განკურნე ამ გულის წყლული და აღადგინე შაჰაბაზის ძველი სახელი!“.

თქვა ეს სიტყვები ცბიერმა შაჰმა.

— ვფიცავ შენს მზეს, ირანის მეუფევე, რომ ამიერთ თავს დავსდებ შენთვის! მოვიკრებ ძალას, რომ გასახელო, დავთრგუნო შენი მოსისხლე მტრები და განვადიდო სპარსეთის დროშა! ვფიცავ ცოლ-შვილს, ვფიცავ საყვარელ ჩემსა სამშობლოს, ჩემს ივერიას, რომ შევებში შენს მტრებს და დაგიმარცხებ! მთელ ღუნიანზე ვასახელებ ერანის დროშას და განვადიდებ შაჰაბაზის სახელს ბრწყინვალეს! ყოველივე ამის მუქათად არ მწადს დიდება, ეეზირთთავობა და სპასპეტობა სპარსთა ჯარების, არცა შირაზის და ერაყის დიდი ხანობა, არც ჩემი ქვეყნის მეფედ გახდომა, რაც არ შემეფერის მცირე გვარის შვილს და რაიც დაბადებს ათეულ წლობით შულსა და მტრობას, ხალხთა სისხლის ღვრას, რაც დაასუსტებს ჩემსა სამშობლოს და აამხედრებს საწიწკნად მის მტრებს. არა, არ მწადის, შაჰო, მე ეს დიდება! მხო-

ლოდ გენუკვი: გებრალეზოდეს ჩვენი ივერი, ერთ დროს ქი-
ბული, მტერთა ზარმცემი... დღეს-კი უნიჭო მეფეთა ხელში
ფეხქვეშ სათელი, დაქინებული, დამცირებული!

ამცნო შაჰბაზს ეს სიტყვები მხურვალე გრძნობითა და
ვბირის თვალეზს დაეკიდა მწვავე ცრემლები.

— ვფიცავ ალაჰს, ქვეყნის გამჩენელს და მის ფეჰამბარს,
დიდებულ მაჰმადს, რომ დავეხმარები ივერიას, შევებრძო-
ლები მის მტერს და დუშმანს, გავუფართოებ საზღვრების
ფარგლებს, თანაც აღვეუდგენ წინანდელ სახელს, ძველს
დიდებას! ავლაგამავ შიგნით ურჩისა თავადებს. გაცემ ბრძა-
ნებას, არ ახლონ ხელი იქ ქრისტეს სჯულსა, ტაძრებს,
მონასტრებს: მოეპყრან ფრთხილად ხალხის ზნე-ადათს,
ძალდატანებით არ ავრცელონ მუსულმანობა, აღარ ააგონ
ჯამეები და მეჩეთები, მისცენ ქართველ ხალხს ყოველგა-
რი შეღავათები, სრულად მოუსპონ ჩემთვის ხარკი, გადასა-
ხადი: ფულად, საქონლად და ქალ-ვაჟებით... კვალად ვფი-
ცავ დიდებულ ალაჰს და მის ფეჰამბარს, რომ ამ ჩემს სიტყ-
ვებს, ამ დაპირებას მე შევასრულებ. — წამოიძახა ვერაგმა
შაჰმა, თუმცა მას გულში სულ სხვა ზრახვა ედო საქართველოს
მიმართ, მაგრამ ახლა სააკაძის გულის მოგება უნდოდა.

— გმადლობთ, ერანის მეფე! გმადლობთ!

— დამაცა, შვილო! ხოლო ივერი კვლავ დარჩება ჩემ სა-
ფარველში, რადგან მეშინის თურქებმა არ გადასანსლოს ხელში
ჩაგდებით და ამავე დროს არ გაიკაფონ გზა ერანისაკენ ჩემი
ხალხისა საბედისწეროდ! არ შევეხები ივერთ სამეფოს შინაურ
მართვას და გამგეობას, არც სჯულს, სამართალს და ქართულ
ენას! ხოლო შევზღუდავ ქართლსა და კახეთს, რომ არა ჰქონ-
დეთ იმათ უფლება ომის ატეხის, ან დაზავების სხვა ხელმწი-
ფესთან ჩემ უკითხავად, ჩემ უნებურად! არცა დავუშვებ, ვინ-
მე მძლავრი, მეგობრის სახით რომ მოიწვიონ.

ამით დამთავრდა ეს საიდუმლო ბაასი.

მცირე ხნის შემდეგ შაჰმა მოიწვია საკმაოდ დიდი ჯარი, ჩააბარა მოურავს და გაგზავნა ავღან-ყანდაარისა და სინდეთის წინააღმდეგ. სააკაძე სასწრაფოდ გაუდგა გზას, თან გაიყოლა თავისი მამაცი ქართველნი, ხოლო აგარაკში ცოლ-შვილის მზრუნველად დატოვა ხანში შესული თანმხლებნი.

საკაძის საომრად გამგზავრებამდე თეირანში მოხდა ერთი საგულისხმო ამბავი.

ერთ საღამოს შაჰის დიდ წაღკოტში ქაშანის აბრეშუმის ნოხ-მუთაქებზე ფეხმოკეცით ისხდნენ თვით შაჰაბაზი, დიდი ძოურავი და ირანის რაჰდენიმე მთავარსარდალი, მიერთყვდნენ ცივ შერბეთს, ხილსა და ტკბილულს, თანაც შეექცეოდნენ „შირიმ მასლაათით“ (ე. ი. ტკბილი მუსაიფით), იგონებდნენ ომების ამბებს, აქებდნენ ამა თუ იმ პირის გულოვნობა-სიმამაცეს. ამ საუბრის დროს, შაჰი შეეკითხა სააკაძეს:

— გიორგი ხან! მოულოდნელი ხიფათის ქამსა თავდასაცვად რა იარაღი სჯობია?

— ის, რაც იმ წუთას ხელში მოგხვდება, მეუფე! — იყო სააკაძის პასუხი.

ამ პასუხმა აღძრა შაჰის ცნობისმოყვარეობა: მან გადაწყვიტა დიდი მოურავის გამოცდა გულოვნობა-სიმამაცეში. ერთი კვირის შემდეგ ივერიის გმირი მარტოდ სეირსობდა შაჰის დიდ მალნარში; წელზე ეკიდა მხოლოდ მომცრო ხანჯალი. უცებ ხეივნის ორივე მხრიდან გამოვარდა ორი პირდაღრენილი ლომი და მივარდნენ გმირს შესაჭმელად. დიდი მოურავი არ დაიბნა ამ უეცარი საფრთხით, მან ელვის სისწრაფით ჩაჩარა პირში ერთ ლომს თავისი ქული, ხოლო მეორე ხელით ამოწვდილი ხანჯლით მყისვე გაუბო თავი მეორე ლომს. შემდეგ მოკლა იმავე ხანჯლით პირველი ლომიც. ეს მოხდა თვალის დახამხამებაში. გმირმა გაწმინდა ბალახზე სისხლიანი ხანჯალი, ჩააგო ქარქაშში და არხეინად განაგრძო სეირნობა.

ამ სურათს უმწერდა მაღალი კოშკიდან თვით შაჰაბაზი იმავე სურათის თანდასწრებით და მათ გაოცებას არ ჰქონდა საზღვარი.

ეს ხალხში დარჩენილი ლეგენდა მოწმობს დიდი მოურავის საარაკო ძალღონეს, სისწრაფესა და გულადობას.

ამის შემდეგ დიდი სარდალი საკმაო ჯარით გაუდგა გზას ავლანთა ქვეყნისაკენ.

ჩასვლისთანავე მოურავმა ზედიზედ დამარცხა ხუთჯერ მეტი ავლან-ყანდაარის ჯარები, აიღო იერიშით მათი ციხე-ქალაქი და სამ-ოთხ თვეში დაიპყრო ორთავე ქვეყანა, აიღო მათგან დიდი ალაფი და დაადო საგრძნობი ხარკი ირანის შაჰის სასარგებლოდ.

გამარჯვებული სააკაძე აქედან გადავიდა ინდოეთში, შეებრძოლა საზღვარზე სინდეთის დიდ ლაშქარს, სასტიკად დაამარცხა რამდენიმე ალაგს და შეიჭრა შუაგულ სინდეთში.

მოხდა დიდი ბრძოლანი, რამაც გასტანა რამდენიმე თვეს და დამთავრდა მტრის ჯარების დამარცხებით. ამრიგად, სინდეთის მმართველმა რაჯამ ქედი მოიხარა ირანის დროშის წინაშე, გადიხადა შაჰის სასარგებლოდ უამრავი ხარკი და გაუხსნა სავაჭრო გზები შუაგულ ინდოეთისკენ.

ენით აუწერელი სიმამაცე გამოიჩინეს ამ ომებში გადახვეწილმა ქართველებმა. დიდი მოურავის გამირობამ და სამხედრო გენიოსობამ ხომ გადააჭარბა ყველაფერს! იგი თავისი რაზმებით ელვასავით ჩნდებოდა ხან აქ, ხან იქ, ამარცხებდა ათჯერ მეტ მტრის ძალებს და იღებდა ციხე-ქალაქებს.

შვიდ თვეში ივერიის გამირმა ბრწყინვალედ დაამთავრა ეს დიდი საქმენი, უამრავი განძით, ალაფითა და სამხედრო ტყვეებით დაბრუნდა ერანში. შაჰაბაზის სიხარულს საზღვარი არ ჰქონდა.

ის უზომოდ გაცეხებული იყო სააკაძის ასეთი უმაგალითო გამირობითა და სამხედრო ნიჭით: შაჰი მიხვდა, რომ სააკაძის სახით მან ძლიერი ძალა მიიმხრო. უხვად დააჯილდოვა მამაცი ქართველნი და უფრო-კი მათი მოთავე გიორგი სააკაძე.

დიდი მოურავის სახელი მოედო მთელ ირანს, მთელ აზიას. იგი შეიქნა მათ თვალში რაღაც უძლეველი ბუმბერაზი. ზღაპრული გამირი. მის ქება-დიდებას დამღეროდნენ აშულნი და მგოსნები.

სააკაძის დაუჯერებელი ამბები ვრცელდებოდა საოცარი სისწრაფით და იპყრობდა ქვეყნის სმენას.

ახლა შაჰაბაზმა იწყო მზადება თურქთა წინააღმდეგ, ერაყისა და ქურთისტანის დასაბრუნებლად.

მან მალე გაგზავნა ჯარი გიორგი სააკაძის სარდლობით. შეიქნა სისხლისმღვრელი ბრძოლა ირან-თურქეთს შორის. აქაც დიდი მოურავის სიმარჯვემ სძლია ყველაფერს. მან ჩაიღინა ნამდვილი სასწაულები, თურქნი უკვე იცნობდნენ მას ცხირეთ-ტაშისკარის ბრძოლებიდან, ამიტომ საშინელი შიშის ზარი ეცემოდათ მის ყოველ დანახვასა და ხმის გაგონებაზე.

რვა თვის შემდეგ აქაც დამთავრდა ბრძოლა „დიდი გურჯის“ ბრწყინვალე გამარჯვებით, რომლის სამხედრო ოსტატობა ფართოდ გაიშალა აქ, შორეული აზიის დიდ საბრძოლო ასპარეზზე.

სააკაძემ აქაც შეასრულა თავისი დაპირება და მოდრიკა შაჰის წინაშე ამაყი სულთანი, თურქებმა გადიხადეს შაჰაბაზის სასარგებლოდ დიდი სამხედრო ხარკი, დაუთმეს მთელი ერაყი ქ. ბაღდადით და ქურთისტანი.

ამ საარაკო გამარჯვებით დიდი მოურავის სახელი კიდევ უფრო გაიზარდა და მთელ ქვეყანას მოეფინა. ალექსანდრე მაკედონელის შემდეგ აზიას არ ენახა ასეთი დიადი გმირი. არასდროს ირანი არ ყოფილა ისეთი ძლიერი, როგორც იმ უამად. მის წინაშე თრთოდნენ თურქეთი და ინდოეთი, ავღანი და ყანდაარი.

XII. შაჰის ჰარემში

მთელ ირანს მოედო ხმები დიდი მოურავის საარაკო გამარჯვებათა შესახებ პირველ ხანებში ავღან-ყანდაარსა და ჩრდილო ინდოეთში, ხოლო შემდეგ თურქეთისაკენ. სულთანის ჯარების სასტიკმა დამარცხებამ, დიდ ქალაქ ბაღდადისა და მდ. ტიგრ-ეფრატის ვრცელი აუზის, ანუ ერაყის. დაპყრობამ ხომ უზომო აღფრთოვანება გამოიწვია ირანის ყველა კუთხეში. ირანის დედაქალაქ თეირანში ამ ამბების გამო იმართებოდა საზეიმო დღეობანი ჩირაღდნებითა და შუშხუნებით.

მგოსან-აშულნი თხზავდნენ ლექსებს და დამღეროდნენ თარზე დიდი მოურავის ზღაპრულ გმირობას. ეს სიმღერები შეიკრა შაჰის ჰარემში და აღაფრთოვანა ირანის ბატონის ტურფა ცოლები, რომელთა შორის მრავლად იყვნენ ივერთ ასულნი. ამ საგმირო ჰანგებმა ყველაზე მეტად შეიპყრო შაჰაბაზის უსაყვარლესი არიფი, ჩერქეზთ ბატონის ასული, 17 წლის მშვენიერი ლეილა, ორი წლის წინ მან თვალი მოჰკრა ივერიიდან ახლადმოსულ გიორგი სააკაძეს შაჰის დარბაზში ქორედის სალაფარდიდან, ამ ერთი დანახვით გმირის დიდმა სახიერებამ დაატყვევა ქალის გული. ახლა-კი ლეილას ესმის მგოსან-აშულთა შიქასტა-ბაიათები დიდი მოურავის ზღაპრულ გამარჯვებებზე.

ამ ჰანგებმა დაანთო ქალის გულში სიყვარულის მწვევე ცეცხლი. მისი არსება მძაფრად შეიპყრო დიადმა ვნებამ. სიზმრად თუ ფხიზლად ლეილას ფიქროცნებანი გარს ეხვე-

ოდნენ „დიდებულ გურჯს“, როგორც ეძახდა იგი სააკაძეს. ხშირად განმარტობით დაძრწოდა ქალი შეღამების უამს ჰარემის დიდ წალკოტში და ვარდ-ყვავილების ბუჩქებში შეფარებული ბადრი მთვარის სხივებზე თეთრი მარმარის აუზის პირას მწარედ ოხრადა.

გავიდა დრო. ბაღდადის მხრიდან მოქრის შიკრიკი, იგი ახარებს შაჰს გამარჯვებული ლაშქრის დაბრუნებას. ჯარს მოუძღვის მთავარსარდალი დიდი მოურავი. უზომოდ გაზარებული შაჰაბაზი ასაჩუქრებს შიკრიკს ოქროებით სავსე ქისით, ემზადება სწრაფად და მიდის შესაგებებლად მთელი ამალით, თან მიჰყავს ნაზი ლეილა.

კუნაპეტი ღამე. გამარჯვებული ლაშქარი მოახლოვებია დედაქალაქს ათი ეჯის მანძილზე და დამდგარა ბანაკად. შორი მგზავრობით დაქანცული მხედრები ადრე მისცემიან ტკბილ მოსვენებას. დუმს მიდამო. მხოლოდ ხანდაზმით ისმის გუშაგთ ყვილი. ბანაკის შუა ალაგას კი დგას მოურავის ფარჩის დიდი კარავი.

ამ უზარმაზარი ბანაკიდან სამი ეჯის დაშორებით ჩირაღებით გაშუქებულა შესაგებებლად გამოსული შაჰის მდიდრული კარავები.

სძინავს ყველას სააკაძის ვრცელ ბანაკში, არ სძინავს მხოლოდ მარად ფხიზელ დიდ მოურავს. მან ჩვეულებრივ დაიარა ბანაკი და დაზვერა გუშაგნი გელას თანხლებით; ახლა კი დაბრუნდა კარავში. გმირმა მოიხსნა ჯუბა-ჯავშანი და დააპირა ძილი. კარავში ბეუტავდა პაწია ჩირაღდი და მისი მცირე სინათლე ვერ სწვდებოდა კარვის კუთხეებს, სადაც ისე ბნელოდა, როგორც გარეთ. ამ დროს შავად მოსილი ორი არსება ფრთხილად შეიპარა მოურავის კარავში და შეეფარნენ ბნელ კუთხეს. ერთი მათგანი ფეხაკრეფით მიუახლოვდა სააკაძეს და უცებ მოიხსნა შავი აჯილა. ჩირაღდის შუქზე გმირის უზომოდ გაოცებულ თვალებს დაესახა დიაცის საოცნებო მშვენიერება.

— ვინა ხარ, ტურფავ! საიდან გაჩნდი ასე იჩქითად?! რამ მოგიყვანა ამ ბნელ ღამეში?!— შესძახა გაოცებით დიდმა მოურავმა.

— ვარ შაჰაბაზის სატრფო არიფი; ჩერქეზთ ბატონის ასული ვარ, მქვია ლეილა. ვარ შენზე მწვავედ შეყვარებული, გმირო ზღაპრულო! ეამსა მარადის შენი მგონე, შენზე მლოცველი. ორი წელია, რაც მოიპოვე ამ ჩემსა გულში ტრფობის სავანე... არა, არ ძალმიძს ამ ქვეყნად ყოფნა უშენოდ! აქ მომადრინა ფაქიზი ფრთებით შენდამი ტრფობამ.

შესძახა ქალმა მღელვარე ხმითა და დაიჩოქა გმირის წინაშე ცრემლთა დინებით.

ეს ნაზი ხმები, მწვავე გრძნობით ალად ნთებული, გულის სიღრმეში ჩასწვდა ვაჟკაცს და ნდომის ცეცხლით ის ააფეთქა.

— აღზდეგ, მშვენებავ! ზეცის მნათობო, ბადრულო მთვარევ! შენი სიტურფე, ჰაეროვნება თვით ანგელოზთაც კი შეშურდება. დამშვიდდი, ნაზო! შეიშვრე ცრემლი! არ ფერობს ასულს ჩერქეზთ ბატონის ეს დამცირება, თავდავიწყება. კარგად გაზომე და შეადარე შენ ვინ ბრძანდები, მე-კი ვინა ვარ! შენ მეუღლე ხარ შაჰის უპირველესი, უუნაზესი სატრფო-არიფი, დიდი რაინდის ჩერქეზთ ბატონის და იალბუზის ტურფა ასული, მე-კი... ოჰ, მე-კი ვილაც ეული. საქართველოდან გადმოხვეწილი წვრილი ცოლშვილით, დღეს უბინადრო, ერანის ქერქვეშ შეფარებული. შაჰის სიუხვით, დიდსულოვნებით მე შეტკობილი, შეწყნარებული... გონს მოდი, ტურფავ! დაიცხრე გული...

და ამ სიტყვებით დიდმა მოურავმა ხელი მოხვია ნარნარ ლეილას, დასვა ტახტზე, თან მიაწოდა დასამშვიდებლად თასით შერბეთი.

— მხოლოდ ისურვე, ქვეყნის დიდებავ, და ხვალ დილითვე მეფე იქნები მთელი ერანის! მთელი სპარსეთი ფერხთ დაგეგება შენი გმირობით აღფრთოვნებული! მხოლოდ ისურვე, და ამ ღამითვე ჩემი მარჯვენა გულსა გაუპობს შაჰაბაზს! უსულო გვამად მას გადავაქცევ ბასრი მახვილის ერთი მოქნევით... ოღონდ ისურვე, ჩემო კერპო, ჩემო სიცოცხლევ! ოღონდ გიყვარდე მე უბედური, სამარადისოდ შენი მხევალი, შენი ლეილა!

...თქვა ეს სიტყვები მწვავედ, მღელვარედ... ელვის სისწრაფით ის წამოიჭრა, ჩაეკრა გულში და გაშმაგებით დაუწყო კოცნა.

ატოკლა უცებ ვაუკაცის გული, ესოდენ ხანი ომებში ნამყოფი, იფეთქა ვნებამ. დიაცის კოცნას მწვავეს, მხურვალეს, მის ვარდის ბაგეს მწვავე კოცნითვე მან უპასუხა... მაგრამ ეს იყო მხოლოდ წამი თავდავიწყების. მყის გონს მოეგო, მოიხსნა ქალი გულში ჩაკრული და მიაწვინა ტახტზე სათუთად. თვითონ განშორდა, დაიცხრო გული და საყვედურით მიმართა მაცდურს:

— გრცხვენოდეს, ტურფავ, ჩერქეზთ ასულო! თავაშეებულმა შენმა მოქცევამ მყის აძიშალა ჭაბუკის სისხლი; ლამის გამხნადა მე მოღალატე; ფიცის გამტეხი ცოლის წინაშე... ვერა, ლეილავ, ვერ ვუღალატებ ნუგზარის ასულს, თამარს მშვენიერს, ჩემსა მეუღლეს, უზენაესი სიყვარულით შეკავშირებულს, ვერ ვუღალატებ ჭირსა და ლხინში ჩემსა მეგობარს, ჩემი შვილების დედას მოყვარულს, ოჯახის ფუძეს! ვერ ვუღალატებ, თუნდ მოგკვდე აქვე ბასრი მახვილით!..

— მაშ, თუ აგრეა, მოკვდი, წყეულო! ჩემო მტანჯველო! ჩემო ჯალათო! მოკვდი!

და ამ სიტყვებთან ლეილას ხელში იელვა რკინამ, უცებ უბიდან ამოღებულმა. სანამ გმირის მკერდს შეეხებოდა ბასრი ხანჯალი, მიპარვით უცებ გელას მარჯვენამ ის შეაკავა; გადაუგრიხა სწრაფად ხელი ქალს გააფთრებულს და გამოსტაცა მას სატევარი. დაეცა ქალი იქვე მიწაზე უსულო გვამად, მეტის სიბრაზით და მღელვარებით შეღონებული. ხოლო მოურავს განუშორებლივ ტანზე ემოსა მტკიცე ნაქსოვი რვალის პერანგი, ამიტომ იმას ქალის მახვილი, სუსტი ხელითვე ის მოქნეული, ვერას ავნებდა.

გონს მოიყვანეს ნელსაცხებით, მოასხეს ჩადრი, თანამხლებ მხევალს კუთხეში ფარულს ის ჩააბარეს და ბანაკიდან სამშვიდობოს მყის გააპარეს.

ლამის წყვილიაღმა შეიფარა დიაცის ვნება და გული ნ-სი შურისძიებით აღბორებულნი...

გათენდა კიდეც... ორივე ბანაკში ზურნამ დაუკრა დილის საარი. გაისმა თანაც ბუკ-ნალარის ხმა. მყის აიშალნენ ორივე მხრივ და მოემზადნენ ურთიერთშორის შესაგებებლად.

სააკაძის უზარმაზარი ბანაკიდან გამოვიდა მწყობრად ათასი ცხენოსანი ჯუბა-ჯავშნით, იარაღასხმულნი და გაემართნენ შაჰის ბანაკისკენ. მათ წინ მიათამაშებდა არაბულ შავ მერანს ირანის ჯარების მთავარსარდალი დიდი მოურავი. მისი გოლიათის აღნაგობა ირჩეოდა მხედართა შორის. მოურავის მარჯვნივ მოაგელვებდა თეთრ ბედაურს მისი სიმამრი ნუგზარ ერისთავი. მარცხნივ კი მიაცურებდა წითელ არაბულ ტაიქს ზორბა ტანის ზურაბ ერისთავი, უპირველესი სარდალი სააკაძის შემდეგ. ამათ მოსდევდნენ თან წაყოლილი ასამდე რჩეული ქართველნი, რომელთაც საარაკო სიმამაცი თასახელეს შორეულ აზიაში თავისი სამშობლო. ამათში ირჩეოდნენ მოურავის მუდამ თანმყოფნი ორი პაპუნა, ლომი ჩრდილელი და გელა, აგრეთვე რამდენიმე თავად-აზნაური. ქართველებს ხელთ ეპყრათ დამარცხებულ მტერთა დროშები და ციხე-ქალაქთა ოქროს გასაღებნი, ხოლო გელას ხელში ფრიალებდა ივერიის ვარდისფერი დროშა; რაზედაც იყო ამოქარგული თეთრ რაშზე მჯდომი წმ. გიორგი, რომლის წვეტიანი შუბი ერჭო დაღრეხილ ხახაში შავ გველეშაპს.

მამაცი ქართველნი მოაგელვებდნენ ბედაურთ ქედაზიდულნი, ბრწყინვალე სახით. მათ ბაგეთგან აღმომხდარი „ქართველო, ხელი ხმალს იკარ!“ და სხვა მხედრული ჰანგები ზრიალით ეფინებოდა ირანის ფართო ტაშირს, ათას ფერებად ამზეურებულს.

ივერთა უკან მოდიოდნენ ცხენებით ირანის სარდლები; მათ მოჰყავდათ ტყვედ წამოყვანილი მტრის ჯარების უფროსნი, იარაღაყრილნი და ხელებგაკრულნი. ხოლო მათ უკან ორი ათასამდე მხედარს მოჰყავდა ხუთასი ტურფა ტყვე ქალწული და ხუთასი ჯორა-აქლემი, ოქრო-ვერცხლით, თვალ-მარგალიტით და ფარჩეულით მძიმედ ტვირთულნი.

ამ ცხენოსანთ უკან ასიოდ ნაბიჯის დაშორებით მწყობრად მოდიოდა ქვეითი ლაშქარი, სამოცათასამდე მებრძოლი, იარაღსხმული, გაშლილი დროშებით; მათ შუაში ჩაყენებულ ოცი-ათას ტყვეს მოჰყავდა ორიათასი არაბული ცხენი, მდიდრულად კაზმული, აგრეთვე ოციათასი ჯორ-აქლემი ძვირფას-ნოხ-ფარდაგებით, ქურქვლით, სამოსით და სამხედრო იარაღით მძიმედ ტვირთული, — ეს იყო მტერთაგან ნადავლი.

მოუახლოვდნენ თუ არა შაჰის ბანაკს, ორივე მხრიდან აქეჟა ბუკმა და ახმაურდა ზურნა. მხედარნი გადმოხტენ ცხენებიდან და გასწიეს ფეხით. ყვითელი ოქსინოს კარვ-დან გამობრძანდა საზეიმოდ მორთული ირანის ბატონი. შაჰის სახე სიხარულით იყო გაბრწყინებული. ირანის ბატონს უკან მოსდევდა მისი ამალა. სწორედ იმ დროს, როცა ორივე მხარე უახლოვდებოდა ერთმანეთს ნელი ნაბიჯით, ცაზე საკმაოდ მაღლა გამოჩნდა უზარმაზარი არწივი, მას ლაღად გაეშალა განიერი ფრთები, თავზე დასტრიალებდა ირანის მბრძანებელს და ფართო წრეს აკეთებდა. შეჩერდა სვლა ორთავე მხარეს ყურადღება მიიპყრო ფრთოსანთა მეფემ. კარგ ნიშნად არ მიიჩნიეს მისი თავზე ტრიალი. შაჰმა იხმო თავისი ამალიდან საუკეთესო მსროლელნი და უბრძანა როლათ სათითაოდ. გავარდა თანმიყოლით ათამდე თოფი საუკეთესო ჩუბინთა ხელში, მაგრამ ამაოდ. არწივი კვლავ ნებიერად უვლიდა წრეს გაშლილი ფრთებით. ფრიად დაღონდა შაჰი; მიმოიხედა ირგვლივ. არავინ ჩანდა სროლის მსურველი. საუკეთესო მსროლელთ დარცხვენით ჩაელუნათ თავი. ამ დროს გავარდა თოფი დიდ მოურავის უკან და ზეცის ნებიერი მეფე გულში ტყვიით განგმირული დაეცა ერანის შაჰის ფერხთა წინაშე. შაჰაბაზის აღტაცებას არ ჰქონდა საზღვარი. შაჰმა ეს მიიჩნია მტერზე გამარჯვების ნიშნად და მაშინვე მოითხოვა არწივის მკვლელი.

ის აღმოჩნდა კავკასიონის მთების ასული, უპირველესი ჩუბინი მამაცი ცარო, ვაჟად ჩაცმული მარად რომ თან ახლდა გიორგი სააკაძეს.

ცარო მაშინვე ეახლა ყაენს თოფით ხელში და მძიმედ მოხარა ქელი მის წინაშე.

— შენ მოჰკალ ეს არწივი? — შეეკითხა შაჰაბაზი ქართულად მის წინაშე მდგომ ჩაბალახწაყრულ მშვენიერ ვაჟკაცს.

— დიახ, აზიის დიღო მბრძანებელი! დიახ, მე გავბედე და მოვკალ იგი თქვენდა სადღეგრძელოდ, რაკი ვიხილე შორით თქვენი შეწუხება!

— ვინა ხარ, შენ, მამაცო ჭაბუკო?

— მე ვახლავარ თქვენი მონა, ივერიის მთების შვილა, გელა ჩრდილელი.

— ვისთან ხარ?

— მე ვახლავარ თქვენ ერთგულს, ივერიის გმირს, დიდ მოურავს.

— კეთილი სწორედ მას შეჰფერის შენსავით მამაცი თანმხლები. დარჩი მასთან და იყავ მისი ერთგული გუშაგი. აჰა, მთიელო გელავ, ჩემი ფეშქეში! — ამ სიტყვებით შაჰმა გადასცა ოქროებით სავსე სამი ქისა.

გელა მადლობის ნიშნად ეამბორა შაჰის გამოწვდილ ხელს და სიხარულით აღტაცებულმა ძლივს წარმოსთქვა:

— ერანის ბატონო, თქვენი მონა-მორჩილი მთიელი გელა არ არის ღირსი ესოდენ წყალობისა!

— მე უკეთ ვიცი, რისი ღირსიც ხარ! შენ მოჰკალ შავი არწივი, რომელიც ბნელ ლანდად დამტრიალებდა თავზე ამ დილით და მიფარავდა დიდებულ მზეს, ხმით შენ კეთილად ამიხდინე ჩემი წუხანდელი ცუდი სიზმარი... ყორჩიბაშ! — მიუბრუნდა იგი თავის სიძეს, უპირველეს ვეზირს, — ჩაიწერე რაყიშში ამ მამაცი ვაჟის ვინაობა; უბრძანე მიუბოძონ მას ძვირფასი თვლებით მოქედილი ოქროს თოფი, დამბაჩა და ხმალ-ხანჯალი, თანაც მდიდრული ხალათი და შეკაზმული საუკეთესო არაბული ცხენი.

— შენი ბრძანება მყის იქნება შესრულებული, ერანის დიღო მნათობო! — მძიმე თავდახრით მოახსენა ყორჩიბაშმა.

— მამაცო გელავ! ამიერთ უფლება გეძლევა მოხვიდე ჩემთან, სადაც კი ვიყო, და მთხოვო, რაც გწადს. აჰა, ამის ნიშანი! — ამ სიტყვებთან ერთად შაჰმა წამოიძრო ნეკიდან ძვირფასი ბრილიანტის ბეჭედი და გადასცა გელას. შემდეგ

ხელის აქნევით გასცა ბრძანება და ორივე მხრიდან დაიძრა ასაბია.

პირველად მიუახლოვდა ირანის შაჰს ივერიის გმირი გიორგი სააკაძე და მიმართა შემდეგი სიტყვით:

— მბრძანებლო! ამ წლინახევრის მანძილზე შენი ძლევამოსილი მხედრობა, ჩემი მთავარსარდლობით, და ივერთა ეს მცირე რაზმი მამაცად ებრძოდნენ ერანის მტერთ აღმოსავლეთით, სამხრეთით და დასავლეთით და მოუპოვეს ერანის დროშას ბრწყინვალე გამარჯვება. აჰა, დიდებულ შაჰო, ავღან-ყანდაარის, სინდეთის, ერაყისა და ქურთისტანის ხანები და სულთანები ტყვედ მოყვანილნი და დამხობილნი შენს ფერხთა წინაშე! აჰა, მათ ციხე-ქალაქთა ოქროს გასაღებნი, ოქროს ლანგრით მორთმეულნი! აჰა, უამრავი ტყვე, მათ შორის ხუთასი უმშვენიერესი ქალწული! აჰა, სპილონი და არაბული ცხენები, ოციათასი ჯორ-აქლემი, ძვირფასი ლარით, განძით, ნოხ-ფარჩეულით და სამხედრო იარაღით ტვირთული! ამიერიით იხარე, ილხინე! იყავ დღეგრძელ და ბედნიერ უკუნისამდე!

უზომოდ გახარებულმა შაჰმა უსიტყვოდ გაშალა მკლავები, ჩაიკრა გულში ივერიის გმირი და ეამბორა მის შუბლს. შემდეგ კი მიმართა აღელვებით:

— იკურთხოს ღედა, რომელმაც გშობა და გაწოვა ძუძუ! ამ მცირე დროს განმავლობაში შენ ჩაიღინე თვით სასწაული. შენ დამიმარცხე უამრავი მტერი! შენ დამიმონე მრავალი ქვეყანა! შენ განაღდე ქვეყნის ოთხივე კუთხემდე ჩემი დროშა, ხმალი და ჩემი სახელი! შენ მოასხი უამრავი ტყვე და ოთხფეხნი, განამდიდრე ჩემი ხაზინა, გაამართლე ჩემი იმედები, სანაქებოდ შეასრულე ამ მოკლე ხანში შენი სიტყვა და დაპირებანი... ამიტომ აღარ ვიცი, რარიგ დაგაჯილდოვო, რისი ღირსი ხარ ესოდენ საქმეთა ჩამდენი! მიბოძებია შენთვის ერაყ-ქურთისტანის სულთნობა; მთელი ნადავლიდან მეოთხედი წილი შენა და შენ მამაც ქართველებს. ამიერიდან შენ პირველი კაცი ხარ მთელს ერანში

ჩემს შემდეგ. გიწვევ დღეს ჩემს დიდ ნადიმზე შენი მამ-
ცი გურჯებით. შაბაშ თქვენს საარაკო გამირობას!

შემდეგ შაჰმა მოიკითხა და დიდი მადლობა უბრძანა და-
ნარჩენ ქართველთ, მათ შორის მეტი ყურადღებით მოეპყრო
ძოხუც. ნუგზარ ერისთავს და მის შვილს ზურაბს.

ამის შემდეგ სააკაძემ წარუდგინა შაჰაბაზს ირანის სარ-
დლები და ის ჯარისკაცნი, რომელთაც ისახელეს თავი
ომებში, შეაქო ისინი და შოკლედ მოახსენა მათი სიმამაცე.

შაჰაბაზმა მადლობა უბრძანა მათ და ყველანი დააჯილ-
დოვა მდიდრულად.

მან შეიწვია თავის კარავში სააკაძე რამდენიმე წარჩინე-
ბული ქართველ-ირანელით, თვით დაბრძანდა ოქროს ტახტ-
ზე, გვერდით მოისვა დიდი მოურავი. ხსევებიც დასხდნენ
ფეხმოკეციტ, ხარისხის მიხედვით; ირგვლივ ჩამწყკრივებულ
ტახტებზე. მცირე საუბრის შემდეგ მოურავის განკარგულე-
ბით შაჰს ოქროს ლანგარზე მოართვეს მტერთაგან წართმე-
ულ ციხე-ქალაქთა გასაღებნი და ნადავლის ვრცელი ნუსხა.
რაც შეიცავდა უამრავ სიმდიდრეს. შემდეგ შემოიყვანეს
ხელებგაკრული მთავარი ტყვეები. ისინი დაემხვნენ მიწაზე
შაჰაბაზის წინაშე და არ იძროდნენ ადგილიდან. ფრიად
გახარებული შაჰი ლმობიერად მოეპყრა ყველას, უბრძანა
ადგომა, გაახსენებინა ხელები და დასვა ტახტებზე ხარისხის
მიხედვით.

შემდეგ მოასხეს ძვირფასად დართული ხუთასი უშშვე-
ნიერესი ქალწული, სინდეთ-თურქეთ-ერაყიდან ტყვედ მოყ-
ვანილი. მათ შორის ბლომად იყვნენ საუკეთესო მგოსან-
მუტრიბნი და კეკლუცად მროკავნი. ტურფა ასულთა დანახ-
ვაზე შაჰს გაუბრწყინდა თვალები. მან აირჩია ამ ქალებ
შორის ასამდე საუკეთესონი და გადასცა ხოჯებს თავისი
პარემის დასამშვენებლად, ხოლო დანარჩენნი დაურჩია თა-
ვის სარდლებსა და ხანებს.

ამასობაში ჩუხჩერახის განკარგულებით სუფრაჯებმა გა-
შალეს სუფრები, დაალაგეს ნაირნაირი ნიმუშადები და ტკბი-
ლეული. გაიმართა სპარსული ნადიმი თარ-ჭიანურით, დაირა-
დულუკით, შიქასტა-ბაიათით და ცეკვა-შუშპარით. ფეხმარ-

დი მერიკიფენი დაქროდნენ სუფრებს შორის, მაღიმალ აესებდნენ თას-ზარფეშებს შერბეთითა და კახური ღვინით. აშულ-მუტრიბნი დამღერდნენ თარზე ირანის ლაშქრის დიდ გამარჯვებას და სააკაძის ზღაპრულ გმირობას.

გავიდა სამი დღე ამ უწყვეტ ლხინსა და ქეიფში. შაჰის ბრძანებით მთელი ნადავლი გაჰყვეს ოთხ წილად: ერთი წილი უძღვნა დიდ მოურავს და მის ქართველებს. ორი ნაწილი გადასცა ლაშქარს, ხოლო მეოთხე წილი ხაზინას. თვით შაჰმა-კი დაიტოვა ასი საუკეთესო არაბული ცხენი და უძვირფასესი თვალმარგალიტნი. ტყვეებშორის დიდი ნაწილი დაურიგა თავის ერთგულ კარისკაცებსა და მოხელეებს, ხოლო დატყვევებულ ხანებსა და ფაშებს ჩამოართვა ერთგულების ფიცი, გაანთავისუფლა და დააბრუნა თავ-თავი ქვეყნებში.

მეოთხე დღეს აიშალნენ ყველანი და მივიდნენ დედაქალაქს, სადაც მთელი კვირის განმავლობაში იყო ფართო ზღინები და ჩირაღ-შუშხუნებით ხალხის ღრეობა, ლხინი და ქეიფი. ილხენდა ისპაჰანთან ერთად მთელი ირანი. შაჰმა გასცა უხვი საბოძარი ქვრივ-ობლებსა და ხეიბარ-გლახებზე ავგო მათთვის ხანაგნი და ურწყავ ალაგას გაიყვანა არხები.

XIII. ლეილას უზუპარი

ზეიმობდა გამარჯვებული ჯარების დაბრუნებით მთელი ირანი. ილხენდა გახარებული შაჰაბაზი. უცხო ხეებით დაჩრდილულ, ყვავილნარით, ხასხასა მოლით, კოხტა თალარებითა და ფერადი მარმარის კოშკებით შემკულ დიდ წალკოტში ნებივრობდნენ შაჰის ჰარამხანის ნაზი ტურფანი. მათი სხეულის ქორთა ნაკვთები სამაცდუროდ ჰვირდა აბრეშუმის სიფრიფა სამოსში. ბროლის შიშველა მკლავები და ღია გულ-მკერდი თვალს იტაცებდა. თარ-ჰიანურის ჰანგებზე ან დოლ-სალამურის საამო ხმებზე სრიალებდნენ ჰაშანის აბრეშუმის ხალზე ვარდისფერი შიშველა პაწია ფეხები. ვნებით სავსე უზუნდარას ცვლიდა ნარნარა მირზაია, ამათ კი ცელქი ლეკური. ძვირფას თვალმარგალიტით ნოოქვილ ოქროს ბეჭდებს, საყურე-სამაჯურებს და ფარღულ-ფარმავლებს, ირანის ბატონის მიერ უხვად მოძებულს, უზომოდ გაეხარებინა მშვენიერ ფერიათა ნორჩი გულები.

აქვე იყვნენ აზია-ევროპისა და აფრიკის ტურთა ასულნი. ტყვეობაში მყოფნი, მეგობრობდნენ ერთმანეთს და ხშირად გალობდნენ თავიანთ ეროვნულ ჰანგებს. ამ საამო სიმღერით იქარვებდნენ სევდა-კაეშანს თავის შორეულ სამშობლოზე და მშობელ-ნათესავთა მიმართ, რომელთა ზილვას ერთი მათგანი თუ ეღირსებოდა ოდესმე. ნაზი ასულნი წააგავდნენ ოქროს გალიაში დამწყვდეულ ლამაზ ჩიტუნებს, და მკაცრ გუშაგებად დღე და ღამ უდგნენ მახინჯი ხოჯების ხარბი თვალები.

ლამდება. ცის კამარაზე ნელა მოცურავს პირბადრი მთვარე; მოსავეს სამყაროს ვერცხლის სხივებით. ჩაღდება ღმერთი მარმარის დიდ აუზებთან. აქა-იქ გაშლილ ხალებს ამკობენ ძვირფასად ნაქარგი ხავერდის ბალიშ-მუთაქები. სუფრებს ალაზათებს რჩეული ხილი, ტკბილეული, შერბეთით სავსე ოქროს სურები და ფიალები. იქვე გაისმის თარ-ჭიანურის ბკვენსარე ჰანგი. სმენას ატკობს მუტრიბთა ნაზი გალობა. იშლება ვნებით თეთრი მკლავები. როკვენ მოხდენით ქალთა ფეხები. შორით მოისმის ბუღბუღთა სტვენა... ელიან ბატონს, შაჰს ბედნიერს, ასეულ ქალთა სურვილის საგანს. ბედნიერია, ვინც სამას ქალში შეიჩერებს ბატონის მზერას, აღძრავს მის ვნებას და იგემებს მის ვაჟურ ლტოლვას, ფეხმძიმედ ქმნილი მიუბოძებს შაჰსა მემკვიდრეს. ამიერიდან იგი ხდება შაჰის მეუღლე, დიდი უფლებით და ფუფუნებით უხვად მოსილი, სხვა ქალებს შორის შურის აღმძვრელი. ხოლო ის ტურფა, ვინც იგემებს შაჰის ტკბილ ალერსს და უნაყოფოდ დარჩება, იგი ოთხი თვის შემდეგ გადაეცემა ფეშქაშად ვინმე დიდებულს, ვით ამიერიით ურგები ნივთი დიდებულ შაჰის ჰარამხანაში...

აი, სვე-ბედი იმ ასეულ და ათასეულ ტურფა ასულთა, რომლებიც უწყვეტ ნაკადად მომდინარეობენ ყოველი მხრიდან შაჰის წალკოტში.

მაგრამ ამ საღამო ჟამს არავინ ფიქრობს, თუ რა მოელის! გატაცებულან მხოლოდ აწმყოთი, ტკბილი ნადიმით, საამო ხმებით, საკრავთა ჟღერით; ვნებააღძრულნი მთვარის სხივებზე, ბუღბულის ხმაზე, ქირმანის ხალზე მოცეკვავენი ელიან მიჯნურს, შაჰს დიდებულს!

მხოლოდ არ ფიქრობს ირანის შაჰზე ერთი ასული, ფერიებს შორის უტურფესი, უუნაზესი. განშორებია მხიარულ სუფრას, შეფარებია უსურვაზებით მოვლგბულ თალარს, წალკოტის ბოლოს, და მოუთმენლად ელის ვიღაცას.

მცირე ხნის შემდეგ იღება ფროთხილად მაღალი ზღუდის ფარული კარი და შემოდის ორი არსება შავად მოსილი.

— შენ ხარ, ზაირავ? ხომ მოიყვანე, ვინცა მინდოდა? — შეეკითხება ახლადმოსულს მსუბუქი ხმითა თალარში მყო-

ფი. — აქ არის ჰასან, ყაჩაღთ ბელადი ფრიად განთქმული ძლიერს ვიპოვე და მოგიყვანე, ჩემო მშვენებავ! — და ამ სიტყვებთან შეეჩადრიანმა მოხუცმა ქალმა ნელა წასწია უზარმაზარი ტანის თათარი, თვით გამოვიდა; დაღვა გუშავად იქვე მახლობლად.

— ჰასან, ხომ გწადის ბევრი სიმდიდრე და უტურფესი ქალის ალერსი! ჰა. შეგომხედე!

ამა სიტყვებით ქალმა მოიხსნა პირსაბურავი და მთვარის შუქზე ყაჩაღის თვალებს დაეხატა სახე ციური.

— ჰალა! ეს ხომ ჰურიია, ჰური! უტურფესი, თვით ედემიდან მოვლინებული! სადა ხარ, ჰასან! ეს სიცხადეა, თუ სიზმარეთი?! — შესძახა იმან აფროთოვანებით.

— ჰასან, ხომ გწადის ასეთი ქალის ალერსთან ერთად სულ ბევრი ოქრო?!

— იამან! მნათობო ცისავ! იამან! უბრძანე შენ ყულს, ჰური, რა გწადის? — მუხლმოდრეკითა შებღავლა ტურფას ყაჩაღ-ჰასანამ.

— ჰა, ამჟამად ორასი ოქრო! როს შეასრულებ ჩემ დავალებას, ეს ტურფა სახე, ეს კოკებობ, ჩემი სხეული შენი იქნება სამარადისოდ! ხომ გესმის, ჰასან!

— მესმის, ციურო! მიბრძანე, რა გსურს?

— აი ამ ხანჯლით გული გაუბე გურჯსა დიდებულს! — და ამ სიტყვებით ქალმა გადასცა ბასრი მახვილი.

— ვისა, მშვენებავ? ვერ გავიგე, კარგად მაუწყე.

— გურჯისტანიდან ერანში მოსულს ჯარების სარდალს, დიდსა მოურავს, ინდოეთიდან და ერაყიდან ახლადჩამოსულს. ხომ გესმის, ჰასან! ამ სიტყვების გამგონე ჰასან გაოცებული იღვა მღუმარედ.

— რას სდუმხარ, ჰასან! ხმა ამოიღე! განა იმ გურჯის მარტო სახელმა ასე, ამრიგად შენ შეგაშინა, ყაჩაღთ ბელადი სახელგანთქმული?!

— არა, ცისკარო, პირბადრო მთვარევე! ნუ მეხუმრები! მოურავი ხომ გმირია დიდი და უძლეველი მთელ დუნიაზე! ის ხომ თვით შაჰის სპასალარია უახლოესი; უსაყვარლესი! მე ვით გავებდო მისი მოკვლა, ვილაც ყაჩაღმა?!

— გრცხვენოდეს, ჰასან, ეგრე ლაჩარი როგორ ატყუებ სპარსელ ყაჩაღთა უფროსის სახელს! სირცხვილი შენი! კაცი კი არა, ქალი ყოფილხარ. სულით ჯაბანი. მე კი შეგონე დიდი ვაჟკაცი. შე ლაჩარო! წადი, გამშორდი აღარ გიბოლოს ჩემმა თვალებმა! და ამ სიტყვებთან ჩერქეზთ ასულმა მრისხანე სახე მას შეანათა. ამ გაათრებით უფრო დამშვებს და ტურფა ლეილა.

ველარ გაუძლო ამ დამცირებას, ლანძღვას, გაქირდვას და ამ მშვენებას ყაჩაღის გულმა. ვნების სახმილით სრულად აღიგზნო მისი არსება. დაემხო დიაცის წინ ქალის სიტყვებით გარინდული და მოწიწებით ეამბორა კოპწია ფეხებს.

— კარგი, მნათობო ზეცის! კარგი, მეუფევე სულის! აჰა, მივდივარ მძიმე საქმეზე ყაჩაღთ ბელადი, ემაგ მშვენებით გახელბული, და დაგიმტკიცებ, რა ვაჟკაცი ვარ! ვფიცავ შენს თავს, რომ ხვალ დილითვე მზის ამოსვლამდე ამ მკვდრად მიგულე. ან ამავე ბაღში, აქ, ამ ალაგას. მოგართმევ, ტურფავ, იმ დიდი გურჯის მოკვეთილ თავსა შენივ მახვილით. მივალ, მშვენებავ! ოღონდ ერთ კოცნას გთხოვ შენი ყული თან წამატანო, რომ ვიქცე ლომად და უფრო მტკიცედ შენი ბრძანება მე შევასრულო!

უცებ მუხლმოყრილ ყაჩაღს ვნებიანს ჩაეტკბნენ მწვაველ ქალის ბაგენი.

— წადი, საჩქაროდ! არ დაგინახონ! ალაპი იყოს შენი მფარველი! წადი. იმ გურჯის მოკვეთილ თავით მე გამახარე, თუ გწადს რომ ვიყო სამარადისოდ შენი სატრფო შენი მხევეალი... ხომ გესმის! წადი! როს ამ ხანჯლითა გაუპო გული გურჯსა მომაკვდავს ასე ჩასძახე: „გიაურ! კვლები ჩერქეზთ ასულის, ტურფა ლეილას ბასრი მახვილით!“ მსურს, რომ გამწარდეს სიკვდილისა უამს ის გიაური... ზაირავ! გაიყვა ჰასან და გასაღები შეინახე. დილის რიყრაყზე ამ ფარულ კართან იდევ დარაჯად. ჰასანის ძღვენი ამავე თალარში შენ მომაწოდე, თუ გწადს აგავსო თვალ-მარგალიტით. ჰასან! შენი ლოდინით მე არ მომივა თვალებზე რული. წადი, მამაცო! გაბარებ ალაჰს და მის ფეჰამბარს...

ამ სიტყვებით მთების ასული, შურისძიებით აღბორებუ-

ლი განშორდა თალარს. სწრაფად მიმალა შავი აჯილა იქვე ბუჩქებში და საოცნებოდ გამოწყობილი დიდ შადრევანთან ცეკვა-შუშპარით და ლხინით დამთვრალ ტურფა ფერიებს ის შეუერთდა.

ამ დროს გაისმა მოშორებით რაღაც ხმაური. ზურნადუდუქმა, საზანდარმა დაჰკრეს რააბი. მსუქან ხოჯებით და საოცნებო ჩირალ-ლიფლიფით გარემოცული გამოჩნდა შორით ბრწყინვალე გვირგვინით შაჰაბაზი. მას შეეგებნენ ცეკვა-შუშპარით, სავსე თასებით ნაზ ფერიები, ვით მენადები ზღაპრულ დიონისს...

მეფე მობრძანდა დედოფალთ შორის, გაჩაღდა ლხინი... ზეცას სწვდებოდა საკრავთა ხმები, მუტრით გალობა...

მთვარისა შუქით აელვარებულ ვარდ-ყვავილებით გარემოცულ დიდ შადრევანთან ცადტყოკნილი კიპარისების და სურნელოვან ლეილალების საფარველ ქვეშა ქორფა მდებლობე ფართოდ გაშლილა ქირმან-ქაშანის ძვირფასი ხალნი; უხვად ბნეულან ირგვლივ სამ წყებად ფაქიზნაქარგი ფარჩა-ხავერდის მუთაქები და ბალიშები. შუა ალაგას დინჯად დაბრძანდა სვებედნიერი ირანის ბატონი, უუტურფესი ფერიებით გარემოცული.

იწყეს ალერსი, ცელქი ხუმრობა. შეექცეოდნენ ნაირნაირ საამო ხილით, შაქარლამებით, ცივი შერბეთით, ცივი ვეფინით, რაც კი ელაგა მათ წინ მოხდენილ დაბალ პატარა შავ მაგიდებზე. იქვე ამკობდა დიდებულ ქეიფს ძვირფას ვაზებში ვარდყვავილების სურნელოვანი თაიგულები: შორი ახლოს კი უსურვაზებით შელამაზებულ თალარიდან ისმოდა მუტრით საამო ხმები, საკრავთა ჟღერა. უხვად იკმოდა შირაზის ვარდის ტკბილ-სანეტარო სურნელოვნება...

შაჰის ბრძანებით იქვე დუდუქმა და საზანდარმა ნელ-ტკბილი ხმებით უზუნდარა ამოაკვნესა. საკრავთ მთვლემარე, მტკბარი ზუზუნი იქ მყოფთა შორის ეინს აღვიძებდა, თანაც იწვევდა სურვილით თრობას...

იშვებდა შაჰი. გამძაფრდა ლხინი, ზეცის ამულით დათქორებული. ამ დროს საზანდარის ხმათა თილისმით გარინდებული წამოდგა ქალი, ვით სიზმრად მყოფი. ნელი ზმორე-

ბით გაშალა ხელი. ნარნარი რხევით და გოგმანით მან დაუ-
არა... ზეციურ სახეს უციალებდა ნაზი ღიმილი. თეთრი
მკლავები, თითქო ფაროსის მარმარი, ტურფა სახეზე მოელ-
ვარე შავი თვალები, ღურღნა წამწამთა ჩერო ფრქვეული,
ოდნავ პობილი მარჯნის ბაგენი, ბროლისა მკერდი, ცელქად
მომზირი ვარდის კოკებები — ტრფობის სურები, ქირმანის
ხალზე მოსრიალე წაპა ფეხებით და სრულად მისი ზილფო-
ვანი ნარნარა ტანი, სიფრიფა ფარჩით ოდნავ ფარული, იწ-
ვედნენ ოცნებას.

რალაც წარმტაცი აღტაცებით შესტრფოდა შაპი ხალზე
მოხდენით მროკავ მენადას.

თვით მოცეკვავე, შორეული მთების ასული, ხან შეიფ-
რენდა მკერდაზიდვით, ვით შევარდენი, და დაუვლიდა ვე-
ლურ სისწრაფით, ხან კი მოსხლეთით, ვნების ფრთებზე
მისვენებული, ყელმოღერებით მოგოგავდა მკლავების რხე-
ვით. სახეს უმკობდა ნაზი ღიმილი და სურვილებით სავსე
თვალები. და ეს სურათი — მომჯადოები, ქალის შუშპარი
სისხლს აგიჟებდა...

კვლავ ზუზუნებდა ნელი მუსიკა ვნებიან ჰანგებს, კვლავ
იტაცებდა იქ მყოფთა მზერას ქალის შუშპარი, მთვანისა
შუქზე ასხივებული. ხან ეშხით სავსე თვალებით მისრია-
ლებდა მკლავებგაშლილი ნარნარი რხევით, თითქო შესტრ-
ფოდა მიჯნურს შორეულს, ხან უეცარი შეტრიალებით უვ-
ლიდა დავლურს. მცირე ხნის შემდეგ ისევ ნელინელ იხვე-
და უკან.

მთების ასულის ამ გასაოცარ როკვა-შუშპარში ჭვირდა
ფერადი აღმოსავლეთი უშრეტი ცეცხლით და უუტკბესი აღ-
ერსით...

ბევრჯერ უცეკვავს ტურფა ლეილას აქ უზუნდარა შაპის
წინაშე, ხოლო ამ დამით მისი შუშპარი იყო უწვედენი, სურ-
ვილებით აღმოდებული...

ცეკვის დასასრულს შორის ტყორცნილი ქალის თვალები
თითქო ხედავდნენ ჩუმად შეპარულ ყაჩაღ ჰასანას და იმის
ხელში ელვარე მახვილს. მზერს, რომ ხანჯალი გასაგმირა-

ვად უახლოვდება მძინარე ვაჟკაცს; უახლოვდება იმ გულს, რომელმაც არ მოისურვა ამ დიაცის ზვევნა-ალერსი და სიყვარული. ჰა, შერცხვენილი ჩერქეზთ ასული შურს იძიებდა, რაც თვით ვნებაზე უუტკბესია! თითქო ხედავდა მოურავის გულს სისხლმოთქრიალეს. თითქო ამ წუთას თვრებოდა იგი „გურჯ-გიაურის“ წითელი სისხლით...

უცნაურია და საშინელი ხელნაკრავ ქალის შურისძიება! კვენესდნენ საკრავნი ხმებს მინაზებულს. როკავდა ქალი. შორს მზერდნენ თვალნი ვნებით ლესილნი, შურისძიების ცეცხლით ნთებულნი. და ამ შუშპარით ნელით და ჩქარით თვით ითვრებოდა. თვრებოდნენ მზერით შაჰის კეკლუცნი. თვრებოდა ტრფობით შაჰის თვალეზი, მთელი არსება...

შეწყდა საზანდრის ჰანგი მკვენესარე და მასთან ერთად ირანის შაჰის ფეხთა წინაშე უცებ მოსხლეტით დაეცა ქალი; ვით ჯეირანი ისრით დაჭრილი, გულის სიღრმიდან აღმოხდა გმინვა და ლამაზ თვალეზს წასკდა ცრემლეზი...

XIV. ცარო

ისპაპანიდან სამი ეჯის დაშორებით, ტყით დაბურულ ვორაკებს შორის, მომცრო ტაშირზე გაშლილა ბაღებში ჩაფლული ლამაზი აგარაკი. სპარსულად აგებულ ორსართულიან თეთრ სახლებს ამშვენებს ფართო ბან-წინგარდები. შაჰის ბრძანებით ეს კოხტა აგარაკი მთლიანად გადაეცა ბინებად დიდ მოურავს და თანმყოლ ქართველებს. აგარაკს შუაზე სერავს პაწია ცელქი მდინარე, თევზებით სავსე. მთებიდან კიდევ აქა-იქ მორაკრაკებენ ანკარა წყარონი. ეს კოპწია აგარაკი მდებარეობით მეტად წააგავს ქართლის რომელიმე კუთხეს, რაც ფრიად ახარებს ივერიიდან გადახვეწილთ.

სალამო ჟამია. ახლადჩასული მზის ნაცვლად მთებიდან ამოწვერილა გაბადრული მთვარე და მიდამოს ხვევს ციატა სხივებში. დღის პაპანებას ცვლის გრილი ნიავი. სახლის ბანები სავსეა ქართველებით. ომგადახდილნი ხარობენ თავიანთ ცოლშვილში. სერობის ჟამია. მათ წინ გაშლილ სუფრებს ამკობს ნაირნაირი ნამზადები და ტკბილეული.

შუა ალაგს მდებარე ყველაზე უფრო დიდი სახლის ბანზე გაუშლიათ ფართო ნოხები ხავერდის მუთაქა-ბალიშებით. მათზე ფეხმოკეციტ სხედან გიორგი სააკაძე თავის ცოლშვილით და ახლო ნათესავ-მეგობრებით. დიდ მოურავს მხარს უშვენებენ მოხუცი ნუგზარ და ორი ცოლისძმა — ზურაბ და დათუნა, აგრეთვე უფროსი ძმა ბეჟან სააკა-

ძე და მისი ვაჟი, ფრიად ნიჭიერი და გამბედავი როსტომ, ხოლო დიასახლისის გვერდით სხედან დედამისი — დიოფალი გულქან და დედამთილი თამარ. ამათთან კი სხედან 5 და 6 წლის მშვენიერი ვაჟები ზურაბი და ავთანდილი, უფროსი ვაჟი კი, 7 წლის პაატა, განუშორებლივ გვერდით ჰყავს თავის „გმირ ბაბას“, როგორც ეძახდა ბავშვი მამას. აქვე არიან მოურავის უახლოესი მეგობრები და ძმადფიცულნი — ორი პაპუნა, ლომი და გელა ჩრდილელი.

ტკბილი საუბრით იგონებენ სტუმარ-მასპინძელნი გადახდილ ომთა ამბებს, მეტარდე ორი წლის წინათ მიტოვებულ სამშობლოს. მათ წინ გაშლილ სუფრას უხვად ამკობენ ქართულ-ირანული ნამზადები: ლულაქებაბი, ბოზბაში, ქათმის ჩიხირთმა, შემწვარი ვარიები, ფლავი და ბატკნის შუშხუნა მწვადები, აგრეთვე ხილი და ტკბილეული. სუფრას ახალისებს თეთრი და წითელი ღვინოები. კულა-თასები გადადის ხელიდან ხელში. ხანდახმით აუკიდებენ „სუფრულს“ ან კახურ „მრავალყამიერს“.

დიასახლისი თამარ წყნარად აძლევს განკარგულებას მწდესა და ფარეშთ.

— ნეტავ რა ისმის საქართველოდან? — იკითხა ბოხი ხმით ნუგზარ ერისთავმა და დინჯად გადისვა ულვაშებზე ხელი.

— კარგი არაფერი, ჩემო ბატონო! — უპასუხა სიძემ. — ჩვენ მოსისხლე მტრებს, დიდ თავადებს: შადიმან ბარათაშვილს, ფარსადან ციციშვილს და ქაიხოსრო ჯავახიშვილს, ჩაუგდიათ ხელში უნიათო მეფე ლუარსაბი და როგორც სურთ, ისე ათამაშებენ. სხვა თავადები კიდევ კინკლაობენ ურთიერთ შორის, ართმევენ ერთი-მეორეს მიწა-მამულს და უხვად ღვრიან მოძმეთა სისხლს. ხოლო შუაგულ ქართლში გაბატონებულა ზვიადი თავადი ანდუყაფარ ამილახორი — ეს ქრისტეს სჯულისა და სამშობლოს გამყიდველი, თვით შაჰის სიძე, მისი ერთგული მონა, და რაც სურს, იმას ჩადის. დაუპყრია ჩემ მიერ ახლადდასახლებული გლეხობა, მთელი ტირიფონა, აგრეთვე ორთავ ლიახვ-მეჯუდის ვრცელი ვაკენი ქსნამდე და აწიოკებს მშრომელ ხალხს; ანდუ-

ყაფართან ერთად სამშობლოს. რისხვად მოვლენია იასე ქსნის ერისთავიც...

— ვერ გვამცნე კარგი ამბავი, შენმა მზემ! მართლაც რომ უბედური ხალხი ვართ ქართველნი: ვიღუპავთ ჩვენსავე თავს, ვახარებთ შინ შემოხიზნულ და გარე მტრებს, რომლებიც თავს გვესხმიან და ლამობენ ჩვენს მოსპობას.

— მართალს ბრძანებთ, ბატონო მამავ, — დაიწყო დათუნამ. — ამბობენ, კახეთში კიდევ უარესი ამბებიანო, იქაც შფოთი და არეულობა სუფევსო.

— ეჰ, ამას კი ვიტყვი, რომ სანამ რვად დაგლეჯილი პატარა საქართველო არ გამოთელდება და მას არ დაეუფლება დიდი გონების და მძლავრი მარჯვენის ადამიანი, მანამ არაფერი გვეშველება. ჩვენ გვეჭირვება დავით აღმაშენებლისა და გიორგი ბრწყინვალეს მსგავსი ძლიერი, ქვეყნის მოქირნაზულე მეთაური. აი, მხოლოდ მაშინ არ დაგვჭირდება იქითაქეთ ხელის პოტინი, მხოლოდ მაშინ გავხდებით სულით მაღალნი, დოვლათით სავსენი, ჯანით ძლიერნი და ლად მეზობელთა მიმართ ზარის დამცემნი, ისეთნი, როგორიც ვიყავით ძველად ოქროს ხანაში! — დაამთავრა აღფრთოვანებით დიდმა მოურავმა.

— ეე, შორსა სწევ ხელებს, ჩემო სიძე და ძმად-ფიცულო! — შეეკამათა ზურაბ ერისთავი. მას არაფრად ეამა საქართველოს განდიდება ერთი ძლიერი მეფის ფაენის ქვეშ, — საქართველოს ყველა ტომის ერთად შექუჩება მეტად დასცემს დიდი თავადების გავლენასა და ქედმაღლობას, ეს კი არაფრად საამოა მამაჩემის ოჯახისათვისაც. ყველამ კარგად უწყით, რა დამართა დიდებულ თავადებს დავით აღმაშენებელმა, ანდა გიორგი ბრწყინვალემ.

— მართალია, ძმაო, ორთავე მეფემ სასტიკად დასაჯეს უჩრჩნი და ქვეყნის მოღალატენი, ხოლო იმავე დროს აღმაღლეს ხალხის ერთგულნი. მოგეხსენებათ, რომ ლიპარიტი და რატი ორბელიანები, ანდუყაფარ ამილახორი, იასე ქსნის ერისთავი და მისთანები მარად ჟამს გამთიშავი ძალებია. ისინი მზად არიან შესწირონ სამშობლო თავის პირად ქე-

თილდღეობას. ასეთი კაცნი კი ფრიად მანენი არიან ქვეყნ-სათვის. სახელმწიფო მაშინ შედის წარმატებაში, როცა მისი დიდებულნი დაგმობენ პირადულს და შეეწირვიან ხალხის კეთილდღეობას. ასეთნი იყვნენ ძველად ვანტანგ გორგასლანი, დავით კუროპალატი, დავით აღმაშენებელი, პირიმზე თამარ, ცოტნე დადიანი, დიმიტრი თავდადებული, გიორგი ბრწყინვალე და სხვა მრავალნი. ამიტომ ჩვენც უნდა წავბაძოთ ამ დიდსულოვან ადამიანთ, თუ კი მართლაც გვიყვარს ჩვენი სამშობლო.

მოურავის სიტყვებმა სიხარული გამოიწვია მისი დედის, მეუღლის, მდაბიო ძმადფიცულთა, ძმასა და ძმისწულს შორის. ამ სიტყვებმა განსაკუთრებით გაიტაცა გელა, რომელიც აღტაცებით მისჩერებოდა ივერიის გმირს და ნთქავდა მის თვითეულ სიტყვას. ხოლო სააკაძის ასეთი აზრები სრულებით არ ესიამოვნათ ნუგზარ ერისთავს და მის ვაჟებს. რომ ასცილებოდა ამ უსიამოვნო ბაასს, ნუგზარმა იკითხა კვალად:

— ნეტავ ჩვენს მთაში როგორილა ამბებია?

— ცუდი, შენი კვენესამე, ცუდი, — უპასუხა ლომიმ: — უბნობენ, აიშვეს თავი და ესხმიან ქისტ-ჩეჩენი უპატრონოდ დაყრილ ფშავ-ხევსურთა და საქონლის ტაციობით დიდ ზიანს აყენებენ თურმე.

— ვინ მოიღო ასეთი უსიამოვნო ამბები? — იკითხა სურაბმა.

— ჩემი ძმა ვაჟა ჩამოვიდა საქართველოდან და იმან, შენი კვენესამე, — უპასუხა ლომიმ, — ბაბაი და დედაი დაგვხოცია სახადით. ესეც აღარ გაჩერებულა მთაში ჩვენის ნატვრითა და წამოსულა აქეთ. ცხორი ბიძისათვის ჩაუბარებია.

— ეეჰ, მომწყინდა ამდენი თრევა ამ უცხო ქვეყნებში! ეს ავღანეთი, ყანდაარი და ინდოეთი, ეს ერაყი და ქურთისტანი ხომ მოვთელეთ. იმოდენა ქვეყნები დავუპყარით შაჰს, არ დავზოგეთ ჯანი და ღონე. მისი დროშა და სახელი გავადიდეთ მთელ დუნიაზე. რაილა სურს მეტი?! დავგაბრუნოს ჩვენს ივერიაში და მოგვცეს ფირმანი, რომ არა რაი

გვეცნოს. ოჰ, რარიგ მენატერის ჩემს ანანურში დაბრუნება და მთებში ჯიხვებზე ნადირობა! — წარმოსთქვა ნაღვლიანად ზურაბმა და გადახედა სიძეს.

— ეგეც მალე იქნება, ჩემო ზურაბ, — უპასუხა მოურავმა, — შაჰაბაზ თვითონ აპირებს საქართველოში წასვლას და, უშეკოა, თანვე წაგვიყვანს. ხომ გახსოვს, რა თქვა ამასწინათ! უხვი ქონებითაც ხომ ყელამდე აგვევსო ქართველები. მაშ, მცირე მოთმინება კიდევ და წავალთ ყველანი.

— ნეტარძი მალე გავშორდებოდეთ ამ უცნაურ ქვეყანას! ვერ შევეგუე კავკასიონის მთებში გაზრდილი სპარსეთის პაპანებასა და გარუჯულ მთებსა, თუმცა ამ ჩვენს აგარაკს არა რაი უშავს! — წარმოთქვა მოურავის ნეულღემ.

— კეთილად ბრძანებ, შენი კენესამე! ი თოვლიანი მთების ხილვა და ბროლის ჩანჩქერით გულის გაგრილებადი სრულად მირჩვენის ყველაფერსა! ჯიხვ-არჩევებზე ნადირობა ხომ სიცოცხლეა, ჩემო ბატონო! — წამოიძახა ლომამ აღფრთოვანებით.

მთიელის მგზნებარე კილომ ყველას გაუძლიერა წყურკილი სამშობლოს ნახვისა, განსაკუთრებით გელას, რომელიც სრულიად ვერ შეეგუა ამ ცბელ ქვეყნებს, ოხრავდა ბუნებით შემკულ ივერიასა და უქმეოდ დაგდებულ ხალხზე, რომელსაც ისერიგად აწიოკებდენ შინაურნი და გარეშენი.

ამ მცირე მოგონება-საუბრის შემდეგ გაისმა მწყობრი: „მუმლი მუხასა“ და სხვა ხალხური სიმღერები ფანდურზე; მასზე კარგად უკრავდა გელა.

თითქმის შუალამე იქნებოდა, როს აიშალნენ მოსასვენებლად, ხოლო თამარმა ადრევე გაიყვანა სამივე ვაჟი, ჩააწვინა ლოგინში, მოუწვა გვერდით და დააძინა ზღაპრების მოყოლით.

სტუმრები დაემშვიდობნენ მასპინძელს და წავიდნენ თავთავის ბინაზე.

ქალებსა და ბავშვებს ჩვეულებრივ ეძინათ ზემო სართულში, ხოლო მამაკაცებს ქვემოთ. დიდი მოურავი შევიდა თავის საწოლ ოთახში, გაიხადა ტანს და მიწვა ვეფხვის-ტყავგადაფენილ ფართო ტახტზე; გვერდით დაიდო მუდამ

განუშორებელი ბასრი კალდიმი და გატენილი დამბაჩა, შაჰის ნაჩუქარი. მცირე ხანს შემდეგ საამო ძილმა შეიპყრო იგი. მალე მიეძინა ყველას; სახლში გამეფდა სრული მღუმარება. არ ეძინა მხოლოდ ერთ არსებას. ის ფეხაკრეფით შევიდა მოურავის ოთახში, მიუახლოვდა ტახტს და მგზნებარე თვალებით დააცქერდა მთვარით გაშუქებულ მძინარე სახეს. კარგა ხანს უმზირა უზენაესი ტრფობით გატაცებულმა. შემდეგ სიიუჟა სკამ-ლოგინზე ბნელ კუთხეში, ამოიკენესა და მხურვალე ცრემლები დააფრქვია.

— ცხრა წელია, რაც ვიტანჯები მე უბედურო! ცხრა წელია რაც მწვავს სიყვარულის ცეცხლი! ცხრა წელია ელოცულობ მასზე... ამან კი არ იცის არაფერი და ვერც გაიგებს, — ფიქრობდა იგი თავის გულში. — დე ასე იყოს! მე ბედშავს ისიც მეყოფა, რომ ვხედავ მის გმირულ სახეს მარად-დღე, მესმის მისი ხმა და საუბარი, ვგრძნობ მის მეგობრობას. აბა, ვინ ვარ ბეჩავი! ერთი მწყემსი ქალი, მთებში გაზრდილი, ის კი — ხალხის მოთავე, ქვეყნის დიდება... ბეჩავს ისიც მეყოფის, რომ იგი ბედნიერია თავის ცოლ-შვილში. მისი სახელი მოფენილია მთელ ქვეყანაზე. მეუღლეს ხომ შესაფერი ჰყავს: ნაზი, კეთილი, მშვენიერი... ო, რა კარგებია მასი სამივე ვაჟი, განსაკუთრებით უფროსი, პაატა! როგორა ჰგავს თავის ბაბას! როგორ უყვართ ერთმეორე! ლაშქრობის უამსა სულ იმას იგონებდა მოურავი...

ამ ფიქრებში გართულმა ქალმა სრულებით ვერ შენიშნა, თუ როგორ მოადგა სარკმელს ვილაც ახმახის შავი ლანდი და დააცქერდა მძინარე მოურავს. მცირე ხანს შემდეგ ფრთხილად გაიღო კარი და იგივე ახმახი ლანდივით შემოვიდა ოთახში, შეჩერდა ოდნავ, მიმოიხედა ირგვლივ და ფეხაკრეფით გასწია საწოლისაკენ.

შავი ნაკვთის. შემოსვლა არ გამოეპარა ყურმახვილ ცაროს. იგი თვალს ადევნებდა მის მოძრაობას.

ახმახი ერთხანს დააცქერდა მძინარე მოურავს. მყის მთვარის შუქზე იელვა ხანჯალმა მის ხელში და გადადგა ბიჯი, რომ გულში ჩაესო ივერთ დიდებისათვის.

ელვის სისწრაფით სტაცა უკნიდან მაჯაში ხელი ვეფხვი-

ვით ჩაუქმა ცარომ და ამ უეცრობით თავზარდაცემულ ყაჩაღს მეორე ხელით გამოსტაცა ბასრი მახვილი. მალე მოვიდა გონს შავი ახმახა, მყის იძრო ბებუთი საცვეთის ყელიდან და დაქრა ქალი მარცხენა მკლავში. გამწარებულმა მთიელმა ტარამდე ჩაუსო გულში ყაჩაღს მისივე ხანჯალი. იგი ბრავჯანით დაეცა იატაკზე.

ხმაურზე გაეღვიძა მოურავს, ლომივით წამოიჭრა ზეზე კალდომით ხელში.

— ვინ არის?! — ძლივს მოასწრო ამ ორი სიტყვის წარმოთქმა, როს მთვარის შუქზე დაინახა ძირს გართხმულ შავად მოსილი ზორბა არსება და გვერდით მდგარი გაფითრებული გელა; მას მარჯვენა ხელი წაეჭირა მარცხენა მკლავში და ცდილობდა შეეჩერებინა სისხლის დენა. იგი მწვავე ტკივილებს გრძნობდა.

მოურავი მიხვდა ყველაფერს, დასწვდა მომაკვდავ ყაჩაღს, დასვა მერხზე და ჰკითხა სპარსულად:

— ვინ ხარ? ვინ გამოგზავნა ჩემს მოსაკლავად? სთქვი სიმართლე!

— მე ვარ ჰასან... ყაჩაღთ ბელადი... შენთან მომგზავნა ლეილამ... ჩერქეზთ ასულ...

ველარ მოასწრო სიტყვის დამთავრება, დაეცა მკვდარი. მოურავმა აზიდა იგი და გადისროლა გარეთ, ამავე დროს გელამ მიაწოდა მოურავს ძვირფასად მოოქვილი ოქროსტარიანი პატარა ხანჯალი, რომელიც მაშინვე შეიცნო მან.

სიკვდილს გადარჩენილი სააკაძე გადაეხვია თავის მხსნელს, ჩაიკრა გულში და გრძნობით აკოცა ამ სიტყვებით:

— გმადლობ, მეგობარო, ჩემო ერთგულო! გმადლობ დიდადი ვითარ გიძღვნა მუქათა შენი ესოდენ თავდადებისათვის! რომ შენ არა, ექვს გარეშეა, მძინარს მომკლავდა ის არამზადა! ვითარ მოხდა, რომ ასეთ ჟამს გაჩნდი ჩემს ახლოს?

მეტის აღელვებით და სისხლის დენით დასუსტებულ გელას უკვე წასვლოდა გული და მოსხლეტით ესვენა გმირის მკერდზე.

შეამჩნია თუ არა მოურავმა გულის შეღონება, ფრთხილად მიაწვინა თავის ლოგინზე, ანთო ჭრაქი, გახადა ჯუ-

ბა, პერანგი, რათა ენახა ქრილობა და შეეკავებინა სისხლის დენა. მოურავის გაცეხას საზღვარი არ ჰქონდა, ოდეს გულწასულ ჭაბუკის თეთრ მკერდზე იხილა ქალის კოკობი ძუძუები. გელას მოფუშოდა თავზე ჩაბალახი, დიაციის ლამაზ სახეს უაღერსებდნენ მუჭი კულულნი.

მოურავმა ასხურა წყალი გულწასულ ქალს, მოიყვანა გონს და ჯანის გასამაგრებლად დააღვეინა შარბათნარევი მაგარი ღვინო, შემდეგ ფრთხილად მობანა ქრილობა სუფთა ბამბით, გასინჯა კარგად, სისხლის შესაწყვეტად მოაფრქვია დანაყილი დენთი, დააფარა ნარმა და შეუხვია მაგრად. შემდეგ მიუჯდა გვერდით, დააქქერდა ძმური აღერსით და ჰკითხა ვინაობა, ან რამ აიძულა. რომ ვაჟურად ცმული იფარავს თავსა და ატარებს გელას სახელს.

პასუხის ნაცვლად ქალმა გულში ჩაიკრა მოურავის მარჯვენა ხელი და დაუწყო მხურვალე კოცნა. იმავე დროს მის თვალებს მოსწყდა ცრემლები. ის იყო იმ დროს უსაზღვროდ ბედნიერი. ქალის ასეთმა საქციელმა კიდევ უფრო გააოცა სააკაძე. ის უზომო სინაზითა და გაკვირვებით მისჩერებოდა ქალს, შემდეგ შეეკითხა ალერსით:

— მამცნე ვინა ხარ, მშვენიერო, გმარო დიაცო, ჩვენს ქალებს შორის საკვირველებავ, ვინაიდან სიმამაცით საუკეთესო ვაჟკაცებსაც-კი გადააჭარბე. მითხარ გულახლით. ჩემო მხსნელო, ვინა ხარ შენა? რომელ კუთხიდან? რად იმალები ვაჟად ჩაცმული? ვისლა ემალვი?

— არავის სხვასა, დიდო სარდალო! ჩემს თავს ვემალვი, მხოლოდ ჩემს თავსა, რადგან თვით ზეცამ ჩემი გაჩენა ქალად ინება, მომცა ჭაყკაცის ძალი, ღონე და გულადობა, იმავ დროს-კი მაქვს მე უბედურს ქალის სხეული, ნაზი გრძნობანი... მე მთიელი ვარ, მკვიდრი და ღომი ჩრდილელის. იქ, ჩვენსა მთებში, მწყემსობის უამს მეძახდნენ ცაროს. ახლა ვარ გელა, ვაჟად ჩაცმული. და ეს სახელი მე თვით დავირქვი, როს ჩემს ძმას ღომის დიდის ვედრებით გამოვყე თანა შენს თანამყოლად, ხალხის მტრებზე მუდამ საბრძოლალ... ოდეს გიხილე შენა პირველ ლამისყანაში მყის შემოყვარდი ჩემს უნებურად, გმარო, მღევკაცო! და

ამ სიყვარულს მწვავეს, უტკბილესს, ცხრად წელია ყველას ფარულად ვატარებ გულში. ამიერიდან სამი ხატი მყავს მე სამლოცველო, წმინდა სამებად შედღუღებული: ტურაყა სამ-შობლო, ზალბი ბედშავი და მოურავი — გმირი ზღაპრული...

თქვა ეს სიტყვები მან აღელვებით, გმირის მარჯვენა ჩაიკრა გულში, დაუწყო კოცნა, თან დაასველა მწვავე ცრემლებით...

ქალის სიტყვებმა აუჩუყა გული მოურავს, იმან სინაზით მოხვია ზელი მთებისა ასულს და მიიხუტა ფართო მკერდზე ძმური აღერსით. იყენენ კარგახანს ასე მღუშარედ. იმათი გულნი ერთიმეორეს შეეღერებოდნენ, უსაზღვროდ ბედნიერ ცაროს სახეზე კი ციალებდა ნეტარების შარავანდედი და ამშვენებდა ქალწულის სახეს. მცირე ხანს შემდეგ ქალმა აღახენა ბაგე და გაუმჟღავნა დიდსა მოურავს, ვით აღსარება, თავის განცდები გულის კვნესანი...

ღრმად ჩაფიქრებული სააკაძე აღელვებით ისმენდა ცაროს აღსარებას და ეს სიტყვები, გულის სიღრმიდან ამონახეთქი, სწვავდა გმირის არსებას. ქალმა ისიც კი უამბო ვითარ შეიქნა მტკვრის პირას უნებლი მოწამე მოურავისა და ნუგზარის ასულის ურთიერთ პირველ ნახვისა, საუბრისა და მიჯნურობისა, ან რარიგ იტანჯებოდა იმ უამად ბუჩქებში მიმალული, რარიგ განიზრახა თამარის მოკვლა; ხოლო გმირისადმი უზენაესმა სიყვარულმა შეაჩერა და ააცდინა კაცის მკვლელობას.

— მაშ, შენა, ჩემზე ეგზომ შეყვარებული, ვითარ მიწყობდი ხელს თამარის გატაცებაში?! — წამოიძახა გაოცებით მოურავმა.

— ამას მამხელდა იგივე შენდამი უსაზღვრო სიყვარული... ასეთ მოქმედების უამსა ცხრებოდა ჩემი შფოთარე გული და ივსებოდა უსაზღვრო სიხარულით... ვნეტარებდი შენი ბედნიერების სხივებში გახვეული... ამუამად შენთან ერთად მიყვარს უზომოდ შენი მშვენიერი, სათნო მეუღლე თამარ და ტურაყა ვაჟები; მზად ვარ გაეწირო მათთვის სიცოცხლე, ხოლო შენს ნაცვლად სიკვდილი ჩემთვის უდიდესი ნეტარებაა და ახლაც, შენი გადარჩენის უამს, ამ ყაჩაღს რომ

მოვეკალ, ჩემი სული ნეტარებით გაფრინდებოდა ზეცას შენ-
და მიმართ სიყვარულის უზენაესი ლოცვის მლალადებელი...

ფრიად შეაკრთო ამ სიტყვებმა სააკაძე. იგი სავსებით შე-
ეპყრო ამ ქალის სიტყვებს. ცაროს ასეთ უმაგალითო სიყ-
ვარულში ის მზერდა რაღაც დიად მოვლენას.

— „მხოლოდ კავკასიონის მაღალ მთებს ძალუძს წარმო-
შვას ასეთი საზღაპრო მოვლენა ერის უზენაესი განსაცდე-
ლის ჟამს“... — ასე ფიქრობდა მოურავი და შესტროფდა
ქალის მგზნებარე სახეს. — დიადმა ბუნებამ ქართველი ერის
სულიერ ძლევამოსილობის ჟამსა წარმოშვა პირიმზე თამარ,
ქვრივ-ობოლთა ნუგეში, ხალხის მფარველი, მტერთა ზარმ-
ცემი, ერის დიდება, ციურ მშვენებით და მეფური სიბრძნით
გაშუქებული, საუკუნეთა უწყვეტელ სვლაში შუქურ ვარს-
კვლავად მანათობელი, და ახლა კიდევ, ამ საშინელ სისხლის
წვიმების ჟამსა, როს ჩვენში ძმა აღარ ინდობს საკუთარ
ძმასა და გარე მტრები ემუქრებიან განადგურებას რვა ნა-
წილად დაფლეთილ ჩვენსა სამშობლოს, კავკასიონის მთები
ცაროს სახით გვიგზავნიან გმირსა ქალწულსა დიადი ტრფო-
ბით სავსე გულითა, მახვილით ხელში, რათა ააფეთქოს და
ააფრთოვანოს ერისა სული, შეაგნებინოს ძმობა-ერთობის
დიადი ძალა, თან შთახნოს ქვეყნის სახსნელად გმირობის
ცეცხლი...

ფიქრობდა ამას დიდი მოურავი და ნელი ნაბიჯით მიმო-
დიოდა თავის ოთახში. შემდეგ მიუბრუნდა ცაროს:

— მაგ წმინდა გრძნობით ასხივებული და მაგ გმირობით
გაოცებული მუნღს იდრეკს შენს წინ ივერ-ერანის მთავარ-
სარდალი, კავკასიონის მაღალი მთების ტურფა ასულლო! ერის
გმირობის დიადო სულო, ქალის სხეულში განსახებულო, მაგ
უზენაეს სიყვარულის არა ვარ ღირსი მე მიწიერის ვერც-კი
მივსწვდები მაგ დიად გრძნობას... და, თუ გწადია, ძმად შე-
ვეფიცოთ ერთიმეორეს. შენ და, მე-კი ძმა სამარადისოდა
არა, ორთავე ძმები, ძმადფიცულები, რადგან ამჟამად შენა
ხარ გელა, ვაჟად ჩაცმული, გწადს დარჩე ვაჟად, ეგეთ დიდ
გრძნობას განაშორო მიწიერ ვნების ბნელი ბურუსი, დარჩე
უმანკოდ, იყო ქალწული...

და ამ სიტყვებთან მოურავმა მოხვია ხელი შშგეჩიიერ ცა-
როს, ჩაიკრა გულში და მის თეთრ შუბლსა ეამბორა ფაქი-
ზი გრძნობით. შემდეგ ორთავე შეეფიცნენ ერთიმეორეს გა-
ნუყრელ ძმებად. ამ შეფიცვის უამს მათ სდიოდათ ნელი
ცრემლები...

დილის რიყრავმა ერთიმეორეს გაჰყარა ძმები. ორთავე
გულში ღრმად ჩაიძირა მთების ასულის აღსარება-საოღუნ-
ლონი.

XV. თეიმურაზ მეფე და შაჰ-აბაზის ვერაგობა

ზამთრის პირია. უკვე დაუთოვია კავკასიონის მაღალი კალთები და ციგ-გომბორის მწვერვალნი, ხოლო ბარად ისევ თბილა, ისევ ხენა-თესვაა გაჩაღებული. მზიანი დღეები ხასხასა სხივებში ხვევს ალაზნის ველს. ფუსფუსებს მშრომელი ხალხი: სხლავენ საზამთროდ ზვარ-ვენახებს, შესევნიან ტყეებს და ამზადებენ შეშას. იხვნება ანეული, შვიდ-შვიდი უღელი ხარ-კამეჩი ზღაზვნით მიიწევს წინ. სმენას ატკბობს მეხრეთა ოროველა. თუშური ცხვარი კარგახანია გაპენტილა თეთრად შირაქის ველზე. თოვლით დამფრთხალი ნიამორნი ჩამოსულან დაბლა, შეჭხიზნებიან ამწვანებულ მინდვრებს. იწყება ნადირობა და უმწეო ცხოველთა ულმო ქლეთა.

დილაა. მზე უკვე ხასხასებს. გრემის სასახლის აივანზე გამოსულა მაღალი, შუახნის დარბაისელი დედა, ქათიბმოსხმული, თაედახურული; ზის ფეხმოკეციტ ტახტზე და გასცქერის აღმოსავლეთით, თითქო ელის ვიდაცას. სათნოებით აღსავსე დიდებულ სახეს ჩრდილავს სევდა-კაეშნის ბურუსი. შავი თმის ორი გრძელი ნაწნავი დაშვებულა ძირს. თვალეები ცრემლით ავსებია. ჩაფლულია ღრმა ფიქრებში. მან ვერ შეამჩნია, როგორ გაიღო ოთახის კარი და აივანზე წელი ნაბიჯით გამოვიდა ახოვანი, ქარმაგი მოხუცი ნახევრად თეთრად შესირმებული თმა-წვერ-ულვაშით. ის მიუახლოვდა ტახტზე მჯდომს და მოკრძალებით დახარა თავი.

— შენა ხარ, შარამაზან? — გაისმა ქართველი დედის საამო ხმა.

— მე გახლავარ, დედოფალო!

— ნუთუ ღღესაც არ დაბრუნდება ჩემი ვაჟი, მეფე თეიმურაზი? უკვე მესულაღ ღღია წასულია! ხომ არაფერი შეემთხება?

— ნუ რაიმე გეფიქრებათ, დედოფალო! მეფეს არარა უჭირს. თვით უპირველესი მამაცია, თანაც ახლავან საუკეთესო ვაჟაკანი: დავით ჯანდიერი, ნოდარ ჯორჯაძე, თამაზ და ელიშა ვაჩნაძენი...

ამ სიტყვებით დამშვიდებულმა ქეთევანმა სიამით გადახედა შარმაზანს და უბრძანა დაჯდომა.

მეფის ლალა ტახტზე ჩამოჯდა ცოტა მოშორებით.

— ღმერთო ჩემო! რას გადაპყვა ამ წყეულ ნადირობას პაპამისივით! კარგს არას ველი აქედან!

— ნურას სწუხდებით, დედოფალო! ჩვენი თეიმურაზ მეფე ჭაბუკია, ძლივს არის 25 წლისა; სისხლი უღულს; სწყურია მოძრაობა, ვარჯიში, სიჩაუქე — გულადობის გამოჩენა და, აჰა, ნადირობით ერთობა!

— ჩემო შარმაზან, განა სხვა უფრო საგულისხმო საქმეები არა აქვს მეფეს, თვინიერ ნადირობისა? წაგიკითხავს და იცი ჩვენი მატთანე, „ქართლის ცხოვრებაი!“ როგორ ფიქრობ, განა მარტო ნადირობაში აღამებდნენ წუთისოფელს ან ვახტანგ გორგასლანი, ან დავით აღმაშენებელი და ან გიორგი ბრწყინვალე? მათთვის ნადირობა იყო მხოლოდ მცირე შესვენება ხალხზე ზრუნვისა და შემოსეულ მტერთა შემუსვრის შემდეგ...

— დამშვიდდით, დედოფალო! იმათ ხელში გადავიდა მტერთაგან ძლეული, განადგურებული საქართველო, ამიტომაც მის აღდგენა-განმტკიცებას ეჭირვებოდა ხანგრძლივი შრომა, მხნეობა, გმირული თავგანწირვა... ჩვენი თეიმურაზი კი 13 წლის ასაკიდან გახდა ხალხით და ქონებით მდიდარი აყვავებული პატარა კახეთის მეფედ. მას არ ემუქრებოდა და ახლაც არ ემუქრება შინა და გარე მტერი; მრავალნაყოფიერი მიწა, მულამ უხვი მოსავალი ლალად ხდის ბატონსა და ყმებსა. რაღა დავგრჩენია, თუ არა ნადირობა, ლხინი და ქეიფი?!

— შენს პირს შაქარი, ჩემო ბრძენო შარმაზან! ვშიშობ, რომ მტრად ვიხდით შაჰაბაზს მოსკოვის მეფესთან ელჩების გზავნით.

— ეგ მეც მაშინებს, ჩემო ხელმწიფევე, მაგრამ რა ვქნათ! მეფე თეიმურაზის თვალში შაჰმა დაჰკარგა ნდობა... ამიტომაც ეძებს ღონიერ მფარველს, საიმედო მომხრეს... ესეთად კი სახავს ერთმორწმუნე რუსეთს...

— მართალია, თურქნი და სპარსნი არიან მაჰმადის სჯულისანი, სულთანსა და შაჰს სწადიათ ჩვენი, ქართველების, გამუსულმანება; ძველ დროიდანვე ამ მიზანს სახავენ... სწორია ისიც, რომ რუსეთი, მთლიანად მოსკოვის სამეფო, მართლმადიდებელი ქრისტიანია ჩვენსავით. ამიტომაც ერთმორწმუნე ხალხის მფარველობა ათწილ გვირჩევნის ამათ მეგობრობასა... ზოლო უბედურება ისაა, რომ მოსკოვის სამეფო ფრიად შორსაა. ხუთი და ექვსი თვე სჭირდება მოსკოვში მისვლას ან იქიდან ჩვენამდე მოღწევას. ამიტომაც ამ სიშორიდან ჩვენი დახმარება მოსკოვის მეფეს არ შეუძლია, კიდევ რომ სწადდეს. ამავე დროს კი ერანი და თურქეთი კარზე გვადგია! ორთავე საქართველოს მეზობლებია. მესაზღვრენი...

— მართალი ბრძანებაა, ჩემო ხელმწიფევე! ყოველივე ესა კარგად მაქვს შეგნებული. ამიტომაც მუდამ იმის საცადში ვარ და ვურჩევ მეფე თეიმურაზს, მოსკოვში დესპანთა გზავნით ნუ აღიზიანებს სულთანსა და მეტადრე შაჰაბაზს.

სწორედ ამ დროს შორით გაისმა ბუკის ხმა, რაც ნიშნავდა თეიმურაზ მეფის დაბრუნებას ნადირობიდან.

ბუკის ხმამ გაახარა ყველანი, აივანზე გამოვიდა მთელი ამაღა, ყველაზე უმაღ კი ხორეშან დედოფალი თავისი ორთა ვაჟით. ესენი იყვნენ 5 წლის ლევან და 3 წლის ალექსანდრე. ამათ გამოჰყვა თეიმურაზის ასული პირველი ცოლიდან, 8 წლის დარეჯანი. ბავშვები მიცვივდნენ აცენის მოაჯირთან და იწყეს მხიარული ჟიჟივი. ეშურებოდნენ ჩაკვროდნენ გულში გვირგვინოსან „ბაბას“.

— ბაბაი მორძანდება! ბაბაი მორძანდება! — ამ სიტყვ-

ვებით ჩაირბინეს ბავშვებმა ძირს. მათ მიჰყვნენ ყველანი-
აჰა, მოახლოდნენ კიდეც! ფართოდ გააღეს ალაყაფის
კარები. ეზოში შემოაქროლეს ცხენები მეფემ და მისმა
ასაბიამ.

კარისკაცებმა მიულოცეს მეფეს მშვიდობით დაბრუნება და
დაუწიეს აბჯანდა. თეიმურაზი გადმოხტა მარდად და ჩაიკ-
რა გულში ჯერ დედა, შემდეგ ცოლშვილი. ბავშვების სი-
ხარულს არ ჰქონდა საზღვარი. ისინი უსხდებოდნენ მუხ-
ლებზე, უკოცნიდნენ სახეს...

— რა მოგვიტანე, ბაბაი, რა მოგვიტანე?! — გაიძახოდნენ
ისინი. მთელი ოჯახი შესცქეროდა მეფის მხიარულ სახეს
და ელოდა სასურველ პასუხს.

— ბევრი რამ, შვილებო! ბევრი რამი ხოხბები, ღურაჯნი,
კურდღლები... სწორედ რომ კარგ ფეხზე გავედით სანადი-
როდ. ბლომად დავხოცეთ ეშვები, ნიამორები, შვლები, მე-
ტადრე კურდღლები, ფრინველნი. მოაქვთ ურმებით. მალე
მოვლენ, ორი ისეთი ტაჭი მოვკალით, რომ განახათ, გოც-
დებით! — ამბობდა გახარებული თეიმურაზი და თანაც
ვალერსებოდა შვილებს.

— დიდებულია ჩემი ყირიმული თოფი, ნიშანს არ აც-
დენს, რასაც ვესროლე, იქვე გავაგორე...

ყველანი ამოვიდნენ აივანზე... სუფრა უკვე გაეშალათ
დიდ დარბაზში. თავში დაჯდა თეიმურაზი, მის გვერდით
დასხდნენ მარჯვენით დედამისი ქეთევან, მარცხით კი ცო-
ლი, ხორეშან დედოფალი. იმავე სუფრაზე დასხდნენ მეფის
თანმხლებნი და კარისკაცი. შეიქნა პურობა, სმა და ქეიფი.
მეფე და მონადირენი მადიანად დაეწაფნენ გემრიელ ნამზა-
დებს და მაგარ საფერავს. თან ყვებოდნენ ნადირობის ამ-
ბავს.

თითქმის ათავებდნენ სადილს, როცა შოხსენდა მეფეს,
ირანიდან ესეცაა მოვიდა იფრინდა ფრიად საიდმულო და-
ვლებითაო. წამოდგნენ სუფრიდან შეშფოთებულნი. შაჰის
შეიკრიკი მეორე ოთახში მიიღო მეფის ლალამ.

— საიდან მოხველი?! — შეეკითხა შარამზანი.

— ერანიდან, ბატონო! — იყო იფრინდას პასუხი.

— ვისი დავალებით?

— თვით დიდებულმა შაჰმა გამომგზავნა საჩქაროდ. უსტარი მაქვს კახეთის მეფისადმი.

— მომეცი!

— არა ბატონო! არ შემიძლია... დიდი ყუინის ბრძანებაა მე თვით მეფეს გადავცე ეს ფრიად საიდუმლო რაყიმი, რომელიც თვით შაჰმა დასწერა თავის ხელით.

შარმაზანმა ყოველივე აუწყა თეიმურაზსა და დედამისს. ესენი მაშინვე შევიდნენ ოთახში.

მეფის დანახვაზე შიკრიკი განერთხო მიწაზე, შემდეგ წამოდგა, მოიხადა ქუდი, ამოიღო დარაიაში გახვეული მცირე გრაგნილი და მოწიწებით გადასცა თეიმურაზს. მეფემ გადაუგდო ერთი ქისა ოქრო, რაც მარდად დაიჭირა იფრინდამ, და გაისტუმრა სასახლის ქვემო სართულში. გახარებული იფრინდა კვალად განერთხო მიწაზე და მოწიწებით გავიდა გარეთ.

ოთახში დარჩნენ სამნი: თეიმურაზი, ქეთევანი და შარმაზანი. ორივე მხრივ ჩაკეტეს შესავალი კარები და დასხდნენ ტახტზე.

— წაგვიკითხე, ჩემო ლალა, რას იწერება ბებერი მელა, — თქვა დაბალი ხმით მეფემ და გადასცა ჩოლოყაშვილს შაჰის გრაგნილი.

შარმაზანმა გახსნა უსტარი და წაიკითხა ნელი ხმით ქართულად შემდეგი:

— მე, სრულიად მპყრობელი და მბრძანებელი დიდი ერანისა, რან-შირვანისა, ავღან-ყანდარისა და ერაყ-ქურთისტანისა, შაჰაბაზ პირველი, გწერ ჩემ ერთგულ მოხარკეს, კახეთის მეფე თეიმურაზ პირველს: ესეცაა დანამდვილებით ვცანი, რომ ქართლის მეფე ლუარსაბ გიპირებს დიდი ჯარით უეცარ თავდასხმას. სწადის მოგკლას და შეიერთოს მთელი კახეთი, ამრიგად კი გააძლიეროს თავის სამეფო, რათა გახდეს მბრძანებელი მთელი ივერიისა... გამცნევ რა ამას ფრიად საიდუმლოდ, გიბრძანებ: საჩქაროდ შეკრიბო რჩეული ჯარი, დაეცე მოღალატე ლუარსაბსა და მოკლა იგი. მთელი ქართლი შენთვის დამილოცნია... შაჰაბაზ.

თავზარი დასცა სამთავეს შაჰის უსტარის შინაარსმა. დემ-
დნენ, ვერ იღებდნენ ხმას, შესცქეროდნენ ერთმანეთს უზო-
მოდ გაოცებულნი...

— ხედავ, რას მემუქრება ჩემი ცოლისძმა! მოკვლას! სა-
მეფოს წართმევას!— წამოიძახა გამწარებით თეიმურაზმა და
წამოიჭრა ტახტიდან ფრიად აღელვებული.

— დამშვიდდი, შვილო! აქ რაღაც სხვა ამბავია! შეუძლე-
ბელია ლუარსაბს სწადდეს შენი სიკვდილი და სამეფოს
წართმევა! მას თავის ქართლისთვისაც კი ვერ მოუვლია! —
წარმოსთქვა წყნარად ქეთევან დედოფალმა.

— მეც მაგ აზრისა გახლავარ, ჩემო ბრძანებულო! — და-
იწყო ხმადაწყევით შარმაზანმა. — გული მითხრობს, რომ
ლუარსაბ მეფე აქ არაფერ შუაშია. ეს სულ შაჰის მოგო-
ნილია. აქ იფარვის მისი ჩვეულებრივი ოინბაზობა. მას სურს
წაჰკიდოს ერთიმეორეს ივერის მეჭენი და ამღვრეულ წყალ-
ში დაიჭიროს თევზები... რა ვიცი, რომ ამგვარივე უსტარი
მეორე იფრინდას ხელით არ გაუგზავნა ლუარსაბ მეფესაც!

— მართალი ხარ, ბრძენო შარმაზან! შენი ბავენი დაღა-
დებენ ჭეშმარიტებას, — თქვა დინჯად ქეთევანმა.

ამ ორი ბრძენი ადამიანის სიტყვებმა მეტად ჩააფიქრა ექ-
ვიანი თეიმურაზი, ის ფეხმოკეცით დაჯდა ტახტზე და და-
ეყრდნო მუთაქას.

— თქვენ ორთავენი მართალი ბრძანდებით! — დაიწყო
მცირე სიჩუმის შემდეგ თეიმურაზმა. — შაჰაბაზს რომ კარ-
გი არაფერი სურს არც ჩემთვის და არც ლუარსაბისათვის,
ეს კარგად ვიცი. რომ იგი ცბიერია, ორპირი, მზაკვარი და
უნდო, ესეც ძლიერ კარგად მესმის! ტყვილა კი არ ვიყავით
მის კარზე მე და შარმაზანი სრული ხუთი წელიწადი. ვგო-
ნებ, საკმაო დროა, რომ გავცნობოდით იმ ყიზილბაშის ხრი-
კებსა და ოინბაზობას! მაგრამ რა ვიცი, ეშმაკს თვალა არ
უჩანს! საფრთხილეს კიდევ თავი არ სტკივა! მე და ლუარ-
საბს ძმებზევით გვიყვარს ერთიმეორე, მაგრამ კაცნი ვართ;
ვინ იცის, რა სწადია, რა უდევს გუნებაში! ნუ ვიქნებით
ხელდაკრეფით! ჩვენც მოვემზადოთ და დაუხვდეთ აგრეთ
ვგონებ, ასე აჯობებს! — დაამთავრა თეიმურაზმა და წამოდგა.

ქეთევანმა და შარმაზანმა მოუწონეს მეფეს ასეთი აზრი და შეჯერდნენ ამაზე. ისინი გავიდნენ ოთახიდან და შეუდგნენ სამზადისს. ერთ კვირაში შეკრიბეს ხუთიათასამდე საუკეთესო მებრძოლი და დადგნენ საზღვარზე.

ორი დღის შემდეგ გამოჩნდა ლუარსაბ მეფე საკმაო ჯარით. ქართლის მეფემ დაინახა თეიმურაზის რაზმები, დაუახლოვდა საზღვარს, შეჩერდა და იწყო გამაგრება.

ამრიგად გაკრა შაჰის სატანურმა ხერხმა. ორივე მეფე გაება მის მახეში. კიდევ ერთი მოუფიქრებელი ნაბიჯი — და უნდა ამოწვდილიყო ქარქაშიდან ალესილი ხმალი, უნდა დაღვრილიყო ძმათა სისხლი. მაგრამ ორივე სამეფო გადაარჩინა საშინელ ხიფათს შარმაზან ჩოლოყაშვილმა. მან შეაჩერა თეიმურაზი, წავიდა ლუარსაბთან და აჩვენა შაჰაბაზის უსტარი, თეიმურაზთან მინაწერი. ლუარსაბის გაოცებას არ ჰქონდა საზღვარი. ამანაც აჩვენა შარმაზანს ყვინის უსტარი, იმავე შინაარსის. ამრიგად გამოაშკარავდა ყველაფერი. სიძე-ცოლისძმა, სამტროდ მოსულნი, მოყვრად გადაეხვიენ ერთიმეორეს და განშორდნენ დიდი ლხინის შემდეგ.

სცნო რა ეს ამბავი შაჰაბაზმა, მიმართა მეორე ხერხს: მიიწვია სანადიროდ თეიმურაზი და ლუარსაბი, რათა ორთავე ჩაეგდო ხელში. აქაც გადაარჩინა ისინი ამ ხიფათს იმავე შარმაზანმა. მან დაარწმუნა ორივე მეფე, რომ შაჰი ცასიკეთოდ არ იწვევს მათ, ამათაც დაიშალეს წასვლა.

როცა ყვინი ვერას გახდა ამ ოინითაც, მაშინ შეაგროვა დიდი ჯარი და მოადგა ივერიის საზღვრებს, ვითომდა თურქეთზე სალაშქროდ.

არც ერთი მეფე არ შეეცადა მომზადებას და მტრის დახვედრას.

განჯიდან შაჰმა შეუთვალა თეიმურაზს: ოსმალეთზე მივალ საომრად, შენს ქვეყანაზე უნდა გავიარო, ამიტომ ნიშნად ერთგულებისა გამომიგზავნე ძველად შენი ვაჟი, რათა შენგნით არაფერი ზიანი მიეცეს ჩემს ჯარსაო.

თეიმურაზი ჩავარდა ყოყმანში, აშკარად გრძნობდა, რას ნიშნავდა ეს შემოთვლა. არ სწადდა შეილის გაგზავნა, მაგრამ კახეთის დიდებულებმა დაატანეს ძალა, აიძულეს გაეგ-

ზაენა შაჰისათვის უმცროსი ვაჟი ალექსანდრე; თან გააყო-
ლეს სახელოვანი სარდალი დავით ჯანდიერი. შაჰმა იწყინა
და შეუთვალა თეიმურაზს: ძიძა ხომ არა ვარ, ძუძუმწოვარ
ბაღს რო მიგზავნი! თუ ცუდი რამ არ გიღვეს გულში,
რად არ გამომიგზავნე შენი უფროსი ვაჟი?! გამომიგზავნე
იგი, თან გამოაყოლე დედაშენიც. შვილს ღირსეულად გაგი-
ზრდი, დედაშენს ქეთევანს მოველაპარაკები ერთ საქმეზე და
გამოვეშვებ, თან გამოვატან შენს უმცროს ვაჟსაო.

— გვატყუებს წყეული შაჰბაზა! გვატყუებს უსათუოდ! —
შესძახა გამწარებულმა თეიმურაზმა. — მას სწადია ჩაგვიგ-
დოს ხელში!

კახეთის თავადნი კი გადაჭრით თხოულობდნენ უფროსი
ვაჟის გაგზავნას.

— უნდა შესწირო ქვეყანას ეგ შვილიც, თორემ ის ვე-
შაჰი მთელ კახეთს ააოხრებს! — გაიძახოდნენ კახეთის ღი-
დებულნი.

დიდი მუდარის შემდეგ თეიმურაზი დაჰყვა ნებას, გაუგ-
ზავნა ყენის თავისი დედა ქეთევანი და უფროსი ვაჟი ლე-
ვანი, თან გააყოლა მათ თავისი და ელენე და დიდებულთა
მრავალი ქალ-ვაჟი.

ამის შემდეგ შაჰბაზამ დაიბარა თვით თეიმურაზი. დაიბ-
ნა კახეთის მეფე. ჯარის მოწვევისა და საომრად მზადების
ნაცვლად ის ეძებდა გასაქცევ გზა-ბილიკებს იმერეთისკენ.
მასზე ვერ გაქრა კახთა ვედრებამ, რომ ხლებოდა შაჰს და
მით ეხსნა აოხრებისაგან ქვეყანა. თეიმურაზი დარჩა ურყე-
ვად. მან შეკრიბა თავად-აზნაურთაგან დიდი ამალა, ამ ამა-
ლით და მთელი ოჯახობით გადვიდა ქართლში, აქედან გა-
ვარდა იმერეთს, თან წაიყვანა მეფე ლუარსაბიცი.

შაჰბაზი თავისი ლაშქრით შევიდა კახეთში. ამავე დროს
მან უყელა დიდი რაზმით თეიმურაზს დასაქერად. მაგრამ
თეიმურაზის ასაბიამ საარაკო სიმამაცე გამოიჩინა: ეკვეთა
მტერს გმირულად, ცხარე ბრძოლით გააპო ირანთა მხედ-
რობა და ორთავ მეფითურთ გადვიდა იმერეთს.

მტრის ჯარების შემოსევამ შიშის ზარი დასცა მთელ კა-
ხეთს. გავარდა ხმა: თეიმურაზ მეფე დიდი ამალით გაიქცა

იმერეთს და უპატრონოდ დააგდო ქვეყანაო. ამ ამბავმა კიდევ უარესი ელდა დასცა ხალხს.

— „გაიხიზნეთ! თავს უშველეთ! გადამალეთ ჯალაბნი და ქონება! არიდეთ თავი მტრის საშინელ რისხვას!“

ეს სიტყვები გლოვის ზარივით მოედო ალაზნის ველს.

აჰა, იანერის საშინელ ყინვა-სიცივეში დაიძრა მთებისაკენ მთელი კახეთი! ქალი და კაცი, ყრმა და მოხუცი, ცხენი და ურემი ათასობით იჭედებოდნენ ვიწრო გზა-ბილიკებზე და იყო უსაშველო ვაება და ურიაშული! საშინელება იყო ამ სასტიკ ზამთარში ამოდენა ხალხის მთებისაკენ დაძვრა და შეფარება. მაგრამ რა უნდა ექნათ, როცა სხვა გზა არ იყო! უმწეოდ დარჩენილმა ხალხმა დაკარგა თავგზა და გარბოდა ტყე-ღრეში ცხვრის ფარასავით დამფრთხალი. ასეთ საშინელ განსაცდელში ჩაეარდა კახეთი.

ქართლ-კახეთის მეფეთა იმერეთში გაქცევამ კიდევ უფრო გააბრაზა ერანის შაჰი. მან გადაწყვიტა ორთავ სამეფოს აოხრება. შაჰის ერთი ნიშანი, ერთი შეძახება საკმაოდ იყო, რომ ირანის ლაშქარი მშიერი მგლებივით დარეოდა ივერიას და ქართველთა სისხლით მოერწყა ქვეყანა...

მაგრამ უცებ დაცხრა მძვინვარე შაჰაბაზი. მან ქარქაშში ჩააგო ამოწვდილი ხმალი. მისი რისხვა ლმობიერებად შეიცვალა.

ვინ იმოქმედა ირანის ბატონზე? ვინ იხსნა ივერი დალუპვისაგან? ვინ ჩაიღინა ეს სასწაული?

ქვეყნის გადამრჩენი შეიქნა გიორგი სააკაძე.

სამშობლოდან გაძევებული დიდი მოუტრავი იმ დროს თან ახლდა ერანის ბატონს. როგორც ვიცით, მან უამრავ ომში თურქეთ-ავღან-ყანდაართ და სინდთა წინააღმდეგ საარაკოდ ასახელა ირანის დროშა, დაუმტკიცა შაჰს თავისი ერთგულება. სააკაძე პირველი კაცი შეიქნა ყეინის სასახლეში. მისი დიდებული გარეგნობა, რიხი, დარბაისელი კილო, მაღალი გონება და სამხედრო ოსტატობა ხიბლადა შაჰაბაზს. ყეინი ხშირად ჰკითხავდა რჩევას დიდ მოუტრავს. ირანის შაჰი იჯერებდა მის სიტყვებს.

ახლაც, ამ მძიმე დროს, შაჰმა მიმართა სააკაძეს. ივერიის ქებულმა შვილმა ნათლად დაუმტკიცა მრისხანე შაჰს, რა განსაცდელში აგდებდა თავის ლაშქარს.

მან აუხსნა, რომ ბრძოლის დაწყებით ფეხზე დადგებოდა მთელი ქართლი და მესხეთი, მათ ჰყავდათ გამოცდილი სარდლები, ხელთ ეპყრათ ციხე-სიმაგრენი და შეუვალი ალაგები. ომის დაწყება აამხედრებდა აგრეთვე იმერეთსა და გურია-სამეგრელოს, ისინი მოეშველებოდნენ თავის ძმებს, აამოძრავებდნენ მასთან მთის ხალხებს. ამ ბრძოლაში ჩაერეოდნენ თურქებიც, ისინი ისარგებლებდნენ ასეთი შემთხვევით. ამიტომ ამ ბრძოლის დაწყებით დიდ ხიფათში ვარდებოდა ირანის ჯარი. სააკაძის აზრით, ირანის ბატონმა უნდა დააცხროს თავისი მრისხანება. ლმობიერად მოექცეს ქართლ-კახეთს, ხალხსა და დიდებულთ, რათა მოიგოს მათ გული, ააღებინოს ხელი სხვა მფარველის ძებნაზე.

დიდი მოურავის ასეთი ბრძნული რჩევა ჰკუთხდა შაჰაბაზს. მან დაიცხო გული და დაადგა მშვიდობიან გზას, დაუტკბა ივერიის დიდებულთ, დაურიგა საჩუქრები, გასცა ბრძანება თავის ლაშქარში, რომ არავის ჩაედინა ცარცვა, რბევა და ძალმომრეობა. რამდენიმე დამნაშავე ასეთ საქმეში სასტიკად დაასჯევინა თავის თვალწინ და მით შიშის ზარი შეიტანა თავის მხედრობაში.

კახეთიდან შაჰაბაზი ქართლში გადავიდა. მისი მიზანი იყო როგორმე ჩაეგდო ხელში ორთავე გაქცეული მეფე, ლუარსაბი და თეიმურაზი. შაჰმა გაუგზავნა იმერთა მეფე გიორგის თავისი ვეზირი სარუხხოჯა, მეტად გაქნილი, და მისწერა უსტარი, რითაც სთხოვდა გადმოეცა მისთვის ორივე გაქცეული, მასთან შეფარებული მეფე.

გიორგი მეფემ დიდი პატივით მიიღო შაჰაბაზის დესპანი, განგებ შეაჩერა დიდხანს, აჩვენა ქვეყნის სიმდიდრე და ძლიერება, გაიწვია ოდიშში, ლუარსაბ მეფის ნიშნობაში დადიანის ქალზე, სადაც სარუხხოჯამ ნახა ისეთი პიუხვე, რომ განცვიფრდა. შემდეგ იმერთა მეფემ მისწერა, შაჰს მეტად ბრძნული პასუხი. იგი სწერდა შაჰს, რომ ორთავე მეფე მი-

სი ახლო ნათესავია; გარდა ამისა, ქართული ჩვეულება არ აძლევს ნებას გააგდოს სახლიდან სტუმრები. გიორგი სთხოვდა შაჰს აპატიოს ივერთ მეფეებს მათი „დანაშაული“, დგებოდა თავდებად, რომ ამიერიით ისინი ერთგული ყმები იქნებიან ირანის ტახტისა, აღარ გაბედავენ მის ურჩობას.

ვერ. დააკმაყოფილა შაჰაბაზი ასეთმა პასუხმა. მან დააპირა გალაშქრება იმერეთზე; დასძრა კიდეც ჯარები, ხოლო გიორგი მეფე არ დახვდა ლაჩრად, მან სასწრაფოდ შეკრიბა ჯარები, გაამაგრა გადმოსასვლელი ალაგები და სთხოვა დახმარება აფხაზეთ-გურია-სამეგრელოს. მანვე გაგზავნა კაცები ქართლ-კახეთში, მოიწადინა მათი აჯანყება.

შაჰაბაზმა რაკი სცნო მეფე გიორგის ასეთი მზადება და სიმამაცე, ველარ გაბედა ომის დაწყება, მით უმეტეს რომ ამ ბრძოლაში უსათუოდ ჩაერეოდნენ თურქებიც. ამიტომ შაჰმა ისევ დაიციხრო გული და მოინდომა რაიმე ხერხით ლუარსაბის ხელში ჩაგდება, რა მიზნითაც შეუჩინა პირველად სარუხოჯა, ხოლო შემდეგ მისივე ლალა შადიმან ბარათაშვილი, რომელსაც დაჰპირდა დიდ წყალობას. თეიმურაზ მეფეს კი შეუჩინა მკვლელი. იგი დაიჭირა კახთა მეფის კარის მცველთა უფროსმა ბახუტაშვილმა.

ბოროტი შადიმან შეუჩინდა თავის გაზრდილს ლუარსაბს და იმდენი უჩიჩინა, რომ დაიყოლია კიდეც, ხოლო ქართლის მეფემ მოითხოვა შაჰისაგან ფიცის სიგელი, რომ მას არა ევნება რა. შაჰაბაზმა სიხარულით გაუგზავნა ასეთი რაყიმი, სადაც ეფიცებოდა მაჰმადის საფლავს, რომ მისგან ლუარსაბს არაფერი ევნებოდა, პირიქით მოეპყრობოდა როგორც შვილსა და ახლო მოყვარეს.

ამ ფიცის შემდეგ ლუარსაბი გაჰყვა შადიმანს. შაჰაბაზს შეუსრულდა დიდი ხნის წადილი: ერთი გაქცეული ფრინველი უკვე ჩაიგდო ხელში. შაჰი მოეგება ქართლის მეფეს იმერეთის საზღვარზე, ჩაიკრა გულში, აცრემლდა განგებ და მიმართა საყვედურით: ჩემო ძვირფასო ცოლისძმავ, ჩემო შვილივით გაზრდილო ლუარსაბ! როგორ აჰყვევი ჩემს მოღალატე თეიმურაზსა და გადიკარგე იმერეთსაო.

მალე სცნო ლუარსაბმა, რომ მახეში გაება, მარა გვი-
ლა იყო. დააპირა გაპარვა — ვერაფერს გახდა. შაჰმა მოს-
ვის მიჩენილი ჰყავდა მარჯვე მცველები. ისინი დღე-ღამე
თვალისჩინივით უფრთხილდებოდნენ ამ იშვიათ ტყვეს.

დიდი პატივით ექცეოდა ლუარსაბს შაჰაბაზი, მუღლ-
გვერდით მოისვამდა ნადიმზე და სთავაზობდა საჩუქრებს.
მანვე დაადგა თავზე ძვირფასი სამეფო გვირგვინი და მი-
უბოძა განგებ მრავალი ქვეყანა. ტკბილი საუბრით, შექცე-
ვითა და ნადიმით ცბიერი შაჰი თანდათან იტყუებდა ირან-
ისკენ ქართლის მეფეს.

უმეფოდ დარჩენილ ქართლსა და კახეთს კი განაგებდნენ
შაჰაბაზის მიერ დაყენებული მოხელენი. კახეთის გამგედ
შაჰმა დაადგინა გამაჰმადიანებული იასე, თეიმურაზ მეფის
ბიძაშვილი, რომელსაც მისცა ვეზირებად დავით ჯანდიერი
და ნოდარ ჯორჯაძე. ქართლი კი ფარსადან ციციშვილს
ჩააბარა. ასე დასცა პირსისხლიანმა ირანელმა მტარვალმა ერთ
დროს ძლიერი ივერია.

ამავე დროს არ ისვენებდა იმერეთს მყოფი თეიმურაზი,
ის გზავნიდა დესპანებს მოსკოვში, სწერდა რუსთა ხელმწიფეს
ერცელ პატაკებს, ევედრებოდა დახმარებას, ამხელდა ვერა-
გობას გულმხეცი შაჰაბაზისა, რომელმაც დაატყვევა მისი დედა
და შვილები, ახლა კიდევ გაიტაცა ქართლის მეფე, მან ჩაით-
რია იმერთა მეფე და გურია-ოდის მთავრები.

XVI. კახეთის აჯანყება და შაჰაბაზის ბოროტებანი

შაჰაბაზის მიერ მეფედ დაყენებული იასე მეტად მკაცრად ეპყრობოდა კახეთს, ავიწროებდა დიდებულთ და აწიოკებდა ხალხს. მას ბაძაედნენ ირანელი მოხელენი და ჯარისკაცნი. ამათ თარეშს და უდიერ საქციელს არ ჰქონდა საზღვარი. ამას არ ჯერდებოდა ბოროტი იასე. ის ანგრევდა ტაძრებს, სდევნიდა სამღვდლო პირთ, უპატიოდ ექცეოდა ბერებსა და მონასტრებს, ავრცელებდა მაჰმადის სჯულს.

მაჰმადიანი მეფის ასეთი საქციელი ფრიად აღელვებდა კახეთს. ის მზად იყო იარაღით ხელში მოესპო მტარვალი და მოეშორებინა ირანელთა ბატონობა. ამას ხელს უწყობდა თეიმურაზის კაცების ჩამოსვლა და ხმის გავრცელება, თურქეთის დიდი ჯარი მოდის სპარსელებთან საბრძოლველადო. ახლა კახნი ეძებდნენ გმირს, მოთავეს, მას უნდა აეფრიალებინა აჯანყების დროშა.

აჰა, გამოჩნდნენ ისინიც!

აჯანყების სათავეში ჩადგა კახეთის განთქმული სარდალი დავით ჯანდიერი; მას მიემხრნენ არა ნაკლებ ცნობილი ნოდარ ჯორჯაძე, თამაზ ვაჩნაძე და დელი მამედი. ეს უკანასკნელი, ტომით შირვანელი, წინათ შაჰის სამსახურში იყო, ხოლო უღალატა მას და მიემხრო ქართველთ, რადგან შაჰაბაზი უდიერად მოექცა შირვანელთ, აყარა ისინიც თავისი მიწა-მამულებიდან და სხვაგან გადაასახლა.

აი, ამ ოთხმა გმირმა მოაწყო შეთქმულება, მათ მიიმხრეს თუშ-ფშავ-ხევსურნი და ალავერდობა დღეს მოახდინეს აჯანყება.

როგორც ვიცით, კახეთში ყველაზე უფრო შესანიშნავი ტაძარია ალავერდი, წმ. გიორგის სახელზე აგებული, ყოველი წლის 14 სექტემბერს ამ ეკლესიაში იმართება დიდი დღეობა. მის გალავანში და წინ გაშლილ ალვანის ვრცელ მინდორზე იმ დღეობის დროს იკრიბება აუარება მლოცველი. მთელი კახეთი და მთის ხალხები აქ იყრიან თავს სალოცავად. აქვე იმართება დიდი ბაზრობაც. აი. სწორედ ეს დღე აირჩიეს შეთქმულებმა აჯანყების მოსახდენად.

კახეთში პირველი შემოსევის დროს შაჰაბაზმა შემოავლო ალავერდის ტაძარს ვრცელი, მაღალი გალავანი და გადააკეთა ციხე-სიმაგრედ. აქვე ჩააყენა ჯარი, რომელიც უწყსოდ ეპყრობოდა მლოცველთ და დასცინოდა მათ სარწმუნოებას. დადგა ალავერდობა. უამრავი ხალხი მოაწყდა ტაძარს. მოვიდნენ მთის არწიენი, ჯუბა-ჯავშანში ჩამსხდარნი, თუშნი, არაგენი და ფშავ-ხევსურნი. აქვე იყო შეთქმულთა მოთავე დავით ჯანდიერი თავისი ამხანაგებით. ქართველები ელოდნენ ნიშანს, რომ დარეოდნენ და გაეყლიტათ ირანელნი. ატყდა პატარა კინკლაობა ირანელ-ქართველთ შორის. მეციხოვნეებმა დაჭრეს რამდენიმე კახი და მთიელი. ეს იყო საკმაო.

— სიკვდილი მტარვალთი — შესძახა ჯანდიერმა და იძრო ხჰალი. ამ დროს გავარდა თოფი. ეს იყო შეთქმულთა ნიშანი. გამწარებული ქართველნი ეძგერნენ მტრის მეციხოვნე ჯარს და იწყეს მუსვრა. ქართველის ელვარე ხმალი თვრებოდა ირანელთა სისხლით. რამდენიმე ეამი — და გაწყდა ერთიანად მტერი, დახოცილი ირანელნი ეყარნენ ეკლესიის გალავანში.

ეს ამბავი ელვის სისწრაფით მოედო მთელ კახეთს. შეიქნა მოძრაობა და საომრად მზადება. კახთ მიემხრნენ შირვანელნი. ამ ამბავმა შიშის ზარი დასცა იასეს. მან იწყო მაგრება და ირანელი ჯარის შეგროვება. დღითიდღე ელოდა თავდასხმას.

როცა ასეთი საქმენი ხდებოდა კახეთში, თეიმურაზი იმერეთს იყო შეზიზნული. ამ დროს ეახლნენ კაცები კახეთის გამირთაგან. ისინი აუწყებდნენ ფრიად სასიამოვნო ამბებს: შაჰის ჯარების გაწყვეტას და კახეთის განთავისუფლებას; იწვევდნენ მეფედ.

ამ ამბავმა ააფრთოვანა თეიმურაზი, მაშინვე გაემართა კახეთს დიდი ამალით. ანანურთან მიეგებნენ შეთქმულთა მოთავენი 22.000 მეომრით და მიიღეს მეფე დიდი ზეიმით. ამ ჯარით თეიმურაზი დაეცა იასეს და სასტიკად დაამარცხა. ცხარე ბრძოლაში მოკლეს თვით იასე. აქედან დავით ჯანდიერი გადუხტა ზეგანში გამაგრებულ ირანის ჯარს. მტერი დანებდა უომრად...

ამრიგად კახეთმა გადიგდო მონობის უღელი. იშვებდა და ხარობდა ხალხი. კახეთის ტახტზე დაშკვიდრდა თეიმურაზი.

გამაგრდა თუ არა ტახტზე, თეიმურაზმა ხელი მიჰყო იასეს მომხრე კახეთის დიდებულთა ამოწყვეტას. იმავე დროს მცხეთა შაჰის მტერს დელი-მამედს 10.000 მებრძოლი და შეუსია ირანის საზღვრებს.

დელი-მამედი დაეცა ირანის განაპირა კუთხეებს. ააოხრა ისინი და გაწყვიტა მრავალი ხალხი, ხოლო ირანის ორ ქალაქს, არეშსა და ქამელს, სამუდამოდ მოუღო ბოლო.

ამავე დროს თეიმურაზი გზავნიდა დესპანთა რუსეთში, ევედრებოდა მოსკოვის ხელმწიფეს მიეღო კახეთის სამეფო თავის სრულ მფარველობაში.

ეს ამბები ჩაუვიდა შაჰაბაზს, რამაც გაარისხა უზომოდ. ის მზად იყო თავის კბილებით დაეგლიჯა თეიმურაზი. მისგან დაჯილდოებული და ვეზირებად დაყენებული კახნი, დავით ჯანდიერი და ნოდარ ჯორჯაძე, დალატობდნენ მას. ამის შემდეგ რა იმედი უნდა ჰქონოდა დანარჩენების! აშკარად მზერდა, რომ დღეს თუ ხვალ მთელი ივერი ჩაუვარდებოდა ხელში დიდ რუსეთს, რომლის ასეთი გაძლიერება და მოახლოება დაღუპავდა ირანს. ირანის მეფეს ახლავე უნდა მიეღო მკაცრი ზომები, რომ ეს აეცდინა. მან გადაწყვიტა კახთა სასტიკად დასჯა, მთელი ივერიის ხალხის აყრა და მათ ნაცვლად თათრების დასახლება. ამით შაჰს სურდა

სამუდამოდ აეცილებინა თავიდან ეს დიდი საფრთხე. მას სწაღდა ჩაეგდო ხელში და მაგრად ჩაეკეტა კავკასიონის კარი, — ღარიალის ხეობა, საიდანაც უნდა გადმოსულიყვნენ რუსნი საქართველოში.

შაჰი შეუდგა საქმეს, იწყო დიდი მზადება და ჯარების შეგროვება, ის კარგად იცნობდა ქართველთ, იცოდა, თუ რა მამაცი ხალხი ესახლა ივერიაში. თუმცა ქართლი იყო უმეფოდ, თუმც თეიმურაზი მაშინვე გაიქცეოდა იმერეთს და უპატრონოდ დააგდებდა კახეთს, მაგრამ ამ ორ პატარა სამეფოს ჰყავდა ისეთი გამოცდილი სარდლები. ჰქონდა ისეთი ბუნებრივი და ხელოვნური სიმაგრენი, რომ მათი დამარცხება არ იყო ადვილი საქმე. ამას გრძნობდა შაჰაბაზი და იღებდა ზომებს, შაჰის იღუმალი განზრახვა გაიგო დიდმა მოურავმა. ის ხედავდა მის საშინელ რისხვას. ხედავდა, რა გულმოდგინედ იწვევდნენ ჯარებს ირანის ყოველი კუთხიდან. ეს დიდი ლაშქარი უნდა წასულიყო ივერიაში; უნდა გაეულიტა კახნი; უნდა აეყარა ქართლის მცხოვრებნი... ამიერიით ქართველის სახელი უნდა მოსპობილიყო ივერიაში. ამიერიით იქ უნდა დაესახლებინათ სპარსნი და მულანლოს თათრები...

გმირის გული აივსო ცეცხლით. აშკარად მზერდა ივერიის დაღუპვას. კახეთს კიდევ არ უჭირდა ისე; მას ჰყავდა მეფე და გულშემატკივარი გმირი სარდლები: ქართლი კი სრულიად უპატრონოდ იყო დაგდებული.

სააკაძე ეახლა შაჰაბაზს. ყაენმა მიიღო საიდუმლო სენაკში. მოისვა გვერდით, გადახედა თავისი მხვრეტი თვალებით და დაიწყო აღელვებით:

— ივერიის გმირო, ჩემო ერთგულო მოურავო! ხომ სცანი, რარიგ მილაღატეს ჩემი ბრძანებით განდიდებულმა ჯორჯაძემ და ჯანდიერმა! მათ მოაწყვეს აჯანყება და გაელიტეს ჩემი მეციხოვნენი. ხომ სცანი აგრეთვე, რაებიც ჩაიღინა ჩემმა მოსისხლე მტერმა თეიმურაზმა! დიდი მხედრობით დეცა ჩემს ერთგულ იასეს, მოჰკლა იგი. ესეც არ იკმარა! ჰგზავნის ელჩებს ჩრდილოეთით, ემუდარება მოსკოვის მეფეს მფარველობასა და ჯარებით დახმარებას

ჩემ წინააღმდეგ... ახლა შენ თვითონ განსაჯე, რისი ღირსი ახიან ესოდენ ბოროტებათა ჩამდენი თეიმურაზ მეფე და მისი სარდლები იცი, მოურავო, რას ნიშნავს ურუსების ჩამოსვლა ივერიაში? ისინი გადამიკეტავენ გზას კავკასიისაკენ. რას ფიქრობ, ამ მოსალოდნელ ხიფათს გულზე ხელდაკრეფილი უნდა ვუმზირო? არა, ჩემო გიორგი-ხანს მე ერანის ლომს შეძახიან და საქმით უნდა დავამტკიცო ეს სახელწოდება! მწადს გაველიტო მთელი კახეთი... ო, რა წამებით მოვკლავდი იმ არამზადას, თეიმურაზ მეფეს, თუ კი ალაჰმა ინება და ჩამიგდო ხელში! რაც შეეხება ქართლსა, მას ერთიანად აყერი და გადმოვასახლებ ფერეიდანში, ხოლო ივერიაში დავასახლებ ჩემ ერთგულ ადერბილერ თათრებს...

ფრიად მღელვარე შაჰმა შესვა ფიალით შერბეთი და ზურგით მიესვენა მუთაქებს. ის დუმდა. დუმდა აგრეთვე მოურავიც, ღრმა ფიქრებში ჩაფლული, თანაც ცდილობდა არ დაჩნეოდა ცეცხლი, რაც მძაფრად იგზნებოდა მის გულში. შემდეგ ასწია თავი მაღლა, შეანათა ყეინს არწივის თვალები და დაიწყო დინჯად:

— აზიის მბრძანებლო, მესმის შენი უსაზომო რისხვა და გამწარება, თეიმურაზ მეფის მეოხებით გამოწვეული... ის ღირსია ყველაფრისა... არ ვამართლებ აგრეთვე არც ჯანდიერსა და ჯორჯაძეს... ხოლო ვინ იცის, რით იყო გამოწვეული აჯანყება. ამბობენ, იასე მეტად მკაცრად ეპყრობოდა კახეთის მცხოვრებთ და ამასვე ბაძვდნენ მოხელენი და თვით სპარსთა რაზმებიო... აი, ამ გარემოებამ გამოიყვანა კახნი მოთმინებიდან და წარმოშვა მათი აჯანყებო...

შაჰბაზი დუმდა და გულდასმით უსმენდა სააკაძეს. მოურავი მიუხვდა და განაგრძო:

— ქვეყნის დიღო მბრძანებლო! გენუკვის შენი ერთგული მოურავი, ნუ ინებებ და ნუ გადიტან მთელ ივერიაზე ორიოდ ბოროტი ადამიანისადმი შურისძიებას... ნუ გასწირავ ქართლსა და კახეთს! გებრალეობდეს უდანაშაულო ხალხი. დიღო მეფევე! შენ უწყი კარგად, რა ჩავიდინეთ ამ

ხუთი წლის წინათ მე და ჩემმა ქართველებმა ჩვენ დავეუ-
ყარით დიდებულ ერანს აელანი და ყანდაარი, ქურთისტანი
და მდიდარი ერაყი: ჩვენ მოვხარეთ სინდეთის ამაყი რაჯა
და თურქეთის სულთანი. ჩვენ ვასახელეთ ერანის დროშა აღ-
მოსავლეთით და დასავლეთით! დიდებულო შაჰო! გაიხსენე შე-
ნი სიტყვა და ფიცი ივერიის მიმართ!

საკაცე შეჩერდა, ცდილობდა არ დაჩნეოდა მღვლევარება
მის ხმასა და სახეს. შეეცადა კვლავ მოეღბო შაჰის გული
კახეთის მიმართ, მაგრამ ვერას გახდა... შაჰმა შეაწყვეტია
სიტყვა და აგრძობინა, რომ დამთავრდა მათი საუბარი. შე-
წუხებული მოურავი დაემშვიდობა და გავიდა ოთახიდან.

შაჰაბაზმა გააყოლა თვალი და კვლავ ჩაიფლა ღრმა ფიქ-
რებში...

რამდენიმე დღის შემდეგ შაჰაბაზმა გაგზავნა სააკაცე
მისი ქართველებით ირანში, თვითონ კი დიდი ლაშქრით
გაემართა ივერიაში, რათა მოესრა მთელი კახეთი.

XVII. სისხლიანი პასეჟი

— დიდებულო მეფევ! ესეცაა გულის ხეთქებით მოირბინა ჩვენმა იფრინდამ და გვამცნო საზარო ამბავი: დიდი ლაშქრით მოდის კახეთზე გაბრაზებული შაჰაბაზი და გვიპირებს სრულ განადგურებას. დავხვდეთ მტერს, როგორც ეკადრება! — მოახსენა ბზობა დილით მთავარსარდალმა დავით ჯანდიერმა თეიმურაზ მეფეს. გრემის სასახლეში მალე მოიყარეს თავი სხვა ცნობილმა სარდლებმაც: ნოდარ ჯორჯაძემ, ლამაზ ვაჩნაძემ და დელი-მამედმა.

— მე კი ვამბობ, რომ უნდა განვერიდოთ პირდაღრენილ ვეშაპს, — ჩაფიქრებით წარმოსთქვა თეიმურაზმა, — მყის მოვეშალდეთ ხელდახელ და გავსწიოთ თიანეთით იმერეთისაკენ.

ის კი არ უწყოდა ამ მეფემ, რომ მაშინ და ახლა სულ სხვადასხვა პოლიტიკა ამოქმედებდა შორსმჭვრეტ დიპლომატს, შაჰაბაზს! პირველ შემოსვლის დროს კიდევ თან ახლდა ივერიის გმირი, ხალხის მოთავე, დიდი მოურავი. მისი მეოხებით ასცდა კახეთს შაჰის რისხვა. ახლა-კი არც სააკაძე ახლდა ირანის შაჰსა და თანაც უზომოდ გაბრაზებული იყო კახეთში მომხდარი ამბებით. მეტადრე თეიმურაზ მეფის მოქმედებით. ახლა შაჰი ცოფს ყრიდა კახეთის მიმართ და ემუქრებოდა სრულ განადგურებას. ეს არ იცოდნენ კახეთის ხალხმა და მეფე თეიმურაზმა.

თეიმურაზი მართლა გადაიხვეწა იმერეთს თავისი ცოლ-შვილით და დიდი ამალით.

აღდგომა თენდებოდა. მთვარე და კაშკაშა ცისკარი მხიარულად დასცქეროდნენ უდაბნოში დავით გარეჯის დიდ მონასტერს; უგზავნიდნენ მკრთალ სხივებს. სხვადასხვა კუთხიდან აქ შეკრებილი ექვსასი ბერი აგზნებული სახით უვლიდა ტაძარს ლიტანიას, ანთებული კელაპტრებით ხელში, და გალობდნენ „ქრისტე აღსდგას“. ეს ლაღადი გუგუნით ეფინებოდა მიდამოს ამ მყუდრო ღამეში. ექვსას კელაპტარს გაჰქონდა პრიალი...

— ეს რა ჩირაღდანია?! — წამოიძახა მრისხანე შაჰმა.

— უდაბნოს ბერები დღესასწაულობენ თავის პასექს, დიდებულ შაჰო! — იყო პასუხი.

— გაელიტეთ მთლიანად! გაელიტეთ გიაურები! — დაიღრილა მტარვალმა.

შაჰაბაზის ბრძანებაზე ხეთასი ცხენოსანი დაეშვა უდაბნოსაკენ ამოღებული ხმლით და დაერია უმწეო ბერებს. შეიქნა საზარო მუსერა. მშვიერი აფთრებივით ეძგერნენ ირანელნი უიარაღო მოხუც ბერებს და დაუწყეს ქლეტარ შეაკრთო მორწმუნე ივერნი ამ ველურმა თავდასხმამ, ისინი ისევ დამშვიდებით უვლიდნენ ტაძარს და ლაღადებდნენ „ქრისტე აღსდგას“, იხოცებოდნენ ჯვრით და კელაპტრით ხელში... ერთსა და იმავე დროს დიადი და საზარო იყო ეს სურათი: კიდევ ათიოდე წამი — და ექვსასი ბერი ეყარა დახოცილი ტაძრის ირგვლივ მონასტრის ზღუდეთა შორის. არც ერთი კენესა არ აღმოხდა მათ ბაგეს. ეს ბერები შეიქნენ ყეინის რისხვის პირველი მსხვერპლნი ივერიის საზღვრებს შიგნით. ამათი სისხლით მოირწყო კახეთში შესავალი გზა. ეს იყო მცირე საწყისი საშინელი ტრაგედიისა, რაც იმ ხანებში დატრიალდა ალაზნის ველზე...

კახეთის ხალხმა არად მიიჩნია მეფის გადახვეწა. ის იყო სრულიად დამშვიდებული და იმედოვანი, რომ შაჰაბაზი არ ერჩოდა მას, მოექცეოდა ლმობიერად და დაყვავებით. როგორც ეს ჩაიდინა პირველი შემოსევის ქამსა.

საშინლად მოტყუედა გულუბრყვილო ხალხი მან არ უწყოდა, რა გაბრაზებული მოდიოდა კახეთზე ვერაგი შაჰაბაზი, ან რა ფარული ზრახვანი ამოქმედებდა ირანის ბატონს.

უკვე ათასწერებად ყვაოდა ალაზნის ველი, გაზაფხულის თილისმით გაღვიძებული. ნებივრობდა იგი აპრილის მზის სხივებში უხვად მცურავი. ზურმუხტად შეფოთლილი ტყენი მთა-გორაკებზე, ამწვანებული ველ-მინდორი და შუაში მდორედ გაშლილი ალაზანი თავისი გიჟმაჟი შენაკადებით ამკობდენ პატარძალივით შემეკულ კახეთის ბუნებას. მინდვრად სამუშაოდ გამოფენილი ხალხი, მრავლად გაშლილი გუთნეული, მათზე მოდიდინე „ურმული“ და „ოროველა“, გაცხარებული ზენა-თესვა, აქა-იქ ამწვანებული ჯეჯილები, ზვრებში აცრემლებული ვაზები, უკვე გასლული და ჭიგოებზე გაკრული, ქმნიდნენ სიტკბო-სიცოცხლეს სოფლის მყუდრო ცხოვრებაში.

ამ გადაშლილს აღმოსავლეთის გეზით დიდებულ ველს ალამაზებდა აგრეთვე ფართო ქსელებად გაშლილი თამარ მეფის თაოსნობით მეთორმეტე საუკუნის დამლევს აგებული დედოფლის არხი, რომელიც რწყავდა ასიათასამდე დღიურ ნოციერ მიწებს, აძლევდა მათ გვალვის დროს საჭირო ლამს და ყოველწლივ უმცდარად უვსებდა პურ-ღვინით ბედლებსა და მარნებს კახეთ-ქიზიყის ნახევარ მილიონ მცხოვრებთ...

დღეს-კი მოხდენით ასევალებდა ოქროს ფერებად ამ ტურფა ედემს დიდი მნათობი. დღეს მუშაობდა მინდორ-ველად გლეხი მშრომელი, დღეს რწყავდა უხვად ზოდაბუნებს არხი თამარის, დღეს რაკრაკებდა „ოროველას“ და „მუმლი მუხას“ მშრომელი ხალხი, დღეს ნეტარებდა და იშვებდა მთელი კახეთი... არავინ უწყოდა, თუ რა რისხვას დასცემდა ზვალე. საშინელებას უმზადებდა უბედურ კახეთს ზვალინდელი დღე.

ქართლის საზღვარზე კახეთიდან გამოქცეულ თეიმურაზს შეეფეთა სპარსთა რაზმები. შორსმკვრეტმა შაჰმა წინასწარ გამოგზავნა მის დასაჭერად ორი გამოჩენილი სარდალი: ისპანდიარ-ბეგი და ალიყულა-ხან 15 ათასი მეომრით. ამათ უყულებს ქართლიდან თეიმურაზს და შეუკრეს გასაქცევი გზები.

დიდ საფრთხეში ჩავარდა თეიმურაზი. მას მოელოდა ტყვეობა და სიკვდილი. მან ადრევე შეკრიბა ერწო-თიანე-

თში სამიათასამდე მეზობელი, და თავის დიდ ამაღასთან ერთად 5 ათას კაცამდე ჰყავდა და სულ ამ ჯარით ეკვეთამტერს ისეთი გამწარებით, რომ საშინლად დაამარცხა სამჯერ მეტი ირანის ჯარი და გამარჯვებული გადავიდა იმერეთს, საიდანაც გაუგზავნა სულთანს ფეშქაშად ირანელთა 2500 თავი, რათა ამ სახით მოეგო თურქთა ფადიშას გული.

ამ ამბავმა კიდევ უფრო გააბრაზა მძვინვარე შაჰი, იგი შემოვიდა თბილისში, დასვა ქართლის მეფედ ლუარსაბის ბიძა, თავისი ერთგული გამუსულმანებული ბაგრატიმირზა, დაუყენა მთავარ ვეზირად დიდი მოურავის უფროსი ძმა ბეჟან სააკაძე, თვითონ კი ურიცხვი ჯარით გადავიდა კახეთს, რათა მთლიანად მოესპო ეს მხარე.

XVIII. კახეთის აოხრება

სამი მხრიდან მოედო კახეთს ირანის ლაშქარი ცეცხლითა და მახვილით ხელში. ნამდვილი ჯოჯოხეთი დატრიალდა ალაზნის ველზე. გამხეცებულნი მტერი მოედვა სოფლებს, დაბა-ქალაქებს და უმოწყალოდ ელეტდა ქართველ ხალხს. მათი სისხლით წითლად იღებებოდა მთა, ველი და მინდორი. რასაც ვერ სწვდებოდა ირანელთა მახვილი, მას სწადგურებდა ცეცხლი. საშინელი ხანძარი მძვინვარებდა ალაზნის ველზე, სპობდა ივერთ ქონებას და სარჩო-საგანძურს. უღძო სტიქიონის უმაძლარი ხახა ნთქავდა ყველაფერს.

იწოდა ქალაქები, სოფლები, ბალ-ვენახები, ინგრეოდა მკვიდრად ნაგები ციხე-კოშკები, ტაძრები და მონასტრები... ამ საშინელ ჯოჯოხეთში ისმოდა თოფ-ზარბაზნების გრილი, მტრის მახვილის ჩახაჩუხი და ქართველი ხალხის სისხლის თქრიალი. მომაკვდავის მწარე კენესა, ჩვილის უმწეო ჩხავილი და ნამუსახდილი ქალწულის საზარო კივილი სწვდებოდა თვით ზეცას, მაგრამ ზეცა დუმდა. მას არ აშფოთებდა ქართველის სისხლი და ცრემლები, არ აშფოთებდა სპარსთა მხეცობა და ველურობა...

კახნი არ მოელოდნენ ასეთ ჯოჯოხეთს. მათ არ ესმოდათ, რა ფარული ზრახვანი ამოქმედებდა ირანის შაჰს. მათ კარგად ახსოვდათ შაჰის პირველი შემოსვლა. სწორედ ამის გამო, კახეთის მცხოვრებნი სრულიად მოუმზადებელი დახვდნენ მძვინვარე მტერს. ახლა კი ამ უმაგალითო მუსკრამ

და ცეცხლმა შიშის ზარი დასცა მთელ კახეთს. ხალხი თავისი ცოლშვილით და სარჩო ქონებით ეცა მთებს, სამალავ ალაგებს, მარა გვიანდა იყო! წინდახედულ მტერს უკვე შეეკრა მათთვის გასაქცევი გზები, ამიტომ ათასობით უფარდებოდნენ ტყვედ ან იქლიტებოდნენ მტრის მახვილით. ვინც კი ასწრებდა მთებში შეფარებას, უარესი დღე ადგებოდათ იქ ლეკებისაგან. შაჰაბაზმა კახეთს დასარბევად მიუსია ისინი. ლეკთა ბრბონი უტევდნენ მთებიდან და ბარიდან დამფრთხალ ივერთ და მუსრს ავლებდნენ. იტაცებდნენ ქალებს და ბავშვებს, ართმევდნენ სარჩოს, ჯოგსა და მთელ ქონებას.

80 ათასი ქართველი ქალი და კაცი გაწყდა ერთ თვეში ალაზნის ველზე ამ საშინელი მუსერის დროს, 150 ათასი ქართველი კი ტყვედ ჩაუვარდა გალალეზულ მტერს.

ბევრი საზარო უბედურება განიცადა საქართველომ თავის ხანგრძლივ ისტორიაში, მაგრამ ამგვარი რამ არ ენახა არასდროს. შაჰაბაზის მტარვალობის წინაშე გაფერპკრთაღდნენ მურვან ყრუს, არპასლანის, მალექშაჰის, ჯელალედინის, ლანგთემურის და აზიის სხვა მბრძანებელთა მხეცური მოქმედებანი ქართველთა მიმართ. შაჰაბაზმა გადაჰარბა ყველას. მან მოიწადინა კახეთის მოსპობა და მიზანს მიადწია თითქმის.

— გონს მოდიო, ძმებო! შესდექით! ნუ გარბიხართ უგზო-უყვლოდ ცხვრის ფარასავით დაფრთხალნი! გამხნევდით! ქართველს არ შეჰფერის ეგეთი ლაჩრობა! შეერთდით! შეიარაღდით! დაფუხვდეთ მტერს მამაცად! ან ვაბრუნებინოთ პირი, ან შევაკვდეთ გმირულად! ნუ შევარჩინთ ყიზილბაშთ ჩვენი ქვეყნის დარბევას, აოხრებას, ოჯახის აწიოკებას, ხალხის ტყვევსა გაელეტას! — გაიძახოდა მჭექარე ხმით გურჯანელი გლეხი ილო ჯალიაშვილი, თავიდან ფეხებამდე იარაღში ჩამჯდარი, ზორბა აღნაგობის, შავგვრემანი სახის ვაჟკაცი.

— ძმებო, ხომ ხედავთ რა გვიყვეს მეფემ და თავადებ-
მა! თვითონ ადრევე გაიქცნენ ცოლ-შვილით და თავი შეა-
ფარეს იმერეთს, ჩვენ-კი დაგვყარეს უპატრონოდ. დღეიდან
ჩვენ თვითონ ვართ ჩვენი თავის პატრონი და ჭირისუფალი.
მოქუჩლით ჩემთან, კახეთის ვაჟნო, ვისაც კი გიღულთ ძარ-
ღებებში ვაქცაობის სისხლი! მოგროვდით ჩემთან, ვისაც კი
გიძგერთ ძველი ქართულის მამაცი გული! „ჭირსა შინა გა-
საგრება ისე უნდა, ვით ქვიტკირსა“ — ბრძანებს დიდი რუს-
თაველი; ამაზე მეტი ჭირი და ვაება არ დასდგომია და არც
დაადგება უბედურ კახეთს... ოჯახს გვინგრევენ, ცოლ-შვილს
გვიტყვევებენ, გვიუპატიურებენ, სახლებს და ბაღ-ვენახებს
გვიწვავენ, ყანებსა და სარჩოს გვისპობენ, ჩვენ თვითონ
ცხვრებივით გვყლეტენ... ასეთ დროს შებრძოლებისა და
გმირულად შეკვდომის ნაცვლად გარბიხართ ლაჩრად, ძვრე-
ბით თავის სოროში. სირცხვილი თქვენი! გონს მოდით!
შეიარაღდით, შეერთდით, მოქუჩლით ჩემთან და, აჰა, საერ-
თო ძალით მივიტანოთ მედგარი იერიშები გამხეცებულ
მტერზე! „ასი ათასსა აჯობებს, თუ გამორჩევით მქნელო“ —
ბრძანა დიდმა შოთამ, და ჩვენც, თუმცა ცოტანი, ვაჯობებთ
ათჯერ უმეტეს მტერსა, თუ გამოვიდებთ თავს და შევებრ-
ძოლებით მედგრად... განვაგლოთ, ძმებო, შიში, ვიქცეთ
ლომებად და გამარჯვებაც ჩვენია!

ასე გაიძახოდა თავისი მჭექარე ხმით იგივე მამაცი ილო
და დაქროდა თავის ლუში ცხენით დაბა-სოფლებში. მისი
მძლავრი ხმა, ვითარცა ბუკი, გრგვინავდა მძლავრად და
უდგამდა მის გამგონთ გმირობის სულს. მოდიოდნენ ილო
ჯალიაშვილთან კახეთის გლეხის შვილები, მამაცი ვაჟნი
ასობით იარაღჭურვილნი და დგებოდნენ მის დროშასთან
იმ რწმენით, რომ ან გაეძევებინათ მტერი, ან გმირულ
ბრძოლაში შექცვდომოდნენ მას. გმირი ილოც სანაქებოდ
ბელადობდა ამ გლეხთა რაზმებს, ისინი ხელდახელ აგებ-
დნენ სიმაგრეებს, ანუ სიგნახებს, მფრინავი რაზმების სახით
ეცემოდნენ მოულოდნელად ალაზნის ველზე სათარეშოდ
გაბნეულ მტერს და საგრძნობ ზიანს აყენებდნენ მოულოდ-
ნელი თავდასხმით. მეტ წილად რიყრაყზე ართმევდნენ

მტერს ტყვეებსა და ნადავლს, სურსათს, იარაღს და ელექტრონებს საკმაოდ. იმუსრებოდა კახეთის ხალხი, იმუსრებოდნენ ილოს მფრინავი რაზმები, მაგრამ იელიტებოდა მტერიც... ამან საგონებელში ჩააგდო ვერაგი შაჰბაზი; მან გადასწყვიტა დროით გასცლოდა კახეთს, რომლის მოსპობასაც ის აპირებდა.

თითქმის ერთ თვეს დარჩა შაჰბაზი კახეთში. ერთი თვის მანძილზე იწოდა, იელიტებოდა და ფეხქვეშ ითელებოდა მდიდარი ქვეყანა. წყდებოდნენ კახნი თავისი ცოლშვილით, მაგრამ წყდებოდნენ მტრებიც. ქართველებმა იაფად არ დაუსვეს მტერს თავის დაღუპვა. უკიდურესმა გამწარებამ კახნი გმირებად აქცია და ისინი იბრძოდნენ, როგორც დაჭრილი ლომნი თავის ბუნაგში. უთავბოლო, გაბნეული უიარალო ხალხი ბევრს ვერას აწყობდა შაჰის გააფთრებულ რაზმებთან. მათ ბელადობდნენ გამოცდილი სარდლები და იყვნენ აღჭურვილი საუკეთესო იარაღით: თოფებით, ზარბაზნებით და ზამბურაკებით...

ასე დამთავრდა ეს საშინელი ტრაგედია...

ეს უმაგალითო ამბები გლოვის ზარივით მოედო მთელ საქართველოს, ყველა გლოვობდა კახეთის აოხრებას, განადგურებას და ხალხის ველურად გაყლეტას. კოლხ-მესხეთივერიის ვერც ერთმა კუთხემ ვერ შეძლო დახმარებოდა თავის მოძმე კახელთ იმ საბედისწერო ბრძოლებისა და ელექტის დროს! აი, რას ნიშნავდა დაქსაქსვა წვრილ სამეფოსამთავროებად! ხოლო ამ დროს ირანში იყო ერთი გადახვეწილი ქართველი, ის ყველაზე მეტად გლოვობდა კახეთის დაღუპვას. შაჰის უმაგალითო მტარვალობამ და მისი ჯარების ბარბაროსობამ შურისძიებით აავსო მისი გული და მან გადაწყვიტა სამაგიეროს გადახდა. ის ეძებდა მარჯვე დროს და ეს ეპიცი მალე დადგა...

XIX. ქართველი ტყვეები

შაჰაბაზმა იჯერა გული. მან ჩაოხრა მთელი კახეთი და ქიზიყი, გაწყვიტა ოთხმოციათასი მცხოვრები და დაატყვევა 150 ათასამდე ქალი და კაცი. დაჰყო ისინი ურდოებად და დაუპირა ირანში გადასახლება. ტყვეებს შორის ჭარბობდნენ ქალები. ამათში შაჰის ბრძანებით არჩეულ იქნა სამიათასი ულამაზესი ქალწული, ასაკით 13 წლიდან 18 წლამდე. მათ შორის ას ოცი უტურფესი ასული შაჰის ბრძანებით აღრევე გაიგზავნა თეირანს, მისი ჰარემის დასამშვენებლად, დანარჩენები-კი შაჰმა ჯილდოდ დაურიგა ჯარების უფროსებს, რითაც ფრიად ასიამოვნა და მოიგო მათი გულა.

ინისის დამდეგს გავარდა ხმა — ორი კვირის შემდეგ ქართველ ტყვეებს გზავნიან ირანშიო. ეს ხმა ელვის სისწრაფით მოედო მთელ ივერიას. ამ საზარო ამბავმა ელდა დასცა კახეთ-ქიზიყის დაბა-სოფლებში უპატრონოდ დაყრილ მოხუც-დავრომილთ. ამ ამბავმა მწარე ბოლმით აავსო მთებში შეჩიზნულნი; აქ საუკეთესო ბიჭები დაფაცურდნენ, შეითქვენენ, შეეფიცნენ ძმებად ერთმანეთს, შეადგინეს რაზმები და გადაწყვიტეს დასცემოდნენ ღამე ირანის ჯარს, გუშაგად გამყოლს და რათაც არ უნდა დასჯდომოდათ გაეთავისუფლებინათ, თუ ყველა არა, ქართველი ტყვეების ნაწილი მაინც.

ინისის 15-ს დილით ადრე უჩვეულო მოძრაობა შეიქნა ირანელთა მთავარ ბანაკში. ამ დღეს მიჰყავდათ ქართველი ტყვენი.

ირანის ბატონმა ისურვა თავისი თვალით ენახა ეს ტყვეები. ამიტომ მთავარი ბანაკის გადაღმით გორაკზე ააგეს მდიდრული ჩარდახი, რომელიც ამაყად დაჰყურებდა ვრცელ მინდორს. აქ უნდა შეეკრიბათ ყველა ბანაკიდან ქართველი ტყვენი, რიცხვით 150 ათასამდე. და ეს ამოდენა ხალხი—ქალი, კაცი და მოზარდი, ამ სიციხეში უნდა გაერეკათ ცხერის ფარასავით შორეულ ირანში.

აჰა, გამოვიდა თავისი ძვირფასი კარავიდან ვერაგი შაჰაბაზი, თავისი ცოლებით და ბრწყინვალე ამალით გარემოცული! ოქროს ტახტრევანით მივიდა იგი ოქსინოთი მოფარდაგებულ ჩარდანში! დასვეს იგი ძვირფასი თვლებით მოოქვილ ოქროს სევანზე. ამ დროს ვრცელი მინდორი იესებოდა ტყვეებით. ბოღმა და სიბრაზე ელავდა შაჰის ბოროტ თვალებში. მოშავო ფერი დასცემდა მის მკრთალ შეწვეერა სახეს. მისი ბრძანებით განადგურდა ივერიის საუკეთესო ნაწილი, მან ნაცარტუტად აქცია იგი.

ამ ფიქრებში იყო გართული შაჰაბაზი, ოდეს გაისმა ზურნა-ღუღუქის ხმები. უკრავდნენ რააბს ყეინის სადიდებლად. მალე გამოჩნდნენ დროშებით ხელში თეთრ არაბულ ცხენებზე მსხდარი მდიდრულად მორთული და იარაღასხმული შაჰსევანები — შაჰის გვარდია. ჩარდანის წინ დროშების დახრით მწყობრად ჩაიარა ათასმა მხედარმა. ამათ უკან მოდიოდნენ ხროვად და არეულად, თავდახრით, ზურგზე ტვირთმოდებული, ზოგი ერთმანეთზე გადაბმული ქართველი ტყვენი, მოდიოდნენ ჯგუფებად, ზოგიც ხროვად, ფართოდ უწყვეტ მდინარედ. მოდიოდნენ ფეხშიშველნი, დაფლეთილი სამოსით, მოდიოდნენ ერთ საზარო გლოვად და ვაებად ქცეულნი... მოდიოდნენ... ქალებს მოჰყავდათ ხელჩაკიდებით ბავშვები, ზოგიერთს კიდევ ხელში ეკავათ ხამის ფალასებში გახვეული ძუძუთა ბავშვები. ტყვეების სახეზე იხატებოდა უსაზღვრო ჯავრი და განწირულება. ისინი სამუდამოდ სტოვებდნენ იმ მიწა-წყალს, იმ ტურფა მხრეს, სადაც დაიბადნენ და აღიზარდნენ, სადაც ეგულვოდან წინაპართა საფლავნი, სადაც გრძნობდნენ თავს ბედნიერად; ტოვებდნენ თავის საყვარელ ველსა და მინდორს, მთებსა

და მდინარეს... ტოვებდნენ ზვრებსა და ბალებს და, აჰა, ერეკებიან... სად? შორეულ, ხრიოკ, შხამიან გველ-მორიღ-ლებით სავსე ცხელ ქვეყანაში... და იქ მონებად ქცეულებმა უნდა ათრიონ ტანჯვა-წამებით თავისი ძალღური ცხოვრება...

შაჰმა შორიდანვე შენიშნა ქართველი ტყვენი... წამოდგა ზეზე, გააოცა ამ სიმრავლემ. ამ პაპანება სიციხეში ამ უბედურ ხალხს მოელოდა გრძელ მგზავრობაში აშკარა დაღუპვა, სიკვდილი... გადარჩენილთ კი — სიტიტველ, შიმშილი, გაჭირვება, დამცირება, ძალადობა, ნამუსის ახდა...

ჩარდახს მიუახლოვდნენ ქართველი ტყვეები. ამათ იცნეს მტარვალი, უცებ შედგნენ ყველანი და შებლავლეს გამწარებით:

— შაჰაბაზ! გვაკმარე ესოდენი ტანჯვა-წამება და დამცირება! ნუ გვლუპავ ამოდენა უდანაშაულო ხალხს! ნუ გვეგლიჯავ მამა-პაპეულ მიწა-მამულიდან! ნუ გვერეკები შორეულ ქვეყანაში დაგვეტოვე აქვე! შეიბრაღე ჩვენი უბედური ცოლ-შვილი: შეიბრაღე შინ ოხრად დაყრილი ჩვენი მოხუცი მშობლები... მოიღე მოწყალება, შეგვიბრაღე! ან ბრძანე და აქვე დაგვხოცონ ბარემ... ჩვენთვის ათასწილ სჯობია აქ, ჩვენს ქვეყანაში, სიკვდილი, ვინემ შორეულ გზაზე ტანჯვა-წამებით დაღუპვა... არ წავალთ! აქვე დაგვხოცე ყველანი!

ხალხი დაემხო მიწაზე... გაისმა ყრუ ქვითინი, გაისმა ქალთა და ბავშვთა საშინელი წივილ-კივილი.

პირსისხლიანმა მტარვალმა მოიბრუნა დაღმეკილი სახე, უხმოდ ანიშნა იჯიბთ განეგრძოთ გზა ირანისაკენ... შოლტ-მათრახების ცემით არეკეს დამხობილი ხალხი... საზარო ბღავილი აღმოხდა უბედურ ტყვეებს... გაისმა დედაკაცების წყევლა-კრულვა და გლოვა-ტირილი.

— მტარვალო! სისხლის მღვრელო! საზიზღარო! უღმობელო! ურჯულო! ვერაგო! დამღუპველო! — ყრუდ ისმოდა ეს სიტყვები ხალხის საშინელ გმინვასთან ერთად...

უგულო მზე მხიარულად იცინოდა კრიალა ცაზე და უხვად ჰფენდა მიდამოს მხურვალე სხივებს, ძირს, მიწაზე კი 150 ათასი ქართველი ტყვე მწარედ მოთქვამდა, იგლეჯდა:

თმასა და წვერს. უხეში ძალმომრეობა მათრახის ცემით ერეკებოდა მათ სამშობლოდან შორეულ ირანში.

ეს უამრავი ხალხი ზღაზვნით გაშორდა შაჰის ჩარდახს, განვლო მინდორი და გრძლად გაიშალა ფართო შარაგზაზე. მინდვრის ბოლოს მათ დახედნენ კახეთ-ქიზიყის სოფლებიდან ჩამოსული მოხუცი მშობლები და ახლო ნათესავნი. ერთმანეთის დანახვაზე ორივე მხრიდან გაისმა საშინელი ქვითინი. მიიწიეს, რათა უკანასკნელად მაინც ჩაჰკვროდნენ ერთიმეორეს დედ-მამა და შვილები, ბებია-ბაბუა და ბაღიშები, მაგრამ სარანგ-ეჯიბთა შინდის შოლტებმა, ცხენოსან ჯართა მწვავე მათხარებმა, ქვეითი ჯარის შუბებმა და თოფის კონდახებმა არ მისცეს მათ საშუალება უკანასკნელი ზევინა-ამბორით სამუდამოდ განშორებოდნენ ერთმანეთს. მხოლოდ ისმოდა ორივე მხრიდან მწარე მოთქმა და გოდება, რასაც ბანს აძლევდა ახლო სოფლებიდან უპატრონოდ დაყრილ ძაღლთა საშინელი ყმუილი... მისცეს ნიშანი და დაიძრა ამოდენა ხალხი. წინ მიდიოდა მწყობრად და ნელი ნაბიჯით ათასი ცხენოსანი შაჰსევანი. მათ უკან ჯგროდ და წელმოწყვეტით მიდიოდნენ ქართველი ტყვენი, სიმრავლის გამო სამ-ოთხ ეჯზე გაშლილნი. ესენი ადრევე დაეყოთ ურდობად, თითოში ოც-ოცი ათასი ქალი და კაცი. თვითვე ულ ურდოს გარს ეხვივნენ ხელჯოხიანი სარანგ-ეჯიბნი და მათრახით ხელში ცხენოსანი ჯარი, რიცხვით ორიათასი მხედარი. სულ უკან კი მოჭრიალებდა ათიათასი ურემი და მოჩაქჩაქებდა უამრავი ჯორი და აქლემი, ნადავლით მძიმედ ტვირთულნი. ამათ მოერეკებოდნენ ისევ ქართველი ტყვენი. ზოლო ამათ მცველად და გუშაგად გამოეყოთ სამიათასი ქვეითი და ორიათასი ცხენოსანი ჯარი. ამრიგად, ტყვეებსა და ნადავლს გუშაგებად მიჰყვებოდნენ სულ ხუთიათასი სარანგ-ეჯიბი, ოციათასი ცხენოსანი და ქვეითი ჯარისკაცი, გურგენ-ხანის სარდლობით.

მზე უკვე ჩასვლაზე იყო, როცა ისინი კარგად დაშორდნენ მტრის ხელით აოხრებულ გარეჯის უდაბნოს (მონასტერს) და მიაწიეს სასვენ და გასათევ ალაგამდე მდინარის პირას. მალე გაკეთდა უზარმაზარი ბანაკი; აქ შეჩერდნენ

ყველანი, დასხდნენ, შეისვენეს. მთელი დღის სიარულით მწარედ დაქანცული ტყვენი, მეტადრე ქალები და ბავშვები, მკვდრებივით დაეყარნენ მიწაზე. დაღამდა კიდევ, ლუში უმთვარო ცა გაიქედა ვარსკვლავებით. ჯარისკაცებმა აქა-იქ დაანთეს ცეცხლი, უფრო თავის შესაქცევად. შეუდგნენ ვახშმის ჭამასა და მასლაათს. იმათ ნაბრძანები ჰქონდათ მეტად ფხიზლად ყოფილიყვნენ პირველ ორ-სამ ღამეს მაინც, რადგან მთებში შეფარებულ კახაკ-გან ემცნოდათ თავდასხმის. ასე ამხილა ადრევე თვით შაჰაბაზს ჯაშუსის ენამ.

შუალამეს კარგად გადასცილდა. ტკბილად ეძინა გურგენ-ხანის ჯარს გაშლილ მინდორზე. ეძინათ ქართველ ტყვეებს, მწარე დაქანცულთ. დროგამოშვებით ისმოდა გმინვა და კვნესა, იმათ გულის სიღრმიდან აღმოხეთქილი, თანაც ხანდაზმით სმენას ბზარავდა გუშაგთ ყვილი. აჰა, მოსწყინდაო ამათაც ამ კუნაპეტ ღამეში გუშაგობა, წაგორდნენ მოლზე, მილულეს თვალი... მათაც დაეუფლა მძლეთა-მძლე მორფე; მალე ჩაიფლნენ გუშაგნიც ძილის ლუმბრაში.

ძინავს გურგენ-ხანის უზარმაზარ ბანაკს გაშლილ მინდორზე. ამ ძილს ტკბილ ნანას უგალობს ფართო მდინარე ნელი დუდუნით... შორეული სოფლებიდან მოისმა ოდნავ გასაგონად მამალთ პირველი ყვილი. თითქო ამას უცდიდნენ, მინდვრის სამი მხრივ შემორტყმულ მალნარიდან გამოჩნდნენ შავი ლანდები. მოდიოდნენ, შეჩერდნენ, შეჯგუფდნენ. შეეფარნენ ისევ ტყეს. ელოდებიან ვილაცას. ბანაკის მხრიდან გამოჩნდა სამი შავი ლანდი, ფორთხვით მომავალი, მიუახლოვდნენ ტყეს, შეეფარნენ ისინიც. — რა ჰქენით? რა გაიგეთ? კარგად დაზვერეთ?

შეეკითხა მოსულთ რაზმის უფროსი გიგა აფციაური ჩურჩულით.

— შევედით ბანაკში, დავხოცეთ ხანჯლით ოთხი მძინარე გუშაგი, ავართვით იარაღი და ტყვია-წამალი. მშვიდობით განვლეთ ჯარის რგოლი. მივალწიეთ ტყვეებს. ფრთხილად გავაღვიძეთ მამაკაცები, ვამცნეთ ჩვენი მიზანი, გადავეცით იარაღი, რომელიც ავართვით მოკლულ გუშაგთ, აგრეთვე გადავეცით ხანჯლები თან წაღებულნი. უსაზღვრო იყო მა-

თი სიხარული. მაშინვე დასჭერეს თოკები, რითაც იყვნენ ერთმანეთზე გადამბუნნი სამი და ოთხი ერთად. საუკეთესო ვაჟკაცი ასე მიჰყავთ იმ წყეულებს, ასევე ერთმანეთზე გადამბუნნი მიჰყავთ ლამაზი ქალებიც...

— ეს მითხარი, გაიგეთ რამე ჩვენს გოგოებზე? — შეეკითხა გულის ფანცქალით ერთი ჭაბუკი.

— სანუგეშო ვერაფერი; არ იციან, რომელ ურდოში არიან... ერთმა ისიც კი გვითხრა, რომ ამ ორი კვირის წინათ ყეინმა სამიათასამდე ულამაზესი ქალწული დაურიგა თავის სარდლებსა და იმ ჯარისკაცებს, რომელთაც თავი ისახელეს კახეთის აოხრებაში.

საშინელი გმინვა აღმოხდათ ჭაბუკებს, ბრაზით აქნოთ თვალები. ერთხანს დუმდნენ ყველანი.

— მაშ, ტყვილა ჩაგვიარა ამოდენა ცდამ?! — გამწარებით წაიფუჩუნა მაღალი ტანის ჭაბუკმა.

— რას როშავ, ბიჭო! შეუძახა გიგამ. — განა ამისთვის მოვსულვართ? ჩვენი უმთავრესი მიზანი ხომ ტყვეთა განთავისუფლებაა... განა ამისთვის არ წამოგვყვენ კიდეც ჩვენი ძმადფიცულნი, ლომივით ვაჟკაცი, 600-მდე თუშ-ფშავ ხევსური?

ჭაბუკმა დარცხვენით ჩაღუნა თავი.

— მაშ, ასე, ძმებო, დაყოვნების დრო აღარაა! — დაიწყო ისევ გიგამ, მთელი რაზმი უკვე გაყოფილია სამ ნაწილად და სამი მხრივ უნდა დავეცეთ ბანაკს. თოფ-დამბაჩების სროლით, სამხედრო ყიჟინით და ბუკთა ბლავილით შიშის ზარი დავცეთ მტერს, ავრიოთ უეცარი თავდასხმით მათი რაზმები და შევიტანოთ მათში ყლექა და სიკვდილი. იმავე დროს გავამხნეოთ ტყვეები, გადავცეთ თან წამოღებული ზედმეტი იარაღი თავის დასაცავად, ვამცნოთ თავშესაფარი ალაგები. ამრიგად დიდ ზიანს მივაყენებთ მტერს და ბლომდაც გადავარჩინთ ქართველ ტყვეებს, — დააბოლოვა მამაცმა გიგამ.

— აბა, მომყევით, ძმებო! შესხედით ცხენებზე, დაეწყვეთ რაზმებად, მიუახლოვდით ბანაკს სამი მხრივ. ჩემი ნიშანი იქნება თოფის გასროლა და თქვენც თოფ-დამბაჩების სრო-

ლით, ყიყინით მამაცად შეუტეით მტერს! — წამოიძახა მანვე და ელვის სისწრაფით მოახტა თავის ლურჯას. სხვებმაც მიბაძეს მას. გააქანეს ცხენები ბანაქისაკენ. გავარდა თოფი გიგას ხელში; მას მიჰყვა რამდენიმე ასეული თოფ-დამბაჩების გრალი. აბლავლდა ათეული ბუკი და ნაღარა. გიგამ რჩეული რაზმით სამი მხრივ იერიშით შეუტია მტერს და შეიტანა ირანელთა ბანაკში შიში და სიკვდილი. ქართველის შუბი, დამბაჩა, ხმალი და კალდომი ასობით სპობდნენ ყიზილბაშთ.

წამოცვივდნენ ზარდაცემული მტრები და ეცნენ იარაღს. ძილით გაბრუებულნი, მოულოდნელობით უსაზღვროდ შიშ-ატანილნი ამ სიბნელეში ველარ სცნობდნენ მტერსა და მოკეთეს, შეცდომით ქლეტდნენ ერთმანეთს.

იკადრა გამოსვლა თავისი კარავიდან დიაცთ ალერსით დამთვრალმა გურგენ-ხანმა.

— რა ამბავია?! რა მოხდა?! — იკითხა მან და სწრაფად შეიმოსა ბექთარით და ჯუბა-ჯავშნით.

— ქართველები დაგვესხნენ... გველტავენ... ტყვეები მიჰყავთ... იყო პასუხი.

ერთი წუთი — და გიგას რაზმებმა რამდენიმე ალაგს გააპეს მცველთა რგოლი და ცხენდაცხენ მიიჭრნენ ტყვეებთან, გადუყარეს იარაღი და შესძახეს:

— თავს უშველეთ, ძმებო და დებო! შედით ყველანი ეიმ ტყეში... იქ დაგხვდებიან ჩვენი ეტიკნი და გეტყვიან, რა გეზით უნდა წახვიდეთ, რომ თავი დააღწიოთ ამ საშინელ ყოფას... გასწიეთ სამგორისაკენ. იქიდან უშიშრად მიაღწევთ შესაფარ ალაგებს, სადაც დაგხვდებიან ჩვენები...

— ვინ ხართ, მაღლიანებო, რომ ასე თავი გასწირეთ ჩვენთვის! — შეეკითხა ერთი ცნობისმოყვარე დედაკაცი.

— თქვენი მოძმენი, მთებში აღრევე შეფარებულნი და ჩვენი ძმადგიცულნი მამაცი თუშ-ფშავ-ხვესურნი, მოიელნი და მოხევენი, — იყო პასუხი.

— იკურთხოს თქვენი მარჯვენა! გფარავდეთ წმ. გიორგი, ჩვენო დამხსნელნო!

აბლავლდა ხალხი მეტის სიხარულით და მიღებული იარაღით შეუდგნენ საქმეს.

— შაჰსევენები! — დაიღრიალა გურგენ-ხანმა.

ველარ მოასწრო გაგრძელება, რომ იქვე გაჩნდნენ ცხენზე მსხლარი ასისთავები. მათ უკან მოსდევდა მწყობრად ათასი რჩეული ცხენოსანი.

— ხედავთ, რას სჩადიან გიაურები! ასეთი თავხედობა განა გაგონილა?!

— ამას მოველოდით კიდეც, მაგრამ დროზე ვერ მივიღეთ ზომები...

— რამდენი არიან?

— ვფიქრობთ, 1500-მდე იქნება. აჰა, თენდება კიდეც. ჯარი უკვე მოვიდა გონს და იბრძვის მედგრაად.

— ხედავთ, ტყვეები გარბიან! გარბიან! — წამოიყვირა გურგენ-ხანმა.

— დიახ, გარბიან... მაგრამ ვერსად წაგვივლენ; ზომები მიღებულია, ახლა კი ველით შენს ბრძანებას.

უპასუხეს ასისთავებმა და დახარეს თავი ბელადის წინაშე.

— ცხენი! მომყევით!

დაიღრიალა ისევ გურგენ-ხანმა და სწრაფად მოაჯდა თეთრ არაბულ მერანს.

— სიკვდილი გიაურებს! — დასკეჭა მანვე და ხმალამოწვდილი გაქანდა იქით, სადაც ჯგუფად იბრძოდნენ ქართველი რაზმები. მას დაედევნა ათასი შაჰსევეანი.

ასეთ თავდასხმას ამოდენა ჯარით არ მოელოდნენ ქართველი რაზმელნი, სამ ნაწილად გაყოფილნი და ჯგუფებად გაბნეულნი 2-3 ეჯის მანძილზე. ისინი შედრკნენ, დაიხიეს უკან და შეჯგუფდნენ. მათ შემოერტყნენ ერთი მხრით შაჰსევენები, ხოლო მეორე მხრით ირანელთა ცხენოსანი და ქვეითი ჯარები, ტყვეთა მცველნი. შეიქნა მედგარი, უზოგველი ბრძოლა, უმეტესად ხმლითა და შუბით. დაჭრილ-დაზოცილი ცხენი და კაცი ცურავდნენ სისხლში. ამით ისარგებლეს ტყვეებმა, გარბოდნენ ათასობით და ეფარებოდნენ ტყვეებს. მათ დაედევნენ სარანგ-ეჯიბნი და ქვეითი ჯარი, მაგრამ ტყვეთა ერთი ნაწილი იარაღით ხელში სასტიკად უძალდებოდა მტერს და იბრძოდა თავგანწირვით.

თავისუფლების წყურვილმა გმირებად აქცია ისინი. იბრძოდნენ ქალებიც კი და ამხნევებდნენ ქმრებსა და ძმებს. საუბედუროდ, ტყვეებში ათას კაცს თუ ჰქონდა იარაღი, ისიც ზოგს თოფი, ზოგს დამბაჩა, ზოგსაც შუბი, ხმალი ან კალდომი. ირანის სარანგ-ეჯიბნი და ჯარი კი იყვნენ თავით ღეხაშდვ შეიარაღებულნი, რიცხვით ამათზე 5-6-ჯერ მეტნი. ამიტომ უპირატესობა აშკარად მტრისაკენ იყო. ეს ათასი ტყვე ქართველი გაწყდა თითქმის მთლიანად, ხოლო თავგანწირული ბრძოლით საკმაოდ შეაკავეს მტრის ჯარი და მით მისცეს საშუალება თავიანთ მოძმეთ, მეტადრე ქალებსა და ბავშვებს, შეფარებოდნენ ტყეებს და გაქცეულებს ადრევე ნათქვამ მიმართულებით. გაქცეულთ დაედევნენ ირანელნი და დიდი უმეტესობა უკან დააბრუნეს ცემატყეპით.

შაჰსევანებით და ცხენოსანი ჯარებით გარს შემორტყმული გიგა აფციაურის რაზმი ლომივით იბრძოდა, მაგრამ რას გახდებოდა თითქმის ათჯერ მეტ მტერთან! წყდებოდა მტერი, ხოლო წყდებოდნენ ათობით და ასობით გიგას რაზმელებიც. ერთი ჟამის ბრძოლით რაზმი უკვე განახევრდა.

— უაზროა აქ ჩვენი სიკვდილი, ბიჭებო! თავს ვუშველოთ! როგორმე დავადწიოთ თავი და მივხედოთ ტყვეებს! — შესძახა გიგამ რაზმელთ. — აბა, მომყევით! გავგლიჯოთ მტრის სალტა, გავიშალოთ ფართოდ, დაფანტვით და შევეფაროთ ტყეებს. იქ ესენი ვერაფერს გვიზმენ. ორასი კაციც რომ გადავრჩეთ ცოცხალი, დიდ დახმარებას გავუწევთ გაქცეულ ტყვეებს. აბა, მარჯვედ, ბიჭებო!

ამ შეძახებასთან ერთად გიგამ შემოატრიალა ცხენი, ელვის სისწრაფით დაეძგერა ზურგით მოქცეულ მტერს, გააპო იგი და ასი კაცით გავიდა სამშვიდობოს. ასევე ჩაიღინეს სხვა ასისთავეებმაც, გააპეს მტრის ჯარები, გავიდნენ სამშვიდობოს, გაიფანტნენ სწრაფად და მათრახის ტკაცუნით გააფრინეს ტყვეებისაკენ თავისი პაწია მთიული ცხენები. თოფისა და დამბაჩის სროლით მათ დაედევნენ შაჰსევანები და ცხენოსანი ჯარი. ბედად, ტყე არ იყო შორს და უმეტესობამ მოასწრო შეფარება. ხოლო ნაწილს მოეწიენ სპარსნი

და შაჰსეევანები თავის მფრინავ არაბულ ცხენთა მეშვეობით და აკაფეს ხმლით ცხარე ბრძოლაში.

აჰა, წამოეწია გიგას შაჰსეევანთა ასისტავი, მოუქნა კიდეც ხმალი, აჰა, უნდა გაგორდეს ძირს გიგას თავი გიგამ შეიგრძნო, ელვის სისწრაფით გაუხტა განზე და შემოუბრუნდა ხმალამოწვდილი. შეხედეს ერთმანეთს, შედგნენ გაოცებულნი, დაუშვეს ხმალი, მათ იცვნეს ერთიმეორე.

— ძმაო გიგა, შენა ხარ?! — შესძახა შაჰსეევანმა.

— ვის ვხედავ, ჩემს უფროს ძმას გულბაათს! — წამოიყვირა გიგამ.

ხუთი წლის უნახავი ძმები გადაეხვივნენ ერთმანეთს.

— ბიჭებო, რას უდგეხართ მანდი აქეთ მოიწიეთ! — შესძახა გულბაათმა არა ნაკლებ გაოცებულ სამოცამდე შაჰსეევანთ, თავის მსლებელთ, — ხედავთ, ბრიყვები რას ჩავდივართ? ჩვენს საკუთარ ძმებს ველეტავთ! აი, როგორ დაგვაბრძავა შაჰაბაზის ოქრომ და ჯილდო-პატივმა! აი, ეს ჩემი დიდი ძმაა, გიგა აფციური, მე კი მისი ძმა ვარ, გულბაათ, ირანში ჰასან-ბეით წოდებულნი. ამ წუთას უნდა დაგვეღვარა ერთმანეთის სისხლი. რისთვის? რატომ? ხოლო განგებამ შეგვიბრალა და არ გამხდა ძმის მკვლელი.

— ნუთუ შაჰსეევანები ქართველები ხართ? — გაიოცა გიგამ.

— განა არ იცი? თითქმის ყველანი, ხოლო მაჰმადის სჯულმიღებულნი. ერანის ჯარებში საუკეთესო გაუკაცნი ქართველები არიან. ჩვენ პირადად შაჰის მკველნი ვართ, რიცხვით სულ ათიათასამდე. შაჰაბაზი არ ენდობა არავის, თვინიერ ქართველთა. შთამომავლობით იგი ხომ ადერბილერი თათარია, შიხის გვარისა, მასთან ქართველი დედის შვილი! მას არ უყვარს სპარსნი და არც დიდი გვარის სპარსთ უყვართ იგი. ორჯერ შეთქმულებაჲ კი იყო მის წინააღმდეგ, მაგრამ აღრევე გაიგო და წამებით დახოცა შეთქმულთა ბელადნი.

— ახლა რას აპირებთ, ძმაო გულბაათ და თქვენც, მამაცო შაჰსეევანებო? მოდიხართ ჩვენთან, თუ დაბრუნდებით სპარსთა ბანაკში? — შეეკითხა გიგა.

— მოვდივართ ყველანი — შესძახეს ერთხმად — რა გინ-

და მტარვალთან, რომელმაც ასე ააოხრა ჩვენი ქვეყანა და დაღუპა ამდენი ხალხი! წაგვიყვა ჩვენ უბედურ მოძმეებთან, გვეყო სიბრმავე! გვეყო უსჯულო მტრის სამსახური!

ამ სიტყვებით ყველანი შემოეხვივნენ გიგას. ქართველი რაზმის უფროსი გადაეხვია მათ ძმურად და თვალცრემლიანი გაუძღვა წინ. ისინი მალე შეეფარნენ ტყეს.

მცირე ხნის შემდეგ ტყის მეორე მხრიდან გაისმა ქალის საშინელი კივილი. ეს კივილი მისწვდა გიგას ერთი რაზმელის სმენას. იგი ჩამორჩენოდა ამხანაგებს და ბორიალობდა ტყეში, თითქოს ეძებს ვიღაცასო. ქალის კივილზე ვაჟმა გაქუსლა ცხენი. ორს ეჯიბს ჩაეგდო ხელში გლეხის ლამაზი გოგო, წაექციათ მიწაზე და უპირებდნენ ნამუსის ახდას. ქალი იბრძოდა გააფთრებით, უკაწრავდა სახეს გამხეცებულ მტრებს, ჰკბენდა ხელებზე და თან გაჰკიოდა ცივი ხმით, ითხოვდა შველას, აჰა, მოქანცეს გოგო, შეუტერეს ხელფეხი თოკით, და ისიც იყო ერთი მათგანი უპირებდა პატივის ახდას, როს იელვა ხმალმა რაზმელის ხელში და ორივე ეჯიბის თავი ერთიმეორაზე გაგორდა ძირს.

ვაჟი სწრაფად გადმოხტა ცხენიდან, მიიჭრა გონდაკარგულ ქალთან და გაუხსნა ხელები, დააცქერდა გაოცებული, იცნო თავის საცოლო.

— ღმერთო! ვის ვხედავი მელანო, შენა?— წამოიყვირა ვაჟმა.

ქალმა შეიცნო ხმა, ოღნავ გაახილა მიბნედილი შავი თვალები და მიაჩერდა ვაჟს.

— ჩემო მალხაზ! ჩემო სიცოცხლე... ჩემო... ქალი ჩაეკრა ვაჟს და მეტის სიხარულით წაუვიდა გული...

ნაზი კოცნა-ალერსით მალხაზმა მალე მოასულიერა თავისი სატრფო.

— რარიგ გაჩნდი აქ, ჩემო ყველავე! — რომელმა ანგელოზმა გამოგგზავნა ჩემდა საშველად?!

ეკვროდა ქალი ამ სიტყვებით, თან უკოცნიდა სახეს, უკოცნიდა კოკობ უღვაშებს...

ეს მწვავე კოცნა, ქალის ალერსი, ნაზი ხმები შარბათივით ესხმოდა გულში, აღიზიანებდა ჟინსა და ლტოლვას. მალხაზი ძლივს იკავებდა თავს.

— შენ გეძებდი აქ, ამ ტყეში, ჩემო სიცოცხლე! გულო მითხრობდა, აქ იპოვი შენს მელანოსო. აჰა, გიპოვე კიდეც ჩემო სამოთხევე! გიპოვე, ჩემო ნეტარებავე!

— წავიდეთ, ჩემო სიცოცხლე, თავს ვუშველოთ! არ მოგვისწრონ იმ წყეულებმა! — წაიფუჩუნა ქალმა და ალერსით შეხედა ვაჟს.

— წავიდეთ, ჩემო ნეტარებავე! წავიდეთ!

ამ სიტყვებით ვაჟმა შემოისვა ცხენზე თავისი სატრფო და გაუდგა გზას ადრევე აღნიშნული მიმართულებით. ერთი საათის შემდეგ ისინი გავიდნენ სამშეიღობოს და წამოეწიენ შაჰსეევანებით გარემოცულ გიგას, ჰამხედრო სიმღერით ნელა მიმავალთ.

უკვე გაშუადღედა, ოდეს ტყვეთა მოსაგროვებლად გაფანტული მტრის ჯარი და სარანგ-ეჯიბნი დაბრუნდნენ. იმათ საშინელი ცემა-ტყეპით მორეკეს ქართველი ტყვენი, დააბინავეს, დათვალეს; აღმოჩნდა 129 ათასამდე ქალი და კაცი და მოზარდი. თავს უშველა ოციათასმა, ათასამდე ვაჟ-კაცი კი დაიღუპა ბრძოლაში. ამ ბრძოლაში დაიღუპნენ ცხრაასამდე თავდამსხმელი გიგას რაზმელნი, ოთხასამდე შაჰსეევანი და სამიათასამდე ირანელთა ჩვეულებრივი ჯარი და სარანგ-ეჯიბნი. სამოცამდე შაჰსეევანი და მათი ასისთავი ჰასან-ბეი დაიკარგნენ უგზო-უკვლოდ; გურგენ-ხანმა ვერა გაიგო რა მათ შესახებ.

მესამე დღეს საღამო ჟამს ეს უზარმაზარი ურდო-ქარავანი მიუახლოვდა საზღვარს. დაბინავდნენ ვრცელ მინდორზე მტკერის პირას. მდინარის გაღმით იწყებოდა განჯის სახანო, იგი შედიოდა შაჰის სახელმწიფოს ფარგლებში. აქ თავდებოდა ივერია. შეაქუჩეს ერთად ქართველი ტყვეები, გარს შემოარტყეს ჯარი ორ-სამ სალტად სიფრთხილისათვის და შემოაველეს ბლომად საიმედო გუშაგნი. •

დაღამდა. ბნელი ჩადრი გადაეფარა მიდამოს. ცა ალამაზ-და ციმციმა ვარსკვლავებით. სარანგ-ეჯიბებმა და ჯარისკაცებმა აქა-იქ დაანთეს ცეცხლი, მიუსხდნენ და იწყეს ლაზღანდარობა, შეუდგნენ კვებნას, თუ ვინ რამდენი ტყვე გააუპატიურა, გაცარცვა, დაჭრა ან მოკლა კიდეც.

ქართველი ტყვეები კი დიდ-პატარიანად მისცემოდნენ უსაზღვრო სევდას, ჯავრსა და კაეშანს. უკანასკნელად ათევდნენ ისინი ღამეს საქართველოს მიწა-წყალზე. ხვალ დილით ადრე იმათ გადაიყვანდნენ ამ ფართო მდინარეზე, რომლის გაღმით იწყება შაჰის სამფლობელო, და გაირევენ ულევ გზა-შარაზე შორეული ირანისაკენ... ამიერიტ ველარ იხილავენ თავიანთ ქვეყანას, თავიანთ სოფლებს, ციხე-კოშკებს, აქოჩრილ მთებსა და ცელქ მდინარეებს. ველარ იხილავენ თავიანთ მოხუც მშობლებს, იქ ოზლად დაყრილთ, ამიერიტ ველარ იხილავენ მოყვრებსა და ნათესავთ, ადრევე მთებში შეხიზნულთ...

ასე ფიქრობდა თითოეული მათგანი, ევსებოდათ გული ცუცხლით, შხამით, ნაღველით.

— ოჰ, ნეტავ იმათ, ვინც ახლა მთებშია შეხიზნული! — ღრმა ამოოხვრით წაიფუჩუნა ერთმა.

— ოჰ ნეტავ იმათ, ვინც თავი დააღწიეს გუშინწინ და გავიდნენ სამშვიდობოს! — წამოიძახა მეორემ მძიმე ამოკენესით.

— ოჰ ნეტავ იმათ, ვინც დაიხოცნენ ბრძოლაში და გადურჩნენ იმ საშინელ ტანჯვას, რაც მოგველის ყველას ამ შორეულ გზაზე! — ამოიხვნეშა მწარედ მესამემ.

ამ სიტყვებმა გამოიწვიეს ქალებს შორის გულამოსკენილი გოდება-ქვითინი. ისევ მიწყნარდნენ, მიყუჩდნენ... გამეფდა სამარისებური სიჩუმე. შუალამე მოახლოვდა, მაგრამ არავის ეკარებოდა ძილი... ისევ საერთო უსაზღვრო კაეშანი და მწუხარების შავი ლუმბრა...

აჰა, ამ სიბნელეში გაისმა ფანდურის ხმა, სიჩუმე დაარღვია სიმთა მკენესარე ჰანგებმა. სიმებს აჰყვა ადამიანის სევდიანი ხმები. მღეროდა დაბალი ხმით კარმაგი მოხუცი, ერთ ღროს ფრად მამაცი მინდია წიკლაური, ძველთა-ძველ გლოვის სიმღერას. მძიმე ჰანგებს ექსოვებოდა ცრემლი და ვაება... ამ ხმებში გამოსჭვივოდა მთელი ქართველი ერის ტანჯვა-წამებით სავსე წარსული. მინდიას ლექსში ქართლოსის მოდგმა ედარებოდა ამირან-გმირს, კავკასიონის კლდეზე მიჯაჭვეულს. გმირს — ბუმბერაზს უფლეთავს გულღვიძლს უმაძლარი ძერა, მაგრამ იგი არ იხრის ქედს, ითმენს

ათას წელთა მანძილზე ტანჯვა-წამებას. ის ელის მხსნელს, ელის საბოლოო გამარჯვებას... უმძღარი ძერა კი ის უამრავი მტერია, რომელიც შავბნელ ტალღებად გარს ახვევიან ქართველ ტომებს, ებრძვიან საუკუნეებით და უპირებენ შთანთქმას... ხოლო ქართველი ერი, გმირული თავგანწირვით ებრძვის შემოსეულ მტერთა ურდოებს... ებრძვის საუკუნეებით, ათასი წლობით, არ იხრის ქედს, არ იტეხს გულს, არ აგდებს ხელიდან იარაღს, ის ელის მხსნელს, ელტვის დიდებულ მომავალს, ელის თავისუფლებისა და უზენაესი კულტურა განათლების ბრწყინვალე მზეს...

მაგრამ დღეს ხომ ეს ერი იტანჯება! დღეს ხომ ამირანის ძერასავით უფლეთავს გულ-ღვიძლს გარსშემოხვეული ორი ვეშაპი—ძლიერი ირანი და კიდევ უფრო ძლიერი თურქეთი.

აი, ამ ძველთა-ძველ ზღაპარს, ამ ლეგენდას, ლექსად ასახულს, მღერის ბერი მინდია; ამას აკენესებს თავის ფანდურზე და ეს ხმები, იპყრობს მთლიანად ტყვეების სმენას. კენესის ძველი ფანდური, მოთქვამს სიმღერით და აზუზუნებს თითქო ძველთა-ძველ ამბავს ბერი მინდია, ეს მთის არწივი, და ამ ზუზუნს, ამ მოთქმა-სიმღერას ბანს აძლევს ასიათასი ქართველი ტყვე... შორს გაისმის ეს ყრუ ზუზუნი... ზუზუნებს ხალხი დატყვევებული, მონად ქცეული, ოხვრა-ქეითინით, ცრემლების დენით ამ შავ-ბნელ ზუზუნს თითქო ბანს აძლევს ბუტბუტით მტკვარი, ფართოდ გაშლილი, თითქო ბანს აძლევს მძიმე დუმილით მთელი ბუნება — ცა, დედამიწა ჩაბნელებული...

და ეს ზუზუნი, ლოდივით მძიმე, შავი და ბნელი, გაბზარა ჰანგმა იმედოვანმა, იქ მოშორებით, შუაგულ ურდოში მწყობრად გაისმა ჩანგურის ჟღერა. მას ჩაექსოვა ჭაბუკის ხმები, სუფთა, კრიალა... მღეროდა რეზო ყარალაშვილი, თავის სიმღერით ფრიად განთქმული:

„იყავ მამაცად, ქართველო, გული ნუ შეგიშინდების... არ შეუდრკების ვაჟკაცი კარგი მახვილთა კვეთასა... ასი ათასსა აჯობებს, თუ გამორჩევით მქნელია...“

ჭირსა შინა გამაგრება ისე უნდა, ვით ქვიტკირსა...“

ეს სიმღერა, ეს საიმედო ხმები, ვით ბალზამი სიცოცხლის მგვრელი, მოედო სწრაფად ბედშავთა ურდოს, იმედ-ნუგე-შით ააფრთოვანა. შეწყდა ქალებში ტირილი, შეშრა და გაქრა ვაჟკაცთა თვალებზე მომდგარი ცრემლი. ასწიეს თავი, განშორდა სახეს სევდის ბურუსი...

ყარალაშვილის ჩანგურ-სიმღერის პასუხად, აჰა, აუღერდა კიდევ ჩანგური, ზედ ამღერდა არა ნაკლებ ძლიერი ხმა. უკრავდა, მღეროდა მთაში განთქმული ბერო ჯილაური.

— ვერ დაიჭირავს სიკვდილსა გზა ვიწრო, ვერცა კლღო-
ვანი,

მისგან ყოველი გასწორდეს, სუსტი და ძალგულოვანი, —
გაისმა ჯილაურის მაღალი ბანი.

— ბოლოს შეპყაროს მიწამან ერთგან მოყმე და მცხო-
ვანი,

სჯობს სიცოცხლესა ნაძრახსა სიკვდილი სახელოვანი, —
გაიკრიალა პასუხად ყარალაშვილის საამო ხმამ. და, აჰა, შეიქმნა ერთგვარი შეჯიბრება ამ ორ მომღერალს შორის.

— საწუთრო კაცსა ყოველსა ვითა ტაროსი უხდების...
დაიწყო ერთმა.

ზოგჯერ მზეა და ოდესმე ცა რისხვით მოუქუხდების...
დაამთავრა მეორემ.

აჰა, ჩაენთო გულში იმედის შუქად ასიათას ტყვე ქართველს ხუთასი წლის წინათ მოვლენილი დიდებული მგოსნის უკვდავი სიტყვები! შოთას უზენაესმა პოეზიამ ამ საშინელ ღამეს ჩანგურზე დამღერებულმა, დროებით დაუხშო უსაზღვრო ჯავრი, შევბნელი სინამდვილე და ააფრთოვანა სამშობლოს მოწყვეტილი ასიათასი ქალი და კაცი...

შეწყდა სიმღერა, მიყუჩდა ხმები, დუმდა ჩანგური, დუმდნენ ათასეულნი, გალურსული იმედის სხივით გულს ჩანთებულნი...

— იკურთხოს დიდი მგოსანი, რომლის სიტყვებმა დროებით მაინც დაუბაა გული ასიათას ტანჯულთ და მოასხურა უტკბესი შარბათი მათ გაწამებულ სულს, — ჩაილაპარაკა ჯილაურმა და შეახვია სათუთად თავისი ჩანგური.

ეძინა უბედურ ხალხს. დიდი რუსთაველის სიტყვებით
დამტკბარს, ხოლო არ ეძინათ მინდიას, ბეროს და რეზოს,
ისინი ღვრიდნენ იღუმალ ცრემლებს... იმათ თვალწინ კვლავ
იხატებოდა აოხრებული ტურფა კახეთი, გაულეტილი უამ-
რავი ხალხი და ეს საბრალო ამ დროს მძინარე 130 ათასი
ტყვე ქართველი, რომელთაც ხვალ დილას რიყრაეზე ცემა-
ტყეებით გარეკავდნენ შორეული ირანისაკენ.

მართლაც, დილის რიყრაეზე არეკეს შოლტ-მათრახებით
ეს ამოდენა ხალხი, გადაიყვანეს მტკვარზე ბორან-ტივებით
და გაუყენეს ირანის გრძელ შარას.

აქ აღარ აეწერ იმ საშინელებას, თუ რა შეემთხვა უბე-
დურთ ამ მგზავრობაში, ან რა ტანჯვა-წამება განიცადეს,
ან რამდენი გაწყდა... აი რას სწერს ისპაჰანიდან რომის პაპს
მისი ელჩი პიეტრო დელავალე ამ ტყვე ქართველთა შე-
სახებ:

„საშინელი შედეგი მოჰყვა ქართველი ხალხის ასე გადა-
სახლებას, რამდენი სიკვდილი უზომო გაჭირვების გამო,
რამდენი ადამიანის გაულეტა, გახრწნა და ბილწვა სპარსთა
ჯარის მიერ, რამდენი ჩვილი ბავშვი დაარჩევს მამებმა თა-
ვისივე ხელით, ან ჩაყარეს წყალში, რომ არ ეცქირათ მათ
ტანჯვისათვის, რაკი ყოველ ღონეს იყენენ მოკლებულნი
მათ საპატრონოდ! რამდენს ელეტდა გზა-გზა დაცვენილთ
სპარსთა მხედრობა! რამდენი ბავშვი მოგლიჯეს დედის
ძუძუს და დაჰყარეს გზაზე მხეცთა საკმელად, ცხენთა,
ჯორთა და აქლემთა ფეხქვეშ სათელად; ჯარი და პირუტყ-
ვი უწყალოდ გადადიოდნენ გზაზე დაცვენილ მომაკვდავ
ტყვეებზე. რამდენი ამ ტყვეთაგანი დააშორეს სპარსებმა
მამა-შვილს, ცოლ-ქმარს, და-ძმას და გაფანტეს შორს ქვეყ-
ნებში, ასე რომ ეს საბრალონი საუკუნოდ არიან იმედმოხ-
დილნი, რომ ნახონ ოდესმე ერთიმეორე. რამდენი ქალი და
კაცი იყიდებოდა პირუტყვზე იაფად! რამდენი სხვა ამისთა-
ნები ხდებოდა ღირსი სიბრალეულისა, მაგრამ ყველას ვინ
მოსთვლის!

ქართველ ტყვეთა რიცხვი ისე დიდია, რომ დღეს არ მო-
პოვება არც ერთი სახლი მთელ სპარსეთში, რომელსაც არ
13. ს. ქვარიანი.

იყოს სავსე ქართველებით, კაცით თუ ქალით. აქ არ არის ისეთი დიდი კაცი, რომელიც არ ცდილობდეს, რომ ყველა მისი ცოლები იყვნენ ქართველები, რადგან ქართველი ქალები არიან მშვენიერნი. თვით შაჰის სასახლე სავსეა ქართველი ქალებითა და ვაჟებით“...

როგორც გვაუწყებენ იმ დროის ისტორიკოსნი, ქართველ ტყვეთა თითქმის ორი მესამედი გაწყდა მძიმე მგზავრობაში, დანარჩენები გაიყიდნენ მონებად, ზოგიც დაასახლეს დაცემულ ქაობიან ალაგებში, სადაც მეტი ნაწილი დაიღუპა შიმშილისა და ციებისაგან; ზოგნიც დაძროდნენ კარდაკარ მშვიერ-შიშველნი და მათხოვრობდნენ.

XX. დედოფლის წინდახედულება

იმერეთს შეხიზნული კახეთის მეფე ორიათასამდე თავად-აზნაურით და მათი ცოლშვილით მძიმე ტვირთად დააწვა მეფე გიორგის. ცოტა ხანს შემდეგ მოუსაველიანობის გამო იმერეთში გაჩნდა შიმშილი და თეიმურაზი თავის უზარმაზარი ამალით იძულებული შეიქნა სწვეოდა თავის სიძე მამია გურიელს. იმავე დროს გაუგზავნა დესპანი თურქეთის სულთანს, სთხოვა საცხოვრებლად ადგილმამული და თანაც საკმაო ჯარი, რათა შესეოდა ირანს და სამაგიერო გადაეხადა შაჰაბაზისათვის. სულთანმა შეიწყნარა თეიმურაზის თხოვნა, მისცა გურიის მეზობლად მდებარე ადგილები, აგრეთვე ქალაქები: გონია, ოლთისი, არტანუჯი და სხვა, თანაც გაუგზავნა ჯარი.

თეიმურაზი თავისი ოჯახობით და ამალით დასახლდა ოლთისს. აქედან თავისსა და თურქთა ჯარით იგი შეესია ირანის საზღვრებს. თეიმურაზი მიუახლოვდა ქ. არდებილს, სადაც იყო სეფიდთა დინასტიის აკლდამა, მას სურდა როგორც თვით ქალაქის, ისე შაჰაბაზის საგვარეულო აკლდამათა დანგრევა, მაგრამ არ დაცალდა, სცნო თუ არა ყეინმა თეიმურაზის არდებილზე გალაშქრება, მაშინვე გამოსწია ჯარით. თეიმურაზმა მიანება თავი არდებილს და გამობრუნდა. ამრიგად, არდებილი გადარჩა დანგრევას. შაჰაბაზმა უბრძანა ერევნის ბეგლარ ბეგს ამირ გურიხანს, საკმაო ჯარით დასცემოდა ჩუმად ოლითსს და შეეპყრა თეიმურაზი

თავისი ოჯახობით. ერეენის ხანმა შეასრულა შაჰის ბრძანება. შეკრიბა საკმაო ჯარი, საშინელ ზამთარში გადაიარა მალაილი მთები და მიადგა ჩუმად ოლთისს.

თეიმურაზ სრულებით არ ელოდა მტრის თავდასხმას, მეტადრე ამ უცნაურ ზამთარში. მან გაისტუმრა თურქთა ჯარი, კახეთში გაუშვა აგრეთვე თავისი ჯარის მეტი ნაწილი ოჯახობით, თვითონ კი ჩაჯდა ხომალდში და ვასწია სტამბოლს სულთანთან; ოლთისში დატოვა თავისი ცოლშვილის მცველად ნოდარ ჯორჯაძე მცირე რაზმით. ეჭვი არაა, ოლთისი ამირ გურიხანის მსხვერპლი გახდებოდა და მასვე ჩაუვარდებოდა ტყვედ თეიმურაზის ცოლშვილი, რომ ისინი არ ეხსნა თვით დედოფლის წინდახედულებას. წინაღმეს დედოფალმა ბევრი იფიქრა და მიხვდა, რომ მტერი არ მოისვენებდა, შეიძლებოდა აქაც თავს დასხმოდნენ, ზომების მიღება იყო საჭირო. დილით დედოფალმა მაშინვე დაიბარა ნოდარ ჯორჯაძე და უბრძანა მთელი რაზმით ციხეში გამაგრება მტრის დასახვედრად. რა სცნეს ეს ამბავი ოლთელებმა, მაშინვე იწყეს საომრად მზადება, და ქალაქის გამაგრება.

ირანელნი ღამით მიუახლოვდნენ ოლთისს და დილის რიერაჟზე აპირებდნენ უეცრივ თავდასხმას, მაგრამ ამირ გურიხანის გაოცებას არ ჰქონდა საზღვარი, როცა ნახა ციხე-ქალაქი გამაგრებული და მცხოვრებნი საომრად მომზადებული. მოხდა ცხარე შეტაკება. მძიმე მგზავრობით მოქანცულმა ირანელებმა ვერ გაუძლეს კახ-ოლთელ ჯარის სიმამაცეს და სასტიკად დამარცხდნენ. გაიგო ეს ამბავი შაჰბაზმა და მისი გული ბრაზით აივსო. მტარვალმა მაშინვე იყარა ჯავრი მძევლად წაყვანილ თეიმურაზის ვაჟებზე: შაჰის ბრძანებით ორივე ბავშვი დაასაჭურისეს. ამ ბარბაროსულ წამებას ვერ გაუძლო უმცროსმა ვაჟმა და ჯალათის ხელში მოკვდა, ხოლო უფროსი შეიშალა.

თეიმურაზი დაბრუნდა ოლთისს და გაიგო თავისი ცოლშვილის გადაარჩენა. მან მაშინვე გაგზავნა მოსკოვში ელჩად მთავარ ეპისკოპოსი თეოდოსი და არქიმანდრიტი არსენა,

ჯაატანა მათ ვრცელი ეპისტოლე, აბრალეზდა თავს რუსის ხელმწიფეს, აუწყებდა შაჰაბაზის მტარვალობას, ატყობინებდა თავის უნუგეშო მდგომარეობას, კოლხეთის მეფე-მთავართა კარზე ხეტიალს და გაკირვების გამო ოლთისში შეფარებას; მუხლმოყრით ევედრებოდა შველასა და მფარველობას.

იზერეთს ყოფნის დროს თეიმურაზი დაუცხრომლად უქადაგებდა კოლხეთის მეფესა და მთავრებს რუსეთთან შეერთების საჭიროებას, რუს ხელმწიფის მფარველობაში შესვლას. ამ მხურვალე ქადაგებამ ნაყოფიც გამოიღო: გიორგა მეფემ, გურიელმა და დადიანმა მისწერა მორჩილების პატიკი რუსის ხელმწიფეს და სთხოვეს მიეღო ისინი თავის მფარველობაში. იმავე დროს თეიმურაზი ატყობინებდა ხელმწიფეს შაჰაბაზის მიერ კახეთის აოხრებას, ევედრებოდა ჩარეულიყო მის საქმეში და მიეღო შუამავლობა შაჰის წინაშე, რათა მას გაეთავისუფლებინა მეფე ლუარსაბი, აგრეთვე მძევლად წაყვანილი თეიმურაზის დედა და ვაჟნი.

მოსკოვის მეფემ შეისმინა თეიმურაზის ვედრება, გაუგზავნა დესპანები შაჰაბაზს და მოსთხოვა ლუარსაბ მეფისა და ქეთევან დედოფლის განთავისუფლება. მაგრამ მათ ჩამოსვლამდე შაჰაბაზმა დაიბარა ასტრაბადის ხანი, ვისთანაც ჰყავდა მიბარებულნი მაჰმადის სჯულზე მოსაქცევად ქართლის მეფე, როცა დარწმუნდა მისი სიტყვიდან, რომ ლუარსაბი ისევ მტკიცე უარზეა, არ სურს უარჰყოს ქრისტე და მიიღოს მუსულმანობა, უბრძანა ხანს მოეკლა მეფე რაც შეიძლება საჩქაროდ.

შინ დაბრუნების უმალ, ასტრაბადის ცბიერმა ხანმა გაიტყუა ბედშავი ლუარსაბი, ვითომცდა სათევზაოდ. მიადგნენ მდინარეს. ხანმა აიღო ბადე და განგებ ისროლა ცუდად. ლუარსაბმა დაუწყო დაცინვა, გამოართვა ბადე, აიკრიფა მარჯვედ და, ის იყო უნდა ესროლუ წყალში, რომ მის უკან იელვა ხმალმა ირანელის ხელში და ქართველი მეფის თავი ჩაგორდა მორვეში. მეფის მოკვეთილი თავი ხანმა მაშინვე მიართვა შაჰს.

ასე დასრულდა ლუარსაბის ცხოვრება*. ივერიის ეკლესიამ ის წმინდათა შორის შერაცხა.

ამას შემდეგ მძვინვარე შაჰი შეუდგა ქეთევან დედოფალის საჯაროდ წამების საქმეს. მანამდე კი მედგრად შეეცადა მიეღო დედოფალს მაკმადის სჯული. ყოველივე ცდა და დაპირება ამაო შეიქნა. ქეთევანი მტკიცედ იდგა ქრისტეს მცნებაზე და არ სურდა მისი გმობა.

* ზოგის თქმით, შაჰის ბრძანებით, ლუარსაბ მეფე თითქო მოაშთეს თოცით გულაბყალის ციხეში 1622 წელს.

XXI. ქმთევან წამებული

სექტემბრის საოცნებო დილაა. ბუნებას დასცქერის ცის კაშკაშა ლაქვარდი. მზის ოქროს სხივებში გახვეულა ამწვანებულ ბაღებში ჩაფლული შირაზი, ირანის უტურფესი ქალაქი. ჰაერში გამდნარა ვარდების უტკბესი სურნელი და მიდამოს ეფინება ნიავის ფაქიზი ფრთებით. ვიწრო ქუჩები სავსეა ხალხით. ქარვასლების ვრცელი ეზოებიდან მოჩანან, ვით უცნაური ქიშკრები, აქლემთა უშნო თავები. შორათ კიდევ ჩანს მომაგალი გრძელი ქარავანი.

შირაზის მცხოვრებნი, ქალი თუ კაცი, ყრმა თუ მოხუკი, მიეშურებიან დიდი მოედნისკენ, სადაც შუა ალაგას წამების აპიონთან აზიდულა მხეცური სახის ჯალათი, ინით შეღებილ წვერ-ულვაშით, დაკაპიწებული ბანჯგველიანი მკლავებით. იქვე მდგარ გაღვიებული ნახშირით სავსე ქურაზი ხურდება რკინის შანთები, მარწუხები და წამების სხვა იარაღნი, რაც კი შექმნა ათასი წლობით ბარბაროსმა აზიამ.

საჩქაროდ იხურება დუქნები და ქარვასლა-ქულფაქები. ვაჭარ-ნოქრები და სოვდაგრები მიეშურებიან იქით, სადაც გარბიან მცხოვრებნი. ვრცელი მოედანი ივსება ხალხით, ისინი მიუზიდავს ველურ ცნობისმოყვარეობას. განსაკუთრებით სავსეა ქალებითა და ბავშვებით სახლების ბან-წინგარდები. არის საერთო ყიეყივი და მიმოთქმა. მეტკბილენი დაძრწიან ხალხში და მარდად ყიდიან ქადა-ნაზუქებს, ლავაშებში გახვეულ ლულა-ქებაბს, ქიშმიშ-ლაბლაბს, ხილს, პუნგიას და სხვა მრავალ ტკბილეულს, აგრეთვე ცივ შერბეთსა და დაშაქრულ ვეყინს.

ხალხში აქა-იქ ისმის: „გურჯისტან... ბეიუქ ხანუმ... ქე-თევან... შაჰაბაზ... გურჯი მოურავ“... და სხვ.

რაშია საქმე? რა ამბავია?

ამ მშვენიერ დილას სისხლის მოედანზე შაჰის ბრძანებით უნდა აწამონ ქრისტეს სჯულისთვის ქართველი დედა, ბრძენი, მაღალგონიერი და უზენაესი სათნოებით შემკული კახეთის დედოფალი ქეთევანი.

მცირე ხანს შემდეგ მოგროვდნენ შირაზში მცხოვრება, ტყვედ წაყვანილი და მონებად გაყიდული ქართველნი. მათ გამხდარ, დაღვრემილ სახეს აღბეჭდოდა უსაზღვრო სევდა და უიმედობა. აქვე გამოჩნდნენ ირანში მყოფი რომის მისიონერნი დელავალეს მეთაურობით. ისინი დადგნენ ჯალათის ახლო, რათა თავისი თვალთ ენახათ ქეთევან დედოფლის წამება. მისიონერთა სახეზე კრთოდა მძიმე კაეშანი.

მცირე ხანს შემდეგ გაისმა ბუკის მკექარე ხმა, მან ამცნო ირანის მეფის მოახლოვება. ამ ხმის გაგონებაზე შეტორტმანდა ხალხი და შეიქნა ჩოჩქოლი. უცებ გაჩნდნენ წესრიგის-დამცველი ეჯიბ-სარანგნი ჯოხ-მათრახებით ხელში და ცემა-ტყეპით გააქარაფეს გზა. ვაი იმას, ვინც დროით ვერ მოასწრო გაცლა-გაქცევა: მარჯვედ მოქნეული ჯოხი ან მათრახი უწვავდა ზურგის კანს.

ამავე დროს რამდენიმე ალაგს ზურნამ დაუკრა რააბი და ოეშარი. აჰა, მოედნის თავში გამოჩნდა ირანის დიდი მბრძანებელი, გადახდილ ოქროს ტახტრევანში მჯდომი; ორი წყვილი თეთრი არაბული რაშები ება მის ტახტრევანში, მას მოსდევდა დარახტული ბედაურებით ბრწყინვალე ამაღა. ხოლო დახურული ტახტრევნებით — ჰარემის ტურფანი. თეთრად მოსილი ხოჯებით გარემოცულნი. აქვე იყო შაჰის არიფი, ჩერქეზთ ბატონის ასული მშვენიერი ლეილა, უკვე დაქალბებული და კიდევ უფრო მშვენიერი.

გზადაგზა შაჰის დანახვაზე ხალხი ემხოზოდა მიწაზე და ამ სახით სალამს აძლევდა ირანის ბატონს.

მოედნის შუა ალაგას წამების ამბიონთან გადმოაბრძანეს ტახტრევნიდან მდიდრულად მორთული შაჰაბაზი და შეაბრძანეს იქვე გამართულ დიდ ჩარდახში, რომელიც შეემკოთ

ოქსინოს სალაფარდებით და მოეგოთ ქირმანის ხალხებით. დიდებით დააბრძანეს ძვირფასად მოოქვილ ოქროს სევანზე, აქედან ჩანდა მთელი მოედანი. ირანის ლომის ირგვლივ ხარისხის მიხედვით დასხდნენ შაჰის ამალის დიდებულნი, ხოლო შაჰის ზურგს უკან ძვირფასად მოგებულ გრძელ ტახტზე დასხდნენ ჰარემის ტურფანი პირსაბურავით და აბრეშუქის ფერად აჯიღებში ხვეულნი.

შაჰბაზს უკრთოდა გამხდარი სახე. მის მხერგტავ თვალეში გამოსკვივოდა ბრაზი და ბოროტება. კიდევ მცირე ხანი — და ხელმეორედ გაისმა ბუკის მქექარე ხმა, რასაც მოჰყვა ღორბოტოს უსიამოვნო კენესა.

ხალხი კვლად შეინძრა ჩოჩქოლით. გამოჩნდა შავცხენებზემბული თავახდილი შავი ტახტრევანი. მასზე იყო დაჩოქილი თეთრად მოსილი ქეთევან დედოფალი, საწამებლად გამზადებული. თავზე ეხურა მეფის გვირგვინი. მარჯვენა ხელში ეპყრა პატარა ჯვარი. შავი ნაწნავეები ჰკოცნიდნენ მიწას. ქართველ დედას ზეცად აღეპყრა თვალი ზენაარი სასოებით. მშვენიერ სახეზე კრთოდა ნათელი. მისი სპეტაკი სული განშორებოდა თითქოს სხეულს და ფოფინებდა ციურ ვთერში. დედოფლის მარჯვენით იყო დაჩოქილი ოლარმოსილი მისი მოძღვარი. იგი მხურვალე ცრემლით ავედრებდა თავის ღმერთს საწამებლად განწირულ ქართველ დედას...

ამ უჩვეულო სურათმა მთლიანად შეიპყრო ხალხი. ბევრს მათგანს აუჩუყა გული და აუცრემლა თვალები.

ნელი რონინით მიუახლოვდა წამების სისხლიან დაბირს შავი ტახტრევანი. გარს შემოერთყნენ მოლები. აქვე შექუჩდნენ ბედშავი ტყვე ქართველებიც. ამათ იწყეს თავში ცემა და მწარე ქეთინი. დედოფალი ჩამოსხეს ტახტრევანიდან და აიყვანეს წამების ამბიონზე. ამ დროს ქეთევანს მიუახლოვდა მოლების უფროსი. თეთრჩაღმიანი და. მიმართა ამ სიტყვებით:

— კახეთის დედოფალი! სრულიად ირანის და ერაყის მაღალი მბრძანებელი, სეებდნიერი ბრწყინვალე შაჰბაზ დიდი კვლავ გირჩევს უარყო ქრისტე და თავიანი სცე ჩვენს დიდ ფეჰამბარს მაჰმადს. ამით შეირჩენ სიცოცხლეს.

დიდებას, შაჰის უხვი წყალობით აღსავსე დაუბრუნდებ-
მშვენიერ კახეთს. და თუ არ ისურვებ მიიღო ეს მაღალგონივრული რჩევა, მაშინ, დედოფალო, მოგელის აქ, ამ ალაგას, უამრავი ხალხის წინაშე, წამებით სიკვდილი. გულით გირჩევთ კარგად გაზომო ყოველივე და მოგვეცე პასუხი. ალაჰმა უწყის, რომ არა გეწადს შენი სიკვდილი! ნუ გვაძლებ დავღვაროთ ამ მოედანზე შენი სისხლი.

— მტარვალნო და ქრისტიანეთა ტანჯვით უმაძღარნო! ჰქენით, რაც გწადდეთ! დიდება ამქვეყნიური ვერ შეცვლის ჩემს რწმენას და უსაზღვრო თაყვანებას ქრისტე მაცხოვრის მიმართ, რომელიც ეწამა ჯვარსა ზედა ადამის მოღვათა სახსნელად და საუკუნო ცხოვრების მისანიკებლად სასუფეველსა შინა. ღვთისმშობლის წილხდომილ ივერს და წმ. ნინოს ქადაგებით ნათელღებულ ერსა ჯვაროსანს არა ეშინის სიკვდილისა თავის ღმერთის სადიდებლად. არ ვუფრთხიარვამა ქვეყნიურ სიკვდილსა არცა ჩვენ, ქართველი დედანი. რამეთუ გვამხნევებს წმ. ნინო კაბადოკიელი ვაზის ჯვრით ხელში... უსჯულონო! თქვენ ააოხრეთ მთელი კახეთი! გაულიტეთ და ტყვედ წარიტაცეთ საბილწად უამრავი ხალხი ქრისტიანენი! თქვენ აწამეთ ჩემს თვალწინ ორი უმანკო ბავშვი, — მეფე თეიმურაზის ვაჟნი. თქვენ მოჰკალით ლუარსაბ მეფე! რაღაი ვარ ამათ შემდეგ მე უბედური?! აჰა, მომკალით მეცა! მიმეცით ჯალათს, რათა დასტკბეს ჩემის წამებით შაჰაბაზ მტარვალი! დეე ვეწაჰო მ.ც. უღირსი მხვეალი ღვთისა და ასული მუსლიმთა მიერ წამებულ ივერიისა, ვითარცა ერთი ხიმსალი იმ ზღვა უმანკო სისხლისა. რაც გაწევთ კისრად. ხოლო ცისა და ქვეყნის გამჩენი ღმერთი არ შეგარჩინთ ამ ბოროტებას და უზენაესა მფარველი ივერიისა მოავლენს თქვენსა თავსა ზედა რისხვას საშინელს!

უპასუხა დამშვიდებით დედოფალმა და კვლავ აღაპყრა თვალნი ზეცად. მისი ბავენი ძლივ გასაგონად გალობდნენ ფსალმუნს...

ამ დროს მოედნის თავში შეიქნა ხმაური და დიდი ჩოჩქოლი. ასამდე ცხენოსანმა გააპო ხალხი და მიუახლოვდა

წამების დაბირს. აქ გადმოხტნენ ყველანი ოფლით გაღვარულ ბელაურთაგან, თაყვანი სცეს ჯალათის გვერდით მდგარ კახეთის დედოფალს, შემდეგ მიუახლოვდნენ სამეფო ჩარდახს და მოიყარეს ცალი მუხლი შაჰის წინაშე.

ესენი იყვნენ დიდი მოურავი და მისი ქართველნი; ამის გვიან გაეგოთ შაჰაბაზის განაჩენი ქეთევან დედოფლის წამების შესახებ და გამოეშურნენ იმის სახსნელად.

— დიდებულო შაჰო! — დაიწყო სააკაქემ, — შენთვის და დიდი ერანისათვის თავგანწირული ასი ქართველი, რომლებმაც ვლვარეთ სისხლი შენი ძლევაშოსილი დროშის განსადიდებლად შორეულ აზიაში, მუხლმოდრეკით გენუკვით დააცხრო შენი რისხვა და შეიწყნარო ეს სათნო ადამიანი! გვედრებით გვაჩუქო სიცოცხლე ქართველი დედის ქეთევან დედოფლისა! მას შენს წინაშე არ მიუძღვის რაიმე ბრალი...

წარმოსთქვა ხმამალა ეს სიტყვები დიდმა მოურავმა და შეხედა მტკიცედ შაჰაბაზს.

ძლიერ იმოქმედა შაჰზე ქართველთა უეცარმა მოსვლამ და მხურვალე ვედრებამ. უკვე მზად იყო იგი დაეცხრო გულის წყრომა და გაეცა პატიების ბრძანება, როს მიუახლოვდა ყვითელაბრეშუმჩადრმოხვეული დიაცი, შურისძიებით აღბორგებული, დაიჩოქა შაჰის წინაშე, ასწია ოღნავ პირსაბურავი და მიმართა ამ სიტყვებით:

— „დიდებულო შაჰო! გაფიცებ შენს პირველ სიყვარულს, არ გახდე გულსუსტი და არ შესცვალო შენი ბრძანება! აქ, შირაზის მოედანზე, უნდა მოკვდეს წამებით დიდი ერანის საკეთილდღეოდ დედოფალი ივერიისა ქეთევან. ქრისტეს თაყვანისმცემელი და დიდი ფეჰამბარის უარმყოფელი. მთელი სპარსეთი შენ შემოგყურებს, დიდო ბატონო, და სწყურის გურჯი ხანუმის წამების ხილვა. ნუ დაუხშობ მას ამ უზენაეს სიამოვნებას! ნუ დაივიწყებ, დიდებულო შაჰო, რა ჩაიღინა ქეთევანმა შენ მიერ კახეთში გაგზავნილ კონსტანტინეს მიმართ, რარიგ ჩაფუშა შენი გეგმები! თქვა ეს დიაცმა და ბრაზით გადაიხედა ცალ მუხლზე დარჩილ დიდ მოურავს, რომლის თვალებში კრთოდა ცრემლები.

მაშინ წამოდგა შაჰაბაზ, ცალი ხელი მოხვია თავის მშვენიერ არიფს და დასვა ტახტზე, ხოლო მეორე ხელით მისცა ნიშანი...

გადაწყდა ქეთევან დედოფლის ბედი... დიდბუნებოვანი ქართველი დედა გადასცეს ჯალათს...

ამ სახით იძია შური ჩერქეზთ ასულმა. უსაზღვრო იყო ამ წუთას მისი სიხარული. ლეილამ დაინახა ცრემლი მოურავის თვალებში და სახეზე უზომო გამწარება. ეს საკმაო იყო: დაცხრა მისი მბორგავი სული... ხოლო ველარ გაუძლო დიაცის თვალებმა ივერთ დედოფლის წამების ცქერას. შეიპყრო იგი სინიდისის უსაზღვრო ქენჯნამ. შაჰის არიფმა ამოიღო ბეჭდის თვალიდან მგესლავი შხამი, რასაც მუდმივად თან ატარებდა, და შეისრუტა მთლიანად ლალის ბაგენით. მცირე ხანს შემდეგ შეჰკივლა ცივად, გაიზმორა უცნაურად და დაეცა მკვდარი...

არ ავწერ აქ იმ საშინელებას და უმაგალითო წამებას, რაც მიაყენეს ბარბაროსებმა ივერიის დიდებულ ასულს!.. ამ საზარელ სურათს მზერდნენ რომის პატრები და იღვრებოდნენ ცრემლად. ამ საშინელი სურათის ხილვით მწარედ გოდებდნენ იქ დამსწრე ქართველნი. ეს საზარო სურათი ბადებდა მათ გულში მტარვალთადმი უსაზღვრო ბრახს და შურისძიებას. ამ სურათის მოწმე იყო დიდი მოურავი. ის იდგა მცირე მოშორებით მუნჯად გარინდული, როგორც კლდის ქანდაკი. ვინ უწყის, თუ რა საშინელი ბოღმა ქუხდა იმ დროს მის გულში...

კათოლიკე ბერებმა დროებით დაასვენეს თავის ეკლესიაში ქეთევან წამებულის ნეშტი, შემდეგ-კი გაუგზავნეს იგი მეფე თეიმურაზს. დიდებით დაკრძალეს დედოფალი ალავერდის დიდ ტაძარში. ორმოც დღეს იყო გლოვა და ცრემლთა დენა მთელ კახეთსა და ქართლში.

XXII. საიღუმლო თათბირი

ჩაიდინა რა შაჰაბაზმა ზედიზედ ეს საზარო საქმენი თეიმურაზის დედის, ვაყებისა და ლუარსაბის მიმართ, მისი არსება შეიპყრო კიდევ უარესმა ფიქრმა: მან გადაწყვიტა მთელი ქართლ-კახეთის სრული მოსპობა. პირსისხლიან მხეცს, ამავე დროს კახეთიდან მოსდიოდა არასანუგეშო მშებრი: მისგან მოსპობილი ქვეყანა კვლავ ახლდებოდა. მთებში გახიზნული ხალხი ბრუნდებოდა ბარად და საოცარი მზნეობით აშენებდა განადგურებულ სოფელ-ქალაქებს, ქმნიდა ახალ ცხოვრებას; კახეთის ხალხი საარაკო სისწრაფით მრავლდებოდა და უმკლავდებოდა ფეიქარ-ხანის ჯარებს.

ქართლიდან კიდევ უარესი ცნობები მოსდიოდა შაჰს. იქ იყო გამეფებული რბევა და კინკლაობა დიდ მებატონეთა შორის, სეავეთა ნამდვილი თარეში. მოკვდა ქართლის მეფედ დაყენებული ბაგრატ-მირზა. ყეინმა მეფედ დანიშნა ბაგრატის ვაჟი სვიმონ, სუსტი, უნიჭო და სრულიად გამოუცდელი ჭაბუკი. მასვე დაუყენა სამეფოს გამგედ და მზრუნველად, გიორგი სააკაძე, რომელიც არავითარ ყურადღებას არ აქცევდა ქართლის საქმეებს, პირიქით, დიდი მოურავე განგებ ხელს უწყობდა არეულობას, რადგან ამით სურდა დაემტკიცებინა შაჰისტვის სვიმონ მეფის უნიჭობა და უყარგისობა. სააკაძეს უკვე ჰყავდა არჩეული ირანში ქართლის მეფედ შესანიშნავი კაცი — ხოსრო მირზა ბაგრატიონი, დი-

დი სვიმონ მეფის ძმისწული. მაგრამ ყეინი განგებ არ აღევდა მას ქართლის მეფობას, რადგან იცოდა, რომ მის ხელში ქართლი შესამჩნევად გაძლიერდებოდა, ეს კი სრულებით არ შედიოდა შაჰაბაზის გეგმებში. ამ მიზეზებმა ირანის შაჰი მიიყვანა იმ დასკვნამდე, რომ უნდა მოესრა მთლიანად კახეთი, აეყარა ქართლის მცხოვრებნი და გადაესახლებინა ირანში. იგი შეუდგა მზადებას. ამავე დროს მან მოახდინა დიდი სამხედრო თათბირი.

დიდებული სასახლე. შაჰის დარბაზში გაუმართავთ საიდუმლო თათბირი. შუაგულ ალაგას ოქროს სევანზე ზის შაჰაბაზი. ირგვლივ ტახტებზე უსხედან ვეზირნი, ემირნი, ხანები და სხვა დიდებულნი: ყორჩიბაში, ყორჩიხანი, ამირგურიხანი, შაბადახანი, ქუჩუქხანი და სხვანი. აქვეა სამი ქართველი დიდებული: დიდი მოურავი გიორგი სააკაძე, ხოსრო მირზა ბაგრატიონი და ზურაბ ერისთავი.

ყველას სახეზე იხატება სიღინჯე და ღრმა ჩაფიქრება. დუმდა შაჰაბაზი და დუმდნენ ყველანი. აშკარად ხვდებოდნენ, რომ ირანის ბატონმა შეკრიბა ისინი რაღაც დიდ საქმეზე, რაც უნდა ყოფილიყო დაცული ფრიად საიდუმლოდ. ყველანი კრძალვით მისჩერებოდნენ ირანის ბატონს და ელოდნენ მისგან რაღაც დიდი საიდუმლოს გამჟღავნებას.

აჰა, სამარის ღუმელი დაარღვია ირანის ბატონმა, მან გადახედა კრებულს თავის მხვრეტი თვალებით, ჩაახველა წყნარად და დაიწყო:

— დიდებულნო! ჩემო ერთგულნო ვეზირნო და ჩემი სახელმწიფოს ჰერქვეშ შეფარებულნო სახელგანთქმულნო გურჯნო! მოგიწვიეთ აქ ყველანი, რათა გაუწყოთ ჩემი საიდუმლო ზრახვანი და მოვისმინო თქვენი აზრი. ყველამ კარგად უწყით, რომ ყოველ ღონეს ეხმარობდი ამ 18 წლის მანძილზე, რათა დამეახლოვებინა ქართლ-კახეთის მეფენი და გამეხადა ჩვენი ერთგულნი. დიდმა ალაჰმა ოწყის, რომ გულით ვცდილობდი გამენასკვა ჩემსა და მათ შორის უახლოესი, მეგობრულ-ნათესაური კავშირი, რა მიზნითაც ამ ათი წლის წინათ შევირთე ცოლად ლუარსაბისა და თეიმუ-

წახის დები, ხოლო ვერავითარი დაყვავებით და დაპირება-
ჟეშკაშებით ვერ მოვიგე ამ ორი მეფის გული. ისინი დაუ-
ბამს ეშმაკის ბადეს, გაუშვერიათ ხელი ჩრდილოეთით და
დაყინებით ემუდარებიათ რუს ხელმწიფეს მფარველო-
ბას, რასაც ადვილად ვიგებთ აეშაგთა მეოხებით, რომლო-
ბიც საკმაოდ გვყავს მოსკოვისა და ივერთ მეფეთა კარზე.
ჩვენდა საუბედუროდ, დარუბანდს გარდა, კავკასიონის
გრძელი ქედის ყველა გადმოსასვლელი ყელი, ანუ ხე-
ულელტეხილნი ხელთ უპყრიათ გურჯისტანის სამეფოებს,
ამერეთსა და ქართლ-კახეთს, რომლებიც ვედრებით ეპა-
ტიუებიან ბატონ-მფარველად ურუსებს და ფართოდ უღებენ
კავკასიონზე გადმოსასვლელ კარებს...

აქ შეჩერდა ირანის ბრძანებელი, შესვა ბროლის ფიალით
კივი შერბეთი და გადახედა კრებულს, რომელიც მისჩერე-
ბოდა შაჰს და ნთქავდა მის თითოეულ სიტყვას. მკირე
ზნით გამეფდა ისევ სამარის ღუმელი.

ამ დროს ფრთხილად გაიღო კარი და დარბაზში შემოვი-
და ეჯობთ ემირი. — რა ამბავია, ჰუსეინ? — შეეკითხა წყრო-
შით და წარბებმოღუშვით ირანის ბატონი.

— ირანის დიდო მნათობო! ბედავს და ჰკადრებს უკანა-
ტკნელი მონა ურუსთა ელჩების ხლებას. ესეცაა ჩამოვიდნენ
მოსკოვიდან და ისწრაფიან შენს ხილვას, აზიის მზეო, —
უთხრა ჰუსეინმა მძიმედ, თავდახრით, და ხმის ცახცახთ.

რუს ხელმწიფის ელჩთა ხსენებაზე სიბრაზით აენტო თვა-
ლები შაჰს, მაგრამ მალე შეიკავა თავი ცბიერმა ყიზილბაშ-
მა და ბრძანა მათი შემოყვანა.

ფართოდ გაიღო დარბაზის კარები და პატივით შემოიყვა-
ნეს სამი ზორბა აღნაგობის კაცი, ოქრომკედლითა და ბუზ-
მენტებით შემკულ გრძელ ხალათებში მოსილნი. მათ წი-
თურ სახეს ამკობდა ქერა თმა და გრძელი წვერი; ესენი
აყვნენ მოსკოვის ხელმწიფის ელჩნი. ამათ თაყვანი სცეს
შაჰს და მიართვეს პატაკი. შაჰბაზი წამოდგა მათ პატივისა-
ცემად და მოიკითხა რუსეთის დიდი ხელმწიფე. მოსკოვის
ელჩებს თარჯიმნად ახლდათ ასტრახანელი სომეხი გეურქ
ხითარიანცი, რომელმაც საკმაოდ იცოდა ორივე ენა, რუსუ-

ლი და ირანული. ამიტომ თარჯიმნობდა გასაგებად. ამანვე წაიკითხა აღნიშნული უსტარი. რუსეთის ხელმწიფე სწერდა შაჰაბაზს შემდეგს:

— მე, დიდი ხელმწიფე და მბრძანებელი სრულიად რუსეთისა, ჩრდილო ქვეყნებისა, დიდი ციმბირისა და მრავალთ სამთავროთა, მიხეილ თედორეს-ძე, გწერ და გატყობინებ შენ, სპარსეთის ყეინს შაჰაბაზს, შენდევს: ადრევე გაუწყეთ, რომ ქართლ-კახეთის მეფენი და სრულიად ქრისტიანე ერი ივერიისა ბორის გოდუნოვის დროიდან შემოვიდნენ მოსკოვის სახელმწიფოს საფარველ ქვეშ და ამჟამად ითვლებიან ჩვენს ქვეშევრდომად. ამ ოთხი წლის წინათ ირანის ჯარები შეესივნენ კახეთის სამეფოს და დაარბიეს საშინლად, გაელიტეს და დაატყვევეს უამრავი ხალხი. ამასთანავე, როგორც მატყობინებ ჩემი ქვეშევრდომი კახეთის მეფე თეიმურაზი, კიდევ ადრე ვაგიტყუებია მისი დედა და ვაჟები, აგრეთვე ქართლის მეფე ლუარსაბი. ესლა ვიმედობ. რომ არ დაარღვევ კეთილ მეზობლობას, რაც სუფევს ჩვენს ორთავ სახელმწიფოს შორის, და ამ უსტარის მიღებისთანავე განათავისუფლებთ და პატივით დააბრუნებთ თავ-თავის ქვეყნებში ლუარსაბ მეფესა და თეიმურაზ მეფის, დედასა და ვაჟებს“.

ამ უსტარის კითხვის დროს ირანის ყეინს საშინელი სიბრაზის გამო ეცვლებოდა ფერი, იგი ხან წითლდებოდა და ხან ყვითლდებოდა, მაგრამ თავს იკავებდა. მან ყიზილბაშური ცბიერებითა და მოქარგული ენით მოხიბლა რუსეთის ელჩები და თითქო დაარწმუნა თავის სიმართლეში. უხვად დასაჩუქრა მდიდრული ხალათებითა და თვალმარგალიტით. აღუთქვა, რომ დღესვე დაამზადებს უსტარს რუსეთის დიდ ხელმწიფისადმი და ეცდება შეასრულოს ყოველი მისი თხოვნა. ამავ დროს უბრძანა ეჯიბთა ამირს უხვად გამასპინძლებოდა რუსეთის ელჩებს, თანაც ჩასჩურჩულა ყურში დაეთრო ისინი მაგრად და დაეცდინა მათთვის ყოველგვარი ფარული ზრახვა და საიდუმლო.

ჰუსეინმა გაიყვანა მოსკოვის ელჩნი.

კარები ჩაკეტა შიგნიდან და განახლდა საიდუმლო თათბირი.

— ხომ ნახეთ, ერანის დიდებულნო, ჩრდილოეთის მეფის ქედმაღლობა! — დაიწყო შაჰაბაზმა ბრაზით სავსე თვალებით და კბილების ღრქენით, — ხომ ხედავთ, რომ არ ხუმრობენ, ივერიას გვედავებიან, სწაღიათ ეს გემრიელი ლუკმა ჩაიგდონ ხელში, ფეხი მოიდგან კავკასიონის ქელის გადმომღმით. ნათლად ვმხერ ამ ფარულ ზრახვებს... მაგრამ ვერა, ვერ მიაღწევენ მიზანს! უმჯობეს არს გაწყდეს სრულიად მთელი ივერი, ვინემ ვიხილოთ ჩვენს მეზობლად მოდგმა ურუსებისა! — წამოიძახა შაჰმა საშინელი ბრაზით და გადახედა კრებას. დიდებულებმა ვერ გაუძლეს ამ უცნაურ მზერას და ჩაღუნეს თავი.

— რას იტყვით თქვენა, ერანის დიდებულნო — შეეკითხა მათ ყვინი.

— ჩვენ რა გვეთქმის, აზიის მნათობო! ვითარ გავბედავი და გკადრებთ რასმეს შენი ფეხის მტვერნი და უკანასკნელი ყულნი, ერანის ძლიერო ლომო! შენ უკეთ იცი ყველფერი, ბრძენთა-ბრძენო და ქვეყნის დიდო მბრძანებელო! გენებოს გაულიტე მთელი ივერი, გენებოს — აჰყარე და მთლიანად გადმოსახლე აქ, მათ ნაცვლად კი სპარსნი დაასახლე, — წარმოსთქვა ფრიალ მოწიწებით, წელამდე მოხრით და გულზე ხელდაკრეფით თვით შაჰის სიძემ მთავარმა ვეზირმა ყორჩიბაშმა.

— კარგად სთქვი შენა, ჩემო ყორჩიბაშ! ივერნი უნდა აეყაროთ და გადმოვასახლოთ ერანში, ხოლო მათ ნაცვლად უნდა დაეასახლოთ იმ მშვენიერ ალაგებში სპარსნი და მეტადრე ადერბაიჯანის თათრები. ამ სახით კავკასიონის ქედის ყველა გადმოსასვლელი ყელი, გარდა ვოლხეთში მდებარე მამისონისა, უნდა ვიპყროთ ხელთა და მათ გუშაგებად ვიყოლიოთ ჩვენი ერთგული ხალხი. ხოლო ივერიის მცხოვრებთა ერთი ნაწილი, კახეთის მკვიდრი, უნდა გავვლიტოთ მთლიანად და ამით ვიძიოთ შური ვერაგ და მუხანათ თეიმურაზ მეფეზე. მამ ნუღარ ვაყოვნებთ! ახლავე შევუდგეთ თადარიგს და დიდი ლაშქრით შევესიოთ ივერიის ორ-

თავ სამეფოს სამი მხრიდან. დავცეთ მათ თავზე რისხვა ზეცისა! აბა ვნახოთ, რა რიგ მოეშველებიან მათ ახალი მფარველნი!

შაჰაბაზის ასეთ სატანურ განზრახვაზე დიდმა მოურავმა ფრთხილად გადახედა ზურაბ ერისთავს, რომელიც ისე მისჩერებოდა ირანის მბრძანებელს, თითქო ნთქავდა მის მიერ წარმოთქმულ სიტყვებს.

ეს ოდნავი გადახედვა არ დარჩა შეუნიშნავი ცბიერ ყვინს. მან მიაპყრო თვალნი ივერიის გმირს და დინჯად შეეკითხა.

— აბა, შენ რაღას გვირჩევ?

გიორგი სააკაძე შეაკრთო ამ მოულოდნელმა შეკითხვამ. იგი წამოდგა დინჯად, გადახედა კრებას, შემდეგ მიაპყრო თვალნი შაჰაბაზს და დაიწყო:

— აზიის ბრწყინვალე მნათობო! უსაზღვროა შენი სიბრძნე და უწოდომელი შენი ზრახვანი. მოსკოვის სამეფო ხელთ იგდებს პატარა ივერს, აჰა, სავალალოდ კარებს უღებენ მათ და გზას აძლევენ ქართლ-კახეთის მეფენი. მათ არ უწყიან, თუ რა ხიფათს, რა საშინელ განსაცდელს უმზადებენ ამ მოქმედებით თავის ერს... სწორედ ამის გამო უნდა ემსხვერპლოს პატარა ქვეყანა დიდ სახელმწიფოს! დიახ, უნდა მოისპოს მთელი ივერი დიდი ერანის და სრულიად აზიის საკეთილდღეოდ! მაგრამ როგორ? ივერიაში ჯარების შესევით ჩვენ ვერ მივალწევთ სასურველ მიზანს. ქართველებს არ დავიწყებიათ შენ მიერ კახეთის აოხრება. ამიტომ როგორც კი სცნობენ აქედან ჯარების დაძვრას, მაშინვე გახიზნვენ მთებში ცოლშვილს, დაიჭერენ ციხეებს და გაამაგრებენ შესავალ გზებს. მოხდება დიდი ბრძოლანი, დაიღვრება უზომო სისხლი და მიზანს მაინც ვერ მივალწევთ. ამის საუკეთესო მაგალითი გახლავთ თვით კახეთი, რომელსაც ემსხვერპლა იმოდენა სპარსთა ჯარები. ვფიქრობ, ბევრად აჯობებს, რომ ვეჩვენოთ ივერიას მეგობრის სახით, ნელინელ ოსტატობით შევიყვანოთ ჯარები ქართლ-კახეთში, დავიკავოთ სხვადასხვა ხერხით ციხე-სიმაგრენი და სამალავი ადგილების გზები, რათა ამრიგად მოვამწყვდიოთ შუაში ქართველი ხალხი, მოუესპოთ მათ გაქცევა-დაძაღვის სახსა-

რი. მაშინ ივერთა მთლიანად მოსრა, ან აყრა და გადასახლება ფრად აღვილი საქმეა... მოგახსენებ, დიდო ყეინო, რომ აი ამ მიზნების მისაღწევად საჭიროა ქართლის ნორჩ მეფე სვიმონს ცოლად შეერთოთ თვით შენი შვილიშვილი, ყორჩიბაშის ასული, და თან დიდი ჯარიც გავაყოლოთ, ვითომდა მაყრად, თანაც გავატანოთ ბლომად ფეშქაშები ივერთა დიდებულთათვის. ამით აღვილად მოტყუვდება ქართლ-ქახეთი. ეგონებათ, რომ შენ მოყვრობა გწადის მათი და არა მტრობა. მცირე ხანს შემდეგ გავგზავნოთ კიდეც ჯარები, ვითომდა მისალოცად. ამის შემდეგ კიდეც წავლენ ჯარები დიდი ფეშქაშებით, ისევ მილოცვის მიზნით: გაიმართება საყოველთაო ლხინი და ქეიფი. იმავე დროს ჩვენი ჯარები თანდათან მოახდენენ ივერიაში სამხედრო აღლუმებს, დაიჭერენ გასაქცევ გზებს, ჩადგებიან. ციხეებში და შეუმჩნევლად მოამწყვდევენ შუაში მთელ მცხოვრებთ ცოლ-შვილიანად. ამის შემდეგ ივერიის ბედი ხელთ გეკავება, დიდო მეუფევი! გენებება — მოსპობ მთლიანად, გენებება — აპყრი და გადასახლებ, სადაც გწადია...

ეს იყო სწორედ ჯოჯოხეთური გეგმა. ამ გეგმას იძლეოდა თვით დიდი ივერიელი, შაჰაბაზის უერთგულესი მეგობარი და ირანის მტერთა დამლეწი. ალტაცებაში მოიყვანა ამ სატანურმა გეგმამ ყველა დამსწრე და განსაკუთრებით შაჰაბაზი. შაჰი გადაეხვია სააკაძეს, ჩაიკრა გულში, ეამბორა შუბლზე და მიუბოძა ჯილდოდ უამრავი ლარი და ქონება. დიდი მოურავის ასეთმა ერთგულებამ უსაზღვროთ მოხიბლა იგი.

შაჰაბაზმა გამართა იმ დღეს საზეიმო ლხინი, უხვად დაასაჩუქრა ლატაკნი და ქვრივ-ობოლნი ამ დიდებულ თათბირის აღსანიშნავად, მეორე დღეს კი გასცა სათანადო ბრძანება. ყოველივე შესრულდა იმ გეგმით, რაც მისცა სააკაძემ. დაიბარეს ქართლიდან სვიმონ მეფე, შერთეს ცოლად ყორჩიბაშის ქალი, გადიხადეს სანაქებო ქორწილი და დიდის პატივით გაისტუმრეს ივერიაში, თან გააყოლეს, ვითომდა მაყრად, დიდი ჯარი, უამრავი ჯილდო-ფეშქაშებით ქართლელ დიდებულთათვის. შემდეგ ყოველ ორ კვირაში მიდიო-

დნენ ქართლში ფეშკაშებით, თითქო მისალოცად, ირანის ჯარები საუკეთესო სარდლების ბელადობით. ამ მიმყოლ ჯარებს შაჰმა სარდლად და მრჩეველად დაუნიშნა თვით დიდი მოურავი გიორგი სააკაძე, რომლის უფროსი ვაჟი პაატა დაიტოვა მძევლად ყოველი შემთხვევისათვის. ამავე მიზნით დაიტოვა მძევლად მეუღლე ზურაბ ერისთავისა, რომელიც შაჰის ბრძანებით თან გაჰყვა ირანის ჯარს ერთ-ერთ სარდლად. შაჰბაზი ფრიად აფასებდა დიდ მოურავთან ერთად მისი ცოლისძმის, ზურაბ ერისთავის, სამხედრო ნიჭსა და ერთგულბას.

მართლაც უზომოდ მოტყუედნენ ივერნი, ისინი მოხიბლა და დააბრმავა შაჰბაზის დამოყვრებამ და ჯილდო-ფეშკაშებმა. ირანის ჯარებმა ქართლ-კახეთის მრავალ კუთხეში გამართეს სამხედრო აღლუმნი და ამ ოსტატობით დაიკავეს ხელში ქართველების ციხენი და სახიზნი გზები. ამრიგად ქართველი ხალხი მოემწყვდა შუაში. — ირანის ჯარები რგოლივით შემოერთყნენ მთელ ივერს.

ახლა-კი მიხედნენ ქართველნი თავის საბედისწერო შეცდომას. მიხედნენ, რომ ეს ოინები — ლხინი, ქორწილი, ფეშკაშები და აღლუმები -- თურმე მათ დასაღუპავად იყო მოწყობილი. ზარდაცემული ხალხი თავის ცოლშვილით ეცა სამალავ გზებს. მაგრამ ყველა გზა ხელთ ეკავათ მტრებს... ახლა უსაზღვრო ელდამ მოიცუა მთელი ივერი. იგი აშკარად მზერდა თავის აღსასრულს, მზერდა მის ქედზე აღმართულ ირანის ულმობელ მახვილს...

— ან გამარჯვება აურაცხელ მტერზე, ან გმირული სიკვდილი მახვილით ხელში! — აი ის აზრი, რამაც გაიელვა ქართველის გონებაში. აბობოქრდა მუსლიმთა მღელვარე ზღვა. მისი შავი ზვირთები, ქურდულად შემოჭრილნი, ირგვლივ შემოერთყნენ და შთანთქმას უპირებდნენ მთელ ივერიას...



XXIII. შეთქმულება

1623 წლის თებერვლის დამდეგს მთელი ივერი აივსო ირანის ჯარებით. მათ უკვე ხელთ ეპყრათ ყველა ციხესიმაგრე და სამალავი გზები. ამ დროს კახეთი იყო თითქმის მთლიანად განადგურებული: შიგ თავისუფლად თარეშობდნენ ირანელნი ფეიქარხანის თაოსნობით და აწიოკებდნენ უპატრონო ხალხს. უკეთეს სურათს არ წარმოადგენდა ქართლიც, მას ძირს უთხრიდნენ შინა მტრები... უმეფობამ წახსნა ლაგამი მსხვილ თავადებს, ისინი მშვიერი მგლებივით დაესიენ ხალხს და ერთმანეთს. გამდიდრება-განდიდების მადა-სურვილი უზენაეს წერტილზე ავიდა. ისინი ესხმოდნენ ერთიმეორეს თავისი დაგეშულ მოთარეშე რაზმებით, ართმევდნენ ყმასა და მამულს, იტაცებდნენ ლამაზ ქალ-ვაჟებს ირან-თურქეთში გასაყიდად, უხვად ღვრიდნენ მოძმეთა სისხლს. ისინი არ უღებდნენ თავს შაჰის მიერ დადგენილ ბაგრატოვანთა გვარის მაჰმადიან მეფეებს და თარეშობდნენ დაუსჯელად.

ასეთ ვაებასა და ანარქიას განიცდიდა ქართლი და კახეთი, როცა თავს დაატყდათ საშინელი რისხვა. ისინი მიხვდნენ, რომ დადგა მათი დალუპვის უამი, რომ უნდა გაწყდნენ მთლიანად და აღიგაონ ქვეყნის პირიდან. ეს იყო ენით უთქმელი, საბედისწერო მოვლენა, რომლის მსგავსი ბედშავ ქართველ ერს არ განუცდია თავის ტრაგიზმით სავსე ისტორიაში.

სალამო უამია. თებერვლის ჩამავალი მზე ციაცი სხივებით ემშვიდობება მცხეთის მთა-გორაკებს. თეთრი სასახლის დერეფანში ნოხით მოგებულ სკამლოგინზე ზის მოხუცი ბერი და ჭმუნვარე სახით გასცქერის იქ, სადაც ცელქი არაგვი უერთებს თავის ლურჯ-კამკამა ზვირთებს გულამღვრეულ მტკვარს. იქვე ამართულა გოროზად სვეტიცხოველის დიდებული ტაძარი, მკერდზე ეფინება მოხუცს პატრიარქის სპეტაკი წვერი. დიდებულ სახეს აშუქებს სიბრძნე-სათნოების შარავანდელი. ეს არის ივერიის კათალიკოსი ზაქარია, ქვეყნის მოყვარე და ხალხის ერთგული. მსხვილი გიშრის კრიალოსანი გაყინვია ხელებში. მოხუცი ჩაფლულა ღრმა ფიქრებში. ამ ღროს გაისმა ოდნავ კარის ჭრიალი და ოთახიდან გამოვიდა ზორბა აღნაგობის ჭარმაგი ბერი. ეს იყო წილკნელი ეპისკოპოსი. კარის ხმაურზე შეკრთა მოხუცი.

— ოჰ, შენა ხარ, მურმანოზ? დაჯექი ჩემს გვერდით, — შეეხმაურა დაბალი ხმით კათალიკოსი. — როგორ მოგწონს ამოდენა ჯარების შემოსევა ივერიაში? ვითომც მართლა მოყვრობას გვიპირებს კახეთის გამელეტი მტარვალი შაჰაბაზი, თუ მოსპობას გვიქადის? არ მჯერა მისი კეთილი ზრახვანი ჩვენდა მიმართ, რაღაც ცუდად გმინავს ჩემი გული. ხომ ხედავ, ციხე-სიმაგრენი სულ ხელში ჩაიგდეს და მთებში განიზნვის საშუალებაც კი მოუსპეს ბედშავ ხალხსა.

— ეჰ, ბატონო ჩემო, რაღა ექვებია საჭირო, სულ აშკარაა ყველაფერი. ერანის ბრძანებელი აღბორგებულა საშინელი შურისძიებით ქართლოსანთა მიმართ და განადგურებას უქადის უბედურ ივერიას.

— სრულ ჭეშმარიტებას დაღადებენ შენი ბაგენი, ჩემო მურმანოზ. შაჰაბაზმა ამ მიზნით მოსრა კახეთი და ახლა ამასვე უქადის ქართლსაც, ამიტომაც მოგვევლინა იგი ასე მოხერხებით, მოყვრის ნიღაბით; აჰა, სისხლდაუღვრელად ჩაიგდო ხელში მთელი ქართლი, თავისი ჯარებით ალყა შემოარტყა მას, შეზღუდა მაგარი სალტეებით. ახლა კი ან გაულეტს მთლიანად, ანდა დედიან-ბუდიანად მოაბნევს ერანში, ხოლო მათ ნაცვლად ამ ჩვენს ქვეყანაში დაასახლებს რან-შირვანის თათრებს, განა ამასვე არ სჩადის კახეთში?!

— მართალი ბრძანებაა, დიდო მეუფევე, და მალე ჩვენი ტაძრები შეიკვლება ჯამეებად, მაღალ სამრეკლოთაგან ზარების ნაცვლად გაისმის მოლას უშნო ყივილი, ხოლო წმინდა სახარების ადგილს დაიჭერს მუსლიმთა ყურანი...

— ნუთუ მართლა ასე მოხდება, მურმანოზ?! — წამოიძახა გამწარებით კათალიკოსმა და წამოიჭრა ზეზე. — რაღაც არ მჯერა, არა! მაღალი ღმერთი ასე არ გასწირავს ერის ქრისტიანს! წმინდა ქალწული არ გაიმეტებს თავის წილხდომილ ივერიას! წმინდა ნინო ვაზის ჯვრით ხელში წინ აღუდგება მის მიერ განათლებული ერის ურჯულო მტერთა და ძლიერი წმინდა გიორგი ძახვილით ხელში გულსა გაუპოვს შავსა გველეშაპს, რომელიც გარს მოვლებია ჩასანთქავად მის საქართველოს...

— უფალმა გისმინოს, დიდო მეუფევე! გისმინოს ცისა და ქვეყნის გამჩენმა ღმერთმა! მეც არა მჯერა, რომ ასე გაოხრდეს რიცხვით მცირე, ხოლო სულით ძლიერი ჯვაროსანი ერი, რომელმაც საუკუნეთა სრბოლაში გაუძლო ისტორიულ გრიგალს, უამრავ გასაჭირს, მუსლიმთა ბნელ ტალღებს და მოვიდა დღემდე ცოცხალი, სულით ძლიერი... ხოლო რად ინება ღმერთმა ტურფა კახეთის ასე უწყალო აოხრება?! განა რა ბრალი მიუძღოდა მის წინაშე უმწეო ხალხსა?!

— ნუ ჰგმობ უფალსა, მურმანოზ ჩემო! მაღალი ღმერთის ფარულ ზრახვებს ვერ მიწვდება მომაკვდავის სუსტი გონება. მწამს, რომ ამ საშინელ გასაჭირის უამს გამოჩნდება ჩვენთვის რაიმე ნუგეში, ამასვე მამხელს ეს ჩემი გული, თუმცა ამავე დროს კვნესის და გმინავს.

ამ სიტყვებით კათალიკოსმა იწყო ნელი სიარული გრძელ დერეფანში და უნებლიედ აათამაშა ხელში გიშრის მარცვლები.

შელამდა. მწუხრი ზანტად უთმობდა ადგილს ღამის სიბნელეს. ამ დროს მოისმა მძიმე ფეხის ხმა და ჯოხის ნელი ბაკუნი. კვერთხით ხელში კიბეზე ამოვიდა მხრებში მოხრილი ვინმე მოხუცი ყარიბის შავი სამოსით. სარტყელს ჰკოცნიდა სიბერისაგან გაყვითლებული გრძელი წვერი. მოხუცმა მძიმედ დახარა თავი კათალიკოსის წინაშე, თავყანი სცა სული-

ერ მეუფეს, გამოსთხოვა შენდობა და მოწიწებით ეამბოროა მის მარჯვენას. ასევე მოექცა მურმანოზ წილკნელს. შემდეგ მიმოიხედა ირგვლივ ფრთხილად და მდუმარედ გაჩერდა კათალიკოსის წინაშე.

— „შენა ხარ, საბაჲ? ძლივს გიცან! საიდან მოხვედ? — შეეკითხა კათალიკოსი.

— მოველ შორეთით, მეუფევე, უცხო ქვეყნიდან, მომაქვს თქვენდამი კარგი ამბები, გასახარელი, — თქვა ეს მოხუცმა ფრიად ნელი ხმით და ისევ ფრთხილად მიმოიხედა.

— საიდუმლოა?

— ფრიად, დიღო მეუფევე! მასზე ჰკიდია ქვეყნის და ერის ბედი... გთხოვთ მიმიღოთ ფარულ სენაკში და იქ გაუწყებთ ყოველივეს. დია ვშიშობ. არავინ გვნახოს და არ მოგვაყუროს, აეშაგებით სავსე არის ჩვენი ქვეყანა.

— მურმანოზს შეუძლია ჩვენთან დარჩენა?

— დიახ, მეუფევე, ეგრე მიბრძანა.

კათალიკოსი დინჯად შეუძღვა ორთავეს თავის სენაკში, ანთო პაწია თაფლის სანთელი და გადარაზა კარები.

საბამ ფრთხილად მოხადა მორგეალო თავი კვერთხს, ამოიღო შიგნიდან ჯერ ბამბაში და შემდეგ ნარმაში გახვეული პატარა გრაგნილი და მიაწოდა კათალიკოსს. მან ძლივ გასაგონად წაიკითხა შემდეგი:

— ივერიის წმინდა მამას და კათალიკოსს თავდაბლად ესალმება და მის მარჯვენას მოწიწებით ეამბოროება მისი მარად ერთგული სულიერი შვილი „განი“. დიღო მეუფევე! კარგად უწყით, რა რისხეაც დაატყდა უბედურ კახეთს ამ ხუთი წლის წინათ. ამასვე უქადის ახლა ქართლსაც დიდი მტარვალი. ხომ ხედავთ, რა ცბიერად შემოაპარა მანდ უამრავი ლაშქარი, ხელთ იგდო ციხე-სიმაგრენი და გასახიზნი გზები. ხალხს მოესპო მთებში გაქცევის საშუალება. ამ სახით მთელ სამეფოს შემოერთყა გველეშაპივით და შუაში მოამწყვდია უმწუო ხალხი. გაამხნევეთ ხალხი, წმ. მეუფევე. ნუ გეშინით! თქვენთან არიან ძალნი ციურნი და თქვენთან ვარ მეც, ძე ივერიისა. უკვე მოდის ერანით ახალი ჯარი და მეც მოვდეგ მას. გზიდან გწერ უსტარს, ყოველივე აუწყე

ფრიად საიდუმლოდ წილკანელს, მროველს, ზაზა ციცი-
შვილს და ალათანგ ხერხეულიძეს, აგრეთვე ხოსრო ქარლი-
ძეს და გიორგი ქაეთარაძეს. დეე იმათ ჩემს მოსვლამდე გა-
ამხნეონ შეშინებული ხალხი, მისცენ იმედი. მოაწყვეთ რო-
გორმე საიდუმლო თათბირი. მეც მალე მანდ გავჩნდები.
გწერთ მხოლოდ თქვენა, რადგან სულიერმა მამებმა უკეთ
იციან საიდუმლოს დაცვა, ვინემ ერისკაცებმა. მარად თქვენი
პორჩილი „განი“...

ფრიად გაოცებული და თან აღფრთოვანებული კათალი-
კოსი შეეკითხა საბას:

— ვინა მწერს ამას, ველარ მივმხვდარვარ ?

-- ვინც ორჯერ იხსნა დაღუპვისაგან ჩვენი ქვეყანა, დი-
ლო მეუფე.

— გიორგი, დიდი მოურავი, ერის მოთავე! — უნებლიედ
წამოიძახა ზაქარიამ.

— დიახ, ის გახლავთ, წყნარად, დილო მეუფე, არ გაი-
გონონ.

— დიდება უფალს! ევლინება ქვეყანას მხსნელი, ყვე-
ლაფრის შემძლე იგი. ხომ გითხარ, ჩემო მურმანოზ, ღმერ-
თი არ მოიძულებს ივერიას-მეთქი! აჰა, აღსრულდა ჩემი წი-
ნათგამობა! — წამოიძახა აღტაცებით კათალიკოსმა.

— მართლაც რომ დიდება ღმერთსა!

ბანი მისცა წილკნელმა პირჯერის წერით. წმ. გიორგი
გზავნის ჩვენდა სახსნელად თავის სეხნიას. ყველაფრის შემ-
ძლე არს დალატით დევნილი დიდი მოურავი. მჯერა, რომ
იგი დათურგნავს ურჯულო სპარსთა. მწამს ამიერით გადარ-
ჩენა ჩვენი ხალხისა. ხოლო, საბავ, სად იყავ შენა და რო-
გორლა ნახე ერის მოთავე?

შუამთის მონასტრის მოხუცი ბერი ამ ხუთიოდ წლის წი-
ნათ გავეყვე კახეთიდან ტყვედ წაყვანილ ხალხსა სანუგეშებ-
ლად და გასამხნეებლად; ენით აუწერელი ტანჯვა-წამება
განვიცადეთ მგზავრობასა და თვით ერანში. უამრავი გაწყ-
და გზაში, გადარჩენილთა შორის კარგები ტყვეებად გააყიდა,
დანარჩენი კი, მეტწილად მოხუცნი და ხეიბარნი, დაასახ-
ლეს დაცემულ ალაგებში და ნახევარზე მეტი გაწყდა შიმ-

შილითა და სახადით. მეც მათთან ვიყავ და ჩუმად ვასრულებდი მღვდელმსახურებას. ამ ბოლო დროს ოთხმოცდაათი წლის მოხუცმა ვიგრძენ სიკვდილის მოახლოება და დავაპირე ივერიაში დაბრუნება, რათა მიებარებოდი სამშობლო მიწას. აჰა, გზაში წამოვეწიე ერანის ლაშქარს, ნელად მომავალს ჯარსა და ვიხილე იქ სააკაძე. მან მიცნო მაშინვე, გამენდო ფრიად საიდუმლოდ ღამით უღრან ტყეში და დამავალა კათალიკოსის წინაშე ხლება, თან გადმომცა ეგ უსტარიც, რომელიც თავის ხელით ჩასდო ამ კვერთხის გულში. ახლა კი რას მიბრძანებთ, მეუფევე? — შეეკითხა მოხუცი საბა კათალიკოსს.

— ამაღამ აქ მოისვენე ამ ჩემს სენაკში, ხოლო ხვალ დილის რიერაჟზე წარვედ მშვიდობით შენს მონასტერსა, რათა არ გნახონ აქა და არ აიღონ რაიმე ეჭვი. დანარჩენს თვით მოვაგვარებ. გლოცავ, ძმაო საბავ! იკურთხოს სახელი შენი, ცხონდი უკუნისამდე, ამინ! — ამ სიტყვებით გადასახა ჯვარი მოხუცს და ეამბორა სახეზე. მოხუცი-კი ემთხვია ხელზე, სიხარულის ცრემლით აევსო თვალები. ასევე ლოცვა-კურთხევით დაემშვიდობა წილკნელიც. ორთავე მეუფენი გავიდნენ სერობის მისაღებად და მოსასვენებლად მეორე ოთახში, ხოლო მოხუც საბას თავისი ხელით მიაწოდეს სერობის ჯერი და საგზაო ნუზლი...

მოხერხებული გეგმით სააკაძემ გაანგებ დაქსაქსა და მით დაასუსტა სპარსთა ძალები, იმავე დროს სამალავი გზების დაჭერით მოუსპო ქართველ ხალხს გაზიზვნის სახსარი, რითაც გამოიწვია მათში უზენაესი თავგანწირვა და სიმამაცე, აქცია ისინი გამირებად და ააღებინა ხელში მახვილი თავისი არსებობისა და ცოლშვილის დასაცავად. ხოლო ამ განკითხვის უამს ერს ეჭირვებოდა სარდალი და, აჰა, აღმოჩნდა კიდევ!

ჩამოვიდა თუ არა საქართველოში, მოუტრავმა ფრიად საიდუმლოდ ინახულა კათალიკოსი ზაქარია, წილკნელი ეპისკოპოსი მურმანოზ, ზაზა ციციშვილი, აღათანგ ხერხულიძე, ხოსრო ქარსიძე, გიორგი ქავთარაძე, ნორად ჯორჯაძე, დავით ჯანდიერი, თეიმურაზ მუხრან-ბატონი და სხვა საუკე-

თესო მამულიშვილნი და მათი დახმარებით მოაწყო შეთქმულება ირანის ჯარების წინააღმდეგ. ამ შეთქმულთა პირით მან ფრთხილად გაამხნევა ხალხი, მისცა ხსნისა და გადარჩენის იმედი.

აღფრთოვანდა სასოწარკვეთილი ერი. ამიერით აღარ ეშინოდა მძვინვარე მტრის: იგი გრძნობდა დიდ ქომაგს.

ამ მძიმე საქმის შესასრულებლად კი სააკაძეს ყველაზე მეტად სჭირდებოდა ერთი კაცი — ეს იყო მისი ცოლისძმა ზურაბ ერისთავი. მოურავის შემდეგ ის იყო მთელ ივერიაში უპირველესი სარდალი. ნუგზარის მიცვალების შემდეგ სააკაძის დახმარებით შაჰაბაზმა ზურაბს დაუმტკიცა არაგვის ერისთაობა, თუმც კანონით იგი ეკუთვნოდა მის უფროს ძმა გიორგის. ამის გამო ზურაბ დიდად დავალებულად შეიქნა შაჰისაგან, ამიტომ იგი არასგზით არ ჩაიდენდა ირანის ბატონის საწყენ საქმეს. ხოლო ამავე დროს ზურაბს ეკავა ხელში საქართველოს სამხედრო გზა და ხევის კარიმას ჰქონდა დიდი გავლენა მთის ხალხებზე. მხოლოდ მისი ნებართვით და შემწეობით შეეძლოთ გადმოფრენა მთის არწივებს, თუშ-ფშავ-ხეცსურთ და არაგველთ, რომელთა მთავარ-სარდლად უნდა ყოფილიყო თვით ზურაბ ერისთავი. ისინი იყვნენ მტრის სალტის გარეშე, ამიტომ ივერიის ხსნა პირველად სწორედ იმათგან უნდა დაწყებულიყო... იმათ უნდა მიეტანათ პირველი იერიში მტრის ჯარებზე. აი, ამ პატივ-დიდებით დამთვრალს, ზვიად ერისთავს, ამ შაჰაბაზის ერთგულ პიროვნებას მიმართა გიორგი სააკაძემ. უნდა ითქვას, რომ ზურაბ ერისთავი იყო იმ დროს ნამდვილი სეპეი მებატონე. ამ დიდ სარდალს, მამაცობით განთქმულს, ჰქონდა აღძრული ფრიად განდიდების და გამდიდრების მადამას ოდნავაც არ ხიბლაჲდა ერი და სამშობლო ის იყო ვიწრო ეგოისტი, პირადი ინტერესებით გაყლენთილი ადამიანი. ასეთები იყვნენ იმ დროს ივერ-კოლხეთის და მესხეთის თავად-აზნაურთა მეტი ნაწილი. სააკაძის წყალობით ზურაბი დაიხლოვა შაჰმა, მოხიბლა იგი პატივ-დიდებით და ჟამრავი გილდო-საჩუქრით; ყვენისავე წყალობით ის გახლდა არაგვის ერისთავი. ირანის შაჰის ასეთ მეგობრობას დიდად

აფასებდა. მისგანვე მოკლოდა ახალ ჯილდო-წარმატებას. ამიტომ ის იყო შაჰის ერთგული მთელი ჯრსებით. ამის გამო შაჰაბაზის საღალატო საქმეში ზურაბ არასგზით არ გაერეოდა. პირიქით, სასტიკად დაგმობდა ასეთ მოღალატეს, დაგმობდა მოურავის მიერ საიდუმლოდ მოწყობილ შეთქმულებას, მაშინვე გაამჟღავნებდა მას და მით დაღუპავდა შეთქმულებთან. ერთად მთელ ივერიას. ამაზე ოდნავაც არ შეფიქრდებოდა. ყოველივე ეს კარგად იცოდა სააკაძემ. მაგრამ მიუხედავად ამისა, გაბედა მაინც და მიმართა ამ ფრიალ უნდო და საშიშარ ადამიანს!

ორთავენი მტრის მთავარ ბანაკში იყვნენ მუხრანის ველზე. მათ ეხვიენ ირგვლივ შაჰის აეშაგნი (ჯაშუშნი), სასტიკად ზვერავენენ მათ ყოველ ნაბიჯს და მოქმედებას. მიუხედავად ამისა, სააკაძემ მოახერხა და ფარულად მიიწვია ზურაბი ერთ საიდუმლო ალაგს. გმირმა მეტად ფრთხილად გაანდო ივერთა შეთქმულება და სთხოვა დახმარება ამ დიად საქმეში. გიორგიმ გაახსენა ზურაბს შაჰის სატანური ზრახვანი, აურაცხელი მტრის შემოსევა ქართლ-კახეთში, მათ მიერ ციხე-სიმაგრეთა და სამალავი გზების დაკავება, დაუხატა სამშობლოს უნუგეშო მდგომარეობა, მისი არსებობის უკანასკნელი წუთები.

მან მიმართა შემდეგი სიტყვებით:

— „ზურაბ, ნუთუ უნდა განადგურდეს მთელი ივერი?! ნუთუ უნდა მოისპოს საუკუნოდ ქართველი ერი? — ნუთუ ამ ტურფა ქვეყანაში უნდა აღმოიფხვრას ქრისტიანობა?! ნუთუ მამაცსა და შშვენიერ ქართველთა ნაცვლად ჩვენი წინაპრების სისხლით მორწყულ სამშობლოში ამიერიით უნდა დაბინავდნენ სპარსნი და მულანლოს თათრები, — ეს ჩვენი ერის უძინარი მტრები?! ნუთუ ჩვენს თვალწინ უნდა მოხდეს ეს საშინელება, ჩვენ კი ამ დროს ხელდაკრეფილნი უნდა ვისხდეთ მტრის ბანაკში და შევცქერდეთ ამ უმაგალითო ამბებს?! შემდეგ ამისა რაღად ვატარებთ ქართველის სახელს, რაღად გვკიდია წელზე ხმალი და გულზე ჯვარი?! ან რა პირით წარვუდგეთ საიქიოს ჩვენს ქებულ წინაპრებს, რომლებიც გმირულად ებრძოდნენ ათას წელს მძინვარე

მუსლიმს. შეირჩინეს სამშობლო სჯული და თავისუფლება?! რა პასუხი გავცეთ როცა გვეტყვიან: „პეი, თქვე მოლაღატენო რად დაღუპეთ ქართველი ერი?!“ ზურაბ, იცოდე, ჩვენი სული ვერ მოისვენებს ვერც სააქაოს, ვერც საიქიოსს! ამიერიტ ჩვენს შუბლზე ეწერება: ერის ღალატი... ზურაბ, ჩაუკვირდი ამ საშინელ სიტყვებს! ნუ გავხდებით სამარადისოდ წყევის ღირსნი! ნუ შევიქმნებით სამშობლოს გამცემნი! ნუ გამოვჭრით ყელს ჩვენს საყვარელ დედას! ნუ დავღუპავთ ჩვენს ხალხს, ჩვენს ტურფა საქართველოს!

ეს მწვავე სიტყვები ჩქედდა მოურავის გულის სიღრმიდან. ამ მხურვალე ქადაგებამ აღელვა გულქვა ზურაბი. ქუხდა ერის მოთავე ამ მძლავრი სიტყვებით და ტიროდა ზურაბ ერისთავი; მის გაყინულ გულში ჩაისახა აქამდე უცნობი ძლიერი გრძნობა — სამშობლოს სიყვარული...

ზურაბმა გაუშვირა ხელი მოურავს და ივალცრემლიანი ჩაეკვრა გულში.

— გიორგი, თუ ასეთი საქმე გქონდა ფიქრად, რად არ გამანდვე სპარსეთშივე? მაშინ არ დავტოვებდი იქ ჩემს მეუღლეს. გააფთრებული შაჰაბაზი ხომ წამებით მოჰკლავს ჩემთვის საყვარელ არსებას! მერე ხომ ჩავეარდი მის ცოდვაში!

— ადრე გამხელა, ერანშივე თქმა ასეთი საიდუმლო რამისა შეუძლებელი იყო, ჩემო ზურაბ. იქ კედლებსაც კი ყურები ესხა; გაგვიგებდნენ ამ საქმეს და ჩაიშლებოდა ჩვენი გეგმა, მაშინ ჩვენც დავიღუპებოდით ტყუილ-უბრალოდ და ერსაც დავღუპავდით. ახლა შენ სწირავ ცოლსა ამ დიდებულ საქმეს, მე-კი ჩემს საყვარელ პირმშო ვაჟს, ჩემს პაატას. იგი ცბიერმა შაჰმა მომგლიჯა გულიდან, მძევლად დაიტოვა, მას კი მზად ვარ შეეწირო ჩემი საკუთარი ათასი სიცოცხლე...

ამ სიტყვებთან ერთად გმირს ცრემლით ავესო თვალები. იგი საშინლად აღელდა. ცოტა ხანს შემდეგ მოითქვა სული, მოიწმინდა ცრემლი და განაგრძო:

— ეჰ, გავიმაგრეთ გული, ძვირფასო ძმაო! ჩავიდინოთ ეს საგმირო საქმე! შეეწიროთ სამშობლოს ხსნის საკურთხე-

ველზე ცოლი და შვილი... ივერი ბევრს იმგვართ და კიდევ უკეთეს ქართველთ წარმოშობს, ხოლო ისინი ვერ შექმნიან საქართველოს!

ზურაბ ყოყმანობდა ისევ და წუხდა ცოლის დატოვებას. მაშინ ბრძენმა სააკაძემ მეორე მხრივ მოუარა და სხვაგვარი სიტყვა გაუტარა:

— ზურაბ, ნუ სწუხარ, ძმაო! შეეჩვიე ამ საშინელ აზრს. ნუ გაიტეხ იმედს! დამშვიდდი, ძმაო! მოვაწყობ ისე, რომ შეგრთავ ცოლად თვით ლუარსაბ მეფის დას ელენეს, შაჰაბაზის ნაცოლარს და ამჟამად ფეიქარხანის მეუღლეს. ხომ გესმის, ზურაბ? ამით შენ გახდები ქართლის სამეფოს მემკვიდრე...

შარბათზე უტკბესად იმოქმედა ზურაბზე ამ სიტყვებმა და სწრაფად დააცხრო მისი გული. ამ დიდების მოყვარე არსებას უცებ დაავიწყდა თავისი ნამდვილი ცოლი. იგი კვლავ გადაეხვია დიდ მოურავს, შეფიცა ერთგულება და სრული თავდადება ამ დიდ საქმეში.

ამ დღიდან ისინი მხნელ შეუდგნენ ქვეყნის ხსნას და მტრის დამარცხებას. მეორე დღით ადრე ზურაბმა გასწია თავის საყმოში და ბეჯითად შეუდგა მზადებას. ფრთხილმა მოურავმა მასვე გააყოლა გელა და ლომი ჩრდილელი, რათა მათ საიდუმლოდ ელევნებინათ თვალყური ზურაბისათვის, იმავე დროს კი დახმარებოდნენ მას თუშ-ფშავ-ხევსურთა რაზმების შეკრებაში, სადაც დიდი გავლენა ჰქონდა ორივე და-ძმას, როგორც იმ კუთხის შვილებს. დიდი მოურავის მიერ ასე ფრთხილად მოწყობილი საქმე საიდუმლოდ არ დარჩა გაიძვერა შაჰაბაზის ერთგულ აეშაგთა მეოხებით. შაჰმა შეიტყო ყველაფერი და ფარულად მოსწერა თავის ჯარების უფროსს ყორჩიხანს მოეკლა ჩუმად სააკაძე, იმავე დროს დაჩქარებით შესდგომოდა კახეთის მცხოვრებთა მთლიან გაჟლეტას, ხოლო ქართლის აყრას და გადასახლებას.

რალაც განგებით შაჰის ეს ბარათი ხელთ ჩაუვარდა თვით მოურავს. ნადირობის დროს ლოჭინის ველზე მან თვალი მოჰკრა ირანის მხრიდან მომავალ იფრინდას, დაედევნა მა-

შინვე ცხენით, შეიპყრო იგი, უნახა ქუდში დამალული შაპის ბარათი, წაიკითხა და რაკი სცნო ყველაფერი, მოკლა იფრინდა და იქვე ჩაფლა მიწაში, თვითონ კი საჩქაროდ შეუდგა საქმეს.

დაყოვნება აღარ შეიძლებოდა, შაჰმა უკვე იცოდა ყველაფერი და ამ პირველ შიკრიკს ხვალ-ზეგ დაადევნებდა მეორესა და მესამეს. ამრიგად ეს დიდი შეთქმულება ჩაიშლებოდა და მოისპობოდა მთელი ივერი. ყოველივე ეს სწრაფად მოისაზრა სააკაძემ და გააქროლა ცხენი სამუხრანოსაკენ. დაიბარა თავისი ძმადნაფიცი ორივე პაპაუნა, ჩივადე და ვაშაყაშვილი, აუწყა საქმის ვითარება და მათი მეობებით სასწრაფოდ მოიწვია საიდუმლოდ უმთავრესი შეთქმულნი. ორი დღის შემდეგ შუალამისას ყველანი უნდა შეკრებილიყვნენ შეიარაღებულნი და შავ ნაბადჩაბალახ შებურულნი უფლისციხის ქვედა დარბაზში.

ეს დიდებული ნაშთი ქართული ზუროთმოძღვრებისა, უფლისციხე, მდებარეობს. შუაგულ ქართლში, მტკვრის პირად, ექვსი ეჯის მანძილზე ქ. გორიდან და მთელი ციხე-ქალაქი გამოტეხილია კლდეში რამდენიმე სართულად. შიგ არის სხვადასხვა ზომის ქვის მრავალი დარბაზი და სენაკები, ჩუქურთმებით შემკული, ქვისავე ტახტ-მერხებით და მაგიდებით; კლდეშივეა გამოტეხილი ქუჩები და ქუჩაბანდები, წყალსაცავი აუზები და სხვა... იქვეა გვირაბი მტკვარზე ჩასასვლელად და წყლის ამოსაზიდად. ნამდვილად არავენ იცის, რომელ საუკუნეში ააგეს, ანუ, უკეთ, გამოტეხეს კლდეში ეს ფრიად იშვიათი ისტორიული ნაშთი. ჩვენი ძველი მატიანე „ქართლის ცხოვრება“ გვამცნევს, თითქმის იგი აეგოს ქართველი ერის ზღაპრული მამამთავრის ქართლოსის ვაჟს უფლოსს და თავისი სახელი ეწოდებინოს. ხოლო როგორც ეს უფლისციხე, ისე მეორე ასეთივე დიადი ნაშთი, გიორგი მესამის მიერ დაწყებული და დიდი თამარის მიერ დამთავრებული ვარძიის დიდი მონასტერი, აგრეთვე მტკვრის პირად ჯავახეთის კლდეში გამოტეხილი ტაძრებით და უამრავი დარბაზ-სენაკით უდიდეს აღტაცებას იწვევს დღესაც მკაცრიერ-მოგზაურთა შორის.

აი, სწორედ ამ დიდებულ უფლისციხეში მოაწყო დიდმა მოურავმა შეთქმულთა კრება. მართლაც შექმლებელი იყო მოედებნა კაცს შუაგულ ქართლში უფრო მყუდრო და ფარული ალაგი.

ბნელი, ღრუბლიანი, უმთვარო ღამე. თქორავს. უფლისციხის შესავალ კართან აქეთ-იქით დგას იარაღ-ასხმული ორი გუშაგი. ეს ზორბა ტანის არსებანი, შავი ჩაბალახით თავწაკრულნი, შავნაბადმოხურულნი და მალალტარიან შუბზე დაბჯენილნი, გაგონებთ შავი კლდის ქანდაკთ.

შუალამე გადავიდა. გაისმა მამლის შორეული პირველი ყივილი. ამავე დროს გუშაგთა თვალწინ აიშართა შავი უზარმაზარი ლანდი. იგი დინჯად და ფეხაკრეფით უახლოვდება მათ. გუშაგებმა აღმართეს შუბნი და შეეკითხნენ წყნარად:

- ვინ მოდის?
- მოკეთე.
- ნიშანი?
- „ხარება“.

„იხარე მარად“. მობრძანდი, ბატონო!

ეს იყო მოურავის მიერ მიცემული საიდუმლო ნიშანი, რომელიც გუშაგ-შეთქმულთა გარდა არავინ იცოდა. ამავე ნიშნით ხედებოდნენ ერთმანეთს ციხის დარბაზში თვით შეთქმულნი იმ მოსაზრებით, რომ შემთხვევით რომელიმე გარეშე პირი არ შეჰპაროდათ რაიმე ხერხით. ამ მოკლე კითხვა-პასუხის შემდეგ ერთი გუშაგი ჩაუძღვა ქვის კიბეზე ახლადმოსულს და შეიყვანა დიდ დარბაზში, სადაც მოფარებით მდგარ ქვის მაგიდაზე ოდნავ ბეუტავდა პატარა ჭრაქი.

პირველ შეთქმულს მალე მოჰყვა მეორე, მესამე და სხ. მოვიდნენ ცალცალკე. სულ შეგროვდა ათი კაცი. მათ შორის იყვნენ ზურაბ ერისთავი, ლომი ჩრდილელი და მთაში სახელგანთქმული მამაცი თუში და ხევსური: ბერდია და გოგოთური, ყველანი იყვნენ მოსული ჯუბა-ჯავშნით, მუზაჩადით და იარაღასხმულნი, თანაც შავ ნაბად-ჩაბალახით შებურვილნი. მათ შორის გამონაკლისს წარმოადგენდა ორი ახოვანი ბერი; ერთი იყო ივერიის კათალიკოსი ზაქარია,

ხოლო მეორე — წილკნელი ეპისკოპოსი მურმანოზი. ამათ კი შავი ნაბდის ქვეშ ემოსათ ბერის შავი ანაფორა და თავს ეხურათ დილბანდიანი შავი კოთხო. მურმანოზს ხელთ ეპყრა მცირე აბგა, რომელიც ფრთხილად დადვა დარბაზში ქვის მაგიდაზე. აბგაში იდვა სუფთა დარაიაში სათუთად გახვეული ბარძიმი, ჯვარი და სახარება.

ყველაზე ბოლოს გაჩნდა შემოსასვლელ გვირაბთან სხვებივით მოსილი, გოლიათის აღნაგობის რაინდი. თუმც მაშინვე იცვნეს გუშაგებმა, ვინც იყო იგი, მარა მაინც მიმართეს დათქმული შეკითხვით, ამართული შუბებით ხელში, და მოსთხოვეს საიდუმლო ნიშანი. უკვე ხედებით, რომ ეს იყო თვით დიდი მოურავი. მან მოუწონა გუშაგად მდგარ შეთქმულ ორივე პაპუნას ასეთი სიფრთხილე და შეეკითხა, ყველანი მოვიდნენ თუ არა?

— ათივე გეახლნენ და დიდ დარბაზში გელოდებიან, — იყო გუშაგთ პასუხი.

— კეთილი, ჩავალ, თქვენ კი აქვე დარჩით და თუ რაიმე საეჭვო შეიცნოთ, მოგვეცით ნიშანი ჭოტის ძახილით, სასწრაფოდ მივიღებთ ზომებს. თქვენც ეცადეთ მზვერავი ვინმე არ გაუშვათ ხელიდან.

ამ სიტყვებით სააკაძემ ფრთხილად ჩავლო კიბე და შევიდა დიდ დარბაზში, სადაც დამხედურთ შეკითხვაზე მისცა სათანადო პასუხი დათქმული ნიშნით, შემდეგ ემთხვია ხელზე კათალიკოსს და ეპისკოპოსს. — აბა, ძმებო! დრო აღარ ითმენს! შევეუდგეთ საქმეს!

უთხრა შეთქმულთ ნელი ხმით მოურავმა და ამოიღო უბიდან შაჰაბაზის უსტარი, რომელიც წაართვა ლოჭინის ველზე სპარსელ იფრინდას და წაუკითხა შეთქმულთ ჭრაქის შუქზე შემდეგი:

„ყორჩიხან, ამით გიბრძანებ, მოჰკალ ახლავე ჩვენი მოღალატე გურჯი მოურავი და მისი მოკვეთილი თავი აქ გამოგზაანე, ამავე დროს დააჩქარე კახეთის ხალხის მთლიანი გაქლექა, ხოლო ქართლელთა აყრა და გადმოსახლება.“

სრულიად ირანისა და ერაყის, რან-შირვანისა და ივერიის ბრძანებელი შაჰაბაზ“.

ვინც-კი ირახულა არ ცოლა, იმათ გადაუთარგმნია ქართულად. ყველანი აშკარად დარწმუნდნენ, რომ შავს უკავა გაგებული აქვს ეს შეთქმულება და, ეჭვი არაა, დაუყოვნებლივ ძიილებს ზომებს, ამიტომ საჭიროა დასწრება.

— ძებო! — დაიწყო სააკაძემ. — ზომ ხედავთ, რა საშინელ ხიფათში ჩაგვყარა ჯაშუშის ენამ! ჩანს, ვილაც იუდა ჰგობს ჩვენს შორის, ან სირეგვნიტ წამოცდა ვისმეს ოჯახში და ამრიგად სცნო რომელიმე ჯაშუშმა. აეშაგ-მოლაღატენით ზომ სავსეა მთელი ივერი. ახლა ნუ შევეუდგებით ამის ბეებას. თავის დროზე ვცნობთ ყველაფერს და იუდა-გამცემი ძიილებს შესაფერ ჯილდოს. ამჟამად კი საჭიროა უფრო ფრთხილი და სწრაფი მოქმედება. დადგა ჩვენი მიზნის განხორციელების ეამი. ივერიაში შემოსეული მტრის ჯარები სულ 100 ათას კაცამდეა, ისინი დაქსაქსული არიან ხუთ-ექვსი ალაგას: ამ ჯარებიდან მუხრანის ველზე, მთავარ ბანაკში, იმყოფება 40 ათასი მებრძოლი ყორჩიხანის მთავარსარდლობით. 20 ათასი ფეიქარხანის სარდლობით ბანაკად დგას გარეკახეთში სოფ. მარტყოფთან, 5 ათასი კაცი იმყოფება მცხეთასთან ახლად აგებულ ციხეში, თბილისის ციხეებში ჩაყენებულია 15 ათასამდე მებრძოლი, ხოლო დანარჩენი 20 ათასი სპარსი დაქსაქსულია ქართლ-კახეთში სხვადასხვა ციხესიმაგრეებისა და სამალავი გზების შესაკრავად. ზოგი მათგანი გასულია დაბა-სოფლად სათარეშოდ და საალაფოდ. ამიტომ ჩვენ უნდა მივიღოთ ყოველივე ზომა და უსათუოდ ერთ დღეს შევმუსროთ მტრის მთავარი ძალები მუხრანის ველზე, მცხეთასთან, თბილისში და მარტყოფთან. ესენი არიან სულ 80 ათასი მებრძოლი. ამათი დამარცხებით ვიხსნით დაღუპვისაგან ჩვენს სამშობლოს. მტრის დანარჩენ დაქსაქსულ რაზმებს, 20 ათას კაცამდე, ზომ სულ ადვილად გავუღლევთ იმ დიდი გამარჯვების შემდეგ! ამრიგად მოვსპობთ მტრის ძალებს და სულ თუ არა, დიდი ხნით მაინც მოვეუსპობთ ვერაგ შაჰაბაზს ივერიაში შემოჭრის წადილს.

— ბრძანეთ, მოურავო, რა ძალებით უნდა შევმუსროოთ მტრის ამოდენა ლაშქარი? — შეიკითხნენ სააკაძეს.

— მოგახსენებთ, ბატონებო! ჩირველ უნდა დავეცეო ტრის მთავარ ბანაკს მუხრანის ველზე, ზურაბ, რამდენა-
ცყავთ მზად შენა და მთიელთ?

— ჩემს საყმოში მზად არის ორა ათასი საუკეთესო ძებრ-
ძოლი, ხოლო თუშ-ფშავ-ხევსურთა ჯარი ლომის, ბერდიას,
უჯოსა და გოგოთურის სარდლობით იქნება სამიათასამდე
რჩეულნი ვაჟაკნი, ომში ნაცადნი. სულ ხუთი ათასი მეო-
მარი. ყველანი მზად არიან, ხოლო ელიან ნიშანს, რომ
დაიძრან მთებიდან.

— ძალიან კარგი, ევ დიდი ძალაა. 5 ათასი მთის არწივი
ხუმრობა არ გეგონოთ. ახლა თქვენ ბრძანეთ, ზაზა და ბაა-
დურ, რამდენ კაცს ზოგვაშველებთ საციციანოს მხრიდან?

— ჩვენ ხერხეულიძეებს, მაჩაბლებს და ამირაჯიბთ შეგ-
ვიძლია მოვიყვანოთ თითქმის სამი ათასი. კარგი მებრძო-
ლი, — იყო ორივეს პასუხი.

— ბარაქალა, ღირსეულო მამულიშვილო!

შემდეგ მოურავი შეეკითხა თეიმურაზ მუხრან-ბატონს
და ქსნის ერისთავ იასეს. აღმოჩნდა, რომ ამათ უკვე მზადა
ჰყავთ 1.500-მდე მებრძოლი.

— ორივე პაპუნას, ხოსრო ქარსიძეს და გიორგი ქავთარა-
ძეს კიდევ ტირიფონაზე და ლამისყანისაკენ ირგვლივ სოფ-
ლებში აზატ გლეხთაგან, აგრეთვე კავთისხევსა და მის ახლო
დაბა-სოფლებიდან გამოჰყავთ 1.500 კაცი. მაშ გროვდება
სულ თავდამსხმელა ჯარი თერთმეტი ათასი საუკეთესო
მებრძოლი. ეს ჯარი სრულიად საკმაოა ტრის ორმოცი ათას
მეომრის დასამარცხებლად უეცარი თავდასხმით მუხრანის
ველზე. გაგახსენებთ, რომ ცხირეთ-ტაშისკართან თათარბა-
ნის ლაშქარი აღეშატებოდა 30 ათას კაცს, რომელიც მთლი-
ანად გავანადგურეთ, ჩვენ კი გეყავდა მხოლოდ ექვსი ათა-
სი მებრძოლი. ღმერთი მოწყალეა და წმ. გიორგი ჩვენი
შემწე. თერთმეტი ათასი საუკეთესო მეომრით თვით სას-
წაულებს ჩავიდენტ...

ამ საიმედო სიტყვებით დაამთავრა ბაასი მოურაემა. ყვე-
ლანი გულდასმით უსმენდნენ ხალხის მოთავეს. მამაც სა-

ხეზე ემჩნეოდათ აღტაცება. შემდეგ სააკაძემ მიმართა ჯანდიერს:

— დავით, რამდენი მეომარი გყავთ მზადა მარტყოფზე თავდასასხმელად?

— მე, ნოდარ, თამაზ და დალი მამედი გამოვიყვანთ ექვსი ათასამდე კარგ მებრძოლს, — იყო ჯანდიერის პასუხი.

— სრულებით საკმაოა. ჩვენც მოგეშველებით იქვე ოთხი ათასი კაცით დანიშნულ ღროს. ამრიგად 10 ათასი მეომრით სავსებით გავანადგურებთ ფეიქარხანის შეშინებულ ლაშქარს, მეტადრე თუ გაიგეს ერანის მთავარი ძალების დამარცხება; — დასძინა მოურავმა.

— აბაი, როდის შევუდგეთ საქმეს, გივარგივ? როდის მოგაშველოთ ჩენაი ლაშქარი? — შეეკითხა გოლიათი ხევსური გოგოთური.

— ახლავე მოგახსენებთ, რადგან დიდ საფრთხეში ჩავცვივდით ყველანი გაცემის გამო და დროც აღარ ითმენს, ამიტომ ეს დიდი საქმე, მტრის ბანაკებზე თავდასხმა უნდა მოეწყოს უეჭვოდ ამ ხუთი დღის შემდეგ. ეს იქნება 25 ამ თვეს, ზედ ხარება დილით. მით უმეტეს, რომ ჩენი ნიშანიც ხომ ხარებაა! პირველ უნდა დავესწათ მტრის მთავარ ბანაკს მუხრანის ველზე დილის რიყრაყზე. ერთი მხრით, ზემოდან, მიიტანენ იერიშს ზურაბის ჯარი და თუშ-ფშავხევსურნი, ხოლო მეორე მხრივ, ქვემოდან, ქართლელი რაზმები ზაზას, ბაადურის, იასეს, თეიმურაზისა და ორივე პაპუნას სარდლობით. იმ ღამეს მე თვით ვიქნები ოთხი მამაცი მტრის ბანაკში და ვეცდები თქვენი მოახლოების ყამს გავფლიტოთ სპარსთა სარდლები, რითაც ხელს შევუწყობთ მტრის ძალთა განადგურებას. ხოლო თქვენ ყველამ, მეტადრე ზურაბისა და მთიელ ჯარებმა, შორითვე უნდა აყვიროთ მრავალი ბუკი და ლოროტოტო, რათა მტერს ეგონოს, თითქო საომრად მოდის მეფე თეიმურაზ იმერ-ოსმალთა დიდი ლაშქრით, რომ ამ ხერხით თავზარი დაეცეთ სპარსთა ჯარებს, შევიტანოთ მათში შიში და ძრწოლა... როგორც კი მოვრჩებით ამ მძიმე საქმეს მუხრანის ველზე, მაშინვე თავს დავესხმით მცხეთასთან ახალ ციხეში ჩამდგარ სპარსებს და

თბილისის ციხეებს. ჯარის ნაწილს გავგზავნით მარტოყოფისა-
საქენ კახთა საშველად ფეიქარხნის წინააღმდეგ. მეორე
მხრით კი მტერზე იერიშს მიიტანს დავით ჯანდიერი თავისი
ამხანაგებით და, ღვთით, იქაც გავანადგურებთ მტერს. აი,
ძმებო, ჩემი გეგმა. და სწორედ ხარება დღეს უფალი ღმერ-
თი მოუვლენს ურჯულო მტრის ლაშქარს ზეციურ რისხვას.
ხოლო ივერთა ერს მომადლებს გამარჯვებას და უზომო
სიხარულს! — დაამთავრა მოურავმა თავისი გეგმის გან-
მარტება.

— გისმინოს მაღალმა ღმერთმა და წმ. გიორგიმ! გისმი-
ნოს! — მიამახეს შეთქმულებმა ეროვნულ გმირს.

— გისმინოს, ჩვენო დიღო სარდალო, ლაშარის ჯვარმა
და ლომისის წმ. გივარგიმ! — დაიგრგვინეს ლომი ჩრდილელ-
მა და გოგოთურმა.

მცირე სიჩუმე ჩამოვარდა. მაღალგუმბათიანი დარბაზის
ქერსა და კედლებზე ბარბაცებდა შეთქმულთა შავი ლანდე-
ბი, ჭრაქის შუქით გამოწვეული.

— ახლა კი შევფიცოთ ერთმანეთს ძმობა და ერთგულე-
ბა ჭირსა და ლხინში! დაეფიცოთ, რომ არ ვულალატებთ
ჩვენს დიდებულ საქმეს, თანაც არავის გავუმჟღავნებთ ამ
შეთქმულებასა და ჩვენს გეგმებს, — დაიწყო ისევ დიდმა
მოურავმა.

— ვფიცავთ ყველანი! ვფიცავთ! დედა შეერთოს ცო-
ლად, ვინც სამშობლოს უღალატოს! ვინც დიანანას მისთ-
ვის სიკვდილი, მას დაემხოვს ოჯახი! თავს დაატყდეს ციუ-
რი რისხვა! იყოს წყეული უკუნისამდე! — დაიგრიალეს ერთ-
ხმად შეთქმულებმა ფეხზე ადგომით და ამ მგზნებარე სიტყ-
ვებს ბანი მისცა ყრუ ხმაურით დარბაზის თაღებმა...

— ახლა კი განვსპეტაკდეთ, ძმებო, სულით და ხორცი-
თ, მივიღოთ წმ. ზიარება თვით ჩვენი მაღალი მეუფე კათალი-
კოსის ხელით; ვინ უწყის, რომელი ჩვენგანი დარჩება
კიდევ ცოცხალი! — თქვა ოდნავ მღელვარე ხმით ზაზამ,
მოიხადა მუზარადი და მოიყარა მუხლი კათალიკოსის წინა-
შე. მასვე მიჰბაძეს დანარჩენმა შეთქმულებმა.

კათალიკოსმა მიმართა გმირებს მხურვალე სიტყვით. იგი შეეხო მოკლედ საქართველოს წარსულს, დაასურათა ივერიის საბედისწერო ეპი, გულით დალოცა იქ მყოფნი, გააბნენვა და ყველას მიაღებინა წმ. ზიარება.

— გლოცავთ, ივერიის ქებულნო გმირნო, ამ უძველეს კლდოვან ციხეში საიდუმლოდ შეკრებილთ. იკურთხოს თქვენი მაღალი მიზანი და ის დიადი საქმე, რომელსაც სწირავთ სიცოცხლეს! იკურთხოს თქვენი მარჯვენა და ხმალი მტრის შემმუსვრელი! გწყალობდეთ მაღალი ღმერთი და წინ გიდლოდეთ ზეცის ქალწული! წმ. გიორგიმ მოგმადლოთ გამარჯვება საქრისტიანოს ურიცხვ მტერთა ზედა! გაიხსენეთ, სულეერო შვილნო, თქვენი განთქმული წინაპრები! მიჰბაძეთ მათ! იქეციოთ თქვენც გმირებად! დასდევით თავი სჯულისა და ქვეყნისათვის, რათა უფალმა ღმერთმან დაგიმკვიდროთ სასუფეველი ცათა შინა... გახსოვდეთ, გმირნო, რომ ასეთი განსაცდელი აროდეს დასდგომია მრავალწამებულ ივერთა ერს! მტარვალნი შაჰაბაზნი უპირებს მას აღგვას დედამიწის პირიდან! აჰა სულიერო შვილნო! მოტყუებით და მოყვრის ნილაბით შემოიჭრა მტერი ჩვენს ბედკრულ ქვეყანაში! იგი დაეუფლა ჩვენს ციხე-სიმაგრეთ და გასახიზნ გზებსა. მან უკვე აღმართა ბოროტი მკლავი და ბასრი მახვილი, რათა ერთიან, წაწყმინდოს ერი ქრისტიანე. ხოლო არ გაემარჯვის ურჯულო მტარვალსი არ გაემარჯვის თესლთა ფილისტიმელთა ღვთის მოსავ ისრაელთა ზედა! ნორჩი ყრმა დავით მოჰკლავს შურდულით მძლავრსა გოლიათსი უკვე ვგრძნობ, რომ ხარება დილით იხარებს ერი ქართველი თავის სასწაულებრივ გადარჩენას. მწამს, რომ ივერთა ველნი და მინდორნი შეიღებება უხვად მტრის სისხლით... მუხლმოყრით ვევედრები უფალს, რათა მოგანიჭოს თქვენ და ივერთა ერს მტერთა ზედან ბრწყინვალე გამარჯვება...

ამ სიტყვებთან ერთად კათალიკოსმა მოიხადა კოთხო, დაიჩოქა იქვე და სასოებით აღაპყრა თვალნი ზეცად. მხურვალე ლოცვა-ვედრების გუნდრუქს აფრქვევდნენ მისი ბაგენი; ჟებრწყინავდა ნათელი სახე მოხუც მღვდელმთავარს.

მის წინაშე იყვნენ მუხლმოდრეკით ათივე შეთქმულნი. მათაც მუზარადმოხდილთ აღეპყრათ თვალნი ზეცად და მამაც საბუზე სდიოდათ ცრემლი. მათი სულიერი არსება მთლიანად შთანთქმულიყო უხილავის უსაზღვრო არსში. ეს იყო დიადი წამი.

ბოლოს წამოდგა კათალიკოსი, წამოდგნენ გმირნიც. წმ. მამამ გაშალა მკლავნი, სათითაოდ ჩაიკრა გულში სამშობლოსათვის თავდადებულნი და ყველას ეამბორა შუბლზე, ხოლო ესენი ემთხვივნენ ჯვარსა და ხელზე, შემდეგ ძმურად ჩაეკვრნენ ერთმანეთს და ფრთხილად გაუდგნენ გზას ცალცალკე, დიადი გრძნობით აღტყინებულნი.

გუშაგად მდგარმა ორივე პაპუნამ ჩააქრეს კრაქი და გასწიეს შინისაკენ. კვლავ მოიცვა წყვილიღმა და სამარის სიჩუმემ უფლისციხის დიდი დარბაზი.

შეთქმულთა წასვლის შემდეგ არ გასულა ნახევარი ეამიც, როს ათასი მხედრისაგან შემდგარი სპარსთა რაზმი, ორივე მხრივ მოადგა უფლისციხეს... შემოარტყეს ალყა, აანთეს ქინედილები, შევიდნენ შიგნით და იწყეს გულდასმით ჩხრეკა, ხოლო ვერ ნახეს ისინი, ვისაც ეძებდნენ. ნაცვლად დააფრთხეს უშნო ღამურები.

აშკარად ჩანდა, რომ ჯაშუშის ენამ აქაც შეასრულა, თუმც უნაყოფოდ. თავისი სამარცხვინო როლი.

— ოჰ, დონღუზ ჯაშუშ! ოჰ! გიაურ ჯაშუშ!

გაიძახოდა გზა-გზა მუქარით ირანის ცხენოსანი რაზმის სარდალი ისუპ-ხანი და უკმაყოფილო ბუზღუნით მიაქროლებდა მთავარი ბანაკისაკენ შავ მერანს.

XXIV. ივერიის გადაჩენა

შუალამე კარგა ხანია. გადავიდა. გათენებამდე მხოლოდ ორი საათი იყო. მთვარე ეფარებოდა აშვერილ მთებს და ეთხოვებოდა მძინარ ბუნებას თავისი ციატა სხავებით. დუმდა მიდამო. ტკბილად ეძინა ირანის ლაშქარს მუხრანის ველზე. სთვლემდნენ გუშაგნი. მხოლოდ ერთ მდიდრულ კარავში ფხიზლობდა ხუთი ვაჟკაცი, ჯუბა-ჯავშან-მუზარადით მოსილნი და იარაღჭურვილნი. ეს ხუთი გმირი; სიბნელეში სულგანაბული, გულის ფანქვალით მისჩერებოდა აღმოსავლეთს და ელოდა განთიადს. ისინი თითქო უცდიდნენ რაღაც ნიშანს. აჰა, ამოვიდა კიდეც ცისკარი; იწყო კაშკაში. ცოტა ხნის შემდეგ დაბერა დილის ნიავმაც. არ ჩანდა ნიშანი, არ ისმოდა ბაიბური. ამ დუმილს არღვევდა მხოლოდ არაგვის ჩხრიალი და ქოტის სევდიანი ხმა.

— ნუთუ გვიღალატა ზურაბმა?! გათენებამ მოატანა კიდეც... ნეტავ სად არიან ამდენი ხანი?! — უკმაყოფილოდ წამოიძანა ბუმბერაზმა რაინდმა.

— მოვლენ, მამილო! მოვლენ უსათუოდ! ცოტადა მოვიტმინოთ, — უთხრა ჭაბუკმა და მოეხვია მამას.

ვინ იყვნენ ესენი? ვგონებ, ხედებით კიდეც: ესენი გახლდენ მოურავი და მის მიერ არჩეული ოთხი მამაცი: ელია დიასამიძე, პაატა ხერხეულიძე, პაპუნა ვაშაყაშვილი და თვით სააკაძის 16 წლის ვაჟი ავთანდილი. გარდა თავის ვაჟისა, ეს პირნი ნაცადი ჰყავდა დიდ მოურავს მრავალ ომში, ამი-

ტომ აირჩია ისინი. ამ ოთხი ვაჟაკით სააკაძე უნდა დარე-
ოდა მტრის სარდლებს და გაეჟლიტა მთლიანად.

ეს იყო საბედისწერო ჟამი. ოღნავი შეგვიანება, ოღნავ
გონს მოსვლა მტრის ლაშქრისა სრულიად დაღუპავდა საქ-
მეს, დაღუპავდა მთელ საქართველოს. აქ, მუხრანის ველზე,
ამ ხარება დილას წყდებოდა ივერიის ბედი: ან მტრის და-
მარცხება და სრული თავისუფლება, ან გამარჯვება და
მთელი ქართლ-კახეთის გაჟლეტა. საქართველოს მომავალი
ბეწვზე ეკიდა.

აჰა, შეფერადდა ცა, მოატანა დილის რიყრაყმა! სწორედ
ამ დროს მოისმა შორით ბუკის ხმა. იგი თანდათან ახლოვ-
დებოდა და გუგუნით ეფინებოდა მიდამოს. შეტორტმანდა
ხუთი მამაციის გული. უსაზღვრო სიხარულის ელფერმა გა-
დაჰკრათ სახეზე.

— ზურაბია, ზურაბ მამაცი ჯარით! აღტაცებით შესძახა
მოურავმა და წამოვარდა ზეზე.

— ახლა კი დადგა, ცბიერო, შაჰაბაზ, შურისძიების ჟამი!
დღეიდან შენ გაიგებ, თუ რას ნიშნავს ქართველი ერი! შენ
უმზადებ მას სიკვდილს, მონობას, გაჟლეტას, მაგრამ არა!
გაწყდება დღეს შენი ლაშქარი, პატარა საქართველო კი
დარჩება ისევ ცოცხალი!

ამ აღფრთოვანებული სიტყვების შემდეგ გმირმა აღმარ-
თა აბრეშუმის ვარდისფერი დროშა, მოიხადა მუზარადი
და დაიჩოქა. მას მიჰბაძა ოთხივ ვაჟაკმა.

— ძლიერო ღმერთო და ჩვენო მფარველო წმ. გიორგი!
თქვენ შეიბრალეთ ესეოდენ ტანჯული ქართველი ერი! თქვენ
იხსენით ზიფათისაგან! თქვენ მომადლეთ მას გამარჯვება
უამრავ მტერთა ზედა!

ღალატებდა ამ მხურვალე ვედრებას ხელაპყრობით ერის
ბელადი.

— ძმებო! — მიმართა თავის გმირებს. — დადგა თავგან-
წირვის ჟამი... ან სიკვდილი, ან გამარჯვება! მოზღვავებუ-
ლა მტერის იგი უპირებს შთანთქმას ჩვენს სამშობლოს!
დღეს ჩვენ ვართ მისი ჭომავნი. დღეს ჩვენ გვარგუნა ბედ-
მა მისი ხსნა და მფარველობა! გალადებული მტერი ემუქ-

რება ჩვენს ხალხს გაელეტას... გამხნევდით, ძმებო! სამშობლოს უზენაესმა სიყვარულმა დეე შთაგებეროს ყველას გმირული სული ნუ შეგვაშინებს მტრის სიმრავლე! ან მოვეკედეთ ნამუსიანად, ან მოვეუბოვოთ ტანჯულ სამშობლოს სანეტარო თავისუფლება! აბა, ძმებო, დროა მოქმედებისა! მომყევით... სიკვდილი მტარვალთ! — შესძახა სააკაძემ მგრგვინავი ხმით, ემთხვია დროშას და იძრო ხმალი, სხვებიც მოწიწებით ეამბორნენ დროშას და იძრეს მახვილი. ამ დროს შემოვარდა კარავში გაფითრებული შიკრიკი.

— მოურავო, ყორჩიხანი გიხმობს საჩქაროდ! — ძლივს წარმოსთქვა მან გულისხეთქებით.

გმირი და ოთხივ ამხანაგი სწრაფად შესხდნენ შეკახმულ ცხენებზე და გააქროლეს მთავარსარდლის კარავისაკენ, სადაც მოედანზე თავი მოეყარათ კიდეც სარდლებს და ფერდაკარგულნი შესცქეროდნენ ერთიმეორეს.

უკვე თენდებოდა, ქრებოდა ბინდი და მთებიდან ჩამოწოლილი ნისლი. რამდენიმე ასეული ბუქნაღარისა და ღორღოტოტოს მჭექარე ხმები ახლოვდებოდა ყოველი მხრიდან. საშინელი გრიალით ეფინებოდა მთებსა და ველს. ეს მზარავი ხმები შიშის ზარს სცემდნენ მტრის უზომოდ დაფეთებულ ლაშქარს.

— ეს რა ხმებია მოურავო? — მისვლის უმაღვე შეიკითხა ცახცახით ყორჩიხანი.

— ეს ის ხმებია, რომ დადგა ჟამი შურისძიებისა! დადგა ჟამი სპარსთა გაელეტისა და საქართველოს განთავსუფლებისა მტრის ბრჭყალებისაგან. სიკვდილი მტარვალთ! — დაიგრგვინა ლომივით სააკაძემ და ელვის სისწრაფით გაუტარა გულში ყორჩიხანს წვერაღესილი შუბი. მტრის მთავარსარდალი იქვე დაეცა მკვდარი. ეს იყო ნიშანი. ხუთივე გმირი მახვილით ხელში ეძგერა სპარსთა სარდლებს და გააგლეს მუსრი. შემდეგ ისინი ცხენდაცხენ გადაემუნენ მტრის ზარდაცემულ ლაშქარში და იწყეს უწყალოდ ელეტა. ამ დროს მოადწია მაშველმა ჯარმაც ზურაბ ერისთავისა და ლომი ჩრდილელის სარდლობით. თუშ-ფშავ-ხეცსურნი და არაგველნი საშინელი ყიფინით დაერივნენ მტერს. შეიქნა

ელეტა. დიდი მოურავისა და ზურაბ ერისთავის ერთი შეტევით იფანტებოდნენ მტრის რაზმები. მამაცად იბრძოდნენ აგრეთვე ლომი, ცარო, ბერდია, უჯო, გოგოთურ, ედიშერი და სხვა ქებული მთიელი არწივნი.

ამ დროს ორ-სამ მხრივ მიიტანეს მტერზე მედგარი იერი-ში ქართლელ ჯარებმაც თეიმურაზ მუხრანბატონის, იასე ქსნის ერისთავის, ზაზა და ბაადურ ციციშვილთა, ალათანგ ხერხეულიძის, ესტატე ამირეჯიბის და პაპუნა ჩივაძის სარდლობით. ისინი შემოერთყნენ მტრის ბანაკს, შეუკრეს გასაქცევი გზები და იწყეს სპარსთა ქლეტა.

ყველაფერი ხდებოდა სააკაძის მიერ წინასწარ შედგენილი გეგმით. საშინელი რისხვა დაატყდა თავზე ირანის ლაშქარს ამ ხარება დილას. ქართველთ მახვილი უღმობლად მუსრავდა ირანელთ. უზომოდ დაფრთხალნი და გონებაარეული სპარსნი ხოცავდნენ ერთმანეთს. კიდევ ორიოდ უამის ხელჩართული ბრძოლა-და გაწყდა მთლიანად მტერი. მხოლოდ რამდენიმე კაცმა უშველა თავს გაქცევით. მტრის მთელი ბანაკი, უამრავი განძი და ქონება დარჩათ ჯილდოდ ქართველთ, ისინი მეტი სიხარულით ეხვეოდნენ ერთმანეთს და ულოცავდნენ ბრწყინვალე გამარჯვებას.

ივერიის გმირმა მცირე ხნით შეასვენა ჯარი, ასაუზმა და შემდეგ გაემართა მცხეთისაკენ, რომლის მეზობლად ახლად აგებულ ციხეში იყო ჩამდგარი სპარსთა ჯარი, 5.000 კაცამდე. სააკაძემ მიიტანა იერიში ციხეზე, ერთი უამის ცხარე ბრძოლით აიღო იგი და გაუღიბა სპარსნი.

აქ მოხდა საოცარი რამ: როცა მოურავი ბრძოლაში იყო გართული, უკანიდან მიეპარა ჭაბუკი სპარსი და მიაძახა: „მოკედი, მოღალატე!“ — და მოუქნია ხმალი. კიდევ წუთი — და უდიდესი გმირი უნდა გამხდარიყო მტრის სითამამის მსხვერპლი. სწორედ ამ დროს იელვა ხმალმა ნორჩი ქართველის ხელში და სპარსელის თავი გაგორდა ძირს, თან მიაძახა:

„მამაჩემმა მოჰკლა მამაშენი და განა ჩემს საყვარელ მამას მოგაკვლევინებდი?“

სპარსელი იყო ყორჩიხანის ვაჟი იმამვერდი, ხოლო ქართველი—სააკაძის 17 წლის ვაჟი ზურაბ, რომელიც ახლდა ზურაბ ერისთავს და ჩამოჰყვა მის ჯარს.

აქედან მოუტრავი მიადგა თბილისს. ცხარე ბრძოლით აიღო ყველა სიმაგრე, მეტეხის გარდა. ჩააყენა აღებულ ციხე-სიმაგრეებში თავისი გუშაგნი, შევიდა თბილისში, გაულიტა სპარსნი და მრავალნიც კიღევ დაატყვევა. სვიმონ მეფემ მოასწრო გაქცევა ოჯახობით.

დიდად გამაგრებულ მეტეხს სააკაძემ ალყა შემოარტყა. ეს მაგარი ციხე უწყლობით უნდა აღებულიყო. მაგრამ თბილისში აღმოჩნდა ორი მოღალატე, რომლებმაც დიდი სამსახური გაუწიეს მეციხოვნე სპარსებს და მით დააბრკოლეს ციხის აღება. ეს მოღალატენი იყვნენ თბილისის მოქალაქენი: გიორგი გორგიჯანიძე და გარსო ჯანუაშვილი. დიდმა მოუტრავმა გაუგო ორთავეს ღალატი და მისი ბრძანებით ერთი მათგანი ჩამოახრჩვეს საჯაროდ, ხოლო მეორეს მოჰკვეთეს თავი. იმ ხარება დღესვე სააკაძემ თავისი ჯარის ნაწილი ზურაბ ერისთავის სარდლობით გაგზავნა გარე-კახეთს ფეიქარხანის ჯარზე თავდასასხმელად.

თვითონაც სამხრობის ყამს მიადგა მარტყოფს. მეორე მხრიდან დაეცნენ მტერს დავით ჯანდიერი, ჯორჯაძე, ვაჩინაძე და დალი მამელი კახ-შირვანთა რაზმით; შეიქნა აქაც ხელჩართული ბრძოლა. გაღლებული ივერნი აწვებოდნენ მტერს ორი მხრივ და ავლებდნენ მუსრს.

ველარ გაუძლო ქართველთა სიმამაცეს შუაში მომწყვდეულმა მტრის ლაშქარმა, დაფრთხა და დაეცა სულით. ზოგმა მოასწრო გაქცევა, ხოლო მეტი ნაწილი ტყვედ ჩაუვარდა ქართველებს; მათვე დარჩათ დავლად სპარსთა მთელი ბანაკი და ქონება: უამრავი სურსათ-სანოვაგე, თოფ-ზარბაზნები, ტყვია-წამალი, ცხენი და ჯორ-აქლემები.

თვით ფეიქარხანმა მოასწრო გაქცევა თავისი ცოლშვილით. მან აღრევე გაიგო მუხრანის ველზე სპარსთა ჯარების დამარცხების ამბავი და უშველა თავს.

ამ საარაკო გამარჯვებათა შემდეგ სააკაძემ დაჰყო რაზმებად თავისი მამაცი ჯარი და გაგზავნა ზოგი კახეთს, სა-

თარეშოდ გასულ სპარსთა ჯარების გასაელეტად, ზოგიც კიდევ ქართლს მტრის რაზმების მოსასპობად, რომელთაც ხელთ ეკავათ ხეობანი და სახაზინო გზები. თვით სააკაძე კი ზურაბ ერისთავის თანხლებით სასწრაფოდ დაედევნა ფეიქარხანს და მიეწია მდ. მტკვართან, როცა იგი ფონში გადიოდა. ყიზილბაშმა ძლივს გაასწრო მათ თავისი ცოლით და ორიოდ ფარეშით. მთელი მისი ამაღლა ტყვედ ჩაუვარდათ ივერიის სარდლებს. მათვე დარჩათ ფეიქარხანის მთელი ქონება.

მეორე დილით სააკაძე და ზურაბ ერისთავი თავისი რაზმით გავიდნენ მტკვარში და გაედევნენ ფეიქარხანს, მაგრამ ვერ მისწვდნენ. ნაცვლდ ამისა შეესივნენ ირანის სახანოებს და დაიპყრეს განჯა, ყარაბაზი, ბარდა, ქაბალუ, არეში, ყაზახი, შაქი და შამშადილი, ჩაუყენეს ციხეებში თავისი გუშაგნი და უამრავი ალაფით დაბრუნდნენ შინ.

ქართლ-კახეთი აივსო დოვლათით. ირანის ჯართა მთელი ქონება, უამრავი სურსათი, განძი, სამოსი, თოფ-ზარბაზნები, ტყვია-წამალი, სხვადასხვა იარაღ-საჭურჭლენი, ცხენი და ჯორ-აქლემნი დარჩათ ქართველებს. ამათ დაერთო მოურავისა და ზურაბის მიერ მოტანილი დიდი ალაფიც.

იშვებდა ქართველი ერი. მთელი ივერი ზეიმობდა უსაშინელეს ხიფათისაგან გადარჩენას და ბრწყინვალე გამარჯვებას. ქართლისა და კახეთის ყოველ კუთხეში ისმოდა დიდი მოურავის უსაზღვრო ქება-დიდება.

XXV. გლეხთა თათბირი

25 მარტს ერთი დაკვრით ირანის დიდი ძალების განადგურებამ და ივერიის გადარჩენამ დაღუპვისაგან უზენაესი აღფრთოვანება გამოიწვია ქართველ ხალხში. თავისუფლად ამოისუნთქა ქართლ-კახეთმა. ერის გული აივსო შვეებით, სიამაყით. იგი მთლიანად განიცდიდა იმ უსაზღვრო სიხარულს, რასაც განიცდის ადამიანი სიკვდილისაგან უცებ გადარჩენით. ზეიმობდა მთელი ივერი.

დუმდნენ მოურავის პირადი მტრები, ეს ბოროტი არსებანი, დარცხვენით ქედმოხრილნი და ამ უზარმაზარი მოვლენით გაბრუებულნი.

მოურავის პირადი მტრები: შადიმან ბარათაშვილი, ქაიხოსრო ჯაეახიშვილი, ფარსადან ციციშვილი და მათი მომხრენი, იყვნენ ამჟამად სულიერად ძლეულნი. გმირმა არ იძია შური, არაფერი ცუდი არ შეამთხვია მათ, თუმც შვეძლო ერთი თითის განძრევით მოესპო ისინი ოჯახობით. პირიქით, ამ სულგრძელმა ადამიანმა ბოროტის ნაცვლად მიუზღო კეთილი, რითაც გააოცა ქვეყანა. დუმდნენ აგრეთვე დიდი მოურავის შიშით ქართლის სვაეები: ანდუყაფარ ამილახვარი, იასე ქსნის ერისთავი, ბარათაშვილნი და მათი დამქაშნი. ისინი შეიმალნენ თავის ყაჩაღურ ბუნაგებში. ვერ ბედავდნენ ვისმეზე თავდასხმას და აკლება-აწიოკებას. წყნარად იყო აგრეთვე მთის აფთარი — ზურაბ არაგვის ერისთავი; მას სწადდა ჩაეგდო ხელში ოჟშ-ფშავ-ხევსურეთი და

ყმად გაეხალა ეს თავისუფალი ძაძაცი ხალხნი, რაც კალეც განახორციელა შემდეგ ხანებში და უხვად ღვარა მოქმეტა სისხლი.

დღეს მთელი ივერიის ნამდვილი გამგე. ბატონ-პატრონი. ქომავი და ქირისუფალი იყო მარტოოდენ გიორგი სააკაძე. იგი შეიქნა ორთავ სამეფოს მბრძანებელი, ის იყო ქვრივობოლთა და გლახაკთა შემბრალე მამა. საკმაო იყო დიდი მოურავის ოდნავი სურვილი, რომ მისგან ესოდენ დაეალებულს, მის მალმერთებელ ხალხს ეცნო იგი მეფედ და დაედგა თავზე ივერიის სამეფო გვირგვინი.

მაისის ბოლო რიცხვები, სადამო უამი. მზე თითქმის ჩასვლახეა. მუხრანის ტყე არაგვის პირას. შუაში მომცრო მინდორი, სხვადასხვა მხრიდან მოდიან ცხენოსნები და ფრთხილად ბანაკდებიან მინდორზე. უნაგირიდან სხნიან ხურჯინებს, სადაც უდევთ საგზალი. მოდიან ჯგუფ-ჯგუფად, ესალმებიან და ეცნობიან ერთმანეთს, სხდებიან იქვე მდელიოზე დაგებულ ნაბაღზე და მასლაათობენ წყნარად. უკვე შეგროვდა სამოცამდე კაცი. ესენი იყვნენ: ქართლის სხვადასხვა თემებიდან გლეხთა ყველა ფენის წარმომადგენელი: აზატი გლეხების, სახაზინო, სამონასტრო და საბატონო გლეხთა, შინაყმების, ხიზნების და სხვადასხვა ხელობის საამქროებიდან. აქვე იყვნენ თუშ-ფშავ-ხევისურთა მოთავენი — ბერდია, უჯო, გოგოთურ და სხვანი, ათამდე კაცი. აგრეთვე აქ იყვნენ და თაოსნობდნენ თათბირს თვით დიდი მოურავის ძმადნაფიცნი: ორივე პაპუნა, ლომი ჩრდილელი, გიორგი ქავეთარაძე და თამაზ ქარსიძე. გელა ჩრდილელი კი თან ახლდა დიდ მოურავს, რომელიც იმეამად ათი დღით ისვენებდა ცოლ-შვილში თავის ცოლისძმა ზურაბ ერისთავთან.

პაპუნა ჩივადემ დაცვალა აღრევე დაყენებული გუშაგნი სხვადასხვა საზვერავ წერტებზე, მისცა მათ შესაფერი დარიგება, დაბრუნდა უკან, დაჯდა, როგორც უფროსი, საპატიო ალაგას და მიმართა კრებას:

„ძმებო, თქვენ მოგიწვიეთ აქ თავი კაცები ქართლის სამეფოს სხვადასხვა კუთხიდან, რათა ვიქონიოთ საიდუმლო თათბირი ჩვენი ჩვენი დღევანდელ ვითარებაზე. მოგვხსენ-

ნებათ, რომ ფრიად მძიმე უღელი გვაწევს კისრად მშრომელ ხალხს, გლეხობას. ჩვენ მივკრივართ მიწას. ეშრომობთ დღე და ღამ, ზამთარ-ზაფხულ, ვღვრით შრომის ოფლსა, ჩვენი ნაშრომნადაგით კი ვკვებავთ სხვადასხვა ჯურის ბატონებს, რომლებიც გვაზიან თავზე; ესენი არიან: თავადნი, აზნაურნი, თვით მეფე თავისი დიდი ამალით, სასულიერო პირნი და ჩარჩ-ვაჭრები; რომელ ერთს გაუძლოს საწყალმა ხალხმა!“

„ჰაი, ჰაი, რომ ეგრეა, ჩემო პაპუნა!“ წამოიძახეს აქეთ-იქიდან ზოგიერთებმა.

„გარდა ამისა, ძმებო, — განაგრძო ისევ პაპუნამ, — ყაჩაღად დაგვეგვიან გლეხებს შინაურნი და გარეშენი. შინ — მრავალი თავადი და აზნაურნი, გარედან კი მთის ხალხები: ოსნი, ლეკნი, ქისტ-ჩეჩენი და სხვ... გვესმიან თავს, გვაცლიან ქონებას, სარჩოს, საქონელს, ცოლშვილსაც კი, ზოგს ბილწავენ ჩვენს თვალწინ, ზოგსაც ჰყიდნიან ტყვეებად ჩარჩებზე სპარსეთსა და ოსმალეთში გადასაქარგად“ — ეგეც სრული სიმართლეა, შენი კვნესამე! — წამოიძახეს კიდევ თათბირზე მოწვეულებმა.

— ძმებო! ამას დაუმატეთ კიდევ ორი დიდი პირდაღებული ვეშაპი — სპარსეთი და ოსმალეთი. ისინი მოგვძალებიან სამი მხრივ და ჩანთქმას უპირებენ მთელ საქართველოს! — ჩამოართვა სიტყვა პაპუნა ვაშაყაშვილმა.

— ეგეც სრული ჭეშმარიტებაა! — იგრიალა ხალხმა.

— დაწყნარდით, ძმებო, ფრთხილად, არავინ მოგვაყუროს! — განაგრძო ისევ ჩივაძემ, — ერთი ეს მითხარით, აბა რა გვეშველებოდა ბედშავ გლეხობას, რომ ღმერთს არ მოევლინა ჩვენთვის მხსნელად და მფარველად დიდებული გმირი გიორგი სააკაძე, ჩვენი ძმა, ჩვენი წრიდან გამოსული?! —

— სრული სიმართლეა, ძმაო პაპუნა! უმისოდ ჩვენ მოვისპობოდით. დიდი მოურავია ჩვენი პატრონი და ნუგეში, ჩვენთვის თავდადებული! ეგ ჩვენი მფარველი წმ. გიორგია! — ერთხმად შესძახეს მოწვეულებმა.

— დღეს, ძმებო, ქართლსა და კახეთს აღარ ჰყავს მეფენი, — განაგრძო ჩივაძემ, — ლუარსაბ მეფე ხელში ჩაიგ-

დო შაჰაბაზმა და მოაკელეცინა, ხოლო კახეთის მეფე თეიმურაზ შეჰფარებია იმერეთს და იქედან რუსეთს აპირებს წასვლასო. აჰ, ჩვენში, კი უმეფობამ წახსნა ლაგამი მრავალთა ვადს, აგრეთვე გარს მოხვეულ მტაცებელ ხალხებს, დაგვესმოდნენ ყოველ მხრიდან და გაგვანადგურებდნენ მოლიანად, მაგრამ, საბედნიეროდ ჩვენდა, მეფის მაგიერობას გვიწევს ჩვენი დიდი მოურავი. მისი შიშით რომ კრინტსაც ვერ სძრავს ვერავინ. ის ჩვენი ნამდვილი მეფეა, უგვირგვიწო მეფე!

— მართალია, პაპუნავ! მართალს უბნობ! დიდი მოურავი ჩვენი მეფეა, ჩვენი პატრონი, ზეცით ნაკურთხი და კიდევ უნდა დავსვათ ქართლ-კახეთის მეფედ! დავალგათ თავზე გვირგვინი! — შესძახეს აღტაცებით ერიხმად. ან რაილა საჭიროა ჩვენი გივარგის მეფედ კურთხევა! იგი ხომ ისედაც ჩვენი სარდალია, ჩვენი მეთაური! — ჩაუტოო სიტყვა თამაზ ქარსიძემ. — ყველა დიდსა და განათლებულ ერს მეფე ჰყავს. აი, მაგალითად: დიდი ოსმალეთის მეფე ხონთქარია, სპარსეთის მეფე — ყეინი, მთელი რუსეთის მეფე მოსკოვის ხელმწიფეა, აგრეთვე ევროპის ყველა სახელმწიფოსა ჰყავს თავ-თავის მეფენი. მეფე აერთიანებს ერის შემადგენელთ, აძლევს მათ მთლიანობას, ჰკრავს როგორც ფიქალს, ლაგმავს შიგნით თავადთა ძალმომრეობას, ამარცხებს შემოსულ მტერთ; კარგი მეფე ამდიდრებს და აძლიერებს თავის სამეფოს. ჩვენმა ძლიერმა და ჰკვიანმა მეფეებმა — დავით აღმაშენებელმა, თამარმა და გიორგი ბრწყინვალემ — გააერთიანეს დაფლეთილო საქართველო, გაათავისუფლეს თურქთა და თათართა მონობისაგან, გაამდიდრეს, გაანათლეს და გააძლიერეს დიდად. ამასვე ჩაიდნეს ჩვენი გიორგი მეფე! ბაგრატიონთა სამეფო გვარი ამიერიტ შეიცვლება გლეხის წრიდან გამოსულ სააკაძიანთ გვარით. მაშ გაუმარჯოს, ძმებო, ჩვენს ახალ მეფეს — ხალხის მოთავეს გიორგი სააკაძეს!

— გაუმარჯოს! გაუმარჯოს ჩვენს ახალ მეფეს გიორგის, ერის მოთავეს გაუმარჯოს! — იგრილა ფეხზე წამოდგარმა ხალხმა.

აირჩიეს ხუთი კაცი მოურავეთან მისაგზავნად მისი გამე-
16. ს. ქვარციანი.

ფების შესახებ. არჩეულ პირთა შორის არას შორეულზე მეტი ვიდრე ფეხით მოსული, ძველი ომების გმირი, ასოცი წლის მოხუცი, ოდესღაც ბრგე, ახოვანი ვაჟკაცი ღვთისაგარ მიხდიაშვილი, ამჟამად ღრმა სიბერის გამო წელში მოხრილი და ორივე თვალით დაბრმავებული. იგი ცალი ხელით ებჯინება შინდის მაგარ კვერთხს, ხოლო მეორე ხელი ეყრდნობა თავისი შვილის ბადიშის, თორმეტი წლის ბიჭის მხარს. ბრმა მოხუცს სწადია ხელით მაინც შეეხოს იმ ადამიანს, რომელმაც ორჯერ იხსნა ქართლ-კახეთი დაღუპვისაგან. თათბირის დამთავრების შემდეგ მან გამოართვა თავის ყრმა ეტიკს ფანდური, მომართა სიმნი და დაამღერა ძველთაძველ ომთა ამბები, ოქროს საუკუნის მზის ჩასვენება, პირიმზე თამარის სიკვდილი, ლაშა გიორგისა და რუსუდანის მეფობის შავ-ბნელი ხანა, ხორასნის ხანის ჯელალ ედინის მიერ თბილისის განადგურება და უამრავი მცხოვრების გაჟლეტა, შემდეგ თათართა შემოსევა მრავალჯერ და მთელი ივერის რბევა და ცარცვა მთელი საუკუნის მანძილზე, საქართველოს გათიშვა ორ სამეფოდ, შემდეგ გიორგი ბრწყინვალეს მიერ საქართველოს გაერთიანება და ხანმოკლე მზიანი დღენი, შემდეგ ისევ შავი ნისლი და სისხლის წვიმები, უღმოდ ლანგთემურის შვიდჯერ შემოსევით გამოწვეული და სხვა ასეთები.

ხალხი გატაცებით უსმენდა მოხუცის ფანდურზე ლიღინს, ტკბილ-მწარე ჰანგებს. მოხუცი კვლავ განაგრძობდა სევდიან ერთფეროვან გალობას და უთუთქავდა მსმენელთ გულს ქართველი ერის შავ-ბნელი წარსულით. მოხუცის სიმღერის დასრულების შემდეგ გახსნეს აბგა-ხურჯუნები, ამოალაგეს საგზალი, დააწყვეს იქვე დაკრეფილ ნეშობებზე და შეუდგნენ საერთო პურის ჭამას. პატარა ყანწებით სთავაზობდნენ ერთმანეთს იყსა და ღვინოს, სვამდნენ სმურებს; ამას მოჰყვა სუფრულები და სხვა ხალხური სიმღერები, საერთო ლხინს შეუერთდნენ გუშაგნიც.

ამ დროს შორით მოისმა დუღუკის საამო ხმები. ზუზუნა ჰანგები თანდათან უახლოვდებოდა გლეხთა ყრილობას. ამ ირანულ საკრავმა მყის გაბზარა ხალხის ყურთასმენა. ხალ-

ბი შეტოკდა, ასწია თავი მაღლა და წამოიხალა. მუხუღუნ
წრეში შემოიჭრნენ საამქრო დროშით ათამდე ზორბა ყარა-
ჩოღლენი, შავ ჩოხა-ახალუხ მოსილნი, მუშტის ოდენა კოა-
ლებიანი ვერცხლის ქამრებით და შავი დიდრონი ფაფახებით
ბურვილნი. ამათ სალამი ჰკადრეს იქ დამსწრეთ, უსურვეს
სიამით შექცევა, გაშალეს უცებ სუფრა, დააწყეს ზედ თორ-
ნის პურები, ყველი, დოში, მოთალი, ცივად მოხარშულა
ცხვარი, დაყარეს უხვად წვანილი, მოაგორეს ტიკით კახე-
რი ღვინო, აავსეს პაწია ყანწები, დაცალეს იქ მყოფთა სა-
დღეგრძელო და გულუხვად მიიპატიყეს ხალხი. ყარაჩოღელ-
თა ჯგუფს მეთაურობდა და სუფრას თამალობდა ცნობილი
საქო, მთელ თბილისში განთქმული თავისი კრივით, ქეიფითა
და დარდიმანდობით. ზურნა-დუღუკის დავლურზე ამ ზორ-
ბა ვაუკაცმა გაშალა გრძელი მკლავები და დაუარა მოხ-
დენით, თანაც ჩაბუქნა კიდეც; მარჯვენა ხელში მას ეპყ-
რა ღვინით სავსე ყანწი, ხოლო მარცხენა ხელში ფრიალებ-
და აბრეშუმის ქრელი ხელმანდილი. ცეკვის შემდეგ დუღუ-
კის საამო ხმაზე დაამღერა:

„სანამ ცოცხალ ვარ, ვქეიფობ.
ვახარებ ჩემსა იასა,
მოვეკვდები, გაუხარდება
სამარის კარსა ჭიასა!“

— აზარუმ! აბზანდარუმ! — მიაძახეს დამქაშებმა.

— გაუმარჯოს აქ დამხვედრთ ყველას ერთობლივ! გაუ-
მარჯოს ჩვენს ძმებსა შრომის შვილებს, მშრომელ გლეხობას!
გაუმარჯოს ჩვენს სარდალს დიდ მოურავს!—დასქყვილა სა-
ქომ და მას ბანი მისცა ყველამ ერთხმად.

საქომ ისევ ააყოლა დუღუკს საამო დვრინით:

„სამი რამ მიყვარს ამ ქვეყნად:
ღვინო, დუღუკი, ქალები...
ღვინოს ვსვამ, დუღუკზე ვცეკვავ
და ქალებს ვენაცვალები...“

— ჰაჯან, საქულა ჰაჯან! — შიამახეს ამფსონებია. ქეიფს შემდეგ ზურნამ დაუკრა საჭიდაო და მცირე ხნით გაიმართა ჭიდაობა. ერთი ზორბა ყარაჩოღელი მარდად დაეტაკა ჩასკენილ გლეხის ბიჭს ჭობისხვეიდან. მრავალი ფანდი სცადა მასზე, მაგრამ ვერა რა დააკლო, ვერ გაშალა ზურგით მიწაზე.

ამ ყარაჩოღელთა შემოჭრამ გლეხთა ყრილობაში, ზურნის, დოლის, ღუღუყის ხმებმა, ღვინით სავსე ყანწების ტრიალმა, საქოს ცეკვა-სიმღერამ და შემდეგ ჭიდაობამ დიდი მხიარულება გამოიწვია იქ შეკრებილ გლეხთა შორის, ყველანი ფრიად კარგ გუნებაზე დააყენა.

უკვე ჩასულიყო მზე. ორი კვირის ბადრული მთვარე კაშკაშით დასცქეროდა მხიარულ სუფრას და ხალხის ღრეობას. მისი სხივები ეთამაშებოდნენ იქვე არაგვის ცელქ ზვირთებს და ქმნიდნენ ლიგლივა ჭავლს.

ხმაური და სიმღერა მოესმა იარაღასხმულს და აბჯარში ჩამგდარ ერთ ზორბა რაინდს, რომელიც მოაგელვებდა სამხედრო შარაზე თავის შავ მერანს. უკან მოსდევდა ცხენითვე სამი მხედარი.

— ეს რა დღეობაა? — გაიკვირვა რაინდმა. — დღეს არავითარი დღეობაა, ეკლესიაც კი არსად ჩანს, მაშ რამ შეკრიბა ეს ხალხი ამ ტყეში? უნდა გავიგო, რა ხდება აქ.

რაინდმა შეაჩერა თავისი შავი რაში და მიუბრუნდა ერთ მხლებელს.

— გელა, ჩამოხედ ცხენიდან, შედი ჩუმად იმ მუხნარში და გამიგე, რა ხდება. ჩვენც მოგყვებით ნელა ცხენებით.

მხედარი სწრაფად გადმოხტა ცხენიდან, გადასცა იგი ამხანაგს, თვითონ კი გასწია ტყისაკენ მგლური ნაბიჯით და მალე შევიდა მალნარში. დანარჩენები მიჰყვნენ უკან ტყის პირას და შეაჩერეს ცხენები. მცირე ხნის შემდეგ გამოჩნდა გელა და მიმართა რაინდს:

— კარგად დავზვერე, ბატონო. არაგვის პირას, შუაგულ ტყეში, პატარა მინდორზე სხედან სამოცამდე კაცი და ლხინობენ. რაღაც დიდი სიხარული ემჩნევა ყველას სახეზე. ხშირად იმეორებენ შენს სახელს და სმენ სმურებს. მათშივე

დავინახე შეხი ერსაგული და ძმადფიცულსი ორივე პაპუნა, ლომი ჩრდილელი, ავრეთვე ქარსიძე და ქავთარაძე, ვიცან ავრეთვე ფშავ-ხევსურთა ბელადნი ბერდია, უჯო და გოგო-თური. ცხენები იქვე ახლოს ჰყავთ ხეებზე მიბმული.

რაინდი ფრიად დააეჭვა ამ ამბავმა. მან შეცვალა გეზი და არაგვის მხრიდან მოულოდნელად წაადგა თავზე ქეიფ-ში შესულ ხალხს.

იგი ზამინვე შენიშნა ლომიმ და ზეზე წამოიჭრა ამ სიტყ-ვეებით:

— ერის მოთავე მობრძანდა!

ყველანი წამოცვიდნენ მხიარულად.

— ხალხსა და ჯამაათს გაუმარჯოს! — შესძახა მისელის უმაღ დიდმა მოურავმა.

— ლმერთმა და წმ. გიორგიმ გამარჯვება ნუ მოაკლოს ჩვენ მფარველსა და ნუგეშა — ერის მოთავეს!

იყო საერთო პასუხი.

— აქ რას აკეთებთ, ძმებო? — დაეკითხა ივერიის გმირი. ჰაა, ყველანი აქ ყოფილხართ ჩემი ძმადფიცულნი, ფშავ-ხევსურთა და სხვადასხვა თემთა თავი კაცები. რას ნიშნავს ესა, ძმებო? აბა, რას დგეხართ, დასხედით.

— ბევრს არაფერს, ჩვენო იმელო! — უთხრა ბერდიამ, — პაწაი თათბირი მოვაწყვეთ შუა ალაგას, მეფე ავირჩიეთ.

— როგორ თუ მეფე, ვინა? — გაიკვირვა სააკაძემ.

— ვინა და შენა! — წამოისროლა უჯომ როყიოდ. — რა-ლად დავმალეთ, ძმებო! ბარემ ვუთხრათ და ის იქნების! — მიმართა მან ხალხსა.

მაშინ წამოდგა ზეზე მთელ ქართლში ცნობილი თავის მამაცობით და სიტყვა-პასუხით ბერო კენჭოშვილი, დაებჯინა ჯოხს და მოახსენა:

— დიახ, ერის დიდებავ, განგებ მოვაწყვეთ ეს თათბირი ამ არაგვის პირას. მეფე გვწადია ქართლ-კახეთისა და, აჰა, ავირჩიეთ კიდევ ერთბაშად. ეს შენ ხარ, დილო სარდალო! შენზე შეჩერდა ყველას აზრი და გონება. შენ გამოხველ ჩვენი წრიდან, შენ დაიმსახურე მეფური პატივი და დიდება. შენ გუშაგობ ესოდენ ხანია ივერთა ერსა, შენ ქომაგობ უმ-

წყო გლახობას. შენ ჩამოიყვანე ისინი მთა-ხევებიდან და დაასახლე გაშლილ მიწა-მამულზე. შენ მოაშორე ისინი დიდ თავადებს და შერაცხე სამეფოდ, ბევრი მათგანი კიდევე ჰყავ აზატად, დაასახლე დაბა-ქალაქებში და ჩარიცხე სხვადასხვა ამქრებში. შენ მფარველობ სასტიკ ბატონთაგან გაქცეულ გლეხებს და აძლეე მათ მიწა-მამულს. შენ გვიხსენ მთელი ქართლი თათარხანის შემოსევის დროს. შენ იხსენ ქართლი და კახეთი შაჰაბაზის პირველ შემოსევის ყამსა და ახლაც, ამ ორი თვის წინ ხარება დღეს ვინ გაანადგურა ერანთა უამრავი ლაშქარი და ვინ იხსნა ქართველი ერი სრულ მოსპობისაგან, თუ არა შენ, დიდო გმირო და ქვეყნის დიდებავ! ამიტომაც ივერთა ქვეყნის უსაზღვროდ მაღლიერი ერი, გლახობა, ჩვენის პირით, ჩვენდამი რწმუნებით გირჩევს შენ, დიდო გიორგი, ივერიის მეფედ! ამიტომაც, ძმებო, ხალხო და ჯამათო გაუმარჯოს ჩვენს დიდებულ მეფეს, დიდ სარდალს გიორგი სააკაძეს!

— გაუმარჯოს ჩვენს დიდებულ მეფე გიორგის! გაუმარჯოს! — იგრილა ხალხმა ფეხზე წამოდგომით.

მოხუცმა ბერომ გაავსო ღვინით პატარა ყანწი და მიაწოდა დიდ მოურავს ამ სიტყვებით:

— სუფრა დაგვილოცე, სუფრაზე შემოსწრებულო მეფევი! იქამდე შენ იყავ ქართლის გამგე, ქართლის უგვირგვინო მეფე, ამიერიტ შენ იქნები მთელი ივერიის, სრულიად ქართლ-კახეთის გვირგვინოსანი მეფე! ეს არის ერის სურვილი! ხმა დვთისა და ხმა ერისაო, ნათქვამია და, აჰა, ერის ხმა შენ გირჩევს მეფედ და ამ ხმას დაადასტურებს თვით ზეციერი მამა ღმერთი!

ამ სიტყვებით შეშფოთებულმა სააკაძემ ჩამოართვა მოხუცს ყანწი, დალია საერთოდ ყველა სხადღეგრძელო და საყვედურით გადახედა თავის ძმადღვიცულთ, რომლებზედაც აიღო ეჭვი ამ თათბირის მოწყობაში. მათ დარცხვენის ნიშნად ჩაღუნეს თავი. ზემოდან დადღადებდა პირბადრი მთვაჟრე, ზოლო მათ წინ მიშხუოდა ცელქი არაგვი, ეს ბუმბერაზ მყინვარის ჩაუქი შვილი; მის ხმაურს ეჯიბრებოდა ბუჩქებში შეფარებულ ბულბულთ სტვენა და ტია-ტია...

ერის მოთავე ჩამოჯდა მისთვის მიგორებულ ხის ძორზე, გადახედა მძიმედ კრებულს და დაიწყო დინჯად:

— ტყვილა მომცდარხართ, ძმებო! ცუდი რამ გიფიქრიათ, ცუდად გაიზრიათ: მაგ არჩევანით მეც მღუპავთ და თქვენს თავსაც იღუპავთ... ტყვილა შეუყვანიხართ შეცდომაში იმათ, ვინც აქ მოგიწვიათ. ხანდახან კეთილ სურვილებსაც კი დიდი ზიანი მოაქვს ერისათვის. უჭკუოდ და ნაჩქარევად ნააზრვეი ცუდად თავდება ხოლმე. მაკვირებს დიდად, როგორ შეხვედით შეცდომაში, აქ მოსულთა შორის ბევრი ბრძენი და დარბაისელი გლეხნი, თუნდაც ჩვენი ბერო კენჭოშვილი. რას ფიქრობდით, განა? ნუთუ ქართლსა და კახეთში თვინიერ გლეხობისა სხვა წოდებანი აღარ არიან? როგორ გგონიათ. ძმებო, თავადნი და აზნაურნი, ვაჭარნი, მოხელენი და სასულიერო წოდებანი განა მოიწონებენ თქვეს არჩევანს? განა შეიწყნარებენ მეფედ თქვენ მიერ არჩეულ გლეხის წრიდან გამოსულს გიორგი სააკაძეს, თუგინდ ათჯერ იხსნას მან მთელი ივერი დალუპვისაგან? მათ თვალში მე ხომ გლეხაჲ შვილი ვარ, ჯავახიშვილის ყმის შიომ სააკაძის საშუალო ვაჟი, და ეს საკმარისია...

აქ შეჩერდა მცირე ხნით დიდი მოურავი და გადახედა კრებას. ხალხი მღუმარედ მისჩერებოდა მას და ნოჰაჲდა გმირის თვითეულ სიტყვას.

— ხომ გახსოვთ, ძმებო, რა აურზაური ასტეხეს თავადებმა და აზნაურებმა, ოდეს ჩემი და მაკინე ითხოვა ცოლად ლუარსაბ მეფემს რვა თვის შემდეგ მეფეს გააშეებინეს ცოლი, ჩაკეტეს მონასტერში, მე-კი დამიპირეს დალატით სიკვდილი მთელი ოჯახობით და გადავრჩით სულ შემთხვევით. ახლა-კი რომ გაიგონ გლეხებს სწადიათ მეფედ გიორგი სააკაძეო, ხომ ამხედრდნენ მთლიანად გაბატონებული წოდებანი გლეხთა წინააღმდეგ და ხომ შეიქმნა ქართლში ძმათა შორის სისხლის ღვრა და ეს უნდათ სწორედ ჩვენს შინა და გარე მტრებს, ხომ აგვიკლეს, ხომ მოგვსპეს მაშინ სულ ერთიანად! აბა, რად არ განჭვრიტეთ ჭკვიანმა თავმა კაცებმა ეს შედეგები! გარდა ამისა, კახეთის ხალხი განა შეიწყნარებს თქვენ მიერ არჩეულ კაცსა? განა კახეთი დაგმობს

ბაგრატიონთა გვარის მეფეს, ქეთევან წამებულის ვაჟსა, და იწამებს მეფედ ვილაც გიორგი სააკაძეს?! არა, ძმებო, ნუ სტყუებდებით! ნუ აყოლიხართ გრძნობას. ზოგი რამ გონებასაც დაეკითხეთ!

— მაშ, შენ უარს უბნობ მეფობაზე? — დაეკითხა ხევსური უჯო. — ეგ როგორ იქნების, გივარგი! ხალხს არ უნდა აღუდგე. ხალხს სწადია შენი მეფობა და შენც უნდა მიიღო...

— „არა, ჩემო უჯო, ეგ არ ეგების, ეგ არ მოუხდების ჩვენს ქვეყანას, ასეთი წადილი მეც დამლუპავს და თქვენცა, ვაუწყეთ კვალად.

— მაშ, შენა რად გწადის დარჩე? — შეეკითხა გოგოთურ.

— იმად, რაცა ვარ, ისევ ქართლის მოურავად და ჯარების უფროსად. ამაზე შორს სააკაძიანთ გვარი ვერ წავა. ესეც ფრიალ დიდი ჯილდოა მისთვის, ესეც კი ვერ მოუნლებიათ ჩემს პირად მტრებს — დიდ თავადებს, სხვა უფრო დიდ რამეზე ფიქრი მარტოოდენ სიგიჟეა, ან ბავშვური ოცნება...

ამ სიტყვებთან ერთად გმირმა ამოიოხრა და ჩაღუნა თავი.

— მაშ, ვინ გწადია ივერიის მეფედ? — შეეკითხნენ აქეთიქიდან.

— ვინა და რომელიმე ღირსეული პირი ისევ ბაგრატიონთა გვარიდან, რომელსაც უკვე შეჩვეული არიან ყველა წოდებანი, ასეთი კაცი კიდეც მეგულების, იგი არის სვიმონ მეფის ძმისწული, როსტომ ბატონიშვილი, ხოლო სპარსეთში მას ეძახიან ხოსრო-მირზას. დიდი ჭკუისა და გონების კაცია, მასთან მამაცი, სამართლიანი და მტკიცე ხასიათის, მაგრამ, სამწუხაროდ, იგი სჯულდით მაჰმადიანია, შაჰაბაზის ფრიალ ერთგული და ახლო მეგობარი, ამიტომ მას ივერთა ერი ამჟამად არ ისურვებს მეფედ და ჩვენც ანგარიში უნდა გავუწიოთ ამას.

— სხვა ვინმე კიდეც მეგულების მეფედ, დიდო გიორგივ? — შეეკითხნენ ზოგიერთანი.

— სხვა კი არავინ, თვინიერ კახეთის მეფე თეიმურაზისა. მისი დადებითი მხარე ის არის, რომ ის უკვე მეფეა კა-

ხეთისა, ქრისტეს მორწმუნე, ქეთევან წამებულის ვუი, თანაც დაკავშირებული ქართლის სამეფო ტახტთან მოჰყრობით; როგორც იცით, მას ცოლად ჰყავს . ლუარსაბ მეფის და ზორეშანი. ამ სახით მას გამეფებას ჩვენსავე ვერ აღუდგებიან ვერც მღაბიონი და მეტაღრე ვერც გაბატონებული წოდებანი. აი, მისი მეშვეობით შესაძლოა გაერთიანდეს ორი საუკუნის წინათ გათიშული ქართლი და კახეთი. ამასთან ერთად მწაღია დაგამოყვრო თეიმურაზს დიდი სარდალი, ჩემი ცოლისძმა ზურაბ ერისთავი, და მით გავნასკვო ერთურთ შორის მოყვრობა-მეგობრობის კავშირი.

ამ სახით თეიმურაზი იქნება გვირგვინოსანი მეფე ივერიისა, ხოლო მე, თქვენი ძმა და მეთაური, ივერიის გამგე და მოურავი, ივერიის სპალაშქართა მთავარსარდალი. მაშ რაღა გსურთ მეტი?!

— მაშა, შენვე დარჩება, ჩვენო დიღო გივარგივ, ივერიის უგვირგვინო მეფელ, ისევე ჩვენს ნუგეშად და მფარველად! — წამოიძახა ბერდიამ.

— ეგრე, ჩემო ბერდიავ. ახლა კიდევ ნუ გავიწყდებათ, ძმებო, რომ ომი ერანთან არ დამთავრებულა მისი ჯარების განადგურებით ხარება დღეს. სპარსეთი დიღია, თითქმის ოცჯერ მეტი ივერიაზე. ამიტომაც უნდა ველოდეთ ამ მოკლე დროში ახალ თავდასხმას. გაბრაზებული შაჰაბაზი ივერიის მოსასპობად გამოგზავნის ორჯერ მეტ ლაშქარს უპირველესი სარდლებით, ამის გამო ახლავე უნდა მოვიწვიოთ თეიმურაზ და ვაკურთხოთ ივერიის მეფელ და მასთან დაჩქარებით უნდა შეეკრიბოთ ქართლსა და კახეთში საკმაო ჯარი, რათა მზად დაეხედეთ ჩვენს უძინარ მტერს. ახლაც ამ მიზნით ვიყავ ანანურს ზურაბ ერისთავთან; უნდა ვნახო თეიმურაზ მუხრან-ბატონი, ზაქარია კათალიკოსი, იასე ქსნის ერისთავი, ზაზა ციციშვილი და სხვა გავლენიანი დიდებულნი, ხოლო კახეთიდან უკვე დაბარებული მყავს კახეთის გმირნი: დავით ჯანდიერი, ნოდარ ჯორჯაძე და თამაზ ვაჩნაძე. დანიშნულ დროზე ესენი ჩამოვლენ თბილისში. მაშ, ძმებო, გამარჯვებით! — ზმ სიტყვებთან ერთად მარდად წამოდგა დიდი მოურავი და მოითხოვა თავისი მერანი.

— კარგია, რომ შემთხვევით გნახეთ აქა. ახლავე შეეცადეთ ყველანი ომისათვის მზადებას. ნახვამდის, ძმებო! ამ სიტყვებით. გმირმა შემოპკრა დეზი თავის ბედაურს და მიეფარა ტყეს.

უკან მიჰყვნენ გელა და ორი თანმხლები.

იმედმიხდილი თეიმურაზი უკვე ჯდებოდა გემში და აპირებდა წასვლას რუსეთისაკენ, როს მიიღო ფრიად სასიხარულო ამბავი ივერიის მეფედ მოწვევის შესახებ. იგი მაშინვე გამოეშურა თავისი ცოლშვილითა და აძალით. ქართლიმერეთის საზღვარზე მას შეეგებნენ გიორგი სააკაძე, ქართლ-კახეთის დიდებულნი, მაღალი სამღვდელოება და აზნაურნი, მდიდრულად მორთულნი. მიიღეს მეფე დიდი პატივით და მოიყვანეს მცხეთას, სადაც დახვდა კათალიკოსი ზაქარია სასულიერო კრებულთ. აქ, უამრავი ხალხის აანდისწრებით, სვეტიცხოვლის ტაძარში საგანგებო ზემოთ აკურთხეს თეიმურაზ პირველი ივერიის მეფედ და დაადგეს თავს ძვირფასი გვირგვინი.

ამრიგად შეერთდა თითქმის ორასი წლის წინათ გათიშული ქართლი და კახეთი.

XXVI. მონასტრის ზღუდეთა შორის

ქართლის ერთ მყუდრო ხეობაში მორცხვად შექმარებია მთის უბეს ქვათახევის დედათა მონასტერი, სადაც იმყოფება სამოცამდე მორჩილ-მონაზონი იღუმენ ნინო ამირეჯიბის უფროსობით. საკმაოდ მოზრდილსა და ვაკე ალაგას შუაში აუმართავთ ლურჯი ქვის გუმბათიანი ტაძარი სამრეკლოთი. გვერდით დგას ქვის ორსართულიანი დიდი შენობა ფართო აივან-დერეფნებით. ქვემო სართულში მოთავსებულია სკოლა, სერობის ოთახი და სახელოსნო, ხოლო ზემო სართულში — შევირდ ქალთა საწოლი და სამეცადინო დარბაზები. იქვეა იღუმენისა და მისი მოადგილის სენაკებიც.

მონასტრის ეზოს ავლია ქვის მაღალი ზღუდე, რომლის ოთხივე კუთხეში აუმართავთ საგუშაგო ბურჯები. ზღუდის ირგვლივ შიგნიდან ჩამწკრივებულა მორჩილ-მონაზონთა სენაკები. იქვე გადაღმით მაღალ ყორე მოვლებულ ფართო ეზოში აუგიათ ხულა-ბელლები, მარანი, სახაბაზო, სამწარეულო, აბანო და სხვა საჭირო ნაგებნი. ორივე ეზოს ამკობს კაკლის და ცაცხვის უზარმაზარი ხეები და მწვანე მოლი. ეზოებშივე მოჩუხჩუხებენ ანკარა წყარონი ქუქანქმკმაზავთა მიერ მთებიდან თიხის მილებით გამოყვანილი. ორივე წყაროს ამკობენ თლილი ქვის აუზები. იქვე ჰკიდია მაგარი ძეწკვით სპილენძის მოდიდო სარწყულნი. მეორე ეზოს გვერდით კი ხევში ჩაუდგამთ ხის წისქვილი.

მონასტერს გარს აკრავს საკმაოდ ვრცელი ბალ-ბოსტანი. ვაზნარი და საყანე ადგილები. მათ უკან კი გოროზად ამარ-

თულა ტყით დაბურული, ამწვანებული ძთები. ბალ-ბოსტან-ში მუშაობენ მორჩილ-მონაზვნები და მოწაფე ქალები, ხოლო ყანებსა და ვენახში — მონასტრის ყმები, რომლებიც ცხოვრობენ იქვე პატარა სოფლად. ბალში მოუწყვიათ საფუტკრე და დგას ასამდე სკა. თავლს საზრდოდ ხმარობენ. ხოლო ცვილიდან აკეთებენ სანთელ-კელაპტრებს.

მონასტერში აღსასრდელად არის ასოცამდე ქალი, როგორც თავად-აზნაურთა, ისე სასულიერო პირთა და გლეხთა ასულნი, ასაკით შვიდიდან თოთხმეტ წლამდე. ამათ ასწავლიან წერა-კითხვას, ხაზვა-ხატვას. ანგარიშს, გალობას, საღვთო სჯულსა და ქართლის ნატიანეს. აგრეთვე ასწავლიან სხვადასხვა ხელსაქმეს, ე. ი. ქრა-კერვას, ქსოვას, ქარგვას აბრეშუმ-ოქრომკედით, ხეზე ჩუქურთმების ამოქრას და სხვ. ამასთან ერთად ავარჯიშებენ და აჩვენენ სამეურნეო და საოჯახო საქმეებს: მებოსტნეობას, ბაღოსნობას, მეფუტკრეობას, აბრეშუმის მოწევას, ხორბლეულის გარეცხვას, დაფქვასა და გამოცხობას, ხილის მოკრეფა-შენახვას, წნილის დამზადებას, ტკბილისკვერ-ჩურჩხელების და ჩირის კეთებას, სხვადასხვა ჭამადის შემზადებას, რეცხვა-გაუთოებას, პარკის ძაფად ამოღებას, ბამბა-მატყლის დართვა-დაგრეხას, შალეულისა და ხამ-დარაიის ქსოვას და სხვ. ზოგიერთებს კიდევ, უფრო ნიჭიერთ, ასწავლიან მკურნალობას და საჭირო წამლეულის შემზადებას.

მოწაფე ქალთა ოსტატნი არიან აღნიშნულ საგნებში კარგად მომზადებული და გაწვრთნილი მონაზვნები... შეგირდ ქალებს თაღნი კაბები აცვიათ. საზრდობაში დაცულია ზომიერება. აქ დიდი ყურადღება ექცევა შეგირდ ქალთა ყოფაქცევას და ზნეობრივ აღზრდას.

ასეთი წესები იყო დაცული საქართველოს ყველა მონასტერში და მათგან გამოდიოდნენ მწერლობასა და მეოჯახეობაში კარგად დახელოვნებული ქართველი დედები, რომლებიც საზრიანად მართავდნენ ოჯახს და უზრდიდნენ სამშობლოს ღირსეულ შვილებს, ამავე დროს იყვნენ სულით მტკიცენი და ზნეობით ფაქიზნი. ამიტომაც ქართველ დედას დიდი პატივი ჰქონდა მოპოვებული შინ და გარეო. მხოლოდ

ქართული დედის ზეგავლენით უნდა აიხსნას ის საარსებო გმირობა-სიმაძაქვე სულიერი ძალა, ხასიათის სიმტკიცე, ზრდილობა და საერთოდ რაინდული თვისებანი, რითაც დაჯილდოებული იყო ქართველი ხალხი და რისი მეოხებითაც ასეთი პედგრობით ებრძოდა იგი შემოსეულ უამრავ მტერს და უძლებდა ათას წლობით სასტიკად მჭროლავ ისტორიულ გრიგალს.

კარგად იყო დაყენებული ძველად სწავლა-აღზრდის საქმე მონასტრებთან არსებულ ვაჟთა სემინარია-აკადემიებში, საიდანაც გამოდიოდნენ გამოჩენილი მწიგნობარნი რიტორნი, მკვლევარნი და მწერლები, რომლებმაც მეთორმეტე საუკუნეში აიყვანეს ქართველი ერის ნიეთიერი და მეტადრე სულიერი კულტერა ფრიად შესამჩნევ სიმადღემდე, ხოლო პოეზიაში წარმოშვეს ისეთი დიდი გენიოსი, როგორიც იყო შოთა რუსთაველი, რომელმაც მსოფლიო გენიოსთა შორის პოეზიის დარგში დაიკავა დიდად საპატიო ალაგი.

აი, ამ ქვათახევის მონასტერში დამარხეს ცოცხლად ლე-არსაბ მეფის უბედური მეუღლე, გიორგი სააკაძის და ტურფა მაკინე. ეს ქალი თავადებმა ძალად გააშევიზინეს სუსტი ხასიათის მეფეს. მაკინემ არ ისურვა აეგოთ მისთვის ცალკე სახლი და მოთავსდა მონაზვნის უბრალო სენაკში. იგი დიდხანს მოსთქვამდა უნუგეშოდ მონასტრის ბნელ თაღებ შორის თავის უნაზეს გრძნობას, ასე სასტიკად გათელილს ქართლის მეფე-დიდებულთა მიერ. ხშირად ისმრდა ქორფა გულიდან აღმომხდარი უიმედო გმინვა, ხშირად ნამავდა მშვენიერ თვალებს მწარე ცრემლები.

მაგრამ, მოგეხსენებათ, დრო მკურნალია. მაკინეც შეეჩვიო თავის ხვედრს, ვარამს და კაეშანს. იგი მზერდა თავის ამხანაგ-მონაზვნებში სულის სიწმინდეს, მაღალ სათნობას, მტკიცე რწმენას და უზენაეს სასობას ჯვარცმულის მიმართ. მათი ბაძვით მაკინემაც გაიმავრა გული. დაუცხრა უბედურ ქალს მწვავე ვნებანი. ხორციელი სიყვარული შეიკვალა ზეციურ გრძნობად, მეტადრე კი მას შემდეგ, როს გაიგო თავის ესოდენ საყვარელ ლუარსაბის წამებით სიკვდილი. დიდხანს იგლოვა მონაზვნის ძაძით მოსილმა თვისი ბედშავი მეუღლე, ასე უდროოდ განშორებული ამ ქვეყნით

და შაჰაბაზიმ ბრძანებით მოკლული. ხოლო შეჰდეჯ ძხურვალე ლოცვა-ვედრებით მაკინემ თითქო დაუკავშირა თავის სულიერი არსი ლუარსაბის სულს, მით იგემა უტკბესი შვება. ხშირად ევლინებოდა ქალს, ცხადად თუ სიზმრად, ბედშავი მიჯნური, მოწამის გვირგვინმოსილი. იგი იღვა ხოლმე მაკინეს წინაშე მუხლმოდრეკით მღუმარე და ცრემლით სავსე თვალებით თითქო ემუდარებოდა პატიებას. ამ დროს უზენაეს სიტკბოსთან ერთად უზომო წამებას განიცდიდა შეყვარებული ქალის სულიერი არსება...

წირვა-ლოცვის დროს მონასტრის ტაძარში მაკინეს საოცნებო ხმა მკაფიოდ ისმოდა მგალობელთ შორის და უსაზღვრო სიტკბო-სინაზით წკრიალებდა ობლად ეკლესიის თალებში, ვით ციური ზარი. უამრავი ხალხი აწყდებოდა მონასტერს მარტოოდენ იმ მიზნით, რომ ესმინათ მაკინეს გალობა. ხანდახან ამ გალობას უნებლიედ ჩაექსოვებოდა უსაზღვრო სევდის მკვნესარე ჰანგი; უცებ წყდებოდა მკვნესარე ხმა და მონაზონთა მწყობრ გალობაში გაისმოდა მიწაზე დამხობილი მაკინეს მწარე ქვითინი, რაც იწვევდა მლოცველთა შორის უზომო სიბრალულს და ცრემლთა დენას.

უამრავი შესაწირავი მოსდიოდა მონასტერს ყოველ მხრიდან მაკინეს მეოხებით. თავისი წმინდა ცხოვრებით, მაღალი სათნოებით და სინაზე-სიკეთით უსაზღვრო პატივისცემა მოიპოვა მორჩილ-მონაზონთა და მოწაფე ქალთა შორის. მდაბიო ხალხი ხომ აღმერთებდა მაკინეს და თვლიდა წმინდანად. თვით იღუმენი ნინო ხშირად შედიოდა ამ ქალთან მის სენაკში, ტკბებოდა მასთან საუბრით და ანუგეშებდა სულიერად დასჯილს.

მაკინე იყო აღზრდილი მცხეთის წმ. ნინოს დედათა მონასტერში და ამ ფრიად ნიჭიერ ქალს საუკეთესოდ ჰქონდა შესწავლილი საერო და სასულიერო მწერლობა, მხატვრობა და ნაირნაირი ხელსაქმე. უკვდავი „ვეფხისტყაოსანი“ ხომ ზეპირად იცოდა მან. ამ ქალის ხელი ერთი წუთითაც კი არ ჩერდებოდა. ის იყო დაუზარებელი მუშაკი და ყველას ეხმარებოდა, ბალ-ბოსტანშიაც კი მუშაობდა; ხოლო სკოლაში ასწავლიდა სიტყვიერებასა და მხატვრობას. მაკი-

ჩემ კარგად იცოდა მკურხალობაც, ჰქონდა კარაბადინი და
ბრავალი სნეულნი მიდიოდნენ მასთან სააქიმოდ.

მაისის ტკბილი საღამო. ჩამავალი მზე ღიმილით ემშვი-
დაბება მობიბინე მთებსა და მდებლოს. ცელქი ნიავი ფაქიზი
ფრთებით არხევს პურეულს და ამრიალებს ხის ფოთლებს.
კოპწიად გაშლილი ყაყაიო ალამაზებს მწვანე ყანებს. ბუნე-
ბის მყუდროებას არღვევს მხოლოდ მთის პატარა მდინარე
კავთურა თავისი ჩხრიალით და უამრავი ფუტკარი, რომლე-
ბიც ბზუილით მოსდებიან ველსა და ბალებს.

ამ საოცნებო ბუნებას თითქო შესტრფის მშვენიერი სახი:
ფერმკრთალი მონაზონი. იგი მარტოდ ზის ამწვანებულ
კორდზე ხის ქვეშ, მონასტრის გადაღმით. ღრმა ფიქრებში
შეცურებულა მისი გონება. რაღაც სევდანარევი შვება-სი-
მით აღვსილა მისი თვალები. ის თვალები თითქო მზერენ
ვიღაცას. ქალის არსება ამჟამად შეუპყრია ტკბილ-მწარე მო-
გონებებს. მის თვალწინ იშლება სხვადასხვა მხიბლავ ფერე-
ზად წარსულის სურათები: დიდებული ნადიმი თავისი ძმის
ბაღში; მოხდენით გაშლილი სუფრები; უამრავი სტუმარი,
მდიდრულად დართულნი; ლამაზი მეფე, ნორჩი ქაბუჯი.
ტრფობით აივსო ვაჟის თვალები, ოდეს უტურფესი ასული.
ივერისა აწვდიდა მისივ სიმღერით მოხიბლულს ღვინით.
სავსე ოქროს ფიალას. შემდეგ მთვარის შუქზე ბაღის თა-
ლარში სიყვარულის ახსნა...

— ოჰ, ღმერთო! რა ტკბილი, რა ნეტარებით სავსე იყო
ის პირველი შეხვედრა! შემდეგ მოხშირებული სიარულა,
ერთმანეთის ნახვა, უმანკო ტრფობა, საალერსო სიტყვები,
სასახლეში მიწვევა, ძვირფასი საჩუქრები...

ოჰ, ზეცავ! რა სანეტარო იყო ის წამები! რა ბედნიერი
ვიყავ იმ ხანებში მე უბედური!

უნებლიედ წამოიძახა ქალმა ეს სიტყვები და გამოერკვა
ოცნებიდან. მიმოიხედა; არ ჩანდა სულიერი. მზე უკვე გა-
დასცდენოდა მთებს და ბუნებას მოესხა მწუხრის მოლურ-
ჯო ბლონდი. ამოწვერილიყო პირბადრი მთვარე და მორც-
ხვად ახვედა თავის სხივთა ვერცხლოვან ქსელში მთებსა
და მდებლოს.

ქალს დაეუფლნენ კვლავ წარსულის მიკონებახი.

— შემდეგ შუამავალთა ორჯერ მოგზავნა, თანხმობის მიღება, გვირისწერა ამავ მონასტერში, მკირავ ქიარწილი. პირველი ღამე ცხირეთის სასახლეში... ო, ნეტარებაჲ ამქვეყნიურო, მწვავეჲ და ტკბილო, ხოლო იმაჲ დროს მაცდურო და წამიერო! მალე ჩამწარდა ეს სიტკბონი მე უბედურსა. ჩვენს წინააღმდეგ მალე აზღვაფდნენ დიდი თავადნი, ქალნი თუ კაცნი. იუკადრისეს მდაბიო გვარის ასულისა დედოფლად ყოფნა. განრისხდნენ ღიდად უძღურ მეფეზე და აიძულეს ის ბედშავი გაეშვა ცოლი... და განმიტევა იმ უბედურმა... შეშინდა, დამთხო... ძალამ მოღრიაკა, დიდებულთ ძალამ, რისხვამ, მუქარამ... ოჲ, მანსოვეს ის ღამე დაუვიწყარი, როს უკანასკნელ ტრფობა-აღერსით ერთიმეორეს ვეთხოვებოდით, ვემშვიდობებოდით სამარადისოდ... რარიგ გმინავდა მეფე ივერთა! რარიგ ვსტიროდით ჩვენ ორთავენის როგორ მოვაქვამდით მწარე ცრემლებით, როგორ ვალტობდით მიჯნურთ სარეცელს... თითქო ვმარხავდით ერთიმეორეს ორიგ ცოცხლადვე მიცვალებულნი... და ამ ტირილსა, ამ ვაებაში ჩვენ გავათენეთ... მწარედ დაღლილნი და დაქანცულნი იქვე ვესვენეთ... სიკვდილის ფერი გვედო ორთავეს. როს ირაყრაჲ და სარკმელიდან შემოაშუქა დღისა სინათლემ, კარებთან მოღვა ლალა შადიმან, ბოროტი სული, უხმობდა მეფეს... გადამეხვია უკანასკნელად ის უბედური, ჩამიკრა გულში, იწყო ქვითინი... კვლავ დაუძახა მეფეს ლალამ უფრო ხმამაღლა. „მოვალ, ჯალათო!“ — ეს უპასუხა მან გამწარებით, ერთიც მაკოცა მწვავედ, შმაგურად და შეშლილივით გავარდა გარეთ. ჩემს ყურს მოესმა მისი ქვითანი... ორი ჯალათი — ქაიხოსრო და ფარსადანი — მოიჭრა ჩემთან, წამავლეს ხელი და ტახტრევანით აქ მომიყვანეს, ამ მონასტერში, მე ცოცხალ-მკვდარი, რათა ამ ქვეყნად მწარედ დასჯილმა ბნელ თაღებ შორის დავლიო სული, ვზილო ცხოვრება ეს უამური...

ატირდა ქალი. ამ მოგონებამ მას აუშალა ძველი ჭრილობა. დიდხანს ტიროდა გულამოკენესით. ცრემლით ახშობდა აგიზგიზებულ ცეცხლის გენიას. შეჩერდა ბოლოს, შეიშრო

თვალნი შავი მანდილით, მიმოიხედა გონდაკარგულად და კვლავ შეეცურა მოგონებათა მწველსა მორევში.

— იმ ულმო რისხვის ორი წლის შემდეგ გაზაფხულისა ტურფა საღამოს აი აქ ვიჯექ, ამავე ადგილს, მწარე ფიქრებით გარემოცული, როს დავინახე — ქაბუკი ვინმე მოაგელვებდა ჩემკენ ბელაურს. ვიცან მაშინვე, ის იყო მეფე, ლუ-არსაბ მეფე, ჩემი მიჯნური... წამოვიქერი, ვით შეშლილი, გონდაკარგული, უსაზღვრო ტრფობით აღტყინებული, და დავაპირე ქვემოთ დაშვება შესაგებებლად, გულს ჩასაკვრელად... და დაეწია ცხენის ქენებით ორი მხედარი მოხუცებული, გადაუღობეს მას სავალი გზა. ერთმა მათგანმა ცხენის სადავეს უტაცა ხელი, ვითარცა ბავშვი ის შეაჩერა და მიაძახა გესლი სიტყვები... ვიცან ორთავე, — ჩემი ჯალათნი... ერთი მათგანი იყო შადიმან, ხოლო მეორე — თვით ფარსადანი... დავემხვე იქვე გამწარებული და ამოუშვი მწვავე ქვითინი... შემდეგ უეცრივ გულს შემიღონდა, ვეგდე კარგახანს მოლზე უსულოდ... როს გონს მოვედი, მიმოვიხედე, არავინ იყო; მზე ჩასულიყო და ბნელს მოეცვა აქ არემარე. ამ დროს მომესმა მონასტრიდან მონაზონთ ხმები; მე მეძახოდნენ. გამოსულიყვნენ გალავნიდან დიდი თუ მცირე და დამეძებდნენ ჟინჯილით ხელში. ხმა ვერ გავიღე: არ მქონდა ძალი; ვიყავ ამ ხესთან მისვენებული. მხოლოდ ვსტიროდი გულამოსკვნილი... ტირილის ხმაზე იმათ მიპოვეს და წამიყვანეს. არ მიეყვებოდნი, მომძულდა თავი, მძაგდა სიცოცხლე, სიკვდილს ვნატრობდი, ხოლო არ ჩანდა ის ულმობელი... მზად ვიყავ იმ დროს დამეხრჩო თავი ან მაღალ კლდიდან გადაჩეხვით მომელო ბოლო და შემეწყვიტა მწარე ცხოვრების ტანჯვათა ძეწკვი. დების ალერსმა და იღუმენის თანაგრძნობამ, ნუგეშის ხმებმა ძლივს დამამშვიდეს. მათ მიმითითეს ტანჯულს, მამხილეს ქრისტე, კაცთა სახსნელად ის წამებული... ვადიდე ღმერთი. ამ სოფლის ვნება მიწიერი ჩაიხშო გულში. ჩემ სულს მოეფრქვა ცის ნეტარება და აფოფინდა ფრთაგაშლილი ერთერთ სფეროში სპეტაკადქმნილი...

ქალი შეჩერდა; ზეცას მიაპყრა ნათელი სახე და კვლავ განაგრძო ფიქრთა ხვეული:

— გარბოდნენ წლები. აჰა, მოვიდა ერანიდან ხმა საზარელი: მოჰკლეს მეფეო ქართლიდანა გატაცებული! მტარვალის ხმალმა მუხანათად მოუღო ბოლო ჩემსა ლუარსაბს, მიჯნურს უბედურს... თავზარი დამცა ამ ამბავმა სმენად საზარომ. დაეცე მკვდაროვით და სამი თვე ვიწეე ლოგინად. არვის ეგონა, თუ მოვრჩებოდი. ღმერთმა ინება მეცოცხლა ისევ, ახალ ტანჯვებით განმეწმინდა ეს ჩემი სული, მოვრჩი ბედშავი. ეხელად: ლოცვის ჟამს ჩემსა სენაკში წინ დამესახა ჩემი მიჯნური, საიქიოდან მოვლინებული და წმინდანისა შარავანდელით გაშუქებული... გაჩერდა ჩემ წინ და დაიჩოქა... გულს დაიკრიფა. ორივე ხელი... ცრემლითა საესე ნაზი თვალებით მან შემომხედა... ოჰ, მათში კრთოდა უსაზღვრო სევდა და კაეშანი! თითქო მესმოდა ხვეწნა, მუდარა, მაპატიეო — თითქო ამბობდნენ მისი ბაგენი... და ეს ჩვენება ჩემი მიჯნურის ხშირად მას შემდეგ მევლინება სიზმრად თუ ცხადად... მესაუბრება და მანუგეშებს საამო ხმებით... აჰა, აგერაც მუხლმოყრილი ჩემს წინ მდუმარე! ხელდაკრეფილი, თვალცრემლიანი, თითქო რალაცას მემუდარება... მესმის მიჯნურის ბაგეთ ფაჩუნის

წამოიძახა გაფითრებით ქალმა უეცრივ და მიაპყრა სივრცეს მგზნებარე თვალნი.

— აჰა, გაშალა ორთავე ხელი! ალბათ თუ სწადის გულს ჩამიკრას თავისი სატრფო... მოვალ, გენაცვა, ჩემო მეუფეე, ჩემო მიჯნურო! მოვალ ახლავე, რომ გულს ჩაგეკრა და ვიყვე ვენთან განუშორებლივ სასუფეველში!

წამოიძახა ეს სიტყვებიც და ვით შეშლილი ზე. წამოიჭრა... მან მიაშტერა რალაცას თვალი, შეჰკივლა ერთი უცნაურად ქალმა ვნებულმა და იქვე მოლზე დაეცა მკვდარი..

ქალის კივილზე მიიჭრა ხესთან შავი მერანით შავად მოსილი ზორბა რაინდი. ჩამოხტა ცხენით, მივარდა სწრაფად მიწაზე გდებულს ტურფა მონაზონს, დახარა თავი და მთვარის შუქზე იცნო მაკინე. სახეს მშვენიერს დაციალებდა

ზეცის ტრფიალი და ფართოდ გაშლილ უძრავსა თვალებს
აელვარებდა ნეტარება იმქვეყნოური...

— დაო მაკინე! ჩემო ძვირფასო! განა შენ გიმზერს ჩემ-
თვალები?! რა მოგივიდა, მითხარ, ბედშაეო?! ხმა ამოიღე!
იქნებ შეშინდი ჩემი დანახვით! სხვა თუ გეგონე! ნუთუ ვე-
ლარ მცნობ შენს ძმას გიორგის?! ან იქნებ სევდა მოგაწვა
რამე, გულს შეგიღონდა?!

ამ სიტყვებით დიდი რაინდი დაწვდა მონაზონს ასაყენებ-
ლად და როს შეეხო ხელს გაცივებულს, მიხედა ყველა-
ფერს... ქალის წინაშე უცებ მეხლი მან მოიყარა და ცრემ-
ლთა დენით დაუკოცნა სახე, ხელები... ღრმა მწუხარებით
აეცსო გული... ამ ღროს გაბზარა მყუდროება მონასტრის
ზარმა, ტკბილად მოისმა მონაზვნების მწყობრი გალობა...

XXVII. შაჰის ნობათი

ჩაუვიდა შაჰაბაზს ივერიის ამბები. სცნო სპარსთა ჯარების განადგურება, ქართლ-კახეთის სამეფოთა გაერთიანება, მეფედაც კი მისი დაუძინარი მტრის თეიმურაზის მოწვევა.

და ეს ყველაფერი ჩაიდინა ვინ? ათ წელს ცოლშვილით ირანს შეფარებულმა, შაჰის წყალობით ყელთამდე აღსავსე გიორგი სააკაძემ.

— ოჰ, გურჯო გიაურ! გურჯო დონღუზ! — წამოიძახა გამწარებით ირანის ბატონმა და დაუწყო თავისსავე ტუჩებს კენეტა. მის ბოღმა-აღშფოთებას არ ჰქონდა საზღვარი. ამიერიტ საქართველო ხდებოდა უკვე საშიშარი. მოურავის გენიოსობით გაერთიანდა ორად გაგლეჯილი ივერი. იგი სრულიად განთავისუფლდა ირანის ბასრი ბრძყალეებისაგან. ხვალ-ზეგ სააკაძე ადვილად მოგლეჯდა თურქეთს კოლხეთმესხეთს და შეიერთებდა; ამრიგად აღადგენდა მთლიანად საქართველოს ძველ დიდებას, დავით აღმაშენებელის და თამარის ბრწყინვალე ხანას, რაც ფრიად საშიშარი და შესაძლოა საბუდისწეროც გამხდარიყო ირანისათვის. ყოველივე ეს კარგად განჭვრიტა ყიზილბაშმა და ჩაფიქრდა მძიმედ. შაჰის აზრით, საჭირო იყო დიდი მოურავის ასეთი გაბედული გეგმის ამთავითვე დამსხვრევა, სანამ განახორციელებდა მას მთლიანად; საჭირო იყო დიდი ლაშქრით შესევა და ივერიის სამხედრო ძალთა განადგურება, ციხე-ქალა-

ქების დაპყრობა, თავშესაფარ ალაგებისაკენ გზების შექმნა და მთელი ხალხის ხელში ჩაგდება, მათი ქონების განადგურება და თვით ქართველი ხალხის ზოგის გაჟლეტა, ზოგისაც მონებად გაყიდვა ირანში.

ამრიგად, შაჰბაზის სატანური განზრახვით, ივერიაში უნდა მოსპობილიყო მთლიანად ქართველი ხალხი, ერთ მილიონზე მეტი ქალი და კაცი, მათ ნაცვლად კი ქართლ-კახეთის მიწა-მამულზე უნდა დასახლებულიყვნენ შაჰის ერთგული ირანელები და მულანლოს თათრები, რომელთაც უნდა დაეხშოთ როგორც დარიალის, ისე კავკასიონის სხვა გამოსასვლელი კარები, რათა „ურუსებს“ არ ჰქონოდათ საშუალება ჩრდილოეთიდან გადმოსვლისა ივერიაში.

შაჰბაზმა მეორე დილითვე მოიწვია დიდებულთა თათბირი ამ მწვავე საკითხის გადასაწყვეტად. თათბირმა ერთხმად დაადგინა: შეიკრიბოს ახლავე მთელ ირანში კარგად გაწრთვნილი ჯარები და საუკეთესო სარდლების მეთაურობით საჩქაროდ გაიგზავნოს ივერიაში დაკისრებული მიზნების განსახორციელებლად. შაჰმა გასცა ბრძანება ჯარების შესაკრებად.

ამავე დროს მისივე ბრძანებით აწამეს მძევლად დატოვებული დიდი მოურავის პირმშო ვაჟი პაატა, რომელიც გმირულად შეხვდა წამებას და სიკვდილს საყვარელი სამშობლოს გამო. მისი მოკვეთილი თავი „ფეშკაშად“ გაუგზავნეს უბედურ მამას.

სააკაძემ ადრევე იცოდა, თუ რას ჩაიდენდა გაბრაზებული შაჰბაზი. ამიტომ მალე შეუდგა ჯარების შეკრების თადარიგს. შეიტყო თუ არა აეშაგთაგან, ირანის შაჰი ივერიაში გზავნის უამრავ ჯარსო, მოურავმა აფრინა კაცები ყველგან და მოიწვია მხედრობა. ზაფხულის სიცხის გამო ქართველმა ჯარებმა იწყეს შეკრება გრილ ადგილებში, კოჯორსა და ტაბახმელაზე. აქ უნდა დახვედროდნენ მტერს.

ქვეყნის ზრუნვაში გაბმული მოურავი ისიც იყო დაბრუნდა ნოსტეს ცაროს თანხლებით, როს ამცნეს, ამ დილით სპარსელმა იფრინდამ მოიღო „შაჰის ნობათიო“. ამასთან

ერთად ქეშიკმა მოართვა დალუქული აბგა ზეწარწერით სპარსულ ენაზე: „დასტკბი, მოლაღატეე“...

გულის მწარე კენესით გახსნა ივერიის გმირმა აბგა და ამოიღო უსაყვარლესი ვაჟის მოკვეთილი თავი, სხვადასხვა წამლებით შემურვილი...

ამ საშინელ სურათის დანახვაზე გაშეშდა უბედური მამა. შემდეგ დაემხო იქვე და წასკდა მწარე ცრემლები.

დიდხანს იტირა გულამოსკენით თავისი უდროოდ დალუქული საყვარელი პირმშო უნუგეშო მამამ. თავზე ადგა პირგამშრალი ცარო და უხმოდ ღვრიდა ცრემლებს.

მოურავს არ ჰყავდა აქ ცოლშვილი. ისინი იმჟამად ანანურში ზურაბთან იყვნენ საზაფხულოდ.

ამიტომ სააკაძის უსაზღვრო მწუხარებას აორკეცებდა მისი გამამხნევებელი მეუღლის ამ დროს აქ არ ყოფნა.

რაკი მოიოხა გული ცრემლებით, დაიჩოქა მოკვეთილი თავის წინაშე, დაეწაფა ვაჟის შუბლს მხურვალე გრძნობით და მიმართა:

— უსაყვარლესო შვილო პაატავ! საუკუნოდ დატანჯული მამა მზერს და მწარედ დასტირის შენს მოკვეთილ თავს... გრძნობს, თუ რა წამებანი განიცადე, გმირო ჭაბუკო, შაჰაბაზ მხეცის მეოხებით... შენ შეეწირე ტანჯულ სამშობლოს, ბედშავმა მამამ თავის ხელით დასდო ზვარაკად შენი სიცოცხლე ივერიის საკურთხეველზე, რათა ეხსნა იგი დალუპვისაგან... სხვა გზა არ მქონდა მე უბედურ დღეზე გაჩენილს... ან შენ, ან სამშობლო! აჰა, გადარჩა სიკვდილს და მოსპობას ტანჯული ივერი, შენ კი შეეწირე მას!

ბედშავმა შეგნებულად შეეწირე ქართლ-კახეთს ის ნორჩი სიცოცხლე, რომლის გულისთვის მზად ვიყავ ასჯერ მემსხვერპლა თვით ჩემი არსებობა...

ასე მკაცრია და უღმობელი სააკაძიანთ გვარის ბედის ჩარხი... შენ შეეწირე, შვილო პაატა, უბედურ სამშობლოს, მაგრამ ვიფიცავ შენს წმინდა სახელს, რომ ეს მარჯვენა საკვდავ მანვილს ჩაუსობს გულში თვით მტარვალ შაჰაბაზს, თუ ცოცხალი ვიქენს!

ამ სიტყვების შემდეგ დიდი მოუხრავი კვლავ დაემხო შვილის მოკვეთილი თავის წინაშე და მწარე ქვითინი დაიწყო.

დიდხანს დასტიროდა უნუგეშო მამა თავის უსაყვარლეს პირმშოს. გმირის მწარე ცრემლებს ერთვოდა მის უკან უხმოდ დაჩოქილი ცაროს ცრემლები. ბროს ცარო წამოდგა, სათუთად მოხვია ხელი დაჩოქილ მამას, ააყენა ზეზე და გაიყვანა იქვე აივანზე, დასვა ტახტზე, მოუხრბენინა წყაროს ცივი წყალი, დიდი ზვეწნით მოასმევირა მცირეოდენი და ანუგეშა ტკბილი სიტყვებით.

აივნიდან იშლებოდა დიდებულ სურათებად ქართლის ლამაზი ბუნება. მოუხრავმა მიაპყრა ცრემლიანი თვალები მის მიერ გადარჩენილ სამშობლოს, სადაც ამ დროს დულდა სიცოცხლე და საშინელი გმინვა აღმოხდა გულის სიღრმიდან. იგი მიეცა ღრმა ფიქრებს.

ცოტა ხნის შემდეგ მოუხრავს მოესმა დარბაზიდან ვილაცის მწარე ქვითინი. წამოდგა იგი, შეალო ფრთხილად კარი და დაინახა პაატას მოკვეთილი თავის წინაშე დამხობილი ცარო. ის მწარედ მოთქვამდა უდროოდ დაკარგულს თავის საყვარელ გაზრდილს და წყევლა-კრულვას უგზავნიდა გამხეცებულ შაჰს. კავკასიონის მთების გმირი ასული ფიცს სდებდა მოკვეთილი თავის წინაშე, რომ შურს იძიებდა, როგორც მთიელი, და ბასრი კალდიმით გულს გაუპობდა საზიზღარ ჯალათს, მტარვალ შაჰაბაზს... ცოტა ხნის შემდეგ წამოდგა იგი, მხურვალედ დაეწაფა პაატას შუბლს და ლასლასით გავიდა აივანზე... უბედური მამა კი ისევ დაემხო მოკვეთილი თავის წინაშე და აქვითინდა.

ამ დროს შორით გამოჩნდა ორი მხედარი, ქალი და ჭაბუკი, ისინი მოაგელვებდნენ ბედაურებს. მათ უკან მოსდევდა ხუთი იარაღასხმული თანმხლები. აჰა, მიუხანლოვდნენ მოუხრავის სასახლეს, გუშაგმა გაულო მათ ალაყაფის კარები, შემოუძღვა ეზოში და უშველა ქალს ცხენიდან გადმოხტომა. აივანზე მდგარმა ცარომ შორითვე იცნო ისინი, სწრაფად ჩაირბინა კიბეზე, მიეგება ეზოს კარიბჭესთან და ჰკადრა მდაბიო სალამი.

— გამარჯვება, გელავი ხომ კარგადაა მოურავი? შინ ბრძანდება თუ არა?

შეეკითხა სააკაძის მეუღლე თამარ, რომელიც ჩამოვიდა დღუშეთიდან თავის ძმა დათუნასთან ერთად.

— ერის ბელადი კარგად ბრძანდება ქალბატონო. ამჟამად შინ გახლავთ თავის სენაკში... რაღაც უსიამო ამბავი მიიღო ამ დილით ერანიდან, — უპასუხა გელამ მოწყენით...

გელას პასუხის კილომ და დაღვრემილმა სახემ მეტად შეაქრთო თამარ. მას ეცვალა ფერი, გულზე მწარედ უკბინა რაღაცამ.

— გელა, შემომხედე თვალებში შენ რაღაც საშინელ ამბავს მიმალავ! გაფიცებ ყველაფერს, მითხარ გულახდით, რაც იცი!

გელას ეცვალა ფერი და დაიბნა. იგი ჩავადრა ფრიად უხერხულ მდგომარეობაში. აღარ იცოდა რა ეთქვა, რა მოეგონა, რით ენუგეშებინა უბედური დედა. მთიელი დუმდა თავჩაქინდრული.

— რად სდუმხარ, გელავ? ხმა ამოიღე! მითხარ სიმართლე! ნურას მიმალავ, თუ გიყვარს ჩვენი ოჯახი! მითხარ, გული მაგარი მაქვს, ყველაფერ უბედურებას გავუძლებ...

— მე რაილა მოგახსენოთ, გმირის ღირსეულო მეუღლევი თავად აბრძანდით ზევით და იქ სცნობთ ყველაფერს. თვით გაიმბობთ ერის მოთავე.

ფრიად შეშფოთებული თამარ საჩქაროდ ავიდა აივნის კიბეზე და ფეხაკრეფით შევიდა დარბაზში.

მას გაედევნენ გელა და დათუნა.

ქალი წყნარად მიუახლოვდა ქმარს; იგი დამხობილიყო ტახტის წინ და მწარედ ქვითინებდა. გაშლილ ფარჩაზე იდგვა პაატას მოკვეთილი თავი. უბედური დედა გაოცებით დააშტერდა მას; იცნო თავისი პირმშო. ერთი შეჰკივლა უცნაურად და იქვე ჩაიკეცა ქმრის გვერდით. საშინელი გმინვა და ქვითინი აღმოხდა მის გულსა და ბაგეს, იგი დააკვდა შეილის სახეს...

უბედური მამა შეკრთა ამ საშინელ კვილზე; მან დაინახა ტახტზე დამხობილი მეუღლე. დედის უნუგეშო ქვითინს

მოურავმა მისცა ბანი მწარე ქვითინით. კარგახანს იტირეს ორივემ და აფრქვიეს ცრემლები გმირულად დაღუპული ვაჟის მოკვეთილ თავზე.

— საყვარელო შვილო პაატავ! შენ შეეწირე ზვარაკად შენსავეთ ტანჯულ სამშობლოს!

შენი უმანკო სისხლი დაიღვარა ივერიის თავისუფლების სამსხვერპლოზე. შენი მოწამებრივი სიკვდილით გადაარჩინე სრული მოსპობისაგან ქართლი და კახეთი, შენ კი...

ოჰ, შენ, ალბათ, გრძნობდი, ალბათ, ხვდებოდი კიდევ ამ დიად დავალებას, რაც გედო კისრად, ოდეს მტარვალ შაჰაბაზის სურვილის თანახმად უბედური მშობლები გიმორებდნენ მკერდიდან და გტოვებდნენ პირდაღრენილი გველშაპის ბრკყალებში... ამიტომაც იყო, რომ გამოთხოვების ეამს ჩაგვეკარ გულში და გვეკონიდი დიდხანს... გეძნელებოდა ჩვენი განშორება... გვევედრებოდი კიდევ დარჩენას, გვიმზერდი თვალცრემლიანი და თითქოს საუკუნოდ გვეთხოვებოდი. „საყვარელო ბაბავ, საყვარელო დედუ, ნუ მტოვებთ აქა მეც წამიყვანეთ ჩემს ძმებთან ერთად, არ მინდა ყუინთან დარჩენა, გულს ზარავს მისი მრისხანე სახე“ — ამ სიტყვებით გვევედრებოდი ივერიაში წაყვანას. ჩვენ კი, უბედურნი, გამშვიდებდით, რომ შენი დარჩენა სწადია თვით დიდებულ შაჰს, რომ მას უყვარხარ ფრიად და მალე გიბოძებს მაღალ ხარისხსა და სამსახურს. აბა, როგორღა გეტყოდით იმას, რომ შენ გაგწირა ივერიის სახსნელად შენმა უბედურმა „ბაბამ“, რომ შენ დაგიტოვა მძევლად ერანის მტარვალმა, რომ მამის ღალატი შაჰისადმი უნდა გეზლო შენ, წამებულო გმირო, საკუთარი სისხლით, საკუთარი სიცოცხლით... და, აჰა, შენი მოკვეთილი თავი, მტარვალ ყუენის მიერ ნობათად მიძღვნილი! ოჰ, შვილო პაატავ! შვილო საყვარელო, ტანჯულო, წამებულო! — ამ მწარე სიტყვებით მოთქვამდა უბედური დედა, იკაწრავდა სახეს და ღვრიდა ცხარე ცრემლებს.

გულის სიღრმეში ხვდებოდა ეს მწარე მოთქმა უბედურ მამას და იფერფლებოდა მისი სული; იგი განიცდიდა ენით აუწერელ სულიერ ტანჯევებს. ესმოდათ ეს მოთქმა-გოდება

კარებთან მდგარ გელას და დათუნას და ისინიც იღვრებოდნენ ცრემლად.

— საყვარელო მეუღლე! უბედურო მამავ! აჰა, ვაჟის მოკვეთილი თავი! აჰა, ჯალათის მიერ დაღვრილი უმანკო სისხლი, ივერიის სამსხვერპლოზე შეწირული უძვირფასესი ტარიგი! ხედავ, რა მხეცობა ჩაიდინა მტარვალმა?! ხედავ, რა ძვირად დაგვიჯდა სამშობლოს ხსნა და გადარჩენა?! ხედავ, როგორ იძია შური ერანის ყეენმა?! ოჰ, ჩვენ, შავ დღეზე გაჩენილნი, განა ამას მოველოდით?! ივერთა ერის გამარჯვების დიდი ზეიმი ხარება დღეს შეიცვალა ჩვენთვის, გიორგი სააკაძის ოჯახისთვის, უსაზომო გლოვის ზარად. და შენ, ერისთვის თავდადებულო დიადო გმირო, შენ თვითონ განზრახ და შეგნებულად მიუძღვენ ზვარაკად ივერიის სახსნელად შენი უსაყვარლესი პირმშო, შენი უფროსი ვაჟი, შენი სულზე უტკბესი პაატა...

იტირე ახლა, ბედშავო მამავ! იგლოვე მწარე ცრემლებით უსაყვარლესი ვაჟი, იტირე და ამავე დროს იამაყე მისი გმირული სიკვდილით! გახსოვდეს მარად, რომ ამ მოწამებრივმა სიკვდილმა უკვდავყო პაატას სახელი, რომ ქართლის მატთან ხარება დღეს სასწაულებრივ გადარჩენილ ივერიის ხალხთან ერთად მოიხსენიებს დიდი მოურავის უფროს ვაჟს პაატა სააკაძეს! ამიერიით საქართველოსთან ერთად იქნება უკვდავი მის სადღეგრძელოდ შეწირული პაატას ნათელი ხსოვნა. იტირე და იმავე დროს იხარე, ბედშავო და ბედნიერო მამავ! შენ გასწირე ზვერიისათვის შენა უსაყვარლესი ვაჟი და მშვენიერი ჭაბუკი პაატა. იგი შეეწირა დიდებულ საქმეს, შეეწირა ქართველი ერის დაღუპვისაგან გადარჩენას.

კვლავ ასეთი გამგმირავი სიტყვებით მოთქვამდა უბედური დედა; ეს მოთქმა-გოდება წვეტიან დაშნასავით ესობოდა გულში. ერის მოთავეს, ტახტის წინაშე დაქსობილ უბედურ მამას, და აღვრევიანებდა მწარე ცრემლებს.

უკვე კარგახანია ჩასულიყო მზე, ბნელოდა გარეთ, ბნელოდა მოურავის დარბაზში. ახალი მთვარის მკრთალი შუქი, სარკმლით შეჭრილი, შარავანდედად ეფრქვევოდა წამებული ჭაბუკის მოკვეთილ თავს.

კიდევ კარგახანს ისმოდა დიდი მოურავის დარბაზში უბედური მშობლების უნუგეშო კვნესა, მოთქმა და ქვითინი... წამებული პაატას გვაში კარგად შემურვილი და კუბოში ჩადებული რომის მისიონერთა მიერ ესვენა კათოლიკეთა ეკლესიაში. სცნო თუ არა ეს ამბავი დიდმა მოურავმა, დიდი საფასური გაუგზავნა კათოლიკე ბერებს და მოატანიდა ირანიდან შვილის ნეშტი. ეს ნეშტი მოკვეთილ თავთან ერთად პატივით იქნა დაკრძალული ნოსტეს სიახლოვეს ერთაწმინდის ტაძარში.

XXVIII. მარაბლა

შაჰაბაზმა დაუყოვნებლივ გასცა ბრძანება შეეკრიბათ მთელს ირანსა და ერაყში საუკეთესო ჯარები. მან მოწოდებით მიმართა მაჰმადიან აზიას და მუფტ-მოლების დახმარებით გამოუცხადა ივერიას სარწმუნოებრივი ომი. გააფთრებულმა შაჰმა მთელი ირანი და ერაყი, მთელი მუსლიმი სამხედრო პატარა ქრისტიანი ერის წინააღმდეგ. ყვინი შეუდგა დიდ სამზადისს.

შაჰაბაზს შეუფროვდა სულ 120 ათასამდე მეომარი. აქედან აღრევე გამოგზავნა ივერიაში 80 ათასი მებრძოლი საუკეთესო სარდლების თაოსნობით, ხოლო მთავარსარდლობა ჩააბარა საკუთარ სიძეს, სამხედრო ვეზირს და განთქმულ სპასალარს ყორჩიბაშს. თვით შაჰაბაზი ირანში დარჩა. ის მოერიდა სააკაძეს. იქნებ შეაფრთხო იგი მოურავის სამხედრო გენიოსობამ?

ივერიის გმირმა კარგად იცოდა, რომ ირანელთა ჯარების განადგურებას მოჰყვებოდა შაჰაბაზის მხრივ საშინელი შურისძიება და დიდი ლაშქრის გამოგზავნა ივერიის მოსასპობად. ამიტომ ქართლ-კახეთის გაერთიანებისა და თეიმურაზის მეფედ მიწვევის შემდეგ, როგორც აღვნიშნეთ, იგი მაშინვე შეუდგა საჭირო თადარიგს და შეკრიბა 20 ათასი საუკეთესო მებრძოლი, გაამაგრა ციხენი და შემოსასვლელი გზები. ამ დიდი განსაცდელის დროს, სავალალოდ, ისევ იჩინა თავი პირადმა შურმა და მტრობამ. სააკაძის სახელი,

დიდება და მის შიერ ქვეყნის მართვა-გამგეობა შურით ავსებდა ივერიის თავადებს. გაერთიანებული ორივე სამეფოს მზრუნველი და ფაქტიური მეფე ისევ მოურავი იყო.

ის მართავდა ივერიას, ის ცვლიდა და აყენებდა მოხელეებს.

გმირის ასეთი დიდება შურით ავსებდა თვით მის ცოლის-ძმას, ზვიად ფეოდალს ზურაბ ერისთავს, აგრეთვე მეფე თეიმურაზს. ზურაბიც ხომ მონაწილე იყო ივერიის განთავისუფლების საქმეში, მაგრამ ყველგან ქუხდა მხოლოდ მოურავის-სახელი. თეიმურაზ იყო მეფე, მაგრამ ხალხი იცნობდა მეფედ მხოლოდ სააკაძეს. არა ნაკლებ ბრახობდნენ მოურავის წინააღმდეგ მისი ძველი მტრები: შადიმან ბარათაშვილი, ფარსადან ციციშვილი და ქაიხოსრო ჯაფახიშვილი.

აი, ამ შურმა და მტრობამ იჩინა თავი სწორედ იმ დროს, როცა ყველაზე უფრო საჭირო იყო თანხმობით მოქმედება საშიშარი მტრის წინააღმდეგ.

ირანის დიდი ლაშქარი შემოვიდა ქართლში პაპანება ზაფხულში და დაბანაკდა მდ. ხრამისა და ალგეთის ნაპირებზე სოფ. შულავერსა და მარაბდას შორის. ივერთა ჯარი კი იდგა კოჯორსა და ტაბახმელაზე. აქ ელოდნენ შემოსეულ მტერს. სიცხეების გამო შეუძლებელი იყო ამ გრილი ადგილებიდან დაძვრა, სააკაძეს სურდა ამ ვიწროებში შემოეტყუებინა მტრის ლაშქარი და აქ დაეცა მათთვის თავზე ციური რისხვა.

აი, სწორედ ამ საბედისწერო უამს ივერთა ჯარის ბანაკში იჩინა თავი დიდ მოურავისადმი მტრობამ. ქართლ-კახეთის თავადებმა ჩამოართვეს მთავარსარდლობა ამ სამხედრო გენიოსს და გადასცეს ჯარის უფროსობა მეფე თეიმურაზს. ამ გარემოებამ დალუპა დიადი საქმე.

კოჯორში მოხდა დიდი თათბირი. მას ესწრებოდა თვით მეფე თეიმურაზი. დგება შადიმან ბარათაშვილი და მიმართავს კრებას: „ბატონებო, დღეს ივერიის სათავეში სდგას მირონცხებული მეფე თეიმურაზ, ფრიად განათლებული და რიტორ-პიიტეკოსი. აი, ეს ქებული ყლორტი ბაგრატიონთა გვარისა უნდა იქნეს ჩვენი ჯარების მთავარსარდალი; იგი უნდა წარუძღვეს ჩვენს ძლევა-მოსილ ლაშქარს მარაბდისა-

კენ და, ვით შევარდენმა, განფანტოს ტრედის გუნდით
ერანიდან მოსულნი მუსლიმთა ბრბონი. მრჩეველებადაც
აირჩიოს მეფემ, ვინცა მას სწადდეს.

შადიმანს კვერი დაუკრეს ფარსადან ციციშვილმა, ქაიხოს-
რო ჯავახიშვილმა და თვით ზურაბ ერისთავმაც. გველის
ენამ დაგესლა მწვავედ დიდი მოურავის გული. ის აშკარად
მზერდა, რომ მისდამი პირადი მტრობა დალუპავდა საქმეს,
დიდ საფრთხეში აგდებდა მთელს ივერიას. მას არ შეეძლო
ასეთ დროს გაჩუმება. იგი წამოდგა დინჯად, გადახედა კრე-
ბას არწივის თვალებით და დაიწყო:

— ბატონებო! გვირგვინოსანი მეფე ივერიისა, სეებედნი-
ერი თეიმურაზ, უზენაესი მბრძანებელია სამხედრო და სა-
მოქალაქო ძალთა და ხელისუფალთა. და მეც ქედს ვიხრი
მეფის წინაშე, ვითარცა მისი ერთი ხელქვეითთაგანი. ხოლო
ნუ გავიწყდებათ, რომ შემოსეული მტერი მეტად ძლიერია,
ფრიად მომზადებული და ამიტომაც გემართებს დიდი სიფრ-
თხილე. ამ პაპანება სიცხეში ჩვენი ჯარების ჩაყენება იქ,
დაცემულ ალაგებში, შუძლებელია, საშინელი სიცხე დათენ-
თავს ჩვენს საუკეთესო ლაშქარს, მთის არწივებსა, ქართლ-
კახეთის შვილებს, დაუკარგავს ძალსა და მხნეობას, მაშინ
როდესაც სიცხეს ჩვეული სპარსნი მედგრად იბრძოლებენ.
ამას დაუმატეთ კიდევ ჩვენი ჯარის სიმცირე და მტრის
ლაშქრის სიმრავლე. ისინი ოთხჯერ მეტი არიან ჩვენზე
და გაშლილ ვაკეში მათზე თავდასხმა უაზრობაა, ეს წინას-
წარ ომის წაგება და ქვეყნის დალუპვაა! იქ მტრის ჯარები
ადვილად გაშლიან ფრთებს, შეიმწყვდევენ შუაში ჩვენს
მცირე რაზმებს და მოაშთობენ სიმრავლით. ეჭვს გარეშეა,
ადვილად დაგვამარცხებენ... მეფევ და დიდებულნო! ნუ
ვიქმთ ასეთ საქმეს! ნუ დავლუპავთ ჩვენს მხედრობასა და
მასთან ერთად ქართლსა და კახეთს! მუხლმოყრით გენუკ-
ვით მიიღოთ ჩემი რჩევა: გავმაგრდეთ აქ, კოჯორსა და ტა-
ბახმელაში, ამ გრილ ალაგებში, ვეცადოთ და შემოვიტყუ-
ოთ მტერი ამ ვიწროებში და მაშინ რაც მოხდება, მე ვაგებ
პასუხს. ღვთითა და თქვენის შეწევნით მათ დავმართებთ
უარეს საქმეს, ვინემ შეემთხვა სათარხანს ტაშისკართან!

— ხედავთ, ბატონებო რას გვიჩვენებს ჩვენი ფრთხილი ჰირისუფალი, — წამოიძახა ზურაბმა და დააბრიალა თვალები, — როდის აქეთ შეგიკრთა გული, სპასპეტო და დიდო მოურავო? განა ასე მალე მოხუციდი? ჩვენ არ გვეშინის მტრის სიმრავლის. თავს მოვევლებით შევარდენივით და ავკაფავთ მხალივით... ნუთუ არ უწყვი, სიძვე, რომ ერთი შევარდნის წამოქროლვით ილუპება ასი და ორასი მტრედი?! მაშ რაღას ვაყოვნებთ, გავსწიოთ მარაბდისაკენ! ჩავუხტეთ მტერსა და დავცეთ თავსა ზედა ღვთის რისხვა და შიშის ზარის

— წავიდეთ! გავსწიოთ! გავსწიოთ! გაგვიძეხ წინ, ჩვენო მთავარსარდალო, დიდებულო მეფევე თეიმურაზ, ვით დიდი სარდალი ალექსანდრე მაკედონელი, ბუცეფალსა ზედა მჯდარი, დამპყრობელი სრულიად აზიისა! — დაიღრიალეს დიდმა თავადებმა — სააკაძის მტრებმა — და შემოერტყნენ მეფეს სამეფო დროშით.

დამთავრდა კრება. გადაწყდა მტერზე მიხტომა. ეს იყო სიგიჟე, ქვეყნის ღალატი, ხარობდნენ უგნური და ქვეყნის ორგული მტრები მოურავისა, სწუხდნენ გონიერნი და ქვეყნის ერთგულნი. ბორგავდა მწარედ მშრომელი ხალხის მოქირნახულე გიორგი სააკაძე.

დაიძრა დაბლობისაკენ ქართველი ჯარი... მას მიჰყვებოდა გულის კენესით დიდი მოურავი... იგი წინასწარ გრძნობდა ივერთა ჯარის დამარცხებას...

იალღუჯის მთებიდან წითლად ამოცურდა დიდი მნათობი და მოჰფინა მიდამოს მხურვალე სხივები. დაგუბებული ჰაერი სულს უხუთავდა ადამიანსა, ხრამ-ალგეთის ველზე თანდათან მატულობდა სიციხის ბული.

ამ დროს გამოჩნდა ქართველი ჯარი. ის სამხედრო სიმღერით მიდიოდა მტრის ბანაკზე დასაცემად. მოწინავე ჯარის წინ მიაქროლებდა მერანს ორი განთქმული სარდალი: დავით ჯანდიერი და ალათანგ ხერხეულიძე. ესენი არ შეუშინდნენ მტრის თოფებსა და ზარბაზნებს, თამამად მიიტანეს იერიში და მიადგნენ ირანელთა ჯებირებს. მისცეს - ცეცხლი; მოწინავე ჯარის სარდლები გმირულად გადაეშენენ ჯები-

რებზე მახვილით ხელში და ეძვერენ მტერს, მათ მიყვნენ მამაცი რაზმები და მშიერი ლომივით დაერივნენ ირანის ლაშქარს.

მტერი არ შეუშინდა ასეთ გაბედულ იერიშს და თამამად დახვდა ქართველთ. შეიქნა ხელჩართული ბრძოლა. მზის სხივებზე ლაპლაპებდა სისხლიანი შუბი და ხანჯალი, ისმოდა მებრძოლთ ყიჟინა და იარაღის ჩახაჩუხი, ჰაერში ტრიალებდა მძიმედ დაჭრილთა საზარო კენესა და გმინვა. მატულობდა სიცხე, ბრძოლის ველზე ჩამოწვა მხურვალე ბული; შეგუბდა სული, საშინელმა პაპანებამ მოსხლიტა ქართველი ჯარი, მან დაკარგა მხნეობა, ამას ხელს უწყობდა მტრის სიმრავლე. ირანელნი მედგრად ებრძოდნენ ქართველთ და აწვებოდნენ ყოველი მხრიდან. გალაღებულმა მტრებმა ბოლო მოუღო ივერთა მოწინავე ჯარის სარდლებს და მრავალ ქებულ ვაჟკაცს. გმირულად დაიხოცნენ დავით ჯანდიერი და ალათანგ ხერხეულიძე. ამ ამბავმა შეაკრთო ჩვენი მოთენთილი ჯარი, მან თითქმის იბრუნა პირი და მზად იყო გასაქცევად, მაგრამ ამ დროს მოხდა ერთი რამ: უცებ შეიქნა დიდი არევე-დარევა მტრის რაზმებში: ვილაც ბუმბერაზის აღნაგობის მხედარი მუზარადმოხდილი დააქროლებდა შავ მერანს ირანის ჯარებში, მედგრად იქნევდა ხმალს; თავისი მჭექარე ხმით და მძლავრი მარჯვენით ყველგან შეჰქონდა შიში და სიკვდილი.

ეს იყო გიორგი სააკაძე. მის დანახვაზე გარბოდნენ შეშინებული მტრები. რა შეატყო მოურავმა, რომ ქართველი ჯარი განსაცდელშია და საქმე ილუპება, ველარ მოუთმინა გულმა და გასწირა თავი. მან მოიხსნა ჩაფხუტ-მუზარადი და პირახდილი შეიქრა მცირე გუნდით მტრის რაზმებში. მძლავრი მკლავით და მგრგვინავი ხმით ყველგან შეიტანა შიში და რისხვა, დაუხოცა მტერს საუკეთესო სარდლები. მტრის ჯარებმა იცვნეს იგი.

— „ჰალაჰ! ბეიუკ მოურავ! შაითანი შაითანი! თავს ეუშველოთ!“

ეს სიტყვები ელვის სისწრაფით მოედო მტრის ლაშქარს და დასცა შიშის ზარი. გმირის ასეთმა სიმამაცემ ააფრთო-

კანა ქართველი ჯარი; მხნედ შეუტია მან გალალეზულ ირანელთ. დიდ მოურავს კი ცხარე ბრძოლაში მხარდამხარ მისდევდნენ თავისი რაზმებით ზურაბ, ლომი ჩრდილელი, ცარო, ორიგ პაპუნა, ზაზა, გოგოთურ, ბერდია და სხვანი.

ველარ გაუძლო მტერმა სააკაძის და მისი ამხანაგების თავგანწირულ კვეთებას და იბრუნა პირი გასაქცევად. ყველაზე წინ გარბოდა სპარსთა ცხენოსანი ჯარი, მას დაედევნენ ჭეივანიც. მათზე არ მოქმედებდა სარდლების ბრძანება, ხევენა, მუქარა. არეულად გარბოდა შიშით პყრობილი ირანის ლაშქარი.

ამასობაში დაღამდა კიდევ ეს არ იყო მტრის სრული დამარცხება. დამარცხდა მხოლოდ მტრის ერთი ნაწილი, ხოლო მეორე ნაწილს ისევ ხელთ შერჩა მთელი ბანაკი და სიმაგრენი.

დილით ადრე ქართველმა ჯარმა მედგრად შეუტია ირანელთ. წინა დღის გამარჯვებით გალალეზული ივერნი თამამად აწვებოდნენ მტრის რაზმებს. მათ ველარ უძლებდნენ ერთხელვე შეშინებული მტრები, რომელთაც ყველგან ელანდებოდა ჩაფხუტმოხდილი დიდი მოურავი. მედგარი ხელჩართულ ბრძოლის შემდეგ დამარცხდნენ სპარსნი და იწყეს გაქცევა. მთელი მათი ქონება და ბანაკი დარჩათ ქართველებს. ივერთა გმირნი მოურავის მეთაურობით დაედევნენ მტერს და გაავლეს მუსრი. ზარდაცემული ირანელნი გზა-გზა ყრიდნენ თავის იარაღს, თოფებს, ზარბაზნებს, სურსათს, ტყვია-წამალს და სწრაფად გარბოდნენ. ყველაზე წინ მიაქროლებდა არაბულ მერანს მათი სპასპეტი ყორჩიბაში.

დამარცხდა მარაბდის ველზე ურიცხვი მტერი. სასწაულებრივ გაიმარჯვა ივერთა ჯარმა, ეს კი მოხდა უმეტესად სააკაძის გმირული თავგანწირვით.

ჩამოწვა შუადღის ბული და პაპანება. გახურებულ თორნეს დაემსგავსა მარაბდის ველი. უზომო სიცხით დიდად შეწუხებული ქართველნი წვებოდნენ ზოგი წყალში, ზოგიც ხეებქვეშ ბალებში; ბევრიც აბინავებდა ალაფს. ამ სახით

ივერთა ჯარი იყო გაბნეული 10 — 15 ოთხკუთხი ეჯის არეზე.

ხოლო ერთ ალაგას შეჯგუფებულიყვნენ მთიელთ რაზმები და ჰქონდათ რაღაც ჩოჩქოლი. მათი მამაცი სარდალი ზურაბ ერისთავი დაჭრილიყო ბრძოლაში და გარს ეხვივნენ ერთგული ყმანი.

ამ დროს მარაბდის სერის წვეროზე გამოჩნდა რაღაც შავი ღრუბელი. იგი მოძრაობდა და სწრაფად ეშვებოდა ძირს. გაოცებულმა ქართველებმა ამ ღრუბელში იცვნეს მტრის ახალი ლაშქარი.

ის მედგრად მოდიოდა ზურაბ ერისთავის ჯარზე დასაცემად. წინდახედულმა შაჰაბაზმა თავის პირველ ლაშქარს დაადევნა მეორე ჯარი, 40 ათასი კაცისაგან შემდგარი, განთქმული სარდლების ხოსრო მირზას, შაბადახანის და ამირგურიხანის მეთაურობით. ეს ახალი ჯარი მხნედ ეკვეთა ზურაბის რაზმებს და ირგვლივ შემოერტყა. ირანელი ეცნენ ბრძოლით დაქანცულ და სიციხით მოთენთილ ერთ მუჟა ქართველთ. შეიქნა ხელჩართული ბრძოლა. როგორც ლომი თავის ბუნაგში, ისე გამწარებით იბრძოდა დაჭრილი ზურაბ. აწყობდა რაზმებს და მუსრავედა მტერს.

რა დაინახეს ივერთ მეომრებმა სპარსთა ასეთი თავდასხმა, მაშინვე იწყეს დენა ყოველი მხრიდან. მათ მედგრად შეუტიეს ერანელთ, მაგრამ მტერი ფრიად ძლიერი იყო თავისი სიმრავლით. ზურაბს მეტად გაუჭირდა საქმე. იგი ითხოვდა შევლას. უამრავი მტრის ასე მოულოდნელმა თავდასხმამ თავზარი დასცა თეიმურაზ მეფეს.

დაირღვა ბრძოლის გეგმა, აღარ იყო მოთავე, მთავარსარდალი. ყველა მოქმედებდა ისე, როგორც სწადდა. საშინელ ხიფათში ჩავარდა ივერთა ჯარი... დაეცა მტრის შუაგულ რაზმებში სისხლის დენით გულწასული ზურაბ ერისთავი. იგი ძლივს გაათრიეს სამშვიდობოზე თავგანწირულმა მთიელებმა. უგეგმოდ მებრძოლ ქართველ ჯარს დაებნა დავთარი. შედრკა იგი და იწყო უკან დახვევა. კიდევ ნახევარი საათი — და უეჭვოდ დამარცხდებოდა ჩვენი ჯარი, რომ ამ დროს არ მოვლენოდა. მხსნელი.

ამ საერთო ყიფინში გაისმა მოურავის მჭექარე ხმა. სააკაძე და ბარათა ბარათაშვილი თავისი რაზმებით დაედევნენ ყორჩიბაშს და ისიც იყო დაბრუნდნენ უკან სამხედრო ალაფით სავსენი. ამათ ახლდა სამცხედან ახლად ჩამოსული კარგი ვაჟკაცი მანუჩარ ათაბეგი სამასი ჯაცით. განახლდა ბრძოლა. ქართველებმა მოიცეს გული დიდ მოურავის დინახვაზე. ისინი იქცნენ გმირებად და საარაკო სიმამაცით შეუტიეს გალადებულ მტერს. სააკაძის იერიშებმა და მეხვიით მჭექარე ხმამ შიშის ზარი დასცა მტრის მხედრობას. შედრკა მტერი. მან დაკარგა სიმამაცე. კიდევ ერთილა ჟამიც ასეთი ბრძოლა — და უსათუოდ დამარცხდებოდნენ ირანელები, მაგრამ ბედად უსწრო ღამემ და გაჰყარა მებრძოლნი.

საბედისწერო შეიქნა ივერთათვის ეს ბნელი ღამე. მათ შემოერთყა ზურგიდან ყორჩიბაში თავისი ლაშქრით. ამას გაეგო მაშველი ჯარის მოსვლა და მაშინვე დაებრუნებინა თავისი დამარცხებული ლაშქარი, უკვე დასვენებული და რაზმებად დაწყობილი. აუწერელი ელდა დასცა ქართველთ ამ ამბავმა. ახლა კი მიხედნენ სააკაძის მტრები თავის შეცდომას, მაგრამ გვიანდა იყო. ქართლ-კახეთის მთელი მხედრობა და მასთან მთელი ივერი ხდებოდა მათი სიბეცის, პირადი შურისა და უნიჭობის მსხვერპლი... ახლა-კი გაცლა სჯობდა ბევრად, მაგრამ წასვლა შეუძლებელი იყო, რადგან რიცხვით ექვსჯერ მეტი მტერი შემოხვეოდათ რკინის რგოლივით. მხოლოდ ერთი-ლა შთენოდათ ქართველთ: ან ტყვედ ჩავარდნა, ან სრული გაჟლეტა...

დაუვიწყარია ეს ღამე ქართველი ერის ცხოვრებაში... აქ იფეთქა საოცარი მძლეობით ქართველთ გმირობამ და სულის სიდიადემ. სიკვდილის ლანდმა საარაკო გმირად აქცია ივერთა ჯარი... შეითქვენენ ვაჟკაცი. მათ შეფიცეს ერთიმეორეს, რომ გაწყდებიან მთლიანად, ხოლო მტერს არ აჩვენებენ ზურგს, არ დანებდებიან ლაჩრულად. ასეთი გმირობის მაგალითს აძლევდნენ ჯარს სულიერი მამანიც-კი, მაგ. რუისის მიტროპოლიტი დომენტი, ფრიად განათლებული პირი, მარტყოფის მიტროპოლიტი, ხორჭაშნელი, ალავერდელი და სხვანი. ეს მღვდელმთავრები მახვილით ხელში ემზა-

დებოდნენ მტერთან საომრად, ქრისტეს სჯულის დასაცავად.

მოეწყო სამხედრო თათბირი; დაესწრნენ სარდლები და ეპისკოპოსნი. ყველანი დუმდნენ და მისჩერებოდნენ დიდ მოურავს. იგი წამოდგა, უკმაყოფილოდ გადახედა თავის პირად მტრებს და დაიწყო დინჯად:

— ხომ ხედავთ, ბატონებო, რაოდენ მართალი ვიყავ, ოდეს გირჩევდით მტრის შემოტყუებას კოჯორსა და ტაბახმელას ზეგნებში, სადაც ასერიგად ვიყავით გამაგრებულნი და სადაც ადვილად დავამარცხებდით ამაზე ბევრად მეტ მტერსაც! თქვენ არ მიიღეთ ჩემი კეთილი რჩევა და აჰა ნაყოფიც!

ამ საშინელ მარცხს ვგრძნობდი! და ახლა კიდევ, სიცხით დათენთილ და ბრძოლით დაქრილ დაქანცულ ქართველ მხედრობას რკინის რკალივით შემოგვერტყა ირგვლივ ექვსჯერ მეტი მტერი და გვემუქრება სრულ გაჟლეტას. სხვა გზა არ არის: ან სამარცხვინო ტყვეობა, ან ნამუსიანი სიკვდილი... და მწამს, რომ ქართველი მხედრობა მეორეს აირჩევს. დიახ, ჩვენ გავწყდებით მთლიანად, შევაკედებით მტერს, ხოლო ტყვედ არ ჩაუვარდებით ხელში. ასეთია ძველადვე ქართველი ლაშქრის წესი. მაშ განთიადის ჟამს ვეკვეთოთ მტერს თავგანწირვით, ვიბრძოლოთ გმირულად და ძვირად დაფუსვათ ვერაგ სპარსებს ჩვენი სიკვდილი!

დაამთავრა მოურავმა და კვლავ მრისხანედ გადახედა თავის მტრებს. იმათ ჩაექინდრათ თავი და არ იღებდნენ ხმას.

ერთხანს სამარისებური სიჩუმე ჩამოვარდა. ეს დუმილი დაარღვია რუისის მიტროპოლიტის დომენტის ხმამ:

— ქრისტეს მიერ სულიერო შვილნო, ივერიის ქებულო მეფევე, დიდებულო და სახელოვანო სარდალნო! არა ერთგზით ჩავარდნილა ასეთ მძიმე განსაცდელში ქართველი მხედრობა შემოსეულ მტერთა მიერ, ხოლო ძალითა უფლისათა გამოსულა ცოცხალი და გამარჯვებული ქართველი ერი ჯვაროსანი, მურდალ სარკინოზთა შორის განგებით შუაგულ მოქციული.

ის ობოლი ვაჟია, მას ყერას აკლებს საშინელი ბორიო-გრიგალი, რომელიც ძირფესვიანად გლეჯს უზარმაზარ მუხებს... აწ იგივე იქნების ახლაც. საქართველოს მფარველი წმ. გიორგია, ჩვენი შემწე და ღვთით გადავრჩებით უვნებელნი ამ განწირვის უამსა. და აჰა, ჩვენც, სულიერი მამანი მიტროპოლიტნი, ალავერდის, მარტყოფისა და რუისის ქრისტეს ჯვარის ნაცვლად ხელთ ვიპყრობთ მახვილსა, რათა თქვენთან ერთად ვებრძოდეთ ჩვენს სამშობლოში შემოჭრილ მტერთა ქრისტეანეთა, ხოლო მანამდე ვიღებთ ბარძიშს და მოგმართავთ ყველას, სულიერო შვილნო, რათა მიიღოთ წმ. ზიარება ხელითა ჩვენითა, რამეთუ არ ვუწყით, თუ ვინ დარჩების ჩვენს შორის კვლად ცოცხალი“...

ამ სიტყვებთან ერთად წამოდგა ახოვანი მოძღვარი, მოიძრო შავი კოთხო და აღახვნა თვალნი ზეცად. მისი ბაგენი ღალღებდნენ ლოცვას. მის გვერდით დადგნენ ბარძიშით ხელში მიტროპოლიტნი მარტყოფ-ალავერდისა და რამდენიმე არქიმანდრიტი თავლიად. გაისმა მწყობრი სასულიერო გალობა. მათ წინაშე კი მუხლმოყრითა და ქუდმოხდით იდგნენ მეფე, სარდლები და მხედრობა. ეს იყო დიდებული წამი. სულიერ მამათა ღვთისადმი ღალადს უერთდებოდა მათ თვალთაგან უხვად ნადენი მხურვალე ცრემლები. გათავდა ლოცვა. წამოდგნენ ყველანი. სარდლები და მხედრები მწყობრად მიდიოდნენ სულიერ მამებთან და იღებდნენ ზიარებას, შემდეგ ეხვეოდნენ ერთმანეთს და ეთხოვებოდნენ თითქო სამუდამოდ. ყველას სახეზე ეწერა გამირული თავგანწირვა.

დაბერა დილის ნიაგმა და ააშრიალა ფოთლები. აქყიბინდა ზურნა ირანელთ ბანაკში. ახმაურდა ბუკ-ნაფიჩ-ნალარა ივერთა შორის. დაიგრიალა თოფჰა, იწყო საზარო ღრილო უზარბაზნის მშეიკმა ხახამ. აიშალნენ მწყობრად რაზმები. აპრიალდნენ შუბნი, იელვა ხმალმა.

სიმრავლით გათამამებული მტერი და სიმცირით თავგანწირული ქართველნი დაეტაკნენ ერთიმეორეს სამკვდროსასიცოცხლოდ. გაჩაღდა საშინელი ბრძოლა. სისხლის ღვარო-

ქაფს მიჰქონდა კაცი და ცხენი. მიძიმედ დაჰკრილის კვნესა და მომაკვდავის მწარე გმინვა სწვდებოდა ზეცას...

ზეცა კი ღუმდა იმ დროს. იგი გულცივად დაჰყურებდა მარაბდის სისხლიან ველს თავის ფირუზა სახით... ამ დროს მთების წვეროდან უზარმაზარ წითელ ბურთივით ამოგორდა დიდი მნათობი და დააშტერდა ბრძოლის ველს თავის სისხლიანი თვალებით.

აქ იღვრებოდა კაცის სისხლი... აქ ადამიანი ჰკლავდა ადამიანს...

გაშუადღევდა. გაჭირდა საქმე. ერთგვარი მხნეობით იბრძოდა ორივე მხარე.

ექვსჯერ უმრავლესი მტერი ყოველი მხრიდან აწვებოდა ქართველთ. სიცხე მატულობდა. იგი უხუთავდა სულს და ართმევდა ძალას დაქანცულ ივერთ. სიცხეს ჩვეული ირანელნი-კი მედგრად იბრძოდნენ. მოურავი დაჰქროდა თავისი რაშით ქართველთ გუნდებში და ამხნეებდა მათ, თანაც მიჰქონდა იერიში მტრის რაზმებზე, შეჰქონდა შიში და სიკვდილი. მასვე ბაძავდნენ სხვა გმირებიც, მაგრამ მტერი იყო ფრიად მრავალი, ქართველნი კი მეტად მცირენი...

ამ საშინელ ბრძოლაში გაწყდნენ ცხრა ძმა ხერხეულიძენი, ცხრა მაჩაბელი, შვიდი ჩოლოყაშვილი. აქვე მოჰკლეს სახელოვანი ვაჟკაცი ბაადურ ციციშვილი, მარტყოფის მიტროპოლიტი, ხორჰაშნელი, ათასობით გაწყდა გლეხობა. განახევრდა ივერთა ჯარი. გაწყდა აგრეთვე 18 ათასი ირანელი, მაგრამ ბრძოლას არ უჩანდა ბოლო. სააკაძეს მოუტკლეს ცხენი და შემოერტყნენ მოსაკლავად. სწორედ ამ დროს მისი მხსნელი შეიქნა მთის არწივი ლომი ჩრდილელი. თავგანწირული ძგერებით ორივემ გაულიტეს თავდამსხმელნი, ამავე დროს ლომიმ მიაართვა თავისი ცხენი მოურავს, თვითონ კი ქვეითად განაგრძო მედგარი ბრძოლა. სააკაძე მისწვდა ცხენის მკვლელს, შუაზე გააპო ხმლით, მისი ცხენი კი გადასცა ლომის და მით გადაუხადა სამაგიერო.

დიდად გაჭირდა საქმე, შედრკნენ ივერნი, პაპანება სიცხე უხუთავდა მათ სულს და უკვეთდა მუხლებს.

მათ იბრუნეს პირი, სწადდათ გასვლა მტრის რკინის სალ-

ტედან, მაგრამ გასავალი გზა არსად იყო. მაშინ მოურავის ბრძანებით ეძებრნენ მტრის უფრო სუსტ მხარეს თავის რაზმებით სააკაძის ვაჟი ავთანდილი და ცოლისძმა დათუნა ერისთავი. მედგარი ბრძოლით გააპეს მტერი და ამრიგად მისცეს ქართველ ჯარს გასავალი გზა. ივერთ მოითქვეს სული და განაგრძეს ისევ მედგარი ბრძოლა.

ამ დროს გავარდა საბედისწერო ხმა: მოჰკლეს თეიმურაზ მეფეო. ეს ხმა ელვის სისწრაფით მოედო ქართველ რაზმებს და დასცა სულით. მათ გაუწყვიტეს და მძიმედ დაუჭრეს საუკეთესო სარდლები, ახლა მოუკლეს მეფეც. შიშმა აიტანა დაჭრილ-დაქანცული და განახევრებული ქართველი ჯარი. მან ველარ შესძლო მეტი და იბრუნა პირი გასაქცევად. მოეკლათ თურმე თეიმურაზ მუხრან-ბატონი. ბევრს ეცადა მოურავი შეეჩერებინა ივერთა ჯარი, მაგრამ ვერას გახდა: მათზე არ სჭრიდა არც თხოვნა, არც მუდარა. მაშინ ხალხის გადმოცემით, გმირმა სააკაძემ ჩაასო თურმე მიწაში თავის ხმალი და გადატეხა შუაზე ამ სიტყვებით: ასე მოელოს ბოლო მათ, ვისი მიზეზითაც დღეს საქართველო იღუპებაო!

ასე დასრულდა ეს უმაგალითო ბრძოლა მარაბდის ველზე.

XXIX. მზრინავი რაჯმები

გამარჯვებული ირანელები, რიცხვით ასი ათასამდე, შევიდნენ ქართლში. თბილისში მათ მეფედ დასვეს გაქცეული სვიმონი და იწყეს ციხე-სიმაგრეთა ხელში ჩაგდება. თეიმურაზ მეფე ძველებურად გავარდა იმერეთს. ღარჩა ისევ უპატრონოდ მთელი ივერი. ქართველი ჯარი აღარ იყო, რადგან ოცი ათასიდან ცხრა ათასი გაწყდა ბრძოლის ველზე, დანარჩენი კი ზოგი მძიმედ დაიჭრა და წამლობდნენ შინ, ზოგიც თავის ოჯახს მიეპატრონა.

მტრის შემოსევით შეშინებული ხალხი ეცა სახიზნ ალაგებს, დიდმა თავადებმა კი ჩვეულებრივ განუცხადეს მტერს მორჩილება, იწყეს მათ სარდლებთან მოყვრობა და მეგობრობა, ამათ დაავიწყდათ ერი და სამშობლო. ქვეყნის პირველი მოღალატე შეიქნა თვით ზურაბ ერისთავი: იგი ხოსრო მირზას შემწეობით დაუახლოვდა ყორჩიბაშს. სააკაძის წყალობით ზურაბ ადრევე შეიქნა თეიმურაზ მეფის სიძე: მეფემ მიათხოვა მას თავისი ასული დარეჯანი. მიუხედავად ამისა, ამ უნდო აღამიანმა ზურგი აქცია სიმამრს და იწყო ისევ შაჰბაზის ერთგულება. ამას ითხოვდა მისი პირადი ინტერესი.

მრისხანე შაჰმა გასცა ბრძანება მოესრათ ერთიან მთელი ივერი. ეს ბედშავი ქვეყანა უარეს ხიფათში ჩავარდა. მას არ ჰყავდა ჯარი, სარდლები, მეთაური. საუკეთესო ვაჟკაცი და ერის შვილები გაწყდნენ ბრძოლის ველზე. მეფე გაიქცა

იმერეთს. გაბარჯვებული მტერი შევიდა ქართლში და იწყო თარეში. ირანელნი ფხიზლად და ხერხიანად მოქმედებდნენ. უმწეოდ დარჩენილი ხალხის ერთადერთი ნუგეში იყო მთა-აპა, იწყეს მთისკენ დენა სახიზნად ცოლშვილით და სარჩო-ქონებით! ქართლ-კახეთს ახლა უარესი რისხვა მოელოდა: ის წითლად უნდა შეღებულიყო, მტერს უნდა გაეჟლიტა მთელი ივერი.

ამ შავბნელ დროს ქართლში იყო ერთი კაცი, რომელიც არ შეუშინდა მტრის სიმრავლეს, არ დამორჩილდა მას, არ გააგდო ხელიდან მახვილი. ეს დიადი გმირი შეიქნა განწირული ხალხის ქომაგი. მან შეაგროვა პირველ ხანებში 60-მდე საუკეთესო მამაცი და ამ მცირე რაზმით შეეჭიდა ირანის უზარმაზარ ლაშქარს. მან გაუმართა მტერს სათარეშო ბრძოლა. სარგებლობდა მარჯვე შემთხვევებით, ვიწრო ხევებით, ბნელი ღამეებით, თავგანწირვით ესხმოდა სხვადასხვა ალაგს დაბანაკებულ მტერს და ადენდა მუსრს, ართმევდა სურსათსა და იარაღს.

მოურავმა მიმართა თავის ძმად ფიცულთ, ხალხის წილიდან გამოსულ მამაცებს: ორივე პაპუნას, ლომის და გელას.

„აბა ძმებო! ხომ ხედავთ, რა ხდება! ჩემდამი პირადი მტრობით და მეფე-დიდებულთა უგუნურობით დღეს იღუპება ბელშავი საქართველო! ზურგიდან გვერეკება და გააფთრებით მოგვდევს უამრავი მტერი... აბა ვუშველოთ ხალხს! დაეფაცურდეთ! მივცეთ გახიზვნის და სარჩო-ქონების გადამალვის საშუალება! გაფრინდით სწრაფად! აირჩიეთ გამოცდილ მხედრებში ხელდახელ საუკეთესო მებრძოლნი, ასამდე კაცი, სულ ცხენოსნები. ამ მცირე რაზმით ახლავე უნდა დავეცეთ მტრის მოწინავე ჯარს და შევაფერხოთ მათი სვლა სათარეშო ბრძოლით. ამავე დროს მივიღოთ ზომები და შევკრიბოთ ათასამდე მაინც საუკეთესო ვაჟკაცნი, ერთი რომ ათსა და ოცს სჯობდეს, დავყოთ ისინი მცირე ჯუნდებად, შევქმნათ მფრინავი რაზმები, მოულოდნელი თავდასხმით სიცოცხლე გავუმწაროთ შემოსეულ მტერს და შევზღუდოთ მისი თარეში... აბა, ჩემო შევარდნებო, გაფრინდით!

დრო აღარ ითმენს. ხომ იცით, რა ბრძანა დიდმა შოთამ: „დიდსა რას ვაქნევთ ლაშქარსა, კარგი გვინდა და ცოტანი“, აგრეთვე: „ასი ათასსა აჯობებს, თუ გამორჩევით მქნელია“... მაშ ასე, გასწითი დღეს უჭირს ჩვენს უბედურ სამშობლოს და დღეს გამოინდება, ვის უფრო გვიყვარს, ძმანო მამული...

და მართლაც გაფრინდნენ მოურავის შევარდნები და მეორე დღესვე საღამო უამს მოპკვარეს სამოცამდე მხედარი, ფიცხნი, ქარივით სწრაფნი, ომში უდრეკნი და ლომივით მებრძოლნი.

მოურავი ამ მცირე რაზმით, 60 კაცით, უმკლავდებოდა მტრის ლეგიონებს. ერთი მუჟა რაზმით დიდი მოურავი ელვის სისწრაფით ეცემოდა თავზე შუაგულ ქართლში უამრავ მტერს და აღენდა მუსრს. მან მრავალ ალაგას მისცა მტრის მოწინავე რაზმებს დიდი ზიანი, მაგ. ტფილისთან, ავქალასთან, წიწამურთან, ლართისკართან, არაგვზე და სხვა. სააკაძე მამაცი რაზმით შევარდენივით ესხმოდა მტერს ყველგან და აღენდა სისხლის ღვართქაფს. ეს იყო რალაც სიგიჟე, ზეშთაგონებით ნამოქმედარი. მოურავის ასეთმა უმაგალითო თარეშმა შეაფრთხო ირანელნი და ჩააგდო საგონებელში. პირიქით, სააკაძის ასეთმა გმირობამ გაამხნევა ივერნი. იწყეს მასთან დენა საუკეთესო ვაჟკაცებმა. მალე შეგროვდა რამდენიმე ასეული.

საკაძის ძალამ ერთი-ათად იმატა. ჩქარა დაბრუნდნენ მასთან თავისი რაზმებით მთისა და ბარის არწივნი: ლომი ჩრდილელი, გოგოთურ, ბერდია, გელა, პაპუნა ჩივაძე და პაპუნა ვაშაყაშვილი. თითო მათგანს მოჰყვა ომში გაწვრთნილი ას-ასი მამაცი, საუკეთესო ბელაურებზე მსხდომნი. ხოლო ცაროს რაზმი შედგებოდა განსაკუთრებით მთიელ და ბარელ ქალწულთაგან; ჯუბა-ჯავშან-მუზარადში ჩამსხდარნი და ლუშ ცხენებზე მოჯირითენი, თოფებით, გრძელი შუბებით და ბასრი კალდიმით ჭურვილნი, ეს ივერთა ასულნი გაგონებდნენ უძველესი დროის მამაც ამორძალთ.

ამრიგად გმირს შეუგროვდა ხუთიოდ დღეში 600-მდე მებრძოლი. ეს მცირე მხედრობა მან დაჰყო 40-50 მეომართაგან შემდგარ წვრილ გუნდებად, უწოდა მათ მფრინავი

რაზმები და წინასწარ დასახული გეგმით სხვადასხვა მხრივ მიუხია გალაგებულ მტერს უეცარ თავდასაცემად.

— „რა გაჭირდის, უკეთ შეეძლი, ასე მქონდა ომის ჩვევა“... ათქმევინებს ამ სიტყვებს დიდ მოურავს არჩალ მეფე თავის პოემაში. და სწორედ სამშობლოს ასეთ საშინელ გასაჭირის დროს გიორგი სააკაძე თავისი მფრინავი რაზმებით ჩადიოდა უდიდეს საგმირო საქმეებს. დიდი შოურავის გეგმა-ხელმძღვანელობით ეს რაზმები ელვის სისწრაფით ესხმოდნენ რამდენიმე ალაგას დაბანაკებულ მტერს მოულოდნელად, ყოველ მხრიდან, უმთავრესად ბნელ ღამეში ან რიყრაყზე და აყენებდნენ დიდ ზიანს: ქლეთდნენ, მუსრაედნენ, ართმევდნენ ტყვე ქართველთ, — ირანში გასაგზავნ ულამაზეს ქალ-ვაჟთ. იტაცებდნენ ბარგს, სურსათს, სამხედრო იარაღს, დატვირთულ ჯორ-აქლემებს და ოთხფეხ საქონელს. გონს მოსული ირანელი გამოუდგებოდნენ ხოლმე ამ თავდამსხმელ გუნდებს, მაგრამ სწორედ ამ დროს მათ უკანიდან დაესხმებოდნენ ტყესა და ხევში ადრე ჩასაფრებული მფრინავი რაზმები და ადენდნენ მუსრს. გარბოდნენ ზარდაცემული ირანელი და თან მიჰყვიროდნენ: „ჰალაჰი გურჯი — გიაურ!.. ჰალაჰი! გურჯი — შაითანი! შაითანი!“

ბნელი უმთავრო ღამე. ღართისკართან ბანაკად იდგა სამი ათასი კაცისაგან შემდგარი მტრის ჯარი ქუჩუკ-ხანის სარდლობით. მათ ჩაეგდოთ ხელში ეს ვიწრო ყელი და შეეკრათ გასაქცევი გზა სოფლის ხალხისათვის. შუალამეს კარგა გადასცილდა. ტკბილად ეძინა ირანელთ ჯარს. თვლემდნენ გუშაგნიც. ამ დროს ოთხივ მხრივ გაისმა საშინელი ყიჟინა და თოფის გრიალი. შიშის ზარი დაეცათ მძინარე ლაშქარს. წამოიშალნენ, ეცნენ იარაღს, ხოლო სიბნელეში ვერ არჩევდნენ მტერს და ქლეთდნენ ერთმანეთს. ადრევე დამფრთხალთ ყველგან ელანდებოდათ „დელი მოურავი“ მისი მფრინავი რაზმებით. მართლაც, ეს გაბედული იერიში მიიტანა მტერზე განთიადის მოახლოების ეამს გიორგი სააკაძემ რაზმებად დაყოფილი სამასი კაცით, გაანადგურა მტერი და გაუხსნა მთებში შესაფარებლად გზა უკან მომდევნო ხალხს.

სწორედ ამავე დამეს ასეთივე გაბედული თავდასხმა მოხდა სოლანულთან, სადაც ითევდა დამეს ორი ათას მებრძოლთაგან შემდგარი ირანის რაზმი, რომელსაც მიჰყავდა ირანში ქართლ-კახეთში ნაალაფარი ხუთასი ულამაზესი ქალ-ვაჟი. განთიადის ჟამს მძინარე მტერს თავს დაესხნენ სამივე მხრივ თავის მფრინავი რაზმებით ლომი ჩრდილელი, ცარო და პაპუნა ჩივაძე. ამათ დიდი ზიანი მიაყენეს მტერს, გამოსტაცეს ტყვეები და შეეფარნენ ტყეებს; დამარცხებული მტერი ხელცარიელი გამორბოდა თბილისისაკენ.

გარეჯის მონასტრის სიახლოვეს ბანაკად დგას მტრის რაზმი, ხუთასი კაცისაგან შემდგარი, სამასი აქლემით და ხუთასი ჯორ-სახედრით. რაზმს მოაქვს განჯის მხრიდან ჯარის სურსათი. დილის რიჟრაჟზე აიშალნენ და გაუდგნენ გზას თბილისისაკენ. დაუახლოვდნენ თუ არა ტყიან ალაგებს, ანაზღად ორი მხრივ მათ დაესხნენ თავს პაპუნა ჩივაძე და პაპუნა ვაშაყაშვილი ორასი მამაცით, დასცეს საშინელი ყიყინა და დაახალეს თოფები. მივარდნენ მტერს ხმალ-დახმალ. ერთი საათის ხელჩართული ბრძოლით შემუსრეს მტრის რაზმი და გაიტაცეს მთლიანად სურსათით ტვირთული ოთხფეხნი.

ირანელნი ფრიად გააბრაზა დიდი მოურავის მფრინავი რაზმების მოქმედებამ. ყორჩიბაშმა გასცა ბრძანება გაეუღიტათ ეს „თავხედი“ და „აბეზარი“ რაზმები. ამ მიზნით მან გამოყო თავისი ლაშქრიდან საუკეთესო ცხენოსანი ჯარი, ხუთი ათასი კაცისაგან შემდგარი, გამბედავ ქუჩუკ-ხანის სარდლობით, დაყო ეს ჯარი დამსჯელ რაზმებად და მიუსია სააკაძის მფრინავებს, თანაც აამოძრავა ჯაშუშნი. უხვი ჯილდოს დაპირებით, თუ კი ამცნევდნენ დიდი მოურავის მფრინავ რაზმელთა ბინებსა და სამალავ ალაგებს.

გასქრა ყორჩიბაშის ხერხმა. ბევრს არამზადას გაეხსნა მადა ეშოვა ბლომად ოქრო, მოეპოვა შაჰის წყალობა. ამათ ურცხვად გასცეს ქვეყნის დამცველნი და მით საგრძნობი ზიანი მიაყენეს ივერთა მფრინავ რაზმებს, აგრეთვე ფრიად დააზარალეს მშვიდობიანი მცხოვრებნიც.

ქუჩუკ-ხანის დამსჯელი რაზმები, რიცხვით ათი, თითო ხუთასი კაცისაგან შემდგარი, არბევდნენ ქართლ-კახეთის დაბა-სოფლებს, ართმევდნენ გლეხობას ჭირნახულს, ოთხ-ფეხს, ფრინველს, მეტადრე კი ნადირობდნენ ლამაზ გოგობიჭებზე, მიჰყავდათ ისინი ტყვედ ათობით და ასობით. იდგა სოფლად მშვიდობიანი ხალხის ტირილი და ვაება.

დამსჯელ რაზმთა უხვი ნადავლი გროვდებოდა სპარსთა მთავარ ბანაკებში, რომელთა შორის ერთი იყო გარე-კახეთში (ლოჭინოს ველზე), მეორე კი სამუხრანოში (არაგვის პირას). ამასთან ერთად ირანელთ ხელთ ეკავათ მთელი ივერიის ციხე-სიმაგრენი.

მოურავი ადრევე მოელოდა ასეთ ფანდებს ყორჩიბაშის მხრივ. იგი სრულიად მომზადებული შეხვდა დამსჯელ რაზმებს. შეიქნა ერთგვარი შეჯიბრება და დავლური მოპირდაპირეებს შორის. ისინი ნადირობდნენ ერთიმეორეზე და უზოგველად ყლევდნენ ერთმანეთს. აეშაგოა მეშუღობით ადრევე იგებდნენ ერთმანეთის ბინებს, სამალავ ალაგებს და სასვლელ გზებს, ესაფრებოდნენ ერთმანეთს, თავს ესხმოდნენ მოულოდნელად და აყენებდნენ საგრძნობ ზიანს. ისინი არ ინდობდნენ ერთი მეორეს. იყო მათ შორის ბრძოლა მძაფრი, სასტიკი და უღმობელი. მტერს არ ნებდებოდნენ ცოცხალი, რადგან კარგად იცოდნენ, რაც მოელოდათ ტყვეობაში, ამიტომ ორივე მხარე იბრძოდა უზოგველად, სისხლის უკანასკნელ წვეთამდე.

ჩამავალი მზის სხივები წითლად აფერადებს შორეულ მთებს. აგერ მტკვრის პირას პატარა მინდორზე დაბანაკებული პაპუნა ჩივაძის მფრინავი რაზმი, ასოც კაცამდე. ამ მწვანე მინდორს გარს აკრავს სქელი ტყე. რაზმი ფრიალ კმაყოფილია რომ ამ დილით კარგად ინადირა, გააბა მახეში მტრის ერთ-ერთი დამსჯელი რაზმი და მედგარი ბრძოლით მიაყენა დიდი ზიანი, თანაც დააყრევინა უხვი ნადავლი და ტყვედ წამოყვანილი ორმოცამდე ქალ-ვაჟი, რომლებიც დაგზავნა კიდევ თავიანთ სოფლებში, აგრეთვე საიმედო ალაგას დააბინავა ნადავლიც. შელამდა კიდევ. მიღამომ მოისხა მწუხრის ნაბადი. აჰა, მთვარე ამოიწვერა მთის თხემიდან და

ვერცხლით ასევეადა თალხით მოსილი ბუნება. გაიშალა მინდორზე ლურჯი სუფრები, უხვად დალაგდა ცივად მოხარშული თოხლის მსუქანი ნაჭრები, თუშური ყველი და თორნის პურები. მარღად მოუსხდნენ რაზმელნი და მადიანად შეექცნენ ვახშამს. მზად კაზმული, ხოლო მოსართავ-მოშვებული მათი ცხენები ფრუტუნით ძოვდნენ იქვე ბალახს. მოხსნეს თავი ორჩაფიან ტიკს. ღვინით სავსე პატარა ყანწები გადადიოდა ხელიდან ხელში.

ამ დროს გაისმა სამი მხრივ გუშაგთ განგაში. ამას მალე მოჰყვა თოფების სროლა.

მამაცი პაპუნა ჩივადე ლომივით წამოვარდა ზეზე.

— აბა, მხნედ, ბიჭებო! გაგვეცეს! მტერი მოგვადგა სამი მხრივ. სწრაფად, ზურგით მტკვრისაკენ... წაიყვანო ცხენები... ჩასაფრდით ტყეში... ძვირად დაუსვანო ჩვენი სიცოცხლე... ორც ერთი ტყვედ! ან შეაკვლით მამაცად, ან სცადეთ თავის დაღწევა, ვისაც გწადიათ...

გაისმა ნაწყვეტ-ნაწყვეტად პაპუნას ბრძანება.

რაზმი აიშალა, ელვის სისწრაფით ამოძრავდა და შეასრულა მეთაურის ბრძანება.

ამ დროს სამივე მხრიდან გავარდა თოფები. მალე გაჩნდნენ მინდორზე ხმალამოწვდილი ირანელნი, ექვსას კაცამდე, თვით ქუჩუკ-ხანის სარდლობით.

— გზები შეკრულია, ვერ წახვალთ! დაგვრჩით, გურჯებო!

გაისმა ქუჩუკის მკექარე ხმა.

პასუხად გავარდა მტკვრის მხრიდან სამოცამდე თოფი. ოცამდე მტერი გადმოვარდა ცხენებიდან მკვდარი და ზოგიც დაჭრილი.

ყოზილბაშებმა იკადრეს უკან დახევა და შეათარეს თავი ტყეს.

— განა უნდა გავექცეთ ამ წუნკლებს! აბა ბიჭებო, მომყევით, ვისაც გული გერჩით! გავარდეთ სწრაფად და სამივე მხრივ შევეუტიოთ მტერს. აქ ცხენებთან დარჩება თამაზი ოცი რაზმელით. თუ ნახოთ გვიჭირს და ჩვენი ხსნა ძნელია, თავს უშველეთ! მიაშურეთ მტკვარს ცხენებით, გადით

სამშვიდობოს... ამცნეთ დიდ მოურავს ჩვენი დაღუპვა.
მამაცად, ძმებო! — მიმართა პაპუნამ დანარჩენთ: — თოფით,
დამბაჩებით და შუბით ხელში ეძგერეთ მტერს! შემდეგ კი
ხმალდახმალ... ჰკა მაგათ!

წამოიძახა პაპუნამ და გაქანდა თოფით ხელში. მას მიჰყვა
ასამდე კაცი.

მტერმა იცოტავა, სწრაფად გამოვიდა საფრიდან და შე-
მოერთყა ირგვლივ. ორივე მხარემ დაახალა ერთმანეთს
თოფ-დამბაჩები. მალე შეექმნათ ხელჩართული ბრძოლა
სამკვდრო-სასიცოცხლოდ. ირანელნი ქვეითად იბრძოდნენ.
მკვდრები და მძიმე დაჭრილნი პანტასავით ცვივოდნენ ძირს.
ივერნი იბრძოდნენ გააფთრებით, მაგრამ ვერას აწყობდნენ
ექსპედიერ მეტ მტერთან, რომელიც რკინის სალტესავით ეკვ-
როდა ირგვლივ.

დაიხოცნენ საუკეთესო ბიჭები პაპუნას რაზმიდან. აჰა,
დაეცა თვით მამაცი პაპუნა მძიმედ დაჭრილი!

— მოკვდი, გიაურო!

ამ სიტყვებით მიიჭრა პაპუნასთან ქუჩუკ-ხანი და დაახა-
ლა მომაკვდავს გულში დამბაჩა.

პაპუნას სიკვდილმა წელში გაწყვიტა განახევრებული
ივერნი, იმავე დროს კი ფრიად გაამხნევა ყიზილბაშნი. ამათ
დასცეს სიხარულის ყიჟინა და შემოერთყნენ ქართველთ
უფრო ვიწროდ.

მამაცად იბრძოდნენ გამწარებული ივერნი, ხოლო არა
ნაკლები სიმამაცით იბრძოდნენ ირანელნი, სიმრავლით გამხ-
ნევებულნი.

კიდევ ოციოდ წუთის ხელჩართული ბრძოლა — და ასივე
ქართველ რაზმელმა ჰპოვა ვმირული სიკვდილი თავის მამა-
ცი მეთაურის გვერდით. არც ერთი კი არ დანებდა მტერს
ცოცხალი. მათ იმსხვერპლეს სამასამდე მტერი.

რა ნახა აღრევე თამაზმა, რომ საქმე სჭირს, პაპუნას რაზ-
მელებით მოელის სრული დაღუპვა და შეველა შეუძლებე-
ლია, ანიშნა თავის ოც რაზმელს ცხენზე შეჯდომა. იმათ
სწრაფად გაირეკეს წინ მარჯათა ცხენები და შეეუბრდნენ
მტკვარში. გვიან გაიგო ბრძოლაში გართულმა მტერმა, და-

ახალეს თოფები, ბოლო ტყვია არ მოხვედრია ორის მეტს, პათში ერთი დაიჭრა მძიმედ, მეორე კი მსუბუქად.

მალე ამცნეს დიდ მოურავს ეს მძიმე ამბავი, ეს დიდი მარცხი. უზომო იყო მისი მწუხარება. ამიერიით მას აღარ ჰყავდა თავისი საუკეთესო ძმადფიცული, თავისი მარჯვენა ხელი — მამაცი პაპუნა ჩივადე.

უფრო გამბაფრდა სარდალი, შეუდგა ახალ ხერხებს, თუ როგორ მოესრა ან დაესუსტებინა მაინც შემოსეული მტრის ლაშქარი.

აგრეთვე დიდ ზიანს აყენებდა ირანელთ მთიელი გელა; მისი რაზმი მთლიანად შედგებოდა 150 ცხენოსან ქალწულთაგან, რომელნიც თვით ცარომ შეკრიბა ივერიის სხვადასხვა კუთხიდან. იმათ ემოსათ ვაჟურად მუქი სისვი ფერის შალის მოკლე ჯუბა-შარვალი, ზემოდან რკინის მჩატე ჯავშანი. ფეხზე კი ეცვათ მაღალყელიანი უქუსლო წალბები. რაზმელებს შეეკრიბათ თმები და თავზე წაეკრათ იმავე შალის ჩაბალახნი. მათი საქურველი იყო ბასრი ხმალი და ხანჯალი, თოფი, დამბაჩა და პაწია მორგვალო ფარი. ერქვათ ვაჟური სახელები. ეს ქალები იყვნენ საუკეთესო მხედარნი, ფრიად დახელოვნებული ნიშანში სროლასა და ხმალ-ხანჯლის ხმარებაში, გულით მამაცნი და ხალხისათვის თავგანწირულნი. გელასთან ერთად იმათ შეფიცეს ერის მოთავეს: ან გაწყდებოდნენ მთლიანად ამ უეცარ თავდასხმებში, ან ბოლოს მოუღებდნენ მტრის თარეშს ივერიაში. მოურავი ხომ აქეზებდა და ხელს უწყობდა მათ რჩევა-დარიგებითა და იარაღ-სურსათით. ეს ამორძალთა რაზმი შეიქნა სააკაძის მარჯვენა ხელი.

კუნავეტი ღამე. მცხეთის ვიწროებში ღუმელს არღვევს მტკვრის ღუღუნის და არაგვის ჩხრიალი. ტყესა და ბუჩქნარში ჩასაფრებულა ას ორმოცამდე მხედარი. მათ არ სძინავთ, ელიან ვილაცას. ამ დროს რაზმიდან ას ნაბიჯზე მდგომ ორ გუშაგს მოესმა ჭოტის ხმა. ამავე ხმით ჟუპასუხა ერთმა მათგანმა. გამოჩნდა ახლო შავი ლანდი.

— ვინ მოდის? — შესძახა წყნარად გუშაგმა და შემართა დამბაჩა.

— მოკეთე! — იყო წყნარი პასუხი.

— ნიშანი?

— მცხეთა.

— კეთილი! მოახლოვდით! — ამ სიტყვებით გუშაგმა დაუშვა დამბაჩა.

— შენა ხარ, რეზო? — შეეკითხა იგივე ახალ მოსულს — რა ამბავი მოგაქვს?

წამიყვანეთ რაზმის უფროსთან და იქ ვიტყვი.

— ვინ მოხველ? — შესძახა წყნარად გელამ.

— რეზო მზვერავი, სარდალო!

— რაი ამბავი?

— განთიადის ქვამს აქ იქნებიან, საცაა ამოვა დავახშმებული მთვარე.

— კეთილი, რამდენი არიან სულ?

— სპარსთა რაზმი ხუთას კაცამდე იქნების. მოკყავთ ხელფეხშეკრული და ერთმანეთზე გადაბმული ექვსასამდე ულამაზესი ქალ-ვაჟნი, ყველანი შუა ქართლში ნათარეშევი.

— ეგრე. სად დასტოვე ისინი?

— ძეგვთან ბანაკად დგანან.

— კეთილი. აბა, ჩემო ვაჟკაცო, — მიმართა გელამ ჯგუფთა უფროსებს, — თქვენ, გენო და ბესო, ორმოცი მხედრით დაეცი თტერს მარჯვენა მხრიდან; თქვენ, კაკო და სოლო, ორმოცი მხედრითვე დაეცი მარცხენა მხრიდან; თქვენ კიდევ გიგო და შაქრო, ოცდაათი მხედრით დაუარეთ თავი და მოექექით უკნიდან. შენვე მოგეშველები ხუთი მზვერავი, რომლებიც შორიასლოდან დაედევნებიან მტერს. ხოლო მე ჩემი ოცდაათი მამაცი მივიტან იერიშს პირდაპირ. კარგად მოზომეთ მანძილი და საფარი ალაგები, ელოდეთ ჩემს ნიშანს. ეს იქნება თოფის გავარდნა. მაშინვე უმიზნეთ კარგად, დასცალეთ თოფები, შესხედით ცხენზე, დასწყვიღეთ და გადუხტით ხმლითა და დამბაჩით. ეს თავდასხმა უნდა იყოს სწრაფი და უეცარი. უნდა გაიმუსროს მტერი, სანამ გონს მოვიდოდეს. ტყვეებს გადაუსროლეთ ხანჯლის დანები, რომ დასკრან თოკნი და დაიხსნან ხელფეხი. ტყვეები გაიტაცეთ სამხედრო გზით ანანურისაკენ;

19. ს. ქვარაძის.

ჩააბარეთ ისინი უკონ და ბერდია; ასეა ერის მოთავეს განკარგულება. მაშ ასე, ძმებო, იყავით მარჯველ!

ამ სიტყვებით გასცა ბრძანება მამაცმა გელამ.

ყველაფერი შესრულდა თანახმად მისი გეგმისა. მოახლოვდნენ ირანელი ქართველი ტყვეებით, გელამ და ჯგუფთა უფროსებმა ოთხივე მხრიდან დასცალეს თოფები, დასწყვილეს და მიიტანეს მედგარი იერიშები. თავზარი დაეცა მტერს ამ უეცარი თავდასხმით. იგი დაიბნა, დაფრთხა, დაყარა ტყვეები და იწყო უთავბოლოდ დაფანტვა ტყესა და ღრეში. მაგრამ ბედშავ მტრებს ყველგან სწვდებოდა მამაც ამორძალთ ტყვია და მახვილი. ისინი გაიმუსრნენ თითქმის მთლიანად. განთავისუფლებული ქართველი ტყვენი (ქალ-ვაენი) წაიყვანეს სამხედრო გზით. ჩაუვიდა ეს ამბავიც ტფილისში ყორჩიბაშს. მის გამწარებას არ ჰქონდა საზღვარი. იგი იგლეჯდა ხორცს თავისივე კბილებით, დიდ საგონებელში ჩავარდა. ასეთმა გარემოებამ უკარნახა მას შეეცვალა პოლიტიკა და სიმკაცრე-ძალმომრეობიდან გადასულიყო დაყვავებაზე.

ხოსრო-მირზას მეშვეობით მან დაიახლოვა ივერიის გელენიანი თავადნი და სასულიერო წოდება, უწყალობა მათ შაჰის სახელით ძვირფასი ნობათი. ასევე მოექცა ცბიერი ყიზილბაში მდაბიო ხალხსაც. ამ ფანდებით ირანის მთავარსარდალმა ყველას გული მოიგო და აამხედრა ისინი დიდი მოურავის წინააღმდეგ.

გაიმარჯვა ირანულმა პოლიტიკამ. მონურმა გრძნობამ შეიპყრო წარჩინებული ივერნი. ამათ გაუგზავნეს სააკაძეს დესპანებად ტფილელი მიტროპოლიტი დიონისე და მცხეთის სამთავროს ეპისკოპოსი ტროფილე. ესენი მივიდნენ დიდ მოურავთან, დაიჩოქეს მის წინაშე, შეევედრნენ ჩაეგო ხმალი და აეღო ხელი უმცნო სისხლის ღვარზე.

— არა არს ოჯახი მთელ ივერიაში, სადაც არ ისმოდეს გლოვა და ტირილი ომში დაკარგულ ძმებსა, ქმარსა და შვილებზე. მთელი ქართლი და კახეთი შემოსილია შავი ძაძით. დიდი ხანია, რაც შევეჩვიეთ სპარსთა მონობას. დიდი ხანია ქართველი ერი ასრულებს შაჰის ბრძანებას. აბა,

სადა გვაქვს იმოდენა ძალი, რომ გავუძკლავდეთ დიდებულ ერანს და შევებრძოლოთ ყეინის ლაშქარსი დიდო მოურავო, მუხლმოყრით გვედრებით ჩააგო ხმალი და მისცე მშვიდობა წამებულ ერსა, გვეყოფის ამდენი სისხლი და უსარგებლო მსხვერპლი!

ამ სიტყვებით ევედრებოდნენ სააკაძეს ივერიის მღვდელმთავრები. გმირი მოწიწებით ეამბორა ხელზე სულიერ მამებს, დასვა ტახტზე პატავით და მოახსენა:

— სულიერო მეუფენო, ვწუხვარ, რომ ტყუილად გარჯილხართ. მოგახსენებთ: მე შევწყვეტ ბრძოლას მხოლოდ მაშინ, როცა ქართლი და კახეთი შეიქნება სრულიად თავისუფალი. ქარქაშში ჩავაგებ სისხლიან მახვილს მხოლოდ მაშინ, როცა ჩემს სამშობლოში არ იქნება არც ერთი ირანელი მებრძოლი! აი ეს გახლავთ ჩემი საბოლოო პასუხი!

წყევლა-კრულვით გამოორდნენ მღვდელმთავარი დიდ მოურავს. სააკაძემ უმატა მხნეობას. მან მიიმხრო ქსნის ერისთავი იასე, ბარათაშვილები, ზურაბ ერისთვის ძმები — გიორგი და დათუნა, აგრეთვე ზემო ქართლის რამდენიმე თავადი. მანვე აფრინა ყველგან კაცები და შეუდგა საერთო ამბოხებას.

მოურავის ასეთი საარაკო მხნეობა ყველას ჭდგამდა გმირულ სულს და იზიდავდა მასთან ერთად საომრად მტრის წინააღმდეგ.

ირანელთა ლაშქრის სპასალარ ყორჩიბაშს, ქართლში ჰყავდა სიძედ ფრიად გავლენიანი თავადი ანდუყათარ ამილახვარი, სჯულშეცვლილი, სამშობლოს მოლაღატე და შაჰის დიდი ერთგული. ჯერ კიდევ ადრე, ირანელთა პირველი შემოსევის დროს სააკაძემ შეიპყრო ანდუყათარ მისი ცოლშვილით და დაამწყვდია არშის ციხეში მყინვართან, რომ არ შეეშალა ხელი ივერიის განთავისუფლების საქმეში. ამ თავისი სიძის ოჯახობით არშის ციხიდან გამოყვანა მოიწადინა ყორჩიბაშმა. ამ მიზნით გაგზავნა 12 ათასი საუკეთესო მებრძოლი უპირველესი სარდლების მეთაურობით. ესენი იყვნენ ხოსრო მირზა, შაბადახანი და ამირგურახანი. ეს ჯარი სამხედრო გზით, ე. ი.

არაგვის ხეობით უნდა ასულიყო არშის ციხეში და გაენთავისუფლებინა ტუსაღნი. ამ სახით ჯარს უნდა გაეცლო ზურაბ ერისთავის სამფლობელოზე. ყორჩიბაშის თხოვნით ზურაბმა დართო ნება. ჯარი აპყვა არაგვის ხეობას, მივიდა არშის ციხეში და გაანთავისუფლა ანდუყათარი.

სწორედ აქ გააბა მტერი მახეში დიდმა მოურავმა. მან მიიმხრო ზურაბის ძმები. ესენი დახვდნენ მათ მთიელთა რაზმებით და არ მისცეს უკან ჩამოსვლის ნება. მაშინ ირანელთ ჯარი იძულებული შეიქნა ჩამოსულიყო ქსნის ხეობით. ჯარს წინ უძღოდა თვით ანდუყათარი, რომელმაც კარგად იცოდა გზები, მაგრამ მტერს ქსნის ვიწროებში დახვდნენ თავისი რაზმებით სააკაძე, ქაიხოსრო მუხრანბატონი და იასე ქსნის ერისთავი. აქ ირანელთ მოუხდათ საშინელი მარცხი. ისინი წუწკი თავგვივით გაებნენ მახეში. წინიდან ჰყავდათ ულმო მტერი დიდი მოურავი, უკნიდან კი აწვებოდნენ თავისი ვაჟკაცებით ზურაბის ძმები, გიორგი და დათუნა, აგრეთვე თუშ-ხევსურნი. მტერნი მოემწყვდნენ შუაში. გასაქცევი გზა არსაით იყო. გააფთრებული ივერნი მისცივდნენ ირანელთ და გაავლეს მუსრი. მთელი ორი დღე ელიტეს მტერი. მათი ლეშით აივსო ვიწრო ხეობა. მდ. ქსანი წითლად შეიღება. გაწყდა მთლიანად მტერი, დაიხოცნენ მათი სარდლები: შაბადახანი, ამირგურიხანი და სხვანი, გადარჩნენ მხოლოდ ანდუყათარი თავისი ცოლშვილით და ხოსრო მირზა. ამ საშინელ ბრძოლის დროს ამათ მთის ბილიკებით გადაასწრეს სამშვიდობოს და მივიდნენ ყორჩიბაშთან, რომელსაც ამცნეს ზარდამცემი ამბავი.

ეს დიდი მარცხი დამართა მტერს გიორგი სააკაძემ. ამ საშინელმა დამარცხებამ, ისკანდერ მუნშის აზრით, წელში გაწყვიტა მტრის ლაშქარი. არც ეს აკმარა დიდმა მოურავმა. ირანელთ ხელში ეკავათ იმ უამად მთელი ჯავახეთი, თურქთაგან წართმეული. სააკაძე გადვიდა ჯავახეთს, მიიმხრო მესხეთის გმირი ელია დიასამიძე და მოახდინა აჯანყება; მან ზედიზედ დაამარცხა ირანელი მეციხოვნენი და წაართვა ციხეები: აწყვერი, ასპინძა, ახალციხე, ხერთვისი, ფარავანი და სხვა. მოურავს სწადდა ჯავახეთი გაეთავისუფ-

ლებინა მტრისაგან და მეამბოხე ჯარით თავს დასხმოდა ყორჩიბაშს. სააკაძის ამ სამხედრო ხერხმა დავთარი დაუბნია ირანელთ. ყორჩიბაშმა გაგზავნა ჯაგვახეთს დიდი მაშველი ჯარი. ამ ჯარს ერთ მხრიდან დახვდა ელია დიასამიძე თავისი მამაცი რაზმით, მეორე მხრით კი დიდი მოურავი თავისი ვაჟკაცებით. შეიქნა ხელჩართული ბრძოლა. ირანელნი დამარცხდნენ სასტიკად. სააკაძემ აფრინა ელჩი სულთანთან და მოულოცა გამარჯვება. ამ სახით მოხიბლა თურქთა მბრძანებელი და ჩაითრია ომში.

სულთანმა ისარგებლა ამ მარჯვე დროთი და იწყო მზადება ირანის წინააღმდეგ, ერაყისა და ქურთისტანის წასართმევად. ამასთან ერთად ივერთა გმირს შემოუთვალა დიდი მადლობა და უძღვნა ძვირფასი საჩუქრები, თანაც დაპირდა მაშველ ჯარებს.

ჯაგვახეთიდან სააკაძე გადვიდა კოლხეთს, დაიარა იმერეთი, გურია, სამეგრელო და მოუწოდა მათ ივერიის დასახმარებლად. ისინი დიდი თანაგრძნობით შეხედნენ ამ მოწოდებას და იწყეს მზადება.

ამ ამბებმა მეტად დააფრთხო მტერი. ყორჩიბაში ჩაეარდა საგონებელში. თუმცა მას ეკავა ხელში ივერიის ციხესიმაგრენი და მისი მომხრე იყო თავადთა მეტი ნაწილი, მაგრამ დიდი მოურავის ერთი გამოჩენა საზღვარზე კოლხეთის ჯარით საკმაო იყო, რომ ქართლ-კახეთი მთლიანად გადასულიყო მისკენ. ამავე დროს მან გაიგო თურქთა ამხედრებაც. თვით სააკაძე უწყობდა მათ ხელს. ივერთა დიდი ბრძოლებით ფრიად დაქანცულ ირანს კი იმ უამად აღარ ჰქონდა იმდენი ღონე, რომ გამკლავებოდა სულთანს. ამის გამო ყორჩიბაშმა კარგად გაამაგრა ტფილისის, გორის, ბირთვისის და სხვა ციხენი, თანაც მოემზადა ერანში წასასვლელად.

საკაძემ გაიგო თუ არა ეს ამბები, აღარ მოუცადა კოლხეთის ჯარის შეკრებას, გადმოხტა ქართლში თავისი რაზმით, დაეცა გორის ციხეს, აიღო იგი და მიაშურა ტფილისს. აქ შეიტყო მტრის განახევრებული ლაშქარის გაქცევა. უკან გადევნება გვიანდა იყო. ამ დროს ყორჩიბაში უკვე გადასუ-

ლიყო მდ. არეზს გაღმა და გარბოდა თავისი ჯარებით როგორც ნამდვილი დამარცხებული, გარბოდა გულის ხეთქით ეს ერანის ქებული სპასალარი. მას ყველგან ელანდებოდა მოურავის მრისხანე სახე, ყურში ესმოდა მისი მჭექარე ხმა.

ამრიგად მესამედ გადარჩა მთელი ივერი საშინელ ხეტათს. ახლაც მისი მხსნელი შეიქნა გიორგი სააკაძე. მან შეასრულა თავისი სიტყვა.

XXX. სპაჰები

ხევებითა და მთა-გორაკებით დასერილი საქართველო უხვად იყო მოფენილი ციხე-სიმაგრეებით, სადაც ბუღობდნენ კოლხეთ-ივერიის და მესხეთის დიდებულნი, ანუ ღიდი თავადნი. ძველ დროს ეს ციხე-სიმაგრენი მელღრად იცავდნენ სამშობლოს საზღვრებს და უცხო ქვეყნებიდან შემოსასვლელ გზებს გარე მტერთაგან. ხოლო ბოლო ხანებში, მეტადრე საქართველოს დაქუცმაცების შემდეგ წვირლ სამეფო-სამთავროებად, ე. ი. მე-15 საუკუნიდან, ამ ციხე-სიმაგრეებს დაპატრონებული მთავრები და თავადები არაიშვიათად ეურჩებოდნენ და ებრძოდნენ თავიანთ მეფეებს, გამოდიოდნენ მათი მორჩილებიდან, მძლავრდებოდნენ, თარეშობდნენ შინაურ-გარეშეებზე და დაუსჯელად ჩადიოდნენ ათასგვარ ბოროტებას. ისინი ხშირად ესხმოდნენ ერთიმეორეს, უზოგველად ღვრიდნენ მოძმეთა სისხლს, არბევდნენ დაბა-სოფლებს და ქალაქებს, მით აფერხებდნენ მეურნეობას და ვაჭრობა-მრეწველობის განვითარებას. ასეთი მოქმედებით ისინი ფრიად ასუსტებდნენ ნივთიერად, კულტურულად და პოლიტიკურად, ისედაც რვა ნაწილად დაფლეთილ პატარა საქართველოს.

ამრიგად, ამ ციხე-სიმაგრეებმა მეტ წილად დაკარგეს თავისი მთავარი დანიშნულება და თანდათან იქცნენ უმადლარ სეავთა და ზვიგენ-ვეშაპთა, ე. ი. ყაჩაღად ქცულ არსებათა, ბუნაგად, რითაც აუწერელი ზიანი მიაყენეს საუკუნეთა სვლაში ბედშავ საქართველოს. ასეთი იყო თავადთა ღიდი უმეტესობა.

ეს მადააღძრული სვაეები, მიუვალ ციხეებში შებუღრულნი და წვრილ აზნაურებით გარემოცულნი, კინკლაობდნენ ერთმანეთში, მოულოდნელად ესხმოდნენ ერთიმეორეს, ელეტდნენ ულმობელად, ართმევედნენ ყმებს, მიწა-მამულს, სარჩოს, მთელ ქონებას და მოძძეთა უბედურებაზე აგებდნენ საკუთარ კეთილდღეობას, სანამ უფრო მძლავრნი არ დაესხმოდნენ ამათ და არ აქცევდნენ მიწა-მტკრად. ეს ქვეყნის დამღუპველი სვაეები არა იშვიათად ეპატიებოდნენ თავის სამშობლოს დასარბევად გარეშე მტრებს, რათა მოეთბოთ ხელი და უხვად ესარგებლათ ხალხის გაჭირვებით. ეს გარეწარი არსებანი ხშირად წინ მიუძლოდნენ შემოსულ მტერთ, ულოკავდნენ ხელ-ფეხს აზია-ევროპის მტარვალთ და მათ ჯილდო-ხალათებსა და ნასუფრალზე ჰყიდდნენ თავის ერსა და სამშობლოს.

აი, ასეთი უმაძლარი სვაეებით სავსე იყო ბედშავი საქართველო იმ ბნელ ხანაში, რასაც შევეხეთ ამ ისტორიულ რომანში.

ეს ბოროტი და გარეწარი არსებანი, ე. ი. დიდი თავადები, თავისი დაგეშილი მეძებრებით — შინაყმა აზნაურებით — ნადირობდნენ აგრეთვე უმწეო გლეხებსა და წვრილ აზნაურებზე, ესხმოდნენ მათ, აწიოკებდნენ, იტაცებდნენ ლამაზ ქალ-ვაჟთ და ათასობით ჰყიდდნენ მათ უცხოელ ვაჭრებზე ირან-თურქეთში გასაყიდად.

ასეთ უგვანო და საზიზღარ საქმეებს უმთავრესად ჩადიოდნენ კოლხეთ-მესხეთში აფხაზეთ-გურია-სამეგრელოს და სამცხე-საათაბაგოს მთავრები და თავადები.

ოთხი საუკუნის მანძილზე კოლხ-მესხ-ივერის მშვენიერი ვაჟნი და ასულნი ყოველწლივ ათიათასობით იყიდებოდნენ ცხვრის ფარასავით სტამბოლ-თეირანისა და ქაირ-ბაღდათის ბაზრებზე, ამკობდნენ ყეინ-სულთნების და ხანებ-ფაშების ჰარამხანებს.

ტყვედ გაყიდულ ან წაყვანილ ვაჟთა უმეტეს ნაწილს ძალით აღებინებდნენ მაჰმადის სჯულს და წრთენიდნენ სამხედროდ. მათგან შექმნილი იანიჩართა რაზმები სტამბოლში წარმოადგენდა თვით სულთანის საუკეთესო გვარდიას, ხო-

ლო ირანში ქართველთაგან შემდგარ ასეთ რაზმებს ეწოდებოდა შაჰსეფანები, ე. ი. შაჰის ლეგიონები და ყული-საჰა, ანუ მონათა ლაშქარი. და აი, ამ ქართველ ტყვეთაგან შემდგარი რაზმები საუკუნეთა სვლაში იყვნენ ყველაზე უფრო მძლავრი და შაჰი-სულთნების ტახტისათვის საიმედონი.

საბედნიეროდ, მე-17 საუკუნის დამდეგს ქართლს გაუჩნდა პატრონი დიდი მოურავის სახით, რომელმაც გიორგი მეათის დროს და ლუარსაბ მეორის მეფობის პირველ ხანებში რკინის მარჯვენით ალაგმა როგორც მოთარეშე ოს-ლექნო, ისე ქართლის მეტად თავაშვებული თავადები და დაუმორჩილა ისინი მეფეს, სააკაძის ასეთმა მოქმედებამ, როგორც ვიცით, გამოიწვია ამ თავადებში საშინელი შურისძიება, რაც დამთავრდა ლუარსაბ მეფის მიმხრობით და დიდი მოურავისადმი შავი ღალატით.

სწორედ ამ ქვეყნისათვის თავგანწირული გმირის ექსორიით ძსარგებლეს ქართლის გაყაჩაღებულმა თავადებმა და იწყეს თავაშვებული თარეში. ამათ შორის უპირველესი იყვნენ იასე ქსნის ერისთავი, ზურაბ არაგვის ერისთავი და მეტადრე კი შაჰბაზის სიძე, ქრისტეს მგმობი, მაჰმადის თაყვანისმცემელი და სამშობლოს მოღალატე ანდლუყაფარ ამილახვარი, რომლის მთავარ ბუნაგად იყო მიჩნეული ქართლში სხვილოს მაგარი ციხე და იქედან თავზარს სცემდა ქართლსა და კავკასიონის მთის ხალხებს. ეს ორი ძმადშეფიცული უმადლარი სვაგი, იასე და ანდლუყაფარ, კარგად შეიარაღებული რაზმებით, დროგამოშვებით გადადიოდა კავკასიონის ქედს გადაღმაც კი, ისინი ესხმოდნენ ქისტ-ჩეჩენთა სოფლებს (აულებს), არბევდნენ მათ და დიდი ნადავლით, განსაკუთრებით ცხვრისა და საქონლის ჯოგით, ბრუნდებოდნენ შინ. აგრეთვე ჩამოყავდათ ტყვედ იქაური ლამაზი ქალ-ვაჟნი, რომ შემდეგ გაეყიდათ ვაჭრებზე ირან-თურქეთში.

სხვილოს ციხე. სალამო ჟამია. ზედა დარბაზში ტახტზე ფეხმოკეციტ ზის ჩოფურა, ჯმუხი სახის ანდლუყაფარ ამილახვარი და უდარდელად წევს ნარგილეს. მის ჩასუქებულ სხეულს მოსავეს სამალაჯის ხალათი. იგი გართულა რაღაც

ფიქრებში ანოტი და მსუნაგი სახ ელიძის კბიერად. უცებ ასწევს თავს და შემოკრავს ტაშს. ფრთხილად შემოდის ფარეში და თავდახრით დგება კარებთან.

— ბიჭო, მოურავს დამიძახე?

— ეხლავე, დიღო ბატონო, — და ფარეში გარბის გარეთ. მცირე ხანს შემდეგ იღება კარი. შემოდის ჩოხა-ახალუხიანი, იარაღასხმული ზორბა ოსი.

— რას გიბრძანებ, დიღო ბატონო?

— შენ კი არა, მე გიბრძანებ, ბრიყვო! ათ წელზე მეტია ჩვენში ცხოვრობ და აქამდე ქართული ვერ ისწავლე, შე ოხერო, არა გრცხვენია?!

— რა ვქნა, დიღო ბატონო, ვერ ისტავლე და ვერა: ანდუყაფარს გაელიმა ოსის პასუხზე.

— რას შვრებთან ჩვენი ტყვეები?

— კარგად არიან, ბატონო.

— სად დაამწყვდით?

— ციხის დიდ საკანში, ბატონო.

— რამდენი არიან სულ?

— სულ ქალი და კაცი ორმოცამდის იქნების.

— ყველანი ხვალე წაასხი ახალციხეში და მიჰყიდე ფაშას. ეცადე კარგი ფასი მიიღო.

— კი, ბატონო, ვეცდები. ი ლამაზი გოგოც წავესხა? შენ რომ გუშინ თვალში მოგივიდა?

— არა, ის აქ მომგვარე ახლავე.

ოსმა თავდახრით დააპირა გასვლა.

— მოიცა, გიგა, ის სადა გყავს, ჩემი ურჩი გლეხი, სააკადით რომ მემუქრებოდა?

— ისა ციხის ბნელ ჯურღმულში დავამწყვდით, ბატონო, ჯერ კი კარგად ვცემეთ, როგორც ბრძანე.

— კეთილი. ულუფას რას აძლევთ?

— დღეში ნახევარ ხმელ პურსა და ერო ხელადა წყალსა.

— მისთვის ეგეც ბევრია. მაშ გასწი და შეასრულე ჩემი ბრძანება.

— ახლავე, დიღო ბატონო!

ამ სიტყვებით ოსი გაქრა დარბაზიდან.

ამილახვარმა აბოლა წარგილე და უშხი ღიღინით აპო-
უშვა რაღაც ირანული ბაიათი. მცირე ხანს შემდეგ ფრთხი-
ლად გაიღო კარი და დარბაზში ფეხაკრეფით შემოვიდა იგი-
ვე ოსი მოურავი და შემოიყვანა იშვიათი სილამაზის ქალ-
წული, სუფთად ჩაცმული. იგი საშინლად ცახცახებდა.

— მოიყვანე, ბატონო, გოგო.

— კეთილი. გასწი! — იყო ბატონის მოკლე პასუხი.

ოსი გავარდა დარბაზიდან და მაგრად მოიხურა კა-
რები.

ანდრუყაფარმა შეათვალიერა კარებთან მდგარი ქალი და
სიამოვნების ნიშნად აუციმციმდა კროლა თვალები და აუწყ-
ლაპუნდა პირი.

— მოიწი ახლოს, ლამაზო! — უთხრა ტყვე ქალს დაყვა-
ვებით ანდრუყაფარმა.

ქალი არ იძროდა ადგილიდან. იგი მიჰკვროდა კარებს და
მთელი სხეულით ცახცახებდა. განწირულობის ნაპერწკლებს
ისროდა მისი შავი თვალები.

— არ გესმის, ქალო? აქეთ მოიწი! — უთხრა თავადმა
ხმააწევით.

ქალი დუმდა და არ იძროდა ადგილიდან.

— ყრუ ხარ, თუ რა ღმერთი გიწყობა! არ გესმის, რომ
გიბრძანებ?! მოეთრე აქა!

კვლავ დუმილი და უძრაობა ქალის მხრივ.

ქალის ასეთმა „თახედობამ“ ფრიალ გააბრაზა ბატონი.
იგი წამოიჭრა ზეზე და მიუახლოვდა ქალს.

გამხეცებული თავადის მისვლამდე ქალმა სცადა კარის
გაღება, მაგრამ უნაყოფოდ: იგი მეორე მხრივ გადაერაზა
„შორსმკვრეტ“ მოურავს.

— არ მოხვიდე! არ მომეკარო! — შეჰკივლა ქალმა თავ-
განწირვით.

— რა მოგდის, ქალო! რას გაჰკივი ეგრე უცნაურად! რას
შიშობ, მგელი ხომ არა ვარ! — უთხრა ანდრუყაფარმა დაყ-
ვავეებით. იგი შედგა შორიახლოს, იმ ფიქრით, ვაითუ რაიმე
იარაღი ჰქონდეს ქალს სადმე დამალულიო.

— შენ მგელზე უარესი ხარ, ბრაზიან მგელზე! შენ ძმას

არ ინდობ და მოკეთეს! წერილ აზნაურებს და მეტადრე საბრალო გლეხობას ხომ ზეციურ რისხვად მოევილინე! ახლა რა გწადის ჩემგან, შე თათარო, შე ქრისტეს მგომობელო!—შესძახა ქალმა განწირული ხმით და ჩაიყო ხელი უბეში.

— რა მსურს და შენი ხვევნა და კოცნა, შენი ალერსი, ჩემო ტურფავ! ჩემო ლამაზო!

— ვერ ეღირსები ასეთ რამეს, შე მსუნაგო და ქვეყნის მოღალატევი უწინამც დღე დაგელევა!

— აბა, ვნახოთ, ჩემო ჯიუტო! — უთხრა ანდუყაფარმა და გადადგა ბიჯი. ქალი შეელივით გადახტა კუთხისაკენ და მის ხელში მყის იელვა ბასრმა ხანჯალმა.

— არ მომეკარო, თორემ, ვფიცავ მშობლებს, იმ ხანჯლით გაგიპობ მაგ ვერავ გულსა!

მახვილის დანახვაზე შეკრთა და შეჩერდა მსუნაგი. თავადი, იგი არ მოელოდა ამას. მან შეანათა ქალს თავისი ქროლა თვალეები. განწირულებას მეტად დაემშვენებია ქალის ლამაზი სახე. ცეცხლივით უელვარებდა მომხიბლავი თვალეები. ასეთი სახით იგი ფრიად მიმზიდველი ხდებოდა. ამ სურათმა ააგიზგიზა თავნება თავადში მხეტური ვნება და ვაჟური ჟინი. იგი ელვის სისწრაფით მივარდა გაათრებულ ქალს მარჯვენა მაჯაში, სანამ იგი მოუქნევედა მახვილს, მეორე ხელით კი სწვდა მახვილს და გადაისროლა. ქალმა შეჰკივლა მწარედ და შეებრძოლა მეორე ხელით. იგი უკაწრავდა სახეს და გაღეღილ გულმკერდს, ხოლო დიდხანს ვერ გასტანა ამ უთანასწორო ბრძოლამ. თასმასავით მოიგრიხა გამხეცებული არსების რკინის მკლავებში ქალწულის სუსტი სხეული, უკვე ტახტზე მისვენებული.

წამოიჭრა ტახტიდან საბრალო ქალი შეშლილის სახით, მოავლო ირგვლივ ელვარე თვალეები და რა დაინახა მის წინაშე მდგარი ანდუყაფარის სიამით სავსე მხეტური სახე ერთი კიდევ შეჰკივლა საზარლად, წაიძრო უცებ თითიდან ბეჭედი, მიიტანა ტუჩთან და შესრუტა მასში ადრევე დაცული ძლიერი შხამი. ქალი იქვე დაეცა და იწყო მომპკვდავის უკანასკნელი ზმორება...

ამ დროს ფრახილად დაუკაცუნეს დარბაზის კარი. თავადის შეკითხვაზე მოურავმა მოახსენა იასე ქსნის ერისთავის მოსვლა ორმოცდაათი რჩეული ვაჟაკით. იმავე ღამეს ორთავენი უნდა დასცემოდნენ ღაზნელთა ციხეს და გაეუღოთ მთელი გვარეულობა. გახარებული ანდრუყაფარ მიეგება თავის ახლო მეგობარს, მოურავს კი უბრძანა გაეთრია დარბაზიდან პატივახდილი, მიცვალებული ქალი და ჩაეფლა სადმე ციხის გალავნის კუთხეში.

ტირიფონას ზემოდან მდ. მეჯუდას ხეობაში გორაკზე გორიზად ამართულა ტახტის აზნაურ ღაზნელთა ციხე-დარბაზი მაღალი კოშკით და გუშაგად უდგას ჩრდილოეთიდან გადმოსასვლელ ბილიკებს. ვახშობაა. თხილის ხის უჩინელით განათებულ დიდ დარბაზში სუფრას უსხედან თავიანთი ცოლშვილით ხუთი ძმა ღაზნელი, ხუთი ლომივით ვაჟაკი, ხოლო მათ შორის საპატიო ალაგს ზის ასი წლის მოხუცი მამა, რომლის სპეტაკი წვერი ფართოდ ეფინება გულმკერდს. იგი ზის პირქუშად, არ ეკარება საქმელს. რაღაც ღრმა ფიქრს დაუღარავს მისი მაღალი შუბლი. დროგამოშვებით მოხუცს გულიდან ამოხდება გმინვა.

„რად გმინავ, ბატონო მამავ? რად ბრძანდები ეგრე უგუნებოდ? — შეეკითხა მოხუცს მის გვერდით მჯდომი უფროსი ვაჟი. — მიირთვი რამე. აჰა, მშვენიერი ხინკალი! აგერ კიდევ ახლად მოხარული მსუქანი თოხლი! ან იქნებ ფუცხუნა ღვინომ გიპოვოს გული! — და ამ სიტყვებთან ერთად მიაწოდა მოხუცს ღვინით სავსე კულა, — ჩაარაკრაკე, მამავ! მოილხინე! განა რა გვაქვს საჯავრო!

— არა რაი მინდა, შვილო, ვერ ვარ გუნებაზე. რაღაც კუდი სიზმარი ვნახე ნასადილევს. მცირედი წამძინებოდა წლებით დაღლილსა, წარმოსთქვა მძიმედ მოხუცმა და ისევ ჩაღუნა თავი.

— ნეტარძი რა იყო ასეთი, რომ შეწუხდი, ბატონო? — შეეკითხა მეორე ვაჟი.

— ნულარ გამახსენებ, შვილო! რაღაც საშინელება ვნახე... ღმერთო დიდებულო და წმინდაო გიორგი, თქვენ იყავით

ჩემი ოჯახის შემწე და მფარველი! — ქუდის მოხდით და პირჯვარის გამოსახვით წამოიძახა მოხუცმა.

მთელი ოჯახის გულისყური მიიპყრო მოხუცის საქციელმა.

— მაინც რა ნახე ასეთი, ბატონო მამავ? — ცნობისმოყვარეობით შეეკითხნენ შვილები.

— ვითომც ჩვენს ციხე-დარბაზს, ბნელში გახვეულს, ორი მხრით მოსდგომოდა ჩასანთქავად ორი პირდაღრენილი გველშაპი, შავი და წითელი. ისინი ბღღვნიდნენ ბასრი ბრჭყალებით ციხის ბალავერს, ხოლო მალა აშვერილი პირიდან აწვიმებდნენ ცეცხლსა და გენიას. თქვენც, ხუთნივე გმირნი, თქვენი მამაცი ვაჟებით, რკინაში მჯდარნი და თავით ფეხებამდე იარაღასხმულნი. უშენდით მაღალ კოშკიდან შუბებს და ისრებს ორთავეს, ხოლო ვერას აკლებდით იმ წყეულთ. ისინი ციხის ნგრევით მოიწევდნენ თქვენ ჩასანთქავად... ოდეს დააღეს ხახა უზარმაზარი და წამოიწიენ, მყის წამოვიჭერ თქვენს უკან მდგომი და დავიყვირე გამწარებით. ამ ყვირილზე გამომეღვიძა.

მიმოვიხედე გაშტერებით. არაფერი ჩანდა. ვიწეკ სკამლოგინზე დერეფანში ტყაპუქწამოხურული და თავზე დამნათოდა ჩამავალი მზის სხივები. მაშინვე, ფუი ეშმაკს, მივაძახე, გადვისახე პირჯვარი და ვიხმე ჩვენი ოჯახის შემწედ საქართველოს ჟღიღესი წმინდანი. მიველ ციხის წყაროსთან, გავიგრილე გახურებული შუბლი და თავი ცივი წყლით, ხოლო ვერ ამოვფხარ გონებიდან ის საშინელი სიზმარი, ვერ დავიმშვიდე შფოთარე გული.

მოხუცის სიზმრით შეპყრობილმა შვილებმა და რძლებმა გადახედეს ერთმანეთს და დუმდნენ მცირე ხანს. დუმილი დაარღვია უფროსმა რძალმა, მცხეთის ქალთა მონასტერში აღზრდილმა ოჯახის ჭკვიანმა დიასახლისმა.

— მძიმე სიზმარია, ბატონო მამავ, ხოლო ცუდი და საზიანო მანდ არაფერია. ორი პირდაღებული ვეშაპი, ექვს გარეშეა, ჩვენი ორი მოსისხლე მტერია: ქსნის ერისთავი და ანდუყაფარ ამილახვარი. ისინი კარგახანია ილესენ კბილებს, ჩვენს წინააღმდეგ, მეტად ანდუყაფარ, რომელსაც

ვერ მოუწელებია ჩვენი დახმარება დიდმოურავიანად. ოდეს შევიპყარიტ ანდუყაფარ ცოლშვილით სხვილოშ და დავამწყვდიეთ მყინვართან არშის ციხეში. შერას ძიებენ ეხლა უფრორე. ვინაიდან ივერიის გმირი მტრეთსაა აშკამად ჯარების შესაკრებად. აქ კი თარეშობენ ანდუყაფარის მწყალობელი სპარსნი. ხოლო როგორც ბრძანებთ, ბატონო მამავ, ვეშაპებმა ვერ მოაღწიეს მიზანს, ვერ შთანთქქეს შერი გმირი ვაჟები და ბაღიშები. ყვირილმა შეაკრთო ისინი. ხოლო თქვენ გამოგადვიძათ. ამით გაქქრა შიში, სიბნელე და უქმური სიზმარი, თქვენ იხილეთ მზე და სინათლე. ღვთიით ბოლო კეთილია. მტრები ვერას გახდებიან. ხოლო უნდ. გავილოთ უხვი შესაწირავი ერისთავის წმ. გიორგის შიძარა. რათა იყოს ჩვენს შემწედ და მფარველად!

ყველანი დაემოწმენ დიასახლისს და დამშვიდნენ თითქოს. ამ უსიამოვნო სიზმარმა ყველას ჩაამწარა გემრიელი ვახშამი. ისინი მალე წამოიშალნენ სუფრიდან და მიიღეს სათანადო ზომები ყოველი შემთხვევისათვის, რათა გმირულად დახვედროდნენ მტრებს. ბავშვები, ქალწულნი და მათ შორის მშვენიერი მზია დამალეს მალალ კოშკში და მცველებად მიუჩინეს რამდენიმე მამაცი ჭაბუკი.

ამასთან ერთად ხუთივე ვაჟკაცი თავიანთი შვილებითა და შინაყმებით, სულ ოცდაათამდე, შეუდგნენ სამხედრო სპაზადისს. მიმოვლეს ციხის მიდამო, ააპირქვეავს არხის ხიდი. შეცვალეს გუშაგნი და დამშვიდებულნი დაბრუნდნენ დარბაზში.

— ახლა იასე და ანდუყაფარ კი არა, შაჰის ლაშქარიც ეყრას დაგვაკლებს, — იოხუნჯა საშუალო ძმამ.

— მობრძანდნენ თუ ვაჟკაცებია, ის ჩვენი მტრები. აქ დავხვდებით მასპინძლად და ვაცნობებთ, ვინც არიან აზნაური ღაზნელები! — წამოიძახა ამაყად უფროსმა ძმამ.

შუალამე მოახლოვდა. ყველანი მილაგდნენ თავ-თავის ოთახში თვალის მოსატყუებლად და ელოდნენ ნიშანს გუშაგთაგან. არ ეძინა მხოლოდ იუდას, გამცემს, მოსყიდულ ყმას. ისიც ელოდა ნიშანს, რომ გაეღო მტრისთვის ციხის კარები. ამ დროს გაიელვა ზედიზედ. მას მოჰყვა საშინელი

გრგვინვა. შავად მოგრაგნილმა ცაშ დაუშვა თქეში. გაიღო სარკმელი და ქარი ზუზუნით შემოიქრა დარბაზში. იმატა ელვა-ქუხილმა, გავარდა მეხი, იმატა კოკისპირულმა წვიმამ. განრისხებული ზეცა დანგრევას ემუქრებოდა დედამიწას, ზუის გაშმაგებული გრიგალი, ხშირი ელვა-ქეჭაა, ამათ ერთვის საშინელი თქეში და ღვართქაფი. მთების ადიდებული ღელე-მდინარენი შავი ზვირთებით გაშმაგებით მოაგორებდნენ დიდრონ ლოდებს. შორს გაისმის მათი მძლავრი ჯახა-ჯუხი. ბილიკებზე არ ჩანს სულიერი. ყველანი შემძვრალან ბინებში. ტყის ნადირნიც-კი მოჭრიდებიან ბუნების ამ საშინელ ნგრევას და შეჭფარებიან თავიანთ სორო-ბუნაგებს.

ყველას სძინავს ღაზნელთა ციხე-დარბაზში. ციხის გუშაგნიც კი მიყუყულან საფარქვეშ და თვლემენ განთიადის მოლოდინში, არ უწყიან, თუ რას უმზადებს ეს ჯოჯოხეთური ღამე.

უცებ გაისმა საზარო ღრიანცელი. ბუნების რისხვას შეუერთდა ადამიანის ბრაზი. ღაზნელთა ციხე-სიმაგრეს ალყად შემოერტყნენ იარაღასხმულნი, შვენაბადიანი ცხენოსანი რაზმები, ასამდე მხედარი, და დასცეს ყიყინა. შეიქნა თოფების გრიგალი, ისინი შეცვივდნენ ციხის გაღვანსა და თვით ციხეში, რომელთა ქარები ადრევე გაეღო გამცემს. სწრაფად გაჟლიტეს გუშაგნი და შეცვივდნენ სასახლეში, სადაც მამაცად დახვდნენ ძმანი ღაზნელნი თავიანთი ვაჟები და შინაყმებით. შეიქნა ხმალ-დამბაჩებით ხელჩართული მეღგარი ბრძოლა მოძმეთა შორის. აქ, ამ საშინელ ღამეს, ქართველნი შესეოდნენ ქართველთ, შურისძიებით და ანგარებით აღძრული ქართველი ჰკლავდა ქართველს!

უხვად იღვრებოდა მოძმეთა სისხლი და წითლად იღებებოდა ციხე-დარბაზის იატაკი...

— დამრჩი, ღაზნელო, ან გამოდი ხმალში, შე ღაჩარო! შესძახა მრისხანედ ბოროტი სახის მხედარმა და შეუმართა ხმალი ღაზნელთა უფროს ძმას.

— ღაჩარი და ბოროტი შენ თვითონა ხარ, სამშობლოს გამყიდველო. და ქრისტეს სჯულის მოღალატევი — უპასუხა ღაზნელმა და მოუქნია ხმალი. შეექნათ ხელჩართული

ბრძოლა. ლომივით შეებნენ ერთი მეორეს. მოსისხარი მტერნი, გაშმაგებით ლოკავდნენ ერთმანეთს ხმლების ენანი, რკინა-ფოლადს სცივოდა ნაპერწყლები; ხედებოდა ფარსა და ჩაჩქანს მახვილთა ბასრი წვერები. გამარჯვება იხრებოდა დამხდურის მხარეზე. ორ-სამ ალაგას დაიჭრა მძიმედ ამილახვარი. მამაცი ღაზნელის ხმლის ერთი მოქნევა კიდევ — და ვერა-რა უშველიდა ბოროტ ანდუყაფარს. აჰა, აღმართა კიდევ ხმალი მოსაქნევად; მაგრამ ამ დროს უკნიდან იგრიალა დამბაჩამ და ზურგში სასიკვდილოდ დაჭრილი ღაზნელი დაეცა ძირს. მისი მკვლელი იყო იასე ქსნის ერისთავი (ანდუყაფარის მომხრე), რომელმაც აღრევე იმსხვერპლა ორი ძმა ღაზნელი და ახლა ბოლო მოუღო მესამესაც...

ველარ გაუძლო ოცდაათამდე დამხვდურმა სამჯერ შეტეს შემოსეულ მტერს. კიდევ ცოტაოდენი თავგანწირული ბრძოლა — და ყველანი დახოცილნი ეყარნენ დიდ დარბაზში. მათ შორის იყვნენ ქალებიც, ღაზნელთა მამაცი ცოლები და დედები, რომლებიც გამწარებით შევარდნენ ბრძოლაში მახვილით ხელში, რაკი იხილეს ქმრებისა და შვილების უღმო სიკვდილი. ამათ გასწირეს თავი, იმსხვერპლოს ხეობით რამდენიმე შემოსეული და სასიკვდილოდ დაჭრილნი დაეცნენ ქმრებთან და შვილებთან.

ამ რიგათ დაიხოცნენ თავისი ცოლებითა და ერთგულ შინაყმებით ხუთივე ძმანი ღაზნელნი, ნამუსიანი სიკვდილით შესწირეს თავი კერას და მამულს. ხოლო იაფად არ დაუსვენეს მტერთ ეს თავდაცემა. მათ ირგვლივ ხორად ეყარნენ იასესა და ანდუყაფარის დახოცილი და მძიმედ დაჭრილნი რაზმელნი, სამოცამდე კაცი.

რაკი მორჩნენ ამ საზარო საქმეს, იასე და ანდუყაფარ ეცნენ გადარჩენილი მხედრებით ციხის კოშკსა და სარდაფებს, სადაც დახვდათ აცახცახებული ლაშაზი ბავშვნი და ქალწულნი, მათ შორის მშვენიერი მზია, რომლის იშვიათი სიტუფრე და გალობა შუშპარი ცნობილი იყო მთელს ივერიასა და ირანში. ამ მშვენიერ არსებას მხეცი ანდუყაფარ დიდი ხანია უმზადებდა ფეშქაშად თვით ირანის დიდ ბა-

ტონს, თავის სიმაპრს შაჰაბაზს. და, აჰა, ეწია მიზანს. მან წაავლო ხელი მზიას. ქალმა შეჰკივლა საშინლად, იძრო უბიდან პაწია ხანჯალი და მოუქნია მტარვალს, ხოლო რკინის ბეგთარმა აირეკლა ნახვილი. მაშინ გამწარებით წამოიძახა ქალმა: „არ დაგნებდები ცოცხალი საბილწოდ მამაჩემის მკვლელს!“

ამ სიტყვებთან ერთად გაუსხლტა ხელიდან ამილახვარს და ელვის სისწრაფით გაიტარა გულში ხანჯალი. ღაზნელთა გვარის და სრულიად ივერიის შევენება იქვე დაეცა მკვდარი. ქალწულის უმანკო სისხლით შეიღება იატაკზე გაშლილი მდიდრული ხალი...

ამავე დროს უზომოდ შეშინებულმა ბავშვებმა და ქალებმა მორთეს საშინელი წივილ-კივილი.

გამხეცებულმა ანდუყაფარმა უბრძანა მხლებელთ გაევიტათ ყველანი, მაგრამ მათ გადაეღობა ხმალამოწვდილი იასე. შეაჩერა მათი მხეცური მოქმედება. ქსნის ერისთავმა გასცა განკარგულება შეებორკათ ყველანი და ტყვედ წამოეყვანათ. იგი დიდ საფასს ელოდა მათი გაყიდვით ახალციხეში.

სვაეები ჩამოვიდნენ მაღალი კოშკიდან ძვირფასი ნადავლით, შემოვიდნენ გზად დიდ დარბაზში, სადაც სისხლში ცურავდნენ მათი ვერაგობის მსხვერპლნი. ჟინელილებით ხელში შეჩერდნენ ისინი დარბაზის შუა ალაგს და მიმოავლეს თვალი, თითქო ტყებოდნენ ნამოქმედარით. ამ დროს გაიღო კარები და ბარბაციტ შემოვიდა თმააბურძგნული მხრებში მოხრილი ღრმა მოხუცი. ბამბასავით თეთრი წვერი ფართოდ ეფინებოდა მკერდამდე. იგი ფეხაკრეფით მიუახლოვდა იასესა და ანდუყაფარს, დააცქერდა მათ შემოიღობის თვალებით, შემდეგ მიმოიხედა ირგვლივ და რა იხილა მუსვრა-ელეტის საშინელი სურათი, დაიყვირა საზარელი ხმით:

„აცხადდა შავბნელი სიზმარი... ორი საზარო ეეშაპი მოეკლინა ღაზნელთა ციხეს და შთანთქა ღაზნელთა გვარი! ვაი, დაღუპულო ოჯახო! რაღად ვარ ცოცხალი ამის შემდეგ!“

ამ სიტყვებით მივარდა სარკმელს, გააღო და გადაეშვა ჯურღმულში, სადაც ადიდებული მეჯუღა მიაგორებდა შავს ზვირთებს.

მოხუცის ძვალი და რბილი გაითქვიფა შავს კლდეებზე, იგი გაიტაცა მდინარის აქაფებულმა ტალღებმა.

ამრიგად მოისრა შუაგულ ქართლში ღაზნელთა სახელოვანი გვარი.

ამრიგად იძია შური მხეცმა ანდუყაფარმა. ღაზნელთა მთელი ქონება და ადგილ-მამული ძმურად გაიყო ორმა ვე-შაპმა.



XXXI. შავი უმადურობა

კოლხეთიდან ივერიაში დაბრუნებულ დიდ მოურავს დახვდა საზარო სურჯთი: უმეფობას წაეხსნა ლაგამი დიდი თავადებისათვის. ისინი შესეოდნენ რაზმებით ერთიმეორეს და იკლებდნენ. იყო მოძმეთა შორის კინკლაობა, ბრძოლა და სისხლის ღვრა, რაზედაც მათ აქეზებდნენ ირანელები. განდიდების სენით და დიდი ქონების შეძენის სურვილით აღძრული თავადები არ ზოგავდნენ არც მოყვრებს, არც ახლო ნათესავთ. ყველას სწადდა მეტი ყმისა და მამულის ხელში ჩაგდება. ქვეყნის დამლუპველ ბრძოლაში უმთავრესად წყდებოდნენ ყმები, უმწეო ხალხი. დიდებულთა ასეთი თარეში უფრო მეტ ზიანს აძლევდა ქვეყანას, ვინემ შემოსეული მტერი. იქ ზურაბ ერისთავს დაეთხარა თვალები თავისი ძმისათვის, დაეპყრო ერწო-თიანეთი, ახლაკი შესეოდა ფშავ-ხევსურეთს და სწადდა ამ მამაცი ხალხის ქედზე დაედო მონობის მძიმე უღელი. იყო ერთიმეორეზე თავდასხმა, სოფლების გადაბუგვა და საშინელი სისხლის ღვრა.

იასე ქსნის ერისთავს ამოეწყვიტა ცოლშვილით თავისი საკუთარი ძმა შანშე და დაესაკუთრებინა მისი ყმა და მამული. იქით კიდევ გამდგარიყვნენ თ-დი ბარათაშვილნი, ასეთივე ამბები ხდებოდა კახეთშიაც. ამ ტურფა ქვეყანას შესეოდნენ ლეკნი, ცარცვა-რბევით და ტყვეთა გატაცებით

იკლებდნენ ოფლებს. ასავე იქცეოდნენ ქართლში ოსებიც. ერთი სიტყვით ყველგან არსებობდა სრული ანარქია.

აი ასეთ უნუგეშო სურათს წარმოადგენდა სისხლის წვიმებით უხვად მორწყული ივერი, როს გადმოვიდა ქართლში თავისი რაზმით ხალხის მოთავე. იგი მაშინვე ეცა გორის ციხეს, რომელიც ეპყრა ანდუყაფარს ირანელთა ჯარით, სასტიკად დაამარცხა მტერი და აიღო ციხე. ანდუყაფარ შეეხიზნა თბილისში თავის ქვისლს სვიმონ მეფეს. იასე ქსნის ერისთავმა იცოდა სააკაძის ძალა და დამორჩილდა მას.

დააცხრო დროებით თავისი უმაძლარი გული მთის აფთარმა, ზურაბ ერისთავმა. მოურავის ჩამოსვლამ ალაგმა დიდებულთა თარეში და მოდრიკა ისინი გმირის წინაშე. სააკაძეც ლმობიერად მოექცა მათ, განსაკუთრებით ზურაბსა და იასეს, რომელთა სამხედრო ნიქს დიდად აფასებდა, თანაც ახსოვდა მათი ღვაწლი ქვეყნის გადარჩენის საქმეში.

რაკი მტრის მთავარი ძალები ადრევე შემეუსრა, ზოგიც გაუსნლტა ხელიდან ყორჩიბაშის სარდლობით, სააკაძემ მონდომა საბარათიანოს განთავისუფლება ირანელ მეციხოვნეთაგან. ამის გამო მისწერა ბარათი და სთხოვა დახმარება გაცლენიან თავადს ხოსია ბარათაშვილს, ამან კი მოსწერა პასუხად:

— ქართველებს აბა რა მოუციათ ჩემთვის, რომ ამას მთხოვ! პირიქით, სპარსნი დიდ წყალობას მაძლევენ, მაჯილდოებენ; ამიტომ მმართვეს მათი ერთგულება და სამსახურიო.

მიიღო რა ასეთი უკმეხი პასუხი, დიდმა მოურავმა საჩქაროდ გასწია თავისი რაზმით და დილის რიყრაჟზე უეცრივ თავს დაესხა ხოსია ბარათაშვილს. ტბეთის სიმაგრეში და შეიპყრო იგი. შემდეგ დაეცა ბირთვისის ციხეს, აიღო მეღვარი იერიშით და გაულიტა 500 მეციხოვნე ირანელი.

აქედან სააკაძე ეცა ლორის ციხეს და იერიშით აიღო ისიც. ლორის მეღიქებმა მოასწრეს გაპარვა ციხის ხერხელთ. შემდეგ აიღო სამშვილდე, დმანისი და გაწყვიტა მათ-

წი მყოფი მტრის რაზმები. თვით სიმონ მეფე კი თავისი ამალით სააკაძემ დაამწყვდია თბილისის უმთავრეს ციხეში, რომლის აღება შეუძლებელი იყო მცირე რაზმებით: რაკი ამრიგად დაამწვიდა ქართლი, გმირმა გადმოიყვანა იმერეთს გაქცეული თეიმურაზი და დასვა ისევ ივერის მეფედ. ამის შემდეგ სააკაძე შეუდგა ოს-ლექთა ალაგმვას. ჯერ გადვიდა ოსეთს, დაამარცხა სასტიკად, აიღო მათი სიმაგრენი, ჩააყენა შიგ თავისი გუშაგნი და დაბეგრა მცხოვრებნი. შემდეგ შეაგროვა ივერიაში საკმაო ჯარი, გადვიდა კავკასიონის მთებზე და დაეცა ლეკებს. მოურავის მოულოდნელმა შემოსევამ თავზარი დასცა მათ. სააკაძემ გატეხა შეუვალი დაღესტანიც, აიღო მისი მაგარი ციხენი, დაიმორჩილა მთელი ლეკეთი და დაადო დიდი ბეგარა, თანაც გადმოიყვანა ტყვედ გატაცებულნი კახნი.

ახლა კი საჭირო იყო შიგნით მუშაობა, გავერანებული ქვეყნის მოშენება და აღორძინება. ამ მიზნით სააკაძემ ბოგანოდ ქცეულ მრავალ გლეხობას მისცა საკმაო ადგილმამული, უმთავრესად კახეთში, და დააბინავა ისინი, თანაც დაეხმარა სურსათით, საშენი მასალით, საქონლითა და ნადავლით, ხანგრძლივად გაათავისუფლა სახელმწიფო ბეგარისაგან. ამრიგადვე დააბინავა დიდმა მოურავმა გამაჰმადიანებული ქართველნი, რომლებიც მოიყვანა ლეკეთ-ირანიდან, ამავე დროს გაიყვანა არხები, ააგო ხიდ-ბოგირები, ხელი შეუწყო დაბა-სოფლების აყვავებას. გაშენდა ქალაქ-სოფლები, დამშვიდდა ქვეყანა, ხალხი შეუდგა მუშაობას, დანგრეული ციხე-კოშკებისა და ტაძრების განახლებას, გაშენდა ბალები და ვენახები, ამწვანდა მინდვრები პურის ყანებით, გაიშალა საძოვარზე ცხვარი და ძროხა, აღორძინდა თანდათან ვაჭრობა და მრეწველობა... მშრომელი ხალხი თამამად დადიოდა ტყესა და ველად, მას აღარ ეშინოდა შინა და გარე მტრებისა. ყველანი დააცხრო დიდმა მოურავმა. იგი შეიქნა კვლავ მთელი ივერიის დამწყენარებელი, ქომაგი, პატრონი და ამშენებელი. მას აღმერთებდა ხალხი, მას შეკუთრებდა დიდი და პატარა, ის იყო ყველას მამა, მზრუნველი, ფაქტიური მეფე.

ივსებოდა სააკაძისადმი მტრობა—უმადურობით ზურაბის ღვარძლიანი გული. ამ გულზეიად თავადს გესლით ავსებდა სიძის ასეთი სიმძლავრე და უპირატესობა; თანაც სწყუროდა ფშავ-ხევსურეთის დაპყრობა და სამეხრანოს ზელში ჩაგდება, ამის ნებას კი არასდროს არ მისცემდა მოურავი. მაშ უნდა მომხდარიყო მათ შორის შეტაკება. ბრძოლით ვერას გააწყობდა ზურაბი, სააკაძე გასრესდა მას. ეს კარგად იცოდა არაგვის ერისთავმა, ამიტომ იხვევდა გულში გმირისადმი საშინელ მტრობას და სიძულვილს.

სიძე-სიმამრი, ზურაბი და თეიმურაზი, ეს ორი უძლიერესი პირი, შეიქნენ სააკაძის მოსისხლე მტრები. ამათ შეითქვეს პირი და იწყეს საიდუმლოდ მოქმედება მოურავის წინააღმდეგ. ამათ სიამოვნებით მისცეს მხარი ზოგიერთმა გავლენიანმა თავადებმა, — სააკაძის ძველმა მტრებმა. გაიმართა შეთქმულება სააკაძის დასაღუპავად. შეთქმულება მოხდა ცხინვალში, სადაც საზაფხულოდ იყო მეფე თეიმურაზი. ხალხის ზრუნვაში გართული ივერიის გმირი რას წარმოიდგენდა, თუ მის წინააღმდეგ ამხედრდებოდნენ ის პირნი, რომელთა მიმართ იმდენი ამაგი ჰქონდა გაწყეული. მას ვერ წარმოედგინა, რომ იმ პირთ შურითა და ბოლმით ევსებოდათ გული ამ უგვირგვინო მეფეზე, რომელიც ასერიგად შეიყვარა ხალხმა და თავის ნებაზე განაგებდა მთელს სამეფოს. ზურაბ ერისთავი შეეპყრო განდიდების სენს, დღე და ღამ ფიქრობდა მასზე, თუ როგორ დაეპყრო თუშ-ფშავ-ხევსურეთი, ქსნის ხეობა და მუხრან ბატონის სამფლობელო, რათა მით მოეპოვა კიდევ მეტი დიდება და სიმდიდრე. ვინ იცის, ერთ დროს თეიმურაზ მეფის ტახტიც ჩაეგდო ზელში და გამხდარიყო სრულიად ივერიის მეფე. ასე ოცნებობდა ზვიადი ერისთავი და აწყობდა გეგმებს.

საღამო ჟამია. გრილი ნიავი სცემს ლიახვიდან ცხინვალის სასახლის ფართო აივანს, საიდანაც იშლება ღამაზე სურათებად ქართლის ჩრდილო-აღმოსავლეთი ნაწილი. გახურებული მკაა, წამგლის ტრიალი, ოქროსფრად ბზინავს მრავალალაგას მოუძეკელი პური. ხალხის თვალი ძლება ბუნების სიუხვით. გლეხს უხარის გული როს მზერს ბარაქიანად მოწყეულს

თავის ქიჩბახტლს. ის აღლია, თამამი, მას აღარ ეშინის ბატონის, აღარ ეშინის ჩასაფრებულ ოს-ლეკთა ბრბოების ყველა აღაგმა სააკაძემ.

სწორედ ამ დროს თეიმურაზ მეფე ფეხმორთხმით ზის ლბილად მოგებულ აიყანის ტახტზე და მის წინ გაშლილ სუფრაზე მასპინძლობს სტუმრებს, ქართლის დიდებულთ. მეფის გვერდით მარჯვნივ ზის მისი სიძე ზურაბ ერისთავი, მარცხნივ კი უკვე საკმაოდ მოხუცებული შადიმან ბარათაშვილი, ბერად მოსილი. აქვე არიან დიდი მოურავის ძველი მტრები: ქაიხოსრო ჯავახიშვილი, ფარსადან ციციშვილი და ზაალ მანაბელი.

— რატომ ამ გაშლილ სუფრაზე ჩვენს დიდ ბატონ თეიმურაზის გვერდით ვერ ვხედავთ ჩვენს უგვირგვინო მეფეს? ხომ ასე ეძახიან მოურავ სააკაძეს!

ასისინა ჩიფჩიფით გველური ენა ბარათაშვილმა.

— იმას ჩვენთვის არ სცალია, ჩემო შადიმან, — გაეხმაურა მასავით მოხუცი ფარსადან, — ის ხალხსა ფურჩნის, ჯარებს ამზადებს, არ ვიცით კი ვისთვის და რისთვის!

— ადვილი გასაგებია, ბატონო ფარსადან, — მისცა პასუხი ზურაბმა, — ადვილი გასაგებია. თვით გლეხის ნაშიერს გლეხებში ამოსდის სული. მათ აქეზებს მეფისა და თავადების წინააღმდეგ. მათ მფარველობს და ქომაგობს. ეს ბრიყვი ხალხიც ხომ უჯერის! ის მიაჩნიათ მეფედ და პატრონად...

— მართალია, ჩემო ძვირფასო სიძევ, მართალია! მე მხოლოდ ნახელითა ვარ მეფე, მოურავი კი მეფობს ქართლსა და კახეთში! მე მხოლოდ გვირგვინი მადგია თავზე, ის კი უგვირგვინო მეფეა ივერიისა, მისი გამგე და ბატონ-პატრონი! ერთი მიმცნეთ რა მქვია მე შემდეგ ამისა! — წამოიძახა წყენით თეიმურაზმა.

— თქვენი არ მიკვირს, დილო მეფეო! აბა რად უთმენთ ამდენს, თქვენმა მზემ, მეტისმეტად გააღაღეთ და გაათამამეთ მეფეებმა ეს ჩემი ნაყმევი, გუთნისდედა შიოშის-ძე! — შეეკამათა ჯავახიშვილი და შესვა მეფის სადღეგრძელო. მას მიჰბაძეს სხვებმა, დაცალეს კულა-ყანწები და აზარფეშებნი.

— ჩინებული ღვინოა, თქვენმა მზემ, ეს ატენის ღვინო, მაგრამ ჩვენს კურთხეულ კახურს შაინც ვერ შეეღრვება, — წამოიძახა სახლთუხუცესმა ბიძინა ჩოლოყაშვილმა, — არავე თუ საქართველოში, მთელს დუნიაზე ღვინო არ შეეღრვება ახმეტა-წინანდალსა და ყვარელ-კარდანახში დაწურულს დალოცვილ საფერავ-რქაწითლის წვენსა. — დაამთავრა მან და სიამოვნებით გადახედა მეფეს.

— ეგ კი მართალია, ჩემო ბიძინავ! — დაუკრა კვერი თეიმურაზმა. — აბა, სად არის კიდეც ალაზნის ველისთანა ღვინო. იმისთანა საამო სასმელი, მძლავრი, მაგარი! არსად ქვეყანაზე! ოდესღაც, შაჰის ელჩები მეწვივნენ გრემსა, შევიყვანე ჩემს ქებულ მარანში, მოვახდევინე თავი სამასჩაფიან ჭურსა, ამოვალებინე მოდილო ორშიმთი საფერავის შავი ღვინო, პირველად მე თვით დავცალე დიდი ყანწი და გადავედი მათთან ალავერდს. მათ თითქოს უკრძალავს მაჰმადი ღვინის სმას, მაგრამ თავი ვერ შეიკავეს. უნდა გენახათ, რა მოხდა! დასცალეს თუ არა თითო ყანწი, იქვე წაიქცნენ დახოცილნი, ენას ველარ სძრავდნენ: რალაცას ლულულულებდნენ. ძლივს გამოვათრიე მარნიდან უზომოდ დამთვრალნი... ეე, რამდენი ჩვენ მაშინ ვიცინეთ! უნდა გენახათ, ბატონებო, რარიგად აჯავრებს მათ ჩემი მასხარა. ერთი დამიძახეთ, ჩემო ბიძინა!

— გურგენა გორში გეახლა, ბატონო, აკი ამ დილით გაუშვით თქვენ თვითონ!

— ჰო მართალია, სულ დამავიწყდა!

— კარგია, რომ აქ არ არის ამჟამად: ხელს შეგვიშლიდა, ჩილაპარაკა თავისთვის შადიმანმა.

მას ყური მოჰკრა მეფემ და შეეკითხა:

— განა რარიგად შეგვიშლიდა ხელსა?

— საკმაო საბუთი მაქვს ვიფიქრო, სწორედ მაგან გასცა პაპათქვენი მეფე ალექსანდრე და ქართლის მეფე გიორგი, როცა იმათ პირველად გაუგზავნეს ელჩები მოსკოვის ხელმწიფეს. ამიტომ გირჩევთ დიდათ ერთგული შადიმან ბარა-

თაშვილი ფრთხილად ბრძანდებოდეთ მაგასთან, არ ამცნოთ თქვენი ხვაშიადი და ფარული ზრახვანი.

— მე კიდევ პირველ საკითხს ვუბრუნდები, — დაიწყო ზურაბმა. — რა მოვუხერხოთ ამ გაბატონებულ გლეხს? როგორ ავლაგმოთ მისი ზვიადობა? რაკი იმ სათარეშო ბრძოლით დააფრთხო და განდევნა სპარსნი, ეს მეოთხე წელია სულ ერთიანად დაგვაჯდა თავზე. კაცად აღარ გვაგდებს არც მეფესა და არც დიდებულთ. ანგრიშს არ გვიწევს არავის. თავის ნებაზე განაგებს და ბრძანებლობს მთელ ივერიას. ის გახდა მეფეცა და ვეზირებიც. ჩვენ-კი მაჩანჩალა შევიქნით მხოლოდ, მეტი არაფერი! რამდენ ხანს უნდა ვითმინოთ კიდევ ასეთი დამცირება ან მეფემ, ან დიდებულებმა?! როდემდე! აივსო მოთმინების ფიალა...

— ჩვენ, თავადებს, ხომ ენა ჩაგვიგდო, პირში ლაგამი ამოგჭდო. შინაყმები გადაგვირია, ჩამოგვართვა მამულები და გააზატებულ გლეხებს დაურიგა. ერთი სიტყვით, რა არ ჩაიღინა და რას არ ჩადის! — წამოიძახა გაცხარებით ზაალ მაჩაბელმა.

— რა იცით, რომ ერთ მშვენიერ დღეს მეფედ არ გამოაცხადებს თავის თავს ეგ მდაბიო და ბაგრატიონთა დიდებულ ტახტზე არ დაბრძანდება ივერიის მეფედ! — წამოიძახა შალიმანმა.

ამ მწვევე, შხამიანმა სიტყვებმა საშინლად დასერა თეიმურაზისა და ზურაბის გული.

— ნუთუ ვერაფერი მოუხერხეთ ამ ერთ კაცს მეფემ და დიდებულებმა?! — წამოიძახა ფარსადანმა.

— აბა რა მოვუხერხოთ?! მოვკლათ?! — შეეკამათა მეფე.

— დიახ, მოჰკალით, თუ სხვაფრივ ვერაფერს უხერხებთ! მოჰკალით! ერთი კაცის მოკვლა სჯობია მეფე-დიდებულთა ამდენ შერაცხვენასა და დამცირებას! — წამოიძახა ქაიხოსრო, ჯავახიშვილმა.

— ნუ ყვირი ეგრე, ვეეო, წყნარად... ასეთი დიდი საქმე ყვირილით არ კეთდება, ჩემო ქაიხოსრო! — შეეკამათა დაბალი ხმით ბარჯთაშვილი. — შეუძლებელია ასეთი თაობირის მოწყობა გაშლილ სუფრასა და მეტადრე აივანზე. ბრძა-

ნეა მეფეო, და შევიდეთ სათათბიროდ შენ საიდუმლო სენაკში. აქ, ამ დია ალაგს, არ შეიძლება ასეთ მძიმე საქმეზე საუბარი. ყველაფერს ყური აბია... და თუ მოურავმა გაგვიგო, მაშინ... ჰე, მაშინ გამოეთხოვეთ წუთისოფელს!

— თუ კი ეგეთი საშიშარია მოურავი, მაშ შენ როგორღა გადურჩი, რაც ზიანი მიაყენე? — შეეკითხა ზურაბ ერისთავი.

— მე, ბატონო ჩემო, ბერად შევდეგ მაშინვე, გამოვიცვალე სახელი და ჩავიკეტე ერთ შორეულ მონასტერში. ხომ ხედავ, ბერის სამოსი მაცვია და სახელადაც გენადი მქვია... აბა, ვინ მიხვდება, რომ ამ მოკუნტული და თმა-წვერ გათეთრებული ბერის სახით კიდეც ჰგებებს ამ ქვეყნად ერთ დროს ლალი და ძლიერი მეფის ლალა შადიმან ბარათაშვილი, უძინარი მტერი გიორგი სააკაძისა, რომელმაც ერთ დროს დაჰგმო ჩემი ხმალი და ვაჟკაცობა. განა ეს დამავიწყდება ოდესმე?!

— მაშ რა უხერხოთ იმ კაცს! მივეჩინოთ მკელელნი?! -- შეეკითხა მეფე.

— დიახ, ეგ არის! უნდა მოკედეს მოურავი, რათა დამშვიდდეს ქვეყანა. უნდა ემსხვერპლოს მეფესა და დიდებულთ ეგ ერთი კაცი, ხოლო წინასწარ უნდა დაარხიოთ ხალხში ხმა, რომ სააკაძე მოღალატეა, გამცემია, შაჰის ერთგულია, რომ მაგის შთაგონებით ააოხრა შაჰაბაზმა მთელი კახეთი, რომ მაგას ხელები აქვს ვასვრილი ლუარსაბ მეფის უმანკო სისხლში... და ყოველივე ესა უნდა ჩაიწეროს ქართლის ცხოვრების მატრიანეში, რათა მოურავს მარადის ჰქონდეს მოცხებული მოღალატის ჩირქი... გარდა ამისა. ბატონებო... — მყის ენა ჩაუწყდა შადიმანს.

მოისმა კიბეზე ამომსვლელთა ფეხის ხმა. აივანზე უცებ გაჩნდა ჯუბა-ჯავშან-მუზარადიანი, იარაღქურვილი უზარმაზარი რაინდი ორი თანმხლებით.

— მოურავი! სააკაძე — წამოიძახეს უზომო გაცეებით და შეშფოთებით მეფემ, დიდებულებმა და წამოცვივდნენ ზეზე. შადიმან ბარათაშვილი სადღაც გაიპარა უცებ.

— დიახ, ის გახლავართ, ბატონებო! არ მელოდით, განა? — დაიგრგვინა სააკაძემ. ამ გრგვინვაში ისმოდა რისხვა და დაცინვა. — ბოდიშს ვიხდი, რომ შეგიშალეთ სუფრაზე სიამოვნება და ტკბილი, უმანკო საუბარი! — განაგრძო მან იმავე დაცინვის კილოთი. აბა, ის მორიელი სად გაქრა, ბერის სამოსით, ჩემს მოსაკლავად რომ გაქეზებდათ და თანაც შაჰის ერთგულად და ჩემი ქვეყნის მოღალატედ რომ მნათლავდა! სად შეძრა? სად წავიდა? გელავ, შედი და გამოათრიე ის მოხუცი ბერი, ის გესლიანი მორიელი... პაპუნავ, გადასძახე ბიჭებს ალყა შემოარტყან სასახლეს! არავინ გაუსხლტეთ ხელიდან... დაბრძანდით, ივერიის მეფევ და დიდებულნო! განაგრძეთ ლხინი და საუბარი... დაჰკმეთ, გაქირდეთ, მოჰკალით თქვენი ერთგული და თქვენთვის თავდადებული მოურავი... რას დგეხართ! დაბრძანდით...

მეფე და დიდებულნი კი იდგნენ ფეხზე ენაგამშრალნი, დარცხენილნი და უზომოდ შეშინებულნი.

— აი, მოველ მცირე რაზმით თქვენს წინაშე! თვით ბედისწერამ მომაგლო აქა... მიხაროდა, რომ ვნახავთ მეფესა და დიდებულთ, რომელნიც ესეცაა ვიხსენ ტყვეობისაგან. დიახ, სპარსთა ძლიერი რაზმი გემუქროდათ თავდასხმას და დატყვევებას, ხოლო ამ ერთი უამის წინ გავფანტე სპარსნი და გამოვეშურე აქეთ სამახარობლოდ, რას ვიფიქრებდი, თუ აქ დამხვდებოდნენ ჩემი ძველი „მოკეთენი“: ბატონი შადიმანი, ფარსადან, ზაალ და ქაიხოსრო, რომელთაც ერთ დროს შეგასვეს ბევრი შხამი და სამსალა. მათ შორის კი ჩემს მიერ პირველ კაცად ქმნილი, ჩემი ძმადფიცული ცოლისძმა ზურაბ და თვით მეფე ივერიისა თეიმურაზ პირველი, რომელიც იმერეთს გადახვეწილი ორჯერ ჩამოვიყვანე აქეთ და ორჯერ დავადგი თავზე მეფის გვირგვინი... აი, ჩემს წინააღმდეგ შეთქმულთა თაიგული! და აბა, მეც მათ შორის ჩემს უნებლიედ გამჩდარი! რას უდგეხართ, სამშობლოს მტრებო, გამოიჩინეთ გამბედაობა და აღმართეთ იარაღი იმ ადამიანის წინააღმდეგ, რომელმაც სამჯერ იხსნა ქართლ-კახეთი დაღუპვისაგან და მასთან თქვენ; პირველად თათარხანის შემოსევის დროს 1609 წელსა, ხოლო შემდეგ ორჯერ

შაჰაბაზის რისხვისაგან და ერანის უამრავ სპალაშქრისაგან 1623 და 24 წლებში... ახლა-კი აღარ გინდივართ, განა! მეტი ვარ, ხელს გიშლით! ამიტომ მადლობის ნიშნად და ამოდენ ამაგის მუქაფად მოკვლას მემუქრით, მკვლელებს მიგზავნით მუხანათურად! სირცხვილი შენდა, არაგვის ერისთავო ზურაბ, ჩემო ცოლისძმავ და ადრევე ჩემდამი ძმადფიცული სირცხვილი! ზურაბ ერისთავო, აბა სთქვი, ერთი, რა დაგიშავე? ჩემის მეოხებით გახდი არაგვის დიდი ერისთავი და შეიძინე უამრავი ქონება, დაგამოყრე თეიმურაზ მეფეს და გაგზადე უპირველეს დიდებულად მთელს ივერიაში. შენ არ შეჯერდი ამაებს, დასთხარე, ვერაგო, ერთ საკუთარ ძმას თვალები და გააძევე იმერეთს, ხოლო მეორე ძმა გიორგი მოჰკალი კიდევ. ამათი ყმა და მამული შენ დაისაკუთრე. და როცა არც ესენი იკმარე, უმადლარო ვეშაპო, დასაპყრობად ხელები გაუწვდინე თუშ-ფშავ-ხევსურეთს, გწაღდა დაგედვა მონობის უღელი ამ მამაცი ხალხის კისრად, და არ მოგეც ამის ნება, აგრეთვე როს წინ აღუდდექ შენს მეორე წადილს, რომ ხელში ჩაგეგდო ქსნის საერისთაო და მუხრან ბატონის სამფლობელონი, რათა მით გამხდარიყავ ფრიად საშიშარი მთელ სამეფოში, აი სწორედ ამიტომ შეიქენ ჩემი მოძულე და ჩემი უძინარი მტერი... ახლა კი აშკარად ვხედავ ყველაფერს. ვმზერ თქვენ ორთავეს შავს უმადურობას!

— აჰა, ერის მოთავევ, შენი მგესლავი მორიელი, შენი უძინარი მტერი შადიმან! ძლივს ვიპოვე და გამოვათრიე სასახლის ჯურღმულიდან. იქ ჩამძვრალიყო! — წამოიძახა გელამ და ძირს დააგდო ხელფეხგაქრული შადიმან ბარათაშვილი, რომელიც ცახცახებდა, ვით ვერხვის ფოთოლი. მკვდრის ფერი ელო მოხუცის სახეს.

— გაუხსენით ხელფეხი და დასვით ტახტზე!

მყის შესრულდა გამირის ბრძანება. შადიმანი დაემხო მოურავის წინაშე.

— აღსდგე, მოხუცო! ხმაზევე ვიცან ბებერი მგელი, ცხვრის ტყავში გახვეული, — დაიწყო უფრო დინჯად შოურაემა. — შადიმან ბარათაშვილო! სად იყავ ამდენი წანი?! სად დამემალე?! გეგონა არ ვიცოდი, სადაც იყავ შეფარე-

ბული ბერ-მონაზონის სქიმით მოსილი?! გეგოსა, გახა, ვერ მივაგნებდი გენადი ბერსა ზარზმის ლავრაში?! ცდებოდი ძლიერ. არ ვერჩი მტრებსა, რომლებიც გარბიან, არც წაქცეულებს. ამის მოწმენი არიან აი ეს ჩემი მტრები. აბა სტჟევით, თუ ვისმე თქვენგანზე ვიძიე შური! პირიქით, ბევრს თქვენგანს სიკეთე ვუყავ!

— სრული სიმართლეა, ბატონო მოურავო! — დაადასტურა ყველამ.

— ახლა შენ თვით აღიარე, შადიმან ბარათაშვილო, ვინ ჩაუგდო ერანის შაჰს ხელში ლუარსაბ მეფე — მე, თუ შენა? სტჟევი სიმართლე, მოხუცო!

— მე, ბატონო მოურავო, მე გადმოვიყვანე უბედური მეფე იმერეთიდან და ჩავაბარე შაჰაბაზს. — წაილულლულა შადიმანმა აკანკალებული ხმით.

— ჰოო! მაშ ვინ ყოფილა მისი მკვლელობის მიზეზი: მე თუ შენა?

— გამოდის, რომ მე, დიდო მოურავო. ხოლო ვფიცავ ზენას. არ ვიცოდი, თუ წყეული ყიზილბაში სასიკვდილოდ გაიმეტებდა სრულიად უდანაშაულო ადამიანს.

— ახლა ეს მითხარ, მოხუცო შადიმან, რაღად მდებ ბრალს შენ და თეიმურაზ მეფე ლუარსაბის სიკვდილში, რად მახვევთ თავზე თქვენს საკუთარ დანაშაულს? ნუთუ, წყეულო არსებავ, ველარ გაძეხი ჩემი ამდენი მტრობით და შურისძიებით?! ან რა დაგიშავე ასეთი?!

შადიმანი კვლავ დაემხო მოურავის წინაშე ამ სიტყვებით:

— უსაზღვრო დამნაშავე ვარ შენს წინაშე, დიდო რაინდო, ღირსი ვარ ყოველგვარი სასჯელისა, ხოლო გვედრება, ხალხის მოთავევ, მოხუცი შადიმან ბარათაშვილი, დიდსულოვნებით აპატიო მას ესოდენი დანაშაული და მისცე საშუალება შენ ლოცვაში დალიოს სული ზარზმის მონასტრის თაღებ შორის...

ამ სიტყვებთან ერთად მოხუცი შადიმანი მიიწია ხელზე საკოცნად.

— არ არის საჭირო! მიპატიებია დანაშაული ყველასთვის და პირადად შენთვის, მოხუცო მეღავ. შემეძლო ახლავე

სულ ყველას ერთობლივ დატუსაღება და სამართალში მი-
ცემა. ვნახავდი, თუ როგორ მოიწონებდა ხალხი თქვენს
ასეთ საქციელს! მაგრამ არა, არას გერჩით თავდახრილთა
და შეშინებულთ!

დღე, თქვენ სინდისმა დაგდოთ სათანადო სასჯელი! აშკა-
რად ვხედავ, რომ ივერიის მეფე-დიდებულნი ველარ ჰგუობთ
ჩემისთანა კაცს! ამიერიდან ან მე ან თქვენა! ერთად კი ვერ
ვთავსდებით ამ პაწაწა ივერიაში. ვნახოთ! ვიფიქროთ!

ამ სიტყვებით დინჯად ჩავიდა კიბეზე სააკაძე, მოაჯ-
და თავის შავ მერანს და, ვით მოჩვენება, გაქრა წყვდიად-
ში. მის კვალს აედევნენ ორივე თანმსლებნი და მამაკი
რაზმი.

სასახლის აივანზე კი კვლავ იდგნენ მასპინძელნი და
სტუმრები ზარდაცემულნი. შეჩერებოდნენ ერთიპეორეს
და ვერ გაერკვიათ. ცხადად თუ სიზმრად მოეკლნა მათ
გიორგი სააკაძე.

მიაგელვებდა თავის ბელაურს დიდი მოუჩავე შავი ფიქ-
რებით გარემოცული. მან ადრევე იცოდა კარგად, რომ მე-
ფე და თავადთა დიდი ნაწილი არ იყვნენ კმაყოფილნი, რად-
გან მოურავი თავისი დიადი მოქმედებებით ფრიად აჩერო-
ებდა მათ და აჩიოტებდა მათ პიროვნებას, ხოლო ამას კი
ვერ წარმოიდგენდა, რომ ისინი მოინდომებდნენ მის დალა-
ტით მოკვლას, თანაც დასწამებდნენ საშინელ ცილსა. ეს
იყო მათი მხრივ შავი უმადურობა, უადრესი ვერაგობა. მან
ზურგი აქცია ზურაბმაც-კი, ძმადფიცულმა და ცოლისძმამ,
რომლის მიმართ მიუძღოდა იმოდენა ამაგი და სიკეთე. ამის
შემდეგ რაღა რჩებოდა?! ან ივერიიდან გაცლა მთელი ცოლ-
შილით, ან აჯანყება და ძმათა შორის სისხლის ღვრა. სა-
ჭირო იყო ამ მძიმე გარემოების კარგად აწონ-დაწონა. გმირ-
მა მიაშურა ნოსტეს და სასწრაფოდ დაიბარა სათათბიროდ
თავისი უახლოესი მეგობრები და ძმადფიცულნი: ელია დია-
სამიძე, დავით გოგორიშვილი, კახაბერ ხერხეულიძე, გიორ-
გი ქავთარაძე. აგრეთვე დიდი მამულიშვილი, ფრიად განათ-
ლებული პირი დომენტი მროველი და თავის მარად თანმს-
ლებნი პაპუნა ვაშაყაშვილი და ცარო.

მესამე დღეს შედგა თათბირი. თითქმის ყველანი იმ აზრის იყვნენ, რომ მოეხდინათ აჯანყება, გადმოეგდოთ ტახტიდან მცონარე თეიმურაზი, შეეპყროთ მისი მომხრენი და ივერიის ტახტზე დაესვათ მეფედ დიდი მოურავი.

— მართალია, შენი გამეფება, დიდო გმირო, გამოიწვევს ძმათა შორის შეტაკებას, დიდ სისხლის ღვრას, მაგრამ უსისხლოდ არაფერი კეთდება. გვირგვინმოსილი, შენ შესძლებ ნებით თუ ძალით შეიერთო კოლხეთ-მესხეთი და მით წარმოშვა ერთი ფაენის ქვეშ გაერთიანებული ძლიერი საქართველო. ამ სახით, ხალხის მოთავევ, ხორცს შეისხამს შენი დიდი ხნის ოცნება; შენი ძლიერი მარჯვენით კვლავ აღსდგება ძველი დიდებით მთლიანი საქართველო, კვლავ გაშლის ლაღად ფრთებს ქართველი ერი, საუკუნეთა მანძილზე გათიშვა-ბრძოლით ესოდენ ტანჯული, დაკნინებული, კვლავ ინავარდებს ერის სული განათლება—შემოქმედების მაღალ სფეროში, წარმოთქვა გრძნობით დომენტი მროველმა.

— გაბედე, ქვეყნის დიდებავ! გადადგი ეს გონივრული ნაბიჯი! უსმინე ბრძენი დომენტის ფრიად გონივრულ რჩევას! ერის უმეტესი ნაწილი: მთელი გლეხობა, მთა და წვრილი აზნაურნი, სულ შენკენ არიან! მაშ რისილა გეფიქრება! — ჩასძახოდნენ აქეთ-იქიდან მისი მომხრენი.

მოურავი კი იჯდა მღუმარედ ღრმა ფიქრებით გარემოცული. ხმას არ იღებდა. ბუმბერაზს დაეხარა თავი. მწვავე ფიქრებს დაეღარა მისი შუბლი. სამარის მსგავსი სიჩუმე ჩამოწვა დარბაზში, ყველანი შესცქეროდნენ დიდებულ ადამიანს, რომლის გენიოსურ თავში წყდებოდა სრულიად ქართველი ერის ბედი და იღბალი. გავიდა საკმაო ხანი. დუმილი დაარღვია სააკაძემ. იგი წამოდგა დინჯად, გადახედა კრებას და დაიწყო:

— ვერა, ვერ ვიზიარებ მაგ თქვენ რჩევას, ძვირფასო ძმანო და მეგობარნო! აჯანყებით და ბრძოლით დიდ უბედურებას შევამთხვევთ ისედაც სისხლით დაწრეტილ ივერიის ხალხსა. ეს ძმათაშორისო ბრძოლა არც ისე მალე გათავდება, როგორც გგონიათ. მთელი კახეთი მხარს დაუჭერს მეფე

თეიმურაზს, ხოლო არაგვის ხეობა ზურაბ ერისთავს და შე-
უკრავს გზას მთის ხალხებს, თუშ-ფშავ-ხევესურთ ჩვენდა
დასახმარებლად. შეიძლება თეიმურაზმა იმერთა მეფეც
ჩარიოს ამ საქმეში და ძაშინ ხომ დაიღუპა ეს ჩვენი საქმე!
დამეთანხმებით, რომ კახეთის მკვიდრნი მუდამ არჩევენ
მეფედ ბაგრატიონთა გვარის გვირგვინოსანს, ქეთევან წამე-
ბულის ძესა, ვინემ მდაბიო წრიდან გამოსულს, შიოშ სააკა-
ძის შვილს დიდ მოურავს. და არამცთუ კახეთი, თვით ქართ-
ლის აზნაურობა და სასულიერო წოდებაც ამ აზრის იქნე-
ბიან. არას ვამბობ ქართლის თავადებზე; მაშ ეს აჯანყება,
ეს ნაბიჯი არც ისე ადვილი საქმეა, როგორც გგონიათ თქვენ-
ნა. გარდა ამისა, ეს ძმათაშორისო ომი ამხედრებს ივერიის
წინააღმდეგ მის უძინარ მტრებს: კავკასიონის მთის ხალ-
ხებს, ოს-ლექ-ჩეჩენთ, და ორ დიდ ვეშაპს — სპარსეთსა
და ოსმალეთს, რომელნიც მარად გვემუქრებიან ჩასანთქა-
ვად... მაშინ ხომ სულ მთლიანად დაიღუპა მთელი ივერი
ხომ ჩვენ გავხდით მისი დაღუპვის მიზეზნი! არა, ძმებო ჩვენ
ჩიხში ვართ მოქცეულნი! უამრავი მტერი გვახვევია შიგნით
და გარედან! აი, რაშია ქართველი ერის უბედურება! კი-
დეც რომ გავიმარჯვოთ ზურაბ-თეიმურაზზე, კიდეც რომ
დავამარცხოთ მეფე და დიდებულნი, მაშინ აბა ვინ დავსვათ
ივერიის მეფედ?! ვინა გვყავს ესოდენ ღირსეული ადამიან-
ნი?! უმეფობა ხომ არ შეიძლება, უმეფობა ხომ აღვირს
წახსნის ჩვენში დიდსა და პატარას, გამოიწვევს გაუთავე-
ბელ ურთიერთ კინკლავსა და არევდარევასი მაშ მეფეა სა-
ჭირო. ახლა ვიკითხოთ, სად არის ეს სამეფო კაცი? ვინ
არის ივერთ მეფობის ღირსი ადამიანი?!

— ვინა და შენა, ერის დიდებავ, ქვეყნის ნუგეშო! შენ,
უძლეო გმირო, დიდო მოურავო! შენა! — მიაძახეს ერთ-
ხმად.

— მეე?! არა, ჩემო ძმანო და მეგობარნო! მე ვერ გამოვ-
დგები ამ დიდი საქმისათვის! მეფის გვირგვინი არ დაშვენ-
დება სააკაძიანთ გვარსა... ბაგრატი მესამის, დავით აღმაშე-
ნებლის, დიდი თამარის და გიორგი ბრწყინვალეს დიდებულ
ტახტზე ვერ დაჯდება ნოსტეველ გლეხის შიოშის ვაჟი! მო-
21. ს. ქვარიანი.

ურავის ასეთ განდიდებას ვერ იგუებენ ივერთა მკვიდრნი, დიდნი თუ მცირენი, და შეიქნება მუდამ შფოთი, შეთქმულება და აჯანყებანი ჩემს დასამხობად. გარდა ამისა, კიდეც რომ დიდის სისხლის ღვრით, დიდის მსხვერპლით და მოძმეთა გაჟლეტით შევძლო სიმშვიდის დამყარება ივერიაში, ამით ხომ არ თავდება საქმე. საქართველოს გაერთიანება ხომ მოითხოვს მთელი კოლხეთისა და მესხეთის შეერთებას! როგორ გგონიათ, ძმანო. ოსმალეთი განა უომრად დამითმობს საქართველოს იმ კუთხეს, რომელიც ორი საუკუნის მედგარი ბრძოლით ძლივს ჩაიგდო ხელში?! ან კოლხეთის მეფე-მთავრები ასე გულდინჯად მოიხრიან ქედს მეფე გიორგი სააკაძის წინაშე, თუ გაგვიმართვენ ხანგრძლივად გაათრებულ ომსა და ბრძოლებს?! აბა ვინ იტყვის წინასწარ რომ უსათუოდ ჩვენ გავიმარჯვებთ?! ვინ იცის, თუ რა საბედისწერო შედეგი მოჰყვება ქართლოსის ტომთათვის იმ ძმათაშორისი ბრძოლას! არა, ძმანო, ეს არ ეგების! სჯობს სხვარიგ მოვაგვაროთ საქმე...

თვით მე დროებით უნდა გავეცალო ჩემს ივერიას. უნდა შევეფარო ოჯახობით იმერთა მეფე გიორგის; ის კარგახანია მეპატიეება კიდეც. დეე, სცადონ აქ უჩემობა მეფემ და დიდებულებმა. დეე, უჩემოდ მოიგერიონ მტრები, რომელნიც თავს აიშვებენ ჩემი გარდახვეწით!

მოურავს ხმა აუთრთოლდა და თვალებზე ცრემლი მოადგა.

— მერე ხომ ბოლო მოელო შენს დიდებულ მიზნებს საქართველოს გაერთიანების შესახებ! — წამოიძახა ელია დიასამიძემ.

— არა, მეგობარო! პირიქით, უფრო ვუახლოვდებით იმ ჩემს მიზნებს.

— აბა რარიგად, ერის ნუგეშო? — შეეკითხა მროველი.

— უკვე მყავს სახეში ისეთი პირი, რომელსაც ძალუძს ჩვენი დახმარებით ივერთა ტახტის დაპყრობა და საქართველოს გაერთიანება.

— ვინ არის იგი? — შეეკითხნენ ყველანი ერთხმად.

— ჯერ ვერას გეტყვით, ვშიშობ არ გახმაურდეს... მალე გაცნობებთ ყოველივეს ფრიად საიდუმლოდ და მზად იყა-

ვით, ფრთხილად იმოქმედეთ. შეიძინეთ მომხრენი, სურსათი, იარაღი... ელოდეთ ამ მოკლე ხანში ჩემს ნიშანსა და პაემანს... მანამდე კი გამარჯვებით განახეთ, ჩემო საყვარელო ძმანო! იცოცხლეთ ჯანსაღად და მრავალჟამიერ!

ამ სიტყვებით მოურავი გადაეხვია თავის ძმადფიცულთ და მეგობრებს.

— როგორ, გიორგი! შენ მიხვალ და ჩვენ აქ გვტოვებ?! არა, აქ რაღა გვინდა! ჩვენც ყველანი შენთან მოვდივართ იმერეთს, — მიაძახეს ერთხმად.

— არა, ძმანო, თვით საქმე ითხოვს თქვენ აქ დარჩენას და საიდუმლო მუშაობას. მე წავიყვან მხოლოდ გელას და პაპუნას, რათა მათი მეშვეობით ვავაბა თქვენთან ურთიერთობა. აქ გიტოვებთ გიორგისა და თამაზს, თუ რამე იყოს ისეთი, მაშინვე მაცნობეთ ამათი პირით.

ამრიგად გადაწყდა ეს მძიმე საკითხი. მეგობრები გულისკვნესით დაეთანხმენ მოურავს. ის ამ დღეებში უნდა გასცლოდა ივერიას, უნდა გადასულიყო ცოლშვილით კოლხეთში. მალე მოემზადა იგი და გაუდგა გზას სურამის უღელტეხილით. მწარე ბოდმით გულავსებული მიდიოდა იმერეთს...

ხარობდნენ მისი მტრები, გლოვობდა ხალხი, გიორგის წასვლით დაობლებული... აი, რა მწარე სიტყვებს ათქმევინებს ივერიის გმირს პოემა „დიდ მოურავიანის“ ავტორი იოსებ თბილელი *:

ქართლს მოგავლე გალავანი, აწ ვინ აქცევს

ზღუდეებსა!

ჩემად ნაცვლად ჩემს სამკვიდროს ვინ დაიდებს

ბუდეებსა!

რა შაჰაბაზს მე ვიახელ, არ გამიყვის ნატალები,

რა მიბრძანის, რა მიბოძის, ტკბილი სიტყვის

სათქმელები...

მათი დავსთმე სიტკბოება, შენთვის ** დავდე თავი

სულა,

* იოსებ თბილელი ცხოვრობდა მეჩვიდმეტე საუკუნის მეორე ნახევარში.

** ე. ი. ივერიისთვის.

შვილი პირმშო საყვარელი, სიცოცხლე და ჩემი
სულა...
ჩემობითა მებრალეები, ვაჰმე, ქართლო,
სუსტობისთვის!
გალავანი დაგექცევა, ვადგებიან თავთავისთვის...
ეგზომ ჩემი ჭირნახული აწ გადაგდო როგორ,
სხვისთვის?!
ოდეს მტერი წამოგატყდეთ, მომიგონებთ ამ
სიტყვისთვის...
უველამ იცით, რომე ქართლი ჩემი ხელით
დახსნილია,
თვარ შეიტყობთ ამას იქით, მტერი ისევ ახსნილია,
ჩემი ხმლისა ნაშოვარის გულისპირი წახსნილია...
ამდენ ხანსა ველარ გავძლებ, რაც ხანი მაქვს
განასული,
არ დავზოგე ქართლისათვის ძმა, შენი და განა
სული
თავი დავდე საწამებლად ხორცი საკვდავ
განასული“.

XXXII. მუშენიერ კოლხეთში

დიდი მოურავი მთელი ჯალაბით შეეხიზნა იმერეთს. მეფე გიორგიმ დიდებითა და ალტაცებით მიიღო იგი. ჩასვლისთანავე მოურავმა დაუმორჩილა გამდგარი უძლიერესი თავადი ქველი წერეთელი, რითაც უზომოდ გაახარა მეფე და მით დაიმსახურა კიდევ მეტი პატივისცემა.

ამის შემდეგ ივერიის გმირი შეუდგა სამზადისს. როგორც ვთქვით, მისი მიზანი იყო საქართველოს გაერთიანება და ძველი დიდების აღდგენა. მას ღრმად სწამდა, რომ შეერთებული ივერი, კოლხეთი და მესხეთი ადვილად გაუძლებდნენ მუსლიმთა ტალღებს და მოიგერიებდნენ ძლიერ მეზობლებს. ერთობაში იყო ძალა და ბრწყინვალე მომავალი, დაქუცმაცებაში კი უძლურება და სხვისი მონობა. ამის მაგალითებს ხედავდა სააკაძე ქართველი ერის წარსულში. მას თავიდანვე არ მოსწონდა თეიმურაზი. არც სურდა იგი ივერიის მეფედ, მაგრამ საქართველოს საარაკოდ გადარჩენის შემდეგ იძულებული შეიქნა დამორჩილებოდა დიდი უმეტესობის ნებასურვილს და მოეწვია მეფედ იმ დროს იმერეთს გადახვეწილი თეიმურაზ პირველი.

სექტემბრის დასაწყისი. ქუთაისი. უქიმიერონის მთაზე გოროზად ამართულან ბაგრატ დიდის ციხე-კოშკები, სასახლე და უზარმაზარი ტაძარი. წინ ვადაშლილა ბაღებში ჩაფლული ვრცელი ქალაქი. მას შუაზე ყოფს ცელქი რიონი, ეს კავკასიონის მთების ნებიერი შვილი. მისი ზვირთები ვერცხ-

ლივით ბზინავს დილის მზის სხივებზე. შორს კი, სამხრეთით და დასავლეთით, ფართოდ გაშლილა ქვემო იმერეთისა და ოდიშის ვრცელი, ფრიად ნაყოფიერი ვაკე, რომელზედაც ოქროსფრად ბზინავს ღომისა და ფეტვის ყანები, ალაგ-ალაგ სათიბებ-საძოვრებით და დობილოებით ამწვანებული. შუაში კი განივრად ლაპლაპებს მკერდგაშლილი რიონი. ამ ვრცელ ვაკეს სამხრეთით ავლია მაღალ ზღუდედ სურამ-აქარის ქედი, ტყით დაბურვილი და მოლურჯო ბლონდმოხვეული.

სასახლის ეზოში გუშაგმა შემოუშვა ვიღაც შავნაბადმოხვეული ქარმაგი მოხუცი, რომლის თეთრად შესირმულ გაჩეჩილ თმას ამკობდა შალის ფაფანაკი. იგი დინჯად მიუახლოვდა სასახლის წინგარდს, მოიმარჯვა ილიაში ამოჩრილი სტვირის გუდა და ააზუზუნა თვლებით მოოქვილი ყანწისებური სტვირი; თანაც ააყოლა სხვადასხვა შაირები. ეს იყო საკმაოდ ცნობილი რაჭველი მესტვირე თედორე.

— რაჭიდანა ჩამოვედი, მესტვირე ვარ მე ონელი, ყველანი ღმერთმა გაცოცხლოთ სტუმარი და მასპინძელი.

შორი გზიდან მოსული ვარ, გამშრობია მე ყელიო, ბატონებო, გამომხედეთ, თქვენს წყალობას მოველიო.

შაირმა და სტვირის ხმამ გამოაფინა გარეთ სასახლის ქვემო სართულიდან სუფთად ჩაცმული ლამაზი გოგო-ბიჭები, ესენი შემოეხვიენენ მესტვირეს და დაუწყეს ჩვეულებრივ ლაზღანდარობა. ერთმა თავხედმა ახალგაზრდამ მიახალა რაღაც უწმაწური შაირი, ამას მოჰყვა გოგო-ბიჭების სიცილ-ხარხარი. ასეთ შაირზე უცებ მიიღო მან მესტვირის პასუხი:

„ახალი ახო ავკაფე ახალი ფაფანაკითა,
თვალით აღარ დამენახო მაგ შენი ამხანაგითა“.

შეიქნა გოგო-ბიჭებში აურ-ზაური, ამათ ხმაურობაზე გამოვიდა ცალთვალა ხაბაზი და მიახალა მესტვირეს: „მაგვერ მიაბი მაგაზე, ვირი დააბი ბაგაზე“. ცალთვალა ხაბაზმა მესტვირესაგან უცბად მიიღო შემდეგი პასუხი:

„ახალ გაზაფხულის პირას
ქერსა ვთესდი ქერყანასა,
შენ რომ ორივ თვალი გეხას,
დააქცევდი ქვეყანასა“.

— გოგო ფოტინე! გაეშაირე ერთი ამ ქვეყის, ამ რაკველ მესტვირეს. შენ ხომ იმდენი შაირი იცი! — შეუჩნდნენ ამხანაგები ერთ გრუზათმიან ლამაზ გოგოს. იგი მართლაც თამამად მიუახლოვდა მესტვირეს და მიაძახა:

„სალამო ჟამი შეიქნა, შეწყდა ხმაური მუშისა,
მესტვირევ, იქით დაიწი, სუნი მოვიდა ქუშისა“.

გოგო-ბიჭების უცნაურმა სიცილ-ხარხარმა დაფარა ლექსი. მესტვირე დუმდა.

— ჰე, გაჯობა თუ არა ჩვენმა ფოტინემ! მიაძახეს მესტვირეს.

— აბა, უპასუხე, თუ კაცი ხარ! — აქეზებდნენ მას.

— დიხაც ვუპასუხებ, ხოლო არ გამირისხდეთ კი.

— არა, მესტვირევ არ გაგირისხდებით, პირიქით დიდად გვესიამოვნება და თეთრი უზალთუნებით დაგასაჩუქრებთ, ეს ხომ უბრალო ხუმრობაა. ცოტას მაინც გავიცინებთ, აბა უთხარი რამე ჩვენს ფოტინეს! უთხარ, შე ონელო, ზელპირ-დაუბანელო! — აქეზებდნენ მესტვირეს.

— კარგი, ვეტყვი, ხოლო არ იწყინოთ კი.

მესტვირე მიუბრუნდა მოშაირე გოგოს:

— წითელ ღვინოს ლოყა გიგავს
ჭიქაშიდა მოელვარეს,
სასუფეველი რად უნდა
მაგ შენ მკლავზე მწოლიარეს.

ამ შაირმა მოწონება გამოიწვია გოგო-ბიჭებში.

— ახლა რძალ-დედამთილის შაირი გვითხარი, ჩემო თე-
ლორე, — შეეხვეწნენ მესტვირეს. მესტვირემ ჩაბერა გულას
და ააზუზუნა სტვირი, თანაც მიაყოლა მოხუცი დედაკაცის
ხმით: „პატარაა რძალო, პატარაა რძალო! ბაატონო! ბატო-
ნო! ქათმებს დაუძახე, ქათმებს დაუძახე. — ჯიო, ჯიო, ჯიო...
ერთი, ორი, სამი, ოთხი, ხუთი, ექვსი, შვიდი, რვა, ცხრა,
ათი... მეთერთმეტე დაკარგულა, აღარ არის ნაცარაო, დიდო
ღმერთო, ჩემს დედამთილს აუტეხე ცანცარაო, აღარ არის
მეთერთმეტე, წაუღია ძერასაო, ღმერთო, შენ გადამარჩინე
დედამთილის მზერასაო! აღარ არის მეთერთმეტე, მელას
მიყავს ტყეშიაო, შავო ძაღლო, შენ მიაკვდი ჩემს დედამთილს
ყელშიაო.

შაირის ყველა დაბოლოება იწვევდა სიხარულის ყიეინას
და დაუსრულებელ სიცილ-ხარხარს. სასახლის ყმებმა გაუფ-
სეს ვერცხლის უზალთუნებით სტვირის ფართო ტუჩი. აგ-
რეთვე გამოიტანეს ბლომად პურღვინო და ხორცეული.

ასეთმა სიუხვემ ფრიად გაახარა რაჭველი მესტვირე.
მან დაუკრა საცეკვაო, რითაც დიდად ასიამოვნა გოგო-
ბიჭები.

ამ დროს სასახლის ზედა სართულის აივანზე გამობრძან-
დნენ მეფე გიორგი, მისი მეუღლე მარიამ დედოფალი და
მათი საპატიო სტუმარი დიდი მოურავი, მათ გამოჰყვენენ
რამდენიმე კარისკაცი. ისინი მიიზიდა ეზოში ხმაურმა და
სტვირის ზუზუნმა.

მეფე-დედოფლის დანახვაზე მყის დაჩუმდნენ გოგო-ბი-
ჭები და შეეფარნენ წინგარდს. *შეწყვიტა დაკვრა მესტვი-
რემ და თავდახრით იღვა მეფე-დედოფლის წინაშე.

— რას გაჩუმდი, მესტვირევ, განაგრძე შენი მოსწრებუ-
ლი შაირები, — უბრძანა მეფემ გასამხნეველად და გადაუგ-
დო ოქროს ფული, რომელიც მარდად დაიჭირა რაჭველმა
სტვირის ტუჩით და თაყვანი სცა მაღლობის ნიშნად. მან
შთაბერა გულას და ააზუზუნა სტვირი.

— ნეტა ქება როგორ ითქმის ჩვენ დიდ მეფე
გეორგისა,
თათრის ხონთქარს ეურჩება, მტერსა ხოცავს,
მტერსა ჰგვისა,
ქრისტემ ხელი მოუმართოს, შეეწიოს მაღლი
ლეთისა,
წმინდა გეორგი წყალობდეს სამას სამოცდახუთისა...

პი... პი... პი, — დააზუზუნა სტვირი.

— ჰა, ყოჩაღ, თედორე! — მიაძახეს კარისკაცებმა, — ახლა ჩვენს დედოფალზე სთქვი რამე.

მესტირემ შთაბერა თავის გუდას, შეხედა დედოფალს და დაიწყო:

„მაგის მნახველს, თუგინდ წამით, რაღად უნდა
მეტი ლხენა!
თვალეებმა და წამწამებმა ბროლის სახე დაუმშვენა.
ცას გაეხედე მოწიწებით. ზევით მზეა მანდაც
მზეა...
რაღა ვკადრო ამის მეტი დედოფალი პირიმზეა“...

პი... პი... პი, — დააპიპინა სტვირი.

— ჰა, ყოჩაღ, მესტირე! ჰა, ყოჩაღ, თედორე! — მიაძახეს კიდევ კარისკაცებმა. მეფემ გახსნა ქისა და სათითაოდ გადუგდო ხუთი ოქრო. მესტირემ ხუთივე დაიჭირა თავისი სტვირით.

თაყვანი სცა მეფეს ასეთი უხვი წყალობისათვის.

— თედორე, ახლა ამ ჩვენს ძვირფას სტუმარს, ქართლიდან მობრძანებულს დიდ მოურავს, შეასხი ქება, — უთხრა მეფემ მესტირეს და მიუთითა დიდ მოურავზე, რომელიც ბუმბერაზივით იდგა მეფე გეორგის გვერდით.

— ხომ გსმენია ამის გმირობანი!

— კი, დიდო მეფევ, ვის არ სმენია მაგისი საზღაპრო ამბები! — უბასუხა თედორემ.

მესტვირემ მცირე ხანს უცქირა გაოცებით გიორგი სააკაძეს, შთაბერა სული გუდას და დაიწყო:

„ახლა ქება როგორ ვკადრო ჩვენს დიდ სტუმარს
მოურავსა!
გაქირებულ ხალხსა შველის, არ შეარჩენს არვის
ავსა.

სულთანს ჯარი გაუწყვიტა ტაშისკარში
ჩამწყვდევეთა,
სათარხანმა ძლივს მოასწრო გადარჩენა გაქცევეთა.
იქ ყეინის რისხვისაგან სამჯერ იხსნა ქართლ-
კახეთი,

უამრავი მტერი ელიტა, აღენია სიმწრის ზეთი.
აქ მიუხტა ქველ წერეთელს, ქართლიდანა
გადმოსული,
გადმოაგდო ციხიდანა, ძირს არ დაჰყვა თურმე
სული,

ასახელა საქართველო, ასახელა იმერეთი...
ეგეთ დიდ გმირს, ერის შემწეს, შეეწიოს მამა
ღმერთი...

პიი... პიი... პიი, — ააპიპინა სტვირი.

— ყოჩაღ, თედორე! ყოჩაღ შენა! — მიაძახეს მეფემ და
ქარისკაცებმა. დიდ შოურავმა კი კმაყოფილების ნიშნად
გაღუგდო მესტვირეს სამი ოქრო. მესტვირემ მღაბლად თაყ-
ვანი სცა მას. მეფის ბრძანებით მესტვირეს იქვე ეზოში ჰან-
დრის ქვეშ მიართვეს საუკეთესო ღვინო და ნაირ-ნაირი
საქმელები.

მოურავი ფრიად გააოცა მესტვირის შაირებმა და შეეკით-
ხა გიორგის:

— ბატონო მეფევ, ამ მესტვირეს წინასწარ ჰქონდა ეს
შაირები გაზეპირებული, თუ ახლა ჩვენს წინაშე იგონებდა?

— არა, დიდო მოურავო, წინასწარ კი არა, ახლა იგონებდა ჩვენს წინაშე და ამბობდა კაფიად. ეგ ერთგვარი აღ-
მაფრენაა, პიიტკოსის მსგავსად — უპასუხა მეფემ. — ეს მეს-

ტვირეები განსაკუთრებით რაჰველებია, სოფელ ფარეხეთიდან. ყველანი კარგად გაწაფული არიან შაირებში. ხოლო მათ შორის არის რამდენიმე, რომელნიც ფრიალ მოსწრებულად და ტკბილსამენად თხზავენ კაფიად შაირებს, მათ შორის ერთი მოხუცი გოგიაა, სწორედ რომ გაგაოცებს, ისე ჟეცებ და მახვილად ამბობს, როგორც ხობას, ისე საოხუნჯო შაირებს. ხელად გალექსავს ვისზედაც მიუთითებ. მერე ისე ოსტატურად, რომ... არა, უსათუოდ დავიბარებ იმ გოგიას და გაჩვენებ, — ამ სიტყვებით მეფემ გადასძახა მესტვირეს:

— თედორე, სად არის გოგია მესტვირე? კარგახანია არ მინახავს.

— შინ გახლავს, დიღო მეფევ! უპასუხა მესტვირემ ფეხზე ადგომით. მოხუცდა, თანაც საკმაოდ გამდიდრდა თქვენი უხვი წყალობით; აღარ იწუხებს თავს. თავის ბატონ ხოსია წულუკიძისაგან თავი დაიხსნა, ხოდაბუნები შეიძინა, ვენახი გაიშენა ხვანჭკარაში და ცხოვრობს მეფურად. ვაჟებიც მოესწრო, ლომივით ბიჭები.

— რაჰაში რომ დაბრუნდე, ხმა მიაწვდინე, მეფეს სწადია შენი ნახვათქო, მალიად მნახოს, ხომ გესმის!

— კი, დიღო მეფევ, ხვალვე გეახლებით და ვნახავ უსაცოლოდ. მაინც გზად ზედ მის კარზე უნდა გავიარო, — უპასუხა მესტვირემ და შემდეგ მორიდებით მიუჯდა თავის საუზმეს.

— ეს რაჰველი მესტვირენი, — განაგრძო მეფემ, ფეხით დადიან იმერეთსა და გურია-სამეგრელოში, მეტადრე ქორწილ-ნადიმებზე და საეკლესიო დღეობებზე, ართობენ ხალხს თავისი შაირებით. აკინებენ და ბლომა ფულოს შოულობენ. ვგონებ, ხანდახან თქვენკენაც გადმოდნან ქართლსა და კახეთში საწერეთლოს მოკლე გზით. სწორედ ამ დროს გამოვიდა აივანზე სახლთუხუცესი და მოახსენა მეფეს:

— მეფევ, სად ინებებთ საუზმეს: აქა, თუ პურის საჭმელ დარბაზში?

მე მგონია, აქ აჯობებს, თქვენ რას იტყვით, ჩვენო ძვირფასო სტუმარო?

— საესებით გეთანხმებით, დიღო მეფევ. აქ ყოფნას აბა რა სჯობია ამ ფართოდ გაშლილი დიდებული სურათის მზე-

რით ვერ ძლება თვალი! — მოახსენა დიდმოურავმა და განაგრძო: — სწორედ რომ მშვენიერია თქვენი კოლხეთი, მრავალსახოვან ხალივით აფერადებული. ლამაზია ივერია, ტურფაა ქართლი და კახეთი, ხოლო უფრო ერთფეროვანია. კათებს როდი აქვს ასეთი გაშლილი არე. მასთან აქაური ჰავა ბევრად უფრო ნაზია, თბილი, მსუბუქი. ტყვილა კი არ უყვარდათ ეს მშვენიერი მხარე ძველად ჩვენს დიდ მეფეებს: ბაგრატ მესამეს, დავით აღმაშენებელს, გიორგი მესამეს და პირიმზე თამარს, აქეთ ცხოვრობდნენ მეტ წილად. მაგალითად, დიდი დავით წელიწადში სამი-ოთხი თვე თუ ცხოვრობდა ივერიაში, დანარჩენ დროს თურმე სულ აქ და აფხაზეთში ატარებდა.

სუფრა უკვე გაეშალათ აივანზე, დასხდნენ კიდეც. სწორედ ამ დროს ქვემოთ გამოჩნდა ასამდე ცხენოსანი. ესენი მოდიოდნენ მწყობრი სიმღერით და მოაჯირითებდნენ ცხენებს. მხედართ წინ უძღოდა ამაყად და წელგამართულად თეთრწვერა ქარმაგი მოხუცი შავ ჩოხა-ახალუხში და დარაიის ჩაბალახ წაკრული. სასახლიდან მაშინვე იცუნეს იგი. ეს იყო ოდიშის მთავარი კაცია დადიანი, თავისი ვაჟით და რჩეული ვაჟკაცებით. იმათ მალე ამოვლეს აღმართი და მიადგნენ სასახლეს, ჩამოხტნენ ცხენებიდან და ქვეითად შევიდნენ ეზოში. მათ დანახვაზე ყველანი წამოიშალნენ სუფრიდან. კაცია დადიანი თავისი ვაჟით და რამდენიმე რჩეული თავადით გაჩნდა აივანზე, გადიკვანტილა ფეხები და დახარა თავი მეფე-დედოფლის წინაშე.

— ჩვენს ძვირფას მოყვარეს, ოდიშის ქებულ მთავარს, კაცია დადიანს გაუმარჯოს! — წამოიძახა მეფე გიორგიმ მხიარულად.

— ღმერთმა გამარჯვება ნუ მოაკლოს იმერეთის დიდ მეფეს გიორგის! — იყო კაციას პასუხი.

მეფემ გადადგა წინ რამდენიმე ნაბიჯი, სუფრაზე მიიწვია ახლადმოსული სტუმარი და მოისვა მარცხნით, მარჯვნით კი უჯდა დიდი მოურავი. კაციას ვაჟი ლევანი და თავადნი დედოფლის ახლოს დასხდნენ.

შეიქნა სუფრაზე შეპატივება. წამოდგა სუფრიდან ოდი-

შის მთავარი და მოახსენა: „გენუკის თქვენი მოყვარე და სტუმარი კაცია დადიანი, დიღო მეფეო, რათა დამდოთ პატივი და მეწვიოთ ზუგდიდს თქვენი დიდებული სტუმრით, მწადს გაბედნიერდეს ჩემი პაწია ოდიშიც უდიდესი გმირის დიდი მოურავის წვევით!“

მეფემ და სააკაძემ მადლობა გადაუხადეს დადიანს და სიამოვნებით მიიღეს მისი მიწვევა. ამასობაში ათი ჯორის საპალნით მოართვეს მეფესა და დიდმოურავს დადიანის ძღვენი. ეს იყო შალის საჩოხეები, აბრეშუმის დარაიები, თეთრი შალისა და დარაიის ჩაბალახები, მეშისა და სამოგვის წულამესტები, აგრეთვე, ქორფა სულგუნები და მსუქანი ყვერულები, ნანადირევი ხობები და ოჯალეშის განთქმული ძველი ღვინო, სალხინოს დობილოებში დაწურული. ორთავემ დიდი მადლობა გადაუხადეს დადიანს ძღვენისათვის. სამაგიეროდ ამათაც მიართვეს ოდიშის მთავარს — მეფემ ხუთი დარახტული ბედაური, ხოლო მოურავმა შაჰაბაზის ნაჩუქარი ოქროს ხმალი.

დაასკვნეს მეორე დილით წასვლა. იმ საღამოს-კი რიონის პირას გეგუთის მხრივ გაშლილ მინდორზე გაიმართა ჯირითსა და მარულაში დიდი შეჯიბრება იმერთა და ოდიშელთ შორის. ჯირითში სჯობნიდნენ იმერნი, ხოლო მარულაში ოდიშელნი. ამათმა სისწრაფე-სიჩაუქემ და საოცარმა მოქნილობამ განცვიფრებაში მოიყვანა ივერიის გმირი. მართლაც საარაკო იყო და საამო სამზერი გაქენებულ ცხენებზე კოლხელთა ფეხით შედგომა, ნიშანში სროლა, გვერდზე გადაწოლა, ცხენის მუცელქვეშ მოქცევა, დახრა და ვერცხლის ან ოქროს ფულის მიწიდან ხელით აღება, ცხენიდან უცებ გადმოხტომა, დაწევა და გავაზე ხელის დაკვრით ზურგზე მოქცევა, ჯირითის აცილება და სხვა მრავალი ფანდი.

იშვიათი აღტაცებითა და სიუხვით დახვდა დიდებულ სტუმრებს ზუგდიდის სასახლეში დადიანის ოჯახი. დიკლა ათი დეკეული, მრავალი გოჭი, ცხვარი და ყვერულები, გამოცხვა ქვის დიდრონ კეცებზე ქადის-ქადი, ღვეძილები და ხაჭაპურები, გაკეთდა ღომი უზარმაზარ-საარაყე ქვაბებში. ასხის მთის მეჯოგეებმა მოართვეს დადიანს უგემრიე-

ლესი ქორფა, რძიანი სულგუნები, მოიხადა ძველი ოჯალე-
შით სავსე სამასჩაფიანი ქვევრები. უაიშალა გრძელი სეფა
ქანდრებსა და კაკლებქვეშ სასახლის ვრცელ ეზოში. დაიწ-
ყო გაბმული ლხინი, ცეკვა-სიმღერა ზმებითა და კაფია-
შაირებით. ჯირითი, ყაბახი და მარულა ხომ ყოველდღე
იყო, რასაც ხელს უწყობდა საუცხოო ამინდი. აქ დადიანს
ეწვივნენ მისი მოყვრები — გურიის მთავარი მამია გურიე-
ლი და აფხაზეთის მთავარი ტატაშ შარვაშიძე, რჩეული
ვაჟკაცებით, რითაც კიდევ უფრო გაცხოველდა შეჯიბრება
ჯირითსა და მარულაში. აქვე ეახლა იმერთა მეფეს უმშვე-
ნიერესი ვაჟკაცი და იშვიათი ტანადი თენგიზ დადემშეკლია-
ნი საუკეთესო მსროლელი სვანებით. ამათ მოართვეს მეფე-
სა და დადიანს ოცამდე ნანადირევი ჯიხვი და არჩვი, აგრეთ-
ვე დათვისა და მელის ტყავები. აქვე უნდა ითქვას, რომ
იმერლებს ეცვათ დარაიის წითელ ახალუხზე მუქი ლურჯი
მაუდის მოსირმული გრძელი ჩოხები და მაღალყელიანი წა-
ღები, თავზე კი მოსირმული ფაფანაკები, რაც ფრიად უხდე-
ბოდან გაჩეჩილ თმაზე. გურულები იყვნენ გამოწყობილ-
ნი სხვადასხვა ფერის ჩაქურებში, აფხაზები-კი, როგორც
ოდიშელნი, შავ ჩოხასა და დარაიის ახალუხში. თავი წაკ-
რული ჰქონდათ დარაიისავე ჩაბალახით, ფეხზე ეცვათ საც-
ვეთები და წულა-მესტები, ცხენებზე კი უნაგირთან მიკრუ-
ლი ჰქონდათ აბგები და დაკეცილი ნაბდები, ხოლო სვანებს
ეცვათ შალის ყლალი მოკლე ჩოხები და შავი ნაბდები. თავ-
ზე ეხურათ მეტ წილად თეთრი შალის ფართო ქუდები.
ყველანი შეიარაღებულნი იყვნენ ხმალხანჯლითა და ყირი-
მის კაჟიანი თოფებითა და დამბაჩებით.

თუ ოდიშელნი, აფხაზნი და იმერ-გურულები ირჩეოდნენ
ჯირითსა და მარულაში თავიანთი საარაკო სიმარდე-სიჩაუ-
ქით, სამაგიეროდ სვანებს ვერვინ სჯობნიდა თოფ-დამბაჩის
ნიშან-სროლაში. ისინი იყვნენ უპირველესი ჩუბინნი და მო-
ნადირენი თითქმის მთელ საქართველოში.

ათი დღე დარჩა ოდიშში კაცია დადიანის სტუმრად დიდი
მოურავი და ყოველდღამე უგებდა ფარჩის ფრიად სუფთა
ლოგინს თვით დადიანის ასული, მშვენიერი ცარა, ხდიდა

წაღებს და ჰბანდა ფეხებს, აგრეთვე დაწოლის შემდეგ შემოდირდა მასთან მარტოდ იგივე ასული ჩანგურით ხელში, მასზე დაკერით და საამო ღიღინით აძინებდა მას.

ეს იყო მასპინძლის მხრივ უდიდესი პატივისცემა, რაც ფრიალ აოცებდა დიდ მოურავს. ამგვარადვე აოცებდა მას გაზრდილთა ძიძა-მორღუების და ძიძიშვილთა ერთმანეთისათვის თავგანწირვა. ეს წესი არსებობდა მთელ კოლხეთში. მეფე-მთავრები აძლევდნენ თავიანთ ვაჟებს საძიძაო-აღსაზრდელად თავადთა ოჯახებს, თავადნი თავის მხრივ აძლევდნენ იმავე მიზნით თავიანთ შვილებს აზნაურთა ოჯახებს, ხოლო აზნაურნი კი გლეხებს. ამ სახით ინასკვებოდა მათ შორის ნათესაური კავშირი და ფრიალი დაახლოვება მათ ოჯახებს შორის. გაზრდილი საკუთარ შვილზე უძვირფასესი იყო ძიძა-მორღუსთვის, ხოლო ძიძა-მორღუ უყვარდათ გაზრდილებს როგორც საკუთარი მშობელი, ძიძიშვილები კი როგორც საკუთარი ძმები და დები. ასეთი ზნეჩვეულება, უძველესი დროიდან დამყარებული, ქმნიდა სხვადასხვა წოდებას შორის წმინდა ნათესაურ ურთიერთობას და აკავშირებდა მათ ძმობა-სიყვარულით, რასაც ფრიალი მნიშვნელობა ჰქონდა წოდებათა უთანასწორობის სიმწვავის შენელებაში.

ამავე დროს სააკაძემ შეამჩნია, როგორც იმერეთში, ისე ოდიშ-აფხაზეთსა და გურიაში, იშვიათი სტუმარმოყვარეობა, უხვი მასპინძლობა და უხვად გაჩუქება. საკმაო იყო მოგწონებოდა რაიმე ძვირფასი ნივთი, ცხენი და იარაღი, რომ მაშინვე ეჩუქებინათ თქვენთვის. ამ მხრივ ყველას აჭარბებდნენ აფხაზნი. შარვაშიძესთან სტუმრად ყოფნის დროს დიდმოურავმა სიამოვნებით შეავლო თვალი სულთანის მიერ ნაჩუქარ მდიდრულად მოჭედილ და საუკეთესო ხელოვნების ოქროს თოფსა და დამბაჩას. იმავე საღამოს ორივე ნივთი იყო ამ იშვიათი სტუმრის ოთახში, ეწყო მაგიდაზე მცირე ბარათით: „დიდო გმირო, შეგატყვეთ, მოგეწონათ ეს თოფი და დამბაჩა, ამიტომ გთხოვთ ინებოთ მცირე საჩუქრად“.

სხვა მრავალთა შორის კიდევ ერთი ზნეჩვეულება შენიშნა სააკაძემ კოლხეთში ყოფნის დროს. ეს იყო გასათხოვა-

რი ქალის გატაცება მშობლების ოჯახიდან სასიძოს მიერ, სიყვარულის ნიადაგზე, რაც არაიშვიათად თავდებოდა სისხლის ღვრით. ეს წესი იყო დაცული უმთავრესად თავადაზნაურთა შორის და მეტადრე აფხაზეთში. სწორედ დიდმოღრავის ყოფნის დროს სოხუმში სტუმრად ტატამ შარვაშიძესთან თავადმა ინალიპამ მოსტაცა ქალი თავად ემუხვარს. დილის რიჟრაჟზე შეიქნა ემუხვარის ოჯახში საშინელი კივილი: „ავვაიი, ქალი მოგვტაცეს!“ მაშინვე წამოცვივდნენ მოკეთენი, დაადევნეს მღევარი ქალის გამტაცებელს. შავრამ უნაყოფოდ: ინალიპამ გაასწრო სამშვიდობოს.

ასეთ რამეებთან ერთად დიდ მოურავმა შენიშნა კოლხეთში, მეტადრე გურია-სამეგრელოში, ერთი ფრიად საგმობი საქციელი: ლამაზ ქალ-ვაჟის მოტაცება ოსმალეთში გაყიდვის მიზნით. ამ სამარც ზინო ხელობას არ თაკილობდნენ მთავრებიც-ჟი. ეს ზნე-ჩვეულება შთანერგეს დასავლეთ საქართველოში თურქებმა.

XXXIII. დიდი მოურავის გეგმები

მეფის სასახლე. სამხრობის ეამია, სასახლის ფართო და გრძელი აიენიდან წარმტაცად იშლება ქვემო-იმერეთის განიერი ვაკე-დაბლობი, მას კი სამხრეთით ზღუდედ ავლია სურამ-აჭარის მაღალი მთები. წვერვალეებზე აქა-იქ მოჩანს თეთრად მბზინავი თოვლი.

მზე საკმაოდ გადახრილა დასავლეთით, ალაპლაპებს რიონის ფართოდ გაშლილ გულმკერდს და აფერადებს კოლხეთის-ტურფა ბუნებას, ხოლო აივანზე არ ჩანს არავინ, რომ დატკბეს ამ ფეერიული სანახაობით.

მხნე და გამბედავი მეფე გიორგი თავის მემკვიდრე ალექსანდრეთი და საიმედო დიდებულებით ჩაქეტილა თავის მდიდრულად მორთულ მცირე დარბაზში და რალაც მძიმე, ფრიად საიდუმლო თათბირი აქვს. აქ არიან სრულიად კოლხეთის კათალიკოსი, დიდი რიტორი და მწიგნობარი ზაქარია ქვარიანი, ფრიად განათლებული მიტროპოლიტი ანტონ ქუთათელი, მთავარ სარდალი პაატა წულუკიძე, სახლთუხუცესი პაპუნა წერეთელი, მეჭურჭლეთუხუცესი ბეჟან აგიაშვილი, მსახურთუხუცესი როსტომ ნიჟარაძე, მოლარეთუხუცესი დავით მიქელაძე, მეფის მდივანი მამუკა კვინიხიძე. აქვეა მეფის საპატიო სტუმარი დიდი მოურავი.

ყველანი ხარისხის მიხედვით სხედან ტახტებზე, მათ წინ დგას დაბალი მაგიდა, მას უზის მეფის მდივანი; მის წინ დევს თეთრი ეტრატი და საწერ-კალამი.

— სრულიად კოლხეთის სულიერო მეუფენო და იმერთა დიდებულნო! — დაიწყო მეფემ. — მოგიწვიეთ რა თქვენ ამ საიდუმლო თათბირზე, ვიმედობ, რომ ყოველივე აქ ნათქვამი იქნება კარგად განხილული და შეფასებული, თანაც ფრიად საიდუმლოდ დაცული, რათა არ გახმაურდეს და მით არ მოგვეცეს რაიმე ზიანი ჩვენა და ჩვენს სამეფოს.

მეფე გიორგის ასეთმა შესავალმა სიტყვამ დიდი გავლენა იქონია დამსწრე დიდებულებზე და გაამახვილა მათი გულისყური.

— იმას, რაც უნდა გითხრათ, ჩემზე უკეთ გაუწყებთ თვით ამ ფრიად საგულისხმო აზრის აექსონი, ჩვენი ძვირფასი სტუმარი, ივერიის დიდებული გმირი დიდი მოურავი, რომლის სახელი და ქება-დიდება გრგვინავს მთელს აზიასა და კავკასიაში.

მძიმედ წამოდგა დიადი სახისა და გოლიათი ტანის დიდი მოურავი. მან დინჯად გადაავლო კრებას არწივის თვალნი და დაიწყო მდაბალი, გუგუნა ხმით.

— იმერეთის დიდ მეფეს, სულიერ მეუფეებსა და დიდებულთ კარგად მოეხსენებათ, რომ დღეს სამ სამეფოდ და ხუთ სამთავროდ, ანუ რვა ნაწილად დაფლეთილი პატარა საქართველო ერთ დროს იყო ფრიად ძლიერი, დოვლათიანი მდიდარი და სულიერად განათლებული. ეს ბედნიერი ხანა არსებობდა ხუთას-ექვსასი წლის წინათ, ანუ, უკეთ, მეთერთმეტე-მეთორმეტე საუკუნეში, დიდი ბაგრატით დაწყებული და დიდი თამარით დამთავრებული. სწორედ იმ დროს მოხდა ძველი დროიდან დაფლეთილი საქართველოს გაერთიანება, კოლხეთ-მესხეთ-ივერიის შეერთება, ქართველ ტომთა და სამეფო-სამთავროთა გაერთიანებამ წარმოშვა ერის სულიერი სიმტკიცე, სახელმწიფოებრივი გამძლავრება, არაბთა ხანგრძლივ მონობის უღლიდან თავის გამოხსნა, თურქთა თარეშის აღკვეთა, კავკასიონის ქედის მტაცებელ ხალხთა დაპყრობა, სასოფლო მეურნეობისა და ვაჭრობა-ხელოსნობის განვითარება, შინა ცხოვრების სიმშვიდე, ხალხის ნივთიერი დოვლათი, სწავლა-განათლებლისადმი მისწრაფება, ძალადი მწიგნობრობით გონებრივ-ზნეობრივი განვი-

თარება, მხატვრობა-პოეზიის, ზუროთძოდღერებისა და საერთოდ ხელოვნების აყვავება და სხვა. ერთ მოზრდილ სამეფოდ ქცეულ საქართველოს დიდი კრძალვა და შიში მიეცა ჩვენს მეზობელ მტრებს, მოთარეშეთ და დამპყრობელთ — მრავალრიცხოვან თურქებს, სპარსებს და სხვა. ამ სახით შეიქმნა ქართველი ერისთვის ძლევა მოსილობისა და სულიერი აღმაფრენის დიდი ხანა, ოქროს საუკუნედ წოდებული.

დიდი მოურავი შეჩერდა მცირედ, მოითქვა სული და გადახდა კრებას. იქ დამსწრენი სმენად ქცეულნი აღტაცებით შესცქეროდნენ მას. დარბაზში საოცარი დუმილი სუფევდა. კვლავ გაისმა სააკაძის ნელი, მაგრამ მგრავინავი ხმა.

— ბატონებო, როგორც მოგეხსენებათ, ქართველი ერის დიდება და ძლევა მოსილება დასცეს, მისი მთლიანობა გაზარეს, დიდი თამარის შემდეგ ტახტზე ასულმა მეფეებმა, გიორგი-ლაშამ და რუსუდანმა. მათ მიერ უღირს ადამიანთა სამეფოს სათავეში მოქცევამ, ღირსეულთა-კი განდევნამ, აგრეთვე ქვეყნის ორგული დიდი თავადების აღვირახსნილმა თარეშმა და ურთიერთ შორის კინკლაობამ, მეტადრე-კი მონღოლთა ურდოების მრავალჯერ შემოსევა-თარეშმა და მათ მიერ კისრად დადგმული მონობის უღელმა მთელი საუკუნის მანძილზე. ამას დაერთო მეხუთმეტე საუკუნეში ბიზანტიის იმპერიის დამხობა ოსმალთა მიერ, რის გამო ჩვენს დასავლეთით და სამხრეთით, განათლების კერა შეიცვალა თურქების მეზობლობით, რომელთაც უკვე ჩაიგდეს ხელში და ისლამის სჯული მიაღებინეს საქართველოს ერთ საუკეთესო ნაწილს-მესხეთს, კოლხეთზე კი მოაქვს მეღვარი იერიშები და უკვე ორასი წელია სტანჯავენ, ეძალევიან, ხოლო აქამდე ვერაფერს გახდნენ საბედნიეროდ, კოლხეთის მეფე-მთავრების და თვით ერის სიმამაცე — გონიერობის მეოხებით. ეს არის, რომ ფრიად დასცეს გურია-სამეგრელოს მკვიდრთა მაღალი ზნეობა და ფულის დახარბებით შეაჩვიეს თავის მოძმეთა და ახლო ნათესავებისაც კი ძალმორეობით მონებად გაყიდვას, რითაც უსაზღვრო ზიანი ეძლევა უმწეო ხალხსა და თვით სახელმწიფოს...

— სრული ქეშმარიტებაა, გმირო ივერიისავ! წყეული იყვენ ერისა მტერნი და მოლაღატენი უკუნითი უკუნისამდე ამინი — წამოიძახა კათალიკოსმა. იკურთხოს, ერის ნუგეშო, ეგ შენი თაფლივით ტკბილი ენა და მაღალი გონება!

ამ სიტყვების შემდეგ ჩამოვარდა მცირე ღუმილი. მოურაგმა მოსვა წყალი და განაგრძო:

— ხოლო რაც შეეხება აღმოსავლეთ საქართველოს, ანუ ივერიას, იგი კიდევ უარეს ყოფაში ჩავარდა აღმოსავლეთით განახლებულ სპარსეთისა და ჩრდილოეთით მეზობლად მყოფ კავკასიონის ქედის ისლამის სჯულმძღვანელ ბაღბათა ძალმომრეობის გამო, აგრეთვე ოსმალთა თარეშით ყარსიდან და ახალციხიდან. ყველამ უწყით, ბატონებო, რაც ჩაიღინა კახეთში ერანის ყეინმა შაჰაბაზმა რარიგად მოსრა ეს მდიდარი, მშვენიერი და აყვავებული კუთხე ივერიისა ყველამ უწყით აგრეთვე, რომ კიდევ უარეს რისხვას უქადოდა ის მტარვალის ქართლის სამეფოს და რარიგ გადარჩა იგი ორჯერ... დიახ, გადარჩა ორჯერ, ხოლო გადარჩება კი მესამეჯერ?!

— ვინც ორჯერ გადაარჩინა, იგი იხსნის მესამეჯერაც! მაშ გაუმარჯოს ივერიის, არა, სრულიად საქართველოს ზღაპრულ გმირს, თანამედროვე მძლავრს ამირანს, დიდსა მოურაგს! — წამოიძახა ალტაცებით მეფემ და წამოდგა ზეზე.

— გაუმარჯოს! გაუმარჯოს დიდებულ გმირს! გაუმარჯოს ქვეყნის სამჯერ გადამრჩენს! გაუმარჯოს ქართველი ერის მოთავეს, გაუმარჯოს! — ბანი მისცა ერთხმად მთელმა კრებამ, თანაც წამოდგნენ ფეხზე და თაყვანი სცეს გიორგის.

მოურაგს მეტის სიამოვნებით სახე გაუბრწყინდა. სიხარულის ცრემლებმა შეუნამა ცეცხლის მფრქვევი დიდრონი თვალები. მას უნებლიედ გაახსენდა ის საშინელი უმადურება და დაუმსახურებელი შურისძიება, რაც განიცადა.

მას, ქვეყნისათვის თავდადებულ ადამიანს, აფასებენ და აღიღებენ ამ, შორეულ კოლხეთში, შუაგულ იმერეთში, რომლის ფხიზელი მეფე და შეგნებული დიდებულნი ზეიმით

ეგებებიან მას, თაყვანს სცემენ, ესალმებიან და იღებენ მეფურ დიდებით... აი, სად აფასებენ მას! აი, რას ნიშნავს სულიერი განათლება და გონიერება!

ასეთმა ფიქრებმა უნებლიედ, გაიტაცა ხალხის მოთავე. იგი ღუმდა ერთხანს ტახტზე მჯდომარე, ღონივრად ძკერდა მისი მღელვარე გული. მოსეა კიდევ ცივი წყალი და დამშვიდდა. მცირე ხნის შემდეგ წამოდგა და მიმართა კრებას ოღნავ მღელვარე ხმით.

— კოლხეთის დიდო მეფევ, სულიერო მეუფენო და ზრდილობა-ვაჟკაცობით ქებულნო დიდებულნო! თავბრუ დამასხა და ფრიად ამაღელვა თქვენმა ასეთმა ქება-დიდებაჲ! არა ვარ ღირსი ესოდენ ქებისა ერთი ეული და სამშობლო ქვეყნიდან ღვენილი ადამიანი. მთელი ჩემი უბედურება იქიდან გამომდინარეობს, რომ მდაბიო წრიდან გამოველ და დაეწინაურდი ჩემივე შრომითა და უნარით, ამავე დროს უზომოდ მიყვარს მთელი ივერი, მთელი საქართველო, მიყვარს მდაბიო ხალხი, გლეხოზა, ვეურჩები ამა ქვეყნის ძლიერთა პირადულ ზრახვებსა და ზვიადობას, მათ მიერ ერისა და ქვეყნის ღალატს, ამიტომაც ვძულვარ მათ საშინლად და აგულიანებენ ივერიის მეფეებს ჩემს წინააღმდეგ. სამჯერ გადავურჩი მათ მიერ დაგებულ ხაფანგს და ღალატით მოკვლას, მაგრამ აბა რა საჭიროა თქვენი შეწუხება ჩემი პირადი ამბებით! აქ სულ სხვა მიზნით ვართ შეკრებილნი. მხოლოდ დავამთავრებ დიდი რუსთველის უკვდავი სიტყვებით:

„სხვადასხვა ქირი ჩემზედა არ ახალია, ძველია,
კარგი რამ მქირდეს — გიკვირდეს, ავი რა
საკვირველია“...

ასეთია, ბატონებო, ჩემი შავი ბედი და ასე ჩაველ საფლავსა შინა... პირადად თქვენ, დიდო მეფევ და დიდებულნო, ფრიად გმადლობთ ჩემდამი ასეთი თანაგრძნობისათვის და ჩემი ასეთი დაფასებისათვის... ახალა-კი ნება მიბოძეთ განვაგრძო ჩემი სიტყვა, რომელიც, ცოტა არ იყოს, შორი-

დან დავიწყე და გრძელი გამოდის, ვშიშობ, არ დაგლალათ ზედმეტად.

— ბრძანეთი ჩვენ სმენად ვართ ქცეულნი! — მიაძახეს მეფემ და დიდებულებმა.

— დიახ, უნდა მოგახსენოთ, რომ ოსმალთ-სპარსთაგან შევიწროებული ივერიის მეფენი კარგახანია ეძებენ ღონიერ მოკავშირეს, ძლიერ მფარველს, იმათ ადრევე მიმართეს რომის პაპასა და საფრანგეთს, ხოლო ვერაფერს გახდნენ. იქიდან გამოგზავნეს მხოლოდ კათოლიკე ბერები. რომელნიც თქვენთვის ვილოცებთო — დაგვპირდნენ. ჩვენ-კი სულ სხვა დახმარება გვეჭირვებოდა. ჩივისსა და ევროპას შორის გარდუვალ ზღუდედ ჩამდგარა ველური ოსმალეთი, რომლის წყენას ფრიალ ერიდებიან დასავლეთის სახელმწიფონი. ვილა დაგვრჩენია? მუსულმანობა მედგრად მოგეაწვა სამი მხრივ სპარსეთ-თურქეთის სახით, მათ უკვე დალეწეს და შთანთქმეს მცირე აზიაში ორი ქრისტიანი სამეფო: ანტიოქია და სომხეთი, შემუსრეს დიდი თამარის მიერ დაარსებული ტრაპიზონის იმპერია შავი ზღვის პირას. დაამსხვრიეს დიდი ბიზანტია, — ეს რომ-ელინთა განათლების და ქრისტეს საწმუნოების დიადი კერა და მნათობი აზია-ევროპის შორის... ვილა დარჩათ?! დავრჩით კავკასიაში ჩვენ, ქართველი ტომნი, რვა პატარა სამეფო-სამთავროდ დაგლეჯილნი და ურთიერთ-შორის მტრულად განწყობილნი. ექვი არაა, აქამდე ადვილად ჩაგვთქავდნენ ეს ვეშაპნი, ხოლო თუ ეს ვერ შესძლეს დღემდე, ამის მთავარი მიზეზებია: პირველი — ჩვენი ქვეყნის მთა-გორიანი ადგილმდებარეობა, მეორე — ქართველი ერის ჭირსა შინა სიმტკიცე და ზღაპრული სიმამაცე, ხოლო მესამე ის, რომ ეს ვეშაპები ერთმანეთს ეჭიშპებიან ამ გემრიელი ლუკმის მთლიანად ჩასანთქავად.

მართალია, იმათ უკვე გაგლიჯეს შუაზე ჩვენი ქვეყანა, აღმოსავლეთს, ანუ ივერიას, ეპატრონება სპარსეთი, ხოლო დასავლეთ ნაწილზე, ანუ მშვენიერ კოლხეთზე, ხელს იშვერს ოსმალეთი, რომელმაც უკვე ჩაბღუჯა ჩვენი სამხრეთი

ნაწილი — მესხეთი. ამათი დავა-ქიშობით ჩვენ შეგვეძლო მშვენივრად გვესარგებლა, რითაც ადრევე სარგებლობდნენ ჩვენს სამეფო-სამთავროთა მესვეურნი და ახლაც კი ვსარგებლობთ რამოდენიმედ, მაგრამ დავიღალეთ! დავიქანცეთ! ამდენმა უწყვეტმა ომმა და სისხლის ღვრამ დაგვწრიტა ძთლიანად, ფრიად შეგვამცირა რიცხვით, მეტად დაგვცანითიერად და გონებრივად, დაგვაუძღურა, გაგვალატაკა სულიან-ხორციანად... ჩვენ ფრიად ჩამოვრჩით განათლებულ ევროპას. დიახ, ჩამორჩა მას ის დიდად ნიჭიერი ქართველი ერი, რომელიც ოქროს საუკუნეში გაუთანატოლდა მთელს ევროპას და მთელს მსოფლიოში ყველაზე უფრო განათლებულ სახელმწიფოს—ბიზანტიას, ხოლო ზოგ რამეში გადაეჭარბეთ კიდევ... ადვილი წარმოსადგენია, რა ვიქნებოდით დღეს, რომ ხელშემწყობ პირობებში გვეცხოვრა. არ მოვქცეოდით შუაში ისტორიულ გრიგალს და არ დაგვტეხოდა თავზე ზეცის რისხვა — საუკუნეთა სრბოლაში ჯერ ველურ მონღოლთა და შემდეგ ნახევრადველურ თურქ-ქერანთა უამრავი შემოსევა-თარეში! ამ საშინელებას დაერთო ამ ბოლო საუკუნეში ორი დიდი უბედურება: პირველი — გამუსულმანებული კავკასიონის მთის ხალხების ივერიაზე ხშირი თავდასხმანი, დარბევანი, მეორე კი — დენთის მოგონებასთან დაკავშირებით თოფ-ზარბაზნების შემოღება ბრძოლის საქმეებში... თოფი შორიდან ჰკლავს უპირველეს სარდალსა და ვაჟაკს, ზარბაზანი შორიდან ანადგურებს მხედრობას, საფრებსა და ციხე-კოშკებს... რაღა ვაჟაკობა გაგივა იქ, სადაც ზღაპრულმა სიმაძაქემ ადგილი დაუთმო ცეცხლის იარაღებს! აი, რამ დაგვცა სულით! აი, ბატონებო, რა მოვლენებმა ჩაგვყარა უკიდურეს ყოფაში.

აქ მცირე ხნით შეჩერდა დიდი მოურავი და მოსვა წყალი. სრული მღუმარება სუფევდა. დამსწრეთა სახეზე იხატებოდა გაოცებასთან შეზავებული სევდა და ჭმუნვა. არ იძროდნენ ადგილიდან. ყველანი გაეტაცა ერის მოთავის სიბრძნესა და ენამზეობას. მოურავმა ჩაახველა და განაგრძო:

— ბატონებო, ამჟამად ქართველი ერის წინაშე ბნელი ლანდივით აღიმართა ორი საშიშროება: ან სრული გაწყვეტა — განადგურება ყოველი მხრივ შემოსეულ მტერთაგან, ბრძოლის ველზე ნამუსიანი სიკვდილი, ან ქედის მოხრა, გამუსულმანება, მონობა და სრული გათქვეფა ოსმალ-სპარსთა ბნელ მორევში... ქართველ ერს აშინებს ეს ორი ლანდი. მას არა სურს არც სიკვდილი და არც მონობა. მას სწყურია სიცოცხლე და მშვიდობიანი ცხოვრება. იგი მიისწრაფის მზიან მომავლისაკენ... ამიტომაც ეძებს გამოსავალს, ეძებს ძლიერ მოკავშირეს, მფარველს... ჩვენც ხომ შევიფარეთ ერთ დროს სომხეთის ჩრდილო ნაწილი, ძმასავით შევიგუეთ სომხის ერი, ვიხსენით თურქთა მიერ გაჟლეტისაგან და ვიცავთ დღემდე რაინდული თავგანწირვით.

აი სწორედ თურქ-ერანთა ძალმომრეობის გამო ქართლ-კახეთის მეფენი და მრავალი დიდებული იცქირებიან ჩრდილოეთით, მფარველობას ემუდარებიან მოსკოვის, ანუ რუსეთის ხელმწიფეს, სხვა გზასა და გამოსავალს ვეღარ ხედავენ. პირიქით ხელის გაწვდა კახეთიდან დაიწყო. ამ ორმოციოდე წლის წინათ კახეთის მეფე ლეონ პირველმა მიმართა მოსკოვს და სთხოვა ჯარი და მფარველობა. ამის კვალს მიჰყვა მისი ძე ალექსანდრე მეორე. ხოლო რაც შეეხება ჯერ კახეთისა და ახლა სრულიად ივერიის მეფე თეიმურაზ პირველს, როგორც მოგეხსენებათ ის უკვე ოც წელზე მეტია, რაც ჰგზავნის დესპანთ მოსკოვს. ემუდარება რუსთა ხელმწიფეს მფარველობას და შეელა-დახმარებას შაჰაბაზის წინააღმდეგ. მაგრამ მოსკოვის სამეფო ამჟამად ნორჩია. ის თანდათან იკრებს ძალას, მოდის სამხრეთით, უახლოვდება სპარსეთსა და ოსმალეთს. ექვს გარეშეა, ოდესმე მოხდება მათ შორის დიდი ბრძოლანი. მჯერა, რომ ამ ომში გამარჯვებულნი გამოვლენ რუსი. მწას, რომ

მომავალში საქართველოს შეიფარებს მოსკოვის სამეფო, მაშინ ველარ გაბედავენ ველური მუსულმანები ხელი შეახონ ჩვენი ქვეყნის საზღვრებს... მაგრამ ეს მომავლის საქმეა. მანამდე კი ამ საბედისწერო ხიფათისაგან ერთადერთი გამოსავალია ივერია-კოლხეთ-მესხეთის გაერთიანება, ერთ მძლავრ სამეფოდ გახდომა, რათა შესაფერი წინააღმდეგობა გაეწიოს ირანსა და თურქეთს, რომლებიც უქადიან შთანთქმას. ამასობაში რუსეთიც გაიზრდება, გაძლიერდება, მოგვიახლოვდება და ადვილად შესძლებს გაუწიოს გაერთიანებულ საქართველოს ნამდვილი მფარველობა და იქცეს ჩვენი ქვეყნის მძლავრ მოკავშირედ.

სააკაძე შეჩერდა; გადახედა დამსწრეთ. ისინი ღუმდნენ სმენად ქცეულნი. ყველანი ალტაცებით შესცქეროდნენ ამ დიდ ადამიანს. მცირე ხანს შემდეგ განაგრძო:

— ბატონებო! აუცილებლივ უნდა შედუღდეს რვა ნაწილად დაფლეთილი საქართველო! აი, ერთადერთი გზა და გამოსავალი იმ საბედისწერო მდგომარეობიდან, რომელშიაც ვიმყოფებით ამჟამად!

ეს ურყევი აზრი და რწმენა ჩამესახა გულსა და გონებაში იმ შორეულ ეამიდან, ოდეს ოცი წლის ჭაბუკი ჩავუდეგ სათავეში ქართლის სამეფოს საქმეებს და საკმაოდ კარგად გავეცან ჩვენი ერის ისტორიულ წარსულსა.

ხოლო შემდეგმა წლებმა, მრავალი ქვეყნის ხილვამ, ხანგრძლივმა ომებმა და გამოცდილებამ კიდევ უფრო განამტკიცეს ჩემს არსებაში ეს აზრი და რწმენა... რარიგად უნდა მოხდეს ეს გაერთიანება?

ძველადაც კოლხეთიდან დაიწყო საქართველოს გაერთიანების ღიადი საქმე და, სჩანს, ახლაც სწადია განგებას, რათა ეს დიდებული საქმე აქედანვე მოხდეს...

— ეგ ფრიად საგულისხმოა, აბა რარიგად უნდა მოხდეს

ეს გაერთიანება ჩვენი სამეფოდან? — გააწყვეტია სიტყვა
გაოცებულმა მეფემ.

— სულ ადვილად, მეფეო, სულ ადვილად. მოგეხსენებათ,
რომ ქართლის კანონიერი მეფე ლუარსაბ უძეოდ ამოწყდა.
დღეს ქართლ-კახეთის მეფედ ზის, ერისა და დიდებულთა
სურვილის თანახმად, კახეთის მეფე თეიმურაზ პირველი.
ხოლო მან ამ ოცი წლის მანძილზე ვერ გააძარტლა ხალხისა
და დიდებულთა იმედები. იგი ოდნავაც არ ზრუნავს სამე-
ფოს საქმეებზე და მთელ დროს ანდოებებს ქეიფს, ხადირო-
ბას, ხატობაზე სიარულს.

ასეთი ადამიანი, ბატონებო, არ არის მეფობის ღირსი და
მან ძალით თუ ნებით უნდა დაუთმოს ადგილი ღირსეულ პი-
როვნებას. ასეთ პირად მიმაჩნისხართ თქვენ, დიდო მეფეო და,
თქვესი ვაჟი, ტახტის მემკვიდრე, ჭკვიახი და ნიჭიერი ალექ-
სანდრე, რომელიც დედით ენათესავება ქართლის ყოფილ
მეფე ლუარსაბს.

აქ შეჩერდა მოურავი და გადახედა კრებას. მას სწადდა
ამოეკითხა დამსწრეთა სახეზე, თუ რა შთაბეჭდილება მო-
ახდინა მათზე ამ სიტყვებმა. დამსწრენი-კი ისხდნენ მღუმ-
არედ და დიდი ყურადღებით ისმენდნენ სააკაძის სიტყვებს.
მათ შუბლსა და სახეს ანაოჭებდა ღრმა ფიქრი. ჩანდა, რომ
ყველანი გაეტაცნა მოურავის მაღალ აზრს და მის განსაჭვ-
რეტად მკვეთრად მუშაობდა მათი გონება.

გმირმა მოსვა წყალი და განაგრძო უფრო მდებალი ხმით:

— ივერიის ტახტის ღირსეული მემკვიდრე უკვე მოძებ-
ნილია. ეს არის ბატონიშვილი ალექსანდრე, მას თეიმურაზმა
უნდა დაუთმოს ტახტი ნებით ან ძალით, თვითონ კი აირჩი-
ოს სავანედ რომელიმე მონასტერი, რომლებიც ასერიგად
შეჰყვარებია ამ ბოლო ეპოს, დაჯდეს იქ თავის სენაკში და
სწეროს ლექსები. აქ კი ამავე დროს უნდა ვეცადოთ და
შევუერთოთ იმერეთის სამეფოს სამთავრონი — გურია, სა-
მეგრელო, აფხაზეთი და სვანეთი. ამრიგად გაერთიანდება
კოლხეთი. შემდეგ-კი კოლხეთ-ივერიის გაერთიანება თავის-
თავად მოხდება. დმერთმა-ინებოს და დიდხანს აცოცხლოს
ამიერიით მთელი კოლხეთის მეფე გიორგი, ბრძენი, მამაცი

და ხალხის მოკირანახულე... რაც შეეხება მესხეთის შეერთებას, ისიც არაა შორეული საქმე. ხოლო გაერთიანებულ კოლხეთ-ივერი მალე გაიმართება წელში, გაძლიერდება ნივთიერად და სულიერად, ადვილად მოიგერიებს როგორც მთის ხალხებს, ისე ორ ვეშაპს, უკვე საგრძნობლად დასუსტებულ სპარსეთსა და ოსმალეთსა.

— გისმინოს მაღალმა ღმერთმა და წმ. გიორგიმ, ერის მოთავევ! გისმინოს! — უნებლიად წამოიძახა ყველამ და დუმდნენ გაოცებულნი და გარინდულნი.

მცირე ხნის შემდეგ წამოდგა კათალიკოსი ზაქარია და მეფის ნებართვით მიმართა დიდ მოურავს:

— ქართველი ხალხის დიდო მოთავევ! აქამდე გვაოცებდა ჩვენა და მთელ მსოფლიოს შენი სამხედრო გენიოსობა. სამშობლოს უზენაესი სიყვარული, მდაბიო ხალხის მიმართ ზრუნვა და თავგანწირვა, ახლა კიდევ გვაოცებს ფრიად და მოგეწონს შენი მაღალი, გაბედული აზრი საქართველოს გაერთიანების შესახებ. შენი ბაგენით დალაღებს თვით ჭეშმარიტება. შენ გადააჭარბე თვით დიდებულ ალექსანდრე მაკედონელს ბრძოლის ველზე, შენ სამჯერ იხსენ დალუპვისაგან მთელი ივერი და მით მთელი საქართველო, შენ გაბედე და შეებრძოლე ერთი მუჟა რაზმით ივერიაში შემოსეულ უამრავ მტერს, როცა არ მიიღეს შენი მაღალგონიერი რჩევა და მარაბდის ველზე დამარცხდა ჯარების მთავარსარდლად არჩეული მეფე თეიმურაზი. მფრინავი რაზმებით, სათარეშო ბრძოლით შენ დაამარცხე მძევინვარე მტერი და განდევნე ივერიიდან. ჭეშმარიტად შენ შესძელ ისეთი საქმენი, რომელთა მსგავსი არ ჩაუდენია არც ერთ მეფესა და მთავარსარდალს. და ახლა კიდევ გვამცნევ დიდებულ აზრს საქართველოს გაერთიანებისა და განდიდების შესახებ; შენ გვითითებ იმ საშუალებაზე, რითაც უნდა გადარჩეს დალუპვას ქართველი ერი, რითაც უნდა გაიჭედოს მისი უკვდავება და ბრწყინვალე მომავალი; მწამს, რომ ამ უდიდეს და უძნელეს საქმესაც შესძლებ შენ და მხოლოდ შენ....

ქართველი ერის მოთავევ! შენ უდიდესი გმირი ხარ ამი-
ერთ არამცთუ ჩვენს პატარა სამშობლოში, სადაც არ გქონ-
და გასაქანი, არამედ მთელ მსოფლიოში. შენ დაამარცხე
მცირე ჯარებით დიდი ერანი, დიდი ოსმალეთი, დიდი ავღა-
ნი და ინდოეთი, შენ მოახრევინე მათ ქედი პატარა ერის წი-
ნაშე, შენ სახელი გაითქვი მთელს აზიაში... ამიტომ, სუ-
ლიერო შვილო, გლოვაც ხელაპყრობითი იკურთხოს უკუ-
ნისამდე შენი დიადი სული და ზრახვანი, შენი მაღალი გო-
ნება და აზროვნება, შენი საარაკო ძალა, მხნეობა და ძლიერი
მარჯვენა!

ამ სიტყვებით თვალცრემლიანი კათალიკოსი გადაეხვია
ერის მოთავეს და მოწიწებით ეამბორა შუბლზე. თვით გმი-
რი ემთხვია სულიერი მეუფის სპეტაკ წვერსა და მარჯვე-
ნას, ფრიად აღელვებული ასეთი გრძნობით წარმოთქმულ
სიტყვების გამო.

შემდეგ წამოდგა განათლებული მიტროპოლიტი ანტონ
ქუთათელი და მიმართა დიდმოურავს: — ერის დიდებაე და
ქვეყნის ნუგეშო! მაღალ მეუფე კათალიკოსის ჭეშმარიტებით
ილსავე სიტყვას დაესძენ მხოლოდ მას, რომ თვით განგებამ
მოგაგლინა შენ ქართველი ერის ნუგეშად, ქომაგად და
მხსნელად ამ სისხლის წვიმების ხანაში, სასიკვდილო გან-
წირვის ეამსა, როცა მას დახვევიან ჩრდილოეთით კავკასი-
ონის მთების ტურა-მელეები, ხოლო აღმოსავლეთით, სამხ-
რეთით და დასავლეთით შემოხვევია ჩასანთქავად ორი პირ-
დაღებული დიდი ვეშაპი. იკურთხოს შენი მოვლენა ჩვენს
შორის, მსოფლიო გმირო და ზეკაცო!

იკურთხოს შენი აზრი, ზრახვანი, სიმამაცე და ზღაპრული
მოქმედებანი! იკურთხოს შენი სახელი, შენი ხსენება უკუ-
ნითი უკუნისამდე ამინ!

ამ სიტყვებით მიტროპოლიტი მიუახლოვდა დიდ მოურავს
და მოწიწებით ემთხვია სპეტაკ შუბლზე. ზედმეტად აღელ-
ვებული სააკაძე ხელსა და თეთრ წვერზე ეამბორა ქუთა-
თელს.

ბოლოს წამოდგა თვით მეფე გიორგი და მიმართა დიდ
მოურავს:

— დიდო სარდალო იმერეთის მეფე გიორგი სავსებით იზიარებს ორი მაღალი მეუფის აქ შენდა მიმართ წარმოთქმულ სიბრძნე-ქეშმარიტებით აღსავსე სიტყვებს და ქელს იხრის შენს წინაშე, უგვირგვინო მეფე ივერიისაჲ! შენ მრავალგზით იხსენ დალუპვისაგან ერი განწირული, ასახელე იგი საქვეყნოდ და დათურგნე მისი მძვინვარე მტრები. შენ მოდრიკე ქართველი ერის წინაშე ერანელი მხეცი შაჰაბაზი და ოსმალეთის სულთანი. 20 წლის ასაკიდან უკვე 25 წელია რაც უდგეხარ გუშაგად ესოდენ წამებულ ივერიის ერს! და ახლა ქვეყნის განკითხვის ჟამსა, შავბნელ ხანაში სისხლის წვიმებისა, ოდეს ბეწვზე ჰკიდია ერის სიცოცხლე, შენ მოგვევლინე ხალხისა შვილო, რომ ააშორო ქართლოსიანთ ტომთა დამოკლეს ხმალი და გასქედო ერის დიდება მუთი თავმოყრით, ერთად შედლუღვით... იკურთხოს ეგ შენი მაღალი აზრი, შენი ზრახვანი..

ამ სიტყვებით მივიდა მეფე დიდ მოურავთან, მხურვალედ ჩაიკრა გულში, აკოცა როგორც ძმასა და დასია ტახტზე თავის გვერდით.

XXXIV. ბაზალეთი

მეორე დღეს იმერეთის მეფე და დიდებულნი მოურავთაჲს ერთად შეუდგნენ თათბირს, თუ როგორ განეხორციელებინათ გეგმა სრულიად საქართველოს გაერთიანების შესახებ; უომრად არ წყდება საქმე, საჭირო შეიქნა ბრძოლა და ძმათა შორის სისხლის ღვრა. საჭირო იყო საიდუმლო და ფიცხელი მოქმედება, რომ არავითარი ეჭვი არ აეღოთ ივერთაში მოურავის მტრებს, მოულოდნელად დასცემოდნენ თავზე, უეცარი შეტევით დაემარცხებინათ მეფე თეიმურაზი, გადმოეგდოთ ივერიის ტახტიდან და დაესვათ მეფედ იმერთა ტახტის მემკვიდრე ალექსანდრე. ამ მიზნით სააკაძე თხოულობდა ხუთი ათას საუკეთესო მებრძოლთაგან შემდგარ ჯარს. იმედი ჰქონდა, რომ მესხეთ-ქართლიდან მას მიეშველებოდნენ სამი ათასი კაცით მისი მომხრენი, იასე ქსნის ერისთავი, ზაზა ციციშვილი, ქაიხოსრო მუხრან-ბატონი, აზატი გლეხნი გიორგი ქავთარაძისა და თამაზ ქარსიძის სარდლობით, აგრეთვე ჯავახნი ელია დიასამიძის და დავით გოგორიშვილის მეთაურობით, რისთვისაც სასწრაფოდ აფრინა მათთან თავისი ძმადფიცულნი. საიდუმლოდ ამცნო თავისი მიზნები, მოსთხოვა ჯარით დახმარება და დაუთქვა პაემანი.

იმერთა მეფე-დიდებულნი უკვე შეუდგნენ სამზადისს და ჯარის შეგროვებას, თანაც დაჰყარეს ხმა, ახალციხიდან მოველით თურქთა ფაშის თავდასხმას და ჯარსაც ამიტომ ვავროვებთო.

მაგრამ რასაც ასე უმაღლედნენ თეიმურაზ მეფესა და ზურაბ ერისთავს, მათ არ დარჩათ საიდუმლოდ.

სალამო ეამს ვიღაც უშნო მხედარი ცხენით მიადგა დუშეთის სასახლეს, სადაც იმეამდ ცხოვრობდა ზურაბ ერისთავი, გადმოხტა ცხენიდან გალაენის წინ ქიშკართან და სთხოვა გუშავს ეცნობებინა დიდი თავადისათვის, რომ სწადდა მასთან ზღება. იგი მაშინვე მიიღო ზურაბმა თავის სენაკში და ტახტზე მჯდომარემ გადახედა თავისი დიდრონი ბრიალა თვალებით, რითაც ააცახცახა ახლადმოსული შუახნის უშნო არსება, მოძველო შალის ჩოხაში გახვეული.

— ვინა ხარ შენა? — შეეკითხა რიხიანად ზვიადი ერისთავი და გააბოლა გრძელი ჩიბუხი.

— მე... მე, დიდო ბატონო, ცხინვალიდან გახლავარ, თქვენი დიდად ერთგული და კეთილის მოსურნე, — უთხრა მან ნელი ხმით, რომელშიაც კრთოდა შიში და კრძალვა.

თანაც მიმოიხედა ირგვლივ — სხვა ხომ არავინ ისმენსო.

— საიდან მოდიხარ?

— იმერეთიდან; ჩხარსა და ქუთაისში გახლდით მთელი კვირა, ცხვრისა და თხის ტყავებს ვყიდულობდი ჩემი დაბახანისათვის მეშად და სამოგვედ.

— ეგ არ არის ჩემთვის სანუკვარი. შენ მითხარი სხვა უფრო საგულისხმო ამბავი, თუ რამე იცი, — დაიგრჯინა ბოხი ხმით ზურაბმა.

შავი სქელი წვერი მოხდენით ეფინებოდა მის ფართო გულმკერდს. ახლადმოსულს კვლავ აუტყდა ცახცახი; თითქოს ნანობდა აქ მოსვლას, მაგრამ გაახსენდა, თუ რა დიდი ჯილდო ელოდა მას, და საამოდ გაულიტინა გულში. მიმოიხედა კვალად, მიუახლოვდა ერისთავს და ძლივს გასაგონად მოახსენა:

— იქა, ბატონო ჩემო, დიდ მზადებაში არიან იმერთა მეფე და დიდი მოურავი. ჯარებს აგროვებენ... ხმა დადის, თითქოს ოსმალებს ელიანო, მაგრამ ქუთათურ ვაჟრებს არ სჯერათ ეგა. იმათ საიდუმლოდ გადმომცეს — ქართლისაყენ აპირებს ლაშქრობასაო. მეფე თეიმურაზის გადმოგდება სწადიათო...

ამ სიტყვების გაგონებაზე ზეზე წამოვარდა უზარმაზარი ზურაბ ერისთავი, დაიღრიალა რაღაც უცნაურად და მივიარდა მას. აცახცახებული აეშავი დაემხო იქვე.

— ნუ გეშინია, აღსდექ, არაფერს გერჩი, პირიქით, დიდად მადლობელი ვარ მაგ ამბისათვის. აჰა, დაიქი! — ამ სიტყვებთან ესროლა ოქროებით სავსე ქისა, რომელიც ჯაშუშმა მარდად დაიჭირა, აწონა ხელში მისი სიმძიმე და სწრაფად ჩაიგდო უბეში. უზომო სიხარულმა აიტაცა იგი, დაემხო ზურაბის წინაშე და მოწიწებით ემთხვია მუხლებზე.

— არა ვარ ღირსი, ჩემო ხელმწიფე, ასეთი უხვი წყალობისა. ჯერ არაფერი მითქვამს ასეთი. უბრძანე შენს მონას და მზად არის ცეცხლსა და წყალში გადავარდეს შენი გულისათვის.

ერისთავმა ოდნავ ზიზლით გადახედა და მიმართა წყნარი ხმით:

— სთქვი ყველაფერი, რაც იცი! ნურაფერს დამალავ, ხომ იცი ჩემი სიუხვის ამბავი! კისრამდე ჩაგსვამ ოქროში, კისრამდე!

— დიდო ბატონო, რა ღმერთი გამიწყრება და დავმალავ რასმეს, აბა ვის ვეტყვი სხვასა, თუ არა თქვენ? ჯერ დავაპირე დიდი მეფე თეიმურაზის წინაშე ხლება, მაგრამ გადავიფიქრე და თქვენთან გიახელით, როგორც ჩემს დიდ მწყალობელთან და მეფის სიძესთან.

— კარგად გიფიქრია, ეგრე სჯობდა. საჭირო იყო პირველად მე მცოდნოდა. კახეთში წასვლით დიდ ხიფათს წაეკიდებოდი გზაზე. ხომ იცი, ლეკებითა და ყაჩაღებით სავსეა შარაგზები, გაგცარცვადნენ, მოგკლავდნენ; შენც გაფუქდებოდი ტყვილაუბრალოდ და ეს ჩვენი საქმეც წახდებოდა, რადგან ეგეთი ჭკვიანი ყოფილხარ, ამიტომ მიჩუქებია კიდევ შენთვის შეკაზმული ბედაური და ათი ერკემალი. ახლა კი მამცნე ყველაფერი.

უზომოდ გახარებულმა ჯაშუშმა კვლავ დაუკოცნა მუხლები და დაიწყო:

— მთისა და არაგვის დიდო ბატონო! როგორც მოგახსენეთ, მთელი კვირა გახლდით იმერეთს, იქ ბევრი რამ ვნახე

და ბევრიც გავიგონე, თუმცა, როგორც სჩანს, მეფე და დიდი მოურავი ფრიად საიდუმლოდ მოქმედებენ. ჯარი უკვე შეუკრებილია ხუთი ათასი რჩეული ვაჟაკი, ერთიმეორეზე უკეთესნი. აქეთ მოდიან საომრად, მეფე თეიმურაზის წინააღმდეგ, სწაღიათ მისი ტახტიდან ჩამოგდება და სხვა მეფის დასმა.

— ვისი? დაუყვავა ზურაბმა.

— ვისი, ჩემო ბატონო, და... — აქ შეჩერდა იგი.

— ჰო, ვისი? თვით იმერთა მეფე გიორგის ხომ არა?

— არა, ჩემო ბატონო, ვგონებ, მისი ვაჟი ალექსანდრე სწაღიათ ივერიის მეფედ.

— ალექსანდრე?! ნამდვილად იცი?! — შეეკითხა ვაკვირვებულები ზურაბი.

— ასე გადმოცა საიდუმლოდ ჩემმა ნათლიმამამ.

— იმან კი საიდან გაიგო? — შეეკითხა ერისთავი.

— მისი კვიდრი დისწულია გიორგი მეფის მასხარა. ამა იმას რა გამოეპარება სასახლეში, — დიდი ოსტატი და ყურმანხილი არსებაა. აი, ამას უთქვამს საიდუმლოდ წისთვის.

ზურაბ ერისთავი მეტად ჩააფიქრა ამ ამბავმა. იგი მიხვდა ყველაფერს. ზურაბმა აღრევე იცოდა დიდი მოურავის გეგმები საქართველოს გაერთიანების შესახებ. ამ გაერთიანებით ეღებოდა ბოლო ივერ-კოლხეთში დიდი თავადების თავაშეებულ ფართაშს, მათ ურთიერთ რბევას, ხალხის ცარცვასა და ტანჯვას. ამ სახით ბოლო ეღებოდა მის გაღვიძებულ მადას და ბატონობას თუშ-ფშავ-ხევსურებზე. მას თვალი ეკავა აგრეთვე ქსნის ხეობასა და სამუხრანოზე. ამ ზვიადი თავადის მგზნებარე ოცნება კიდევ უფრო შორს მიდიოდა. ის სიძე იყო მეფე თეიმურაზისა, მან კარგად იცოდა ამ მეფის სილაჩრე და უნიჭობა. ზურაბს ბევრი გავლენიანი მომხრე ჰყავდა ქართლსა, კახეთსა და ირანშიაც-კი. ვინ იცის, ერთ დროს რა მოხდებოდა, როგორ შეიცვლებოდა მისი ბედი! იქნებ ბაგრატიონთა გვარს ალაგი დაეთმო ერისთავის გვარისათვის ივერიის ტახტზე. და ამ დიდ იმედებს აქარწყლებს ახლა ვინ? მისი საკუთარი სიძე, ძმადფიცული დიდი მოურავი გიორგი სააკაძე... და ამას შესძლებს იგი

თუ დროით არ იქნა მიღებული საჭირო ზომები. ახლა ზურაბი ნანობდა დიდად, რომ გადიმტერა დიდი მოურავი, მაგრამ გვიანლა იყო.

— ხომ კარგად გახსოვს, რაც მითხარ? — შეგარგვინა ერისთავმა ამბის მომტანს.

— როგორ არ მახსოვს, დიღო ბატონო!

— ჰოლა ჩემი სურვილია დაივიწყო აღმოფხვრა ხსოვნადან. კრინტი არ დასძრა სულიერთან, არსად წამოგცდეს... არც ის სთქვა, რომ აქ მოხველ. ხომ გესმის?

— მესმის, დიღო ბატონო. დავმუნჯდები, პირში წყალს ჩაეიგუბებ...

— ეგრე, ეგრე! ჭკვიანი ყოფილხარ. ამაღამ აქ დარჩები, ხვალ დილის რიერაჟზე წახვალ.

ზურაბმა შემოკრა ტაში. შემოვიდა ფარეში და დადგა კარებთან.

— ციხისთავს დამიძახე.

— ეხლავე, დიღო ბატონო! — ამ სიტყვებით გაეარდა ბიჭი. კარებში უცებ გაჩნდა ხანში შესული ვაჟკაცი.

— ედიშერ, წაიყვანე ეს ჩენი სტუმარი და კარგად გაუმასპინძლდი. ხვალ დილის რიერაჟზე გაისტუმრე; შესვი საუკეთესოდ შეკაზმულ ბედაურზე, თანაც გაატანე ათი ერკემალი, მაგის საჩუქარი.

აეშაგი მადლობის გადახდით გაჰყვა ციხისთავს.

ზურაბი ჩამოჯდა ტახტზე, მოუყიდა ჩიბუხს ცეცხლი კვეს-აბედით, გააბოლა ორ-სამჯერ და უნებლიედ ჩაიფლა ღრმა ფიქრებში.

— ხედავ, რა სწადია მოურავს! ხედავ, რა მახეს გვიგებს! მაგრამ ვინ იცის! იქნებ თვით გაებას ეგ ფრთხილი მელა თავის ხაფანგში... ბედი მწყალობს. რომ არ გამეგო, ხომ მძინარეს დაგვესხმოდა თავზე და მოგვესპობდა ერთიანად. დაილოცოს, უფალო, შენი სახელი! ეხლავე უნდა ვაცნობო ჩემს სიმამრს მეფე თეიმურაზს: დროით უნდა მივიღოთ ზომები... ვისმეს გაგზავნა ან ბარათის მიწერა შეუძლებელია.

ასეთმა ფიქრებმა შორს გაიტაცა არაგვის ერისთავი. უცებ წამოიჭრა ზეზე, რაღაც აზრმა გაუბრწყინა სახე.

— ოჰ, რა სიბრიყვეს ჩავდივარ! როგორ შეიძლება მისი გაშვება! ვინაა თავლები, რომ არ გამცემს, რომ არ აუწყებს დიდ მოურავს, რომ ჩვენ უკვე ვიცით იმის საიდუმლო ამით ხომ კიდევ ბევრად მეტ ჯილდოს მიიღებს, ვიდრე მე მივეცი არა, ვერ გავუშვებ ჯერ ხანად მაინც... მოვკლა? არა, ცოდვაა, რა დაუშვებია კარგის მეტი. მაშ რამდენიმე ხნით უნდა გავაჩერო, უნდა დავატუსალო...

ზურაბმა შემოკრა ტაში. შემოვიდა ფარეში.

— მიხმე ციხისთავი.

— ეხლავე, დიდო ბატონო! — ოა გავარდა გარეთ.

— რას მიბრძანებთ, ბატონო? — შეეკითხა ციხისთავი.

— ის კაცი არ გაუშვა. ჩემად დაამწყვდევ სასახლის სარდაფში და კარგად გაუფრთხილდი არ გაგეპაროს, თორემ დიდ ხიფათში ჩავარდებით ყველანი. ისე კი მოუარე, კარგად ასაზრდოვე, შენს მეტმა არავინ იქონიოს მასთან კავშირი. ხომ გესმის?

— მესმის, ბატონო!

— ხვალ დილით ადრე კახეთს მივალ თიანეთით, ძომობზადეთ მხლებელნი, ბევრი არ მინდა, ათი მეყოფის.

— მზად იქნება, ბატონო. სხვას რას მიბრძანებ?

— აქედან ფეხი არ დაძრა, არსად წახვიდე, ტყვეებს გაუფრთხილდი. რა ისმის მთებიდან?

— სიწყნარეა ჯერჯერობით, სიმშვიდე. მხოლოდ კბილებს ილეხავენ. მარტოოდენ გვემუქრიან.

— არაფერია, მოვლენ გონს. მიხმე თუშ-ფშავ-ხევსურთა მეთაურნი. მესამე დღეს აქ ვარ გაჩენილი, დრო აღარ ითმენს...

— რა ამბავია, ნეტა, ბატონო?

— ჯერ ვერ გეტყვი, მალე გაიგებ. საიდუმლოა ფრიადი. ხიფათი გველის, დიდი ხიფათი... მზად უნდა ვიყოთ... ჩვენს საყმოდან რამდენს გავიყვანთ, თუ საჭიროებამ მოითხოვა?

— ორი ათასამდე რჩეულ ვაეკაცს.

— კეთილი. მთა რამდენს მოგვცემს?

— თუშ-ფშავ-ხევსურეთი სამი ათასს. საუკეთესო მებრძოლს.

— მაშ სულ ხუთი ათასი; საკმარისია. ერთ ამდენს კახეთში შეეკრებთ, ქართლიც მოგვაწვდენს ამდენსავე, თუ საჭირო იქნა, ვფიქრობ კი საჭირო გახდება... ოო, მიფრთხილდი, მოურავო... — გაიფიქრა გუნებაში, გაიარა ოთახში და გააბოლა ჩიბუხი.

ოქტომბრის ხასხასა დილაა. მზე ოქროს სხივებით აცხუნებს კახეთის ტურფა ბუნებას. ხალხს დაუმთავრებია რთველი და მინდვრად გაუბამთ გრძელი გუთნეული. არის შოლტის ტკაცანი და ურმულის ღიღინი. ამ დროს გრემის სასახლის ვრცელ აივანზე ნოხდოშაკებით ღბილად მოგებულ ტახტზე ზის ფეხმოკეციტ აბრეშუმის გრძელ ხალათში გახვეული შავწვერა, შუახნის კაცი, თავზე, თათრული წესით ჩალმამოხვეული, ხელთ უპყრია ორბის კალამი და წერს ეტრატზე რაღაც ლექსებს. მის წინ დგას პატარა მაგიდა, გვერდით ორი მხრივ უწყვია დიდრონი მუთაქები ხელების დასაბჯენად. ხანდაზმით შეჩერდება იგი რითმის ძებნაში და კვლავ შეუდგება წერას.

— საუბრე მზად გალხავთ, დიდო მეფეო, — მოახსენა აივანზე გამოსულმა სახლთუხუცესმა ჩოლოყაშვილმა, — აქ მიირთმევთ, თუ შეიგნით მობრძანდებით?

— ოჰ, რა დროს შემეშალეთ ხელი, ჩემო ბიძინა! როცა მუხა მომიფრინდა და ლექსებიც წყალივით მომდინარეობდა. უხეირო ხალხი ხართ ეს კარისკაცები; მუდამ ხელს მიშლით, ერთი წუთით არ მაცლით დაწვერო რამე! ოჰ, ძნელი ყოფილა ერთსა და იმავე დროს მეფობა და მგოსნობა!

— რას სწერთ, ბატონო, ეს ერთი კვირაა, ასე გატაცებით, რომ აღარც ჭამა გახსოვთ და აღარც სმა. არც ძილი და მოსვენება.

— რასა ვწერ და „ვარდ-ბულბულიანს“, ჩემო ბიძინა. ო, რომ იცოდე, რა პოემაა, რა პოემა! რა ენა, რა მდიდარი რითმა, რა ლექსთწყობა, რა მუსიკა! რუსთაველის ენა მძიმეა, მდორე, სპარსული სიტყვებით ამღვრეული, მუსიკა ერთფეროვანი, ჩემი კი სულ სხვაა! აი, წაგიკითხავ! მაგრამ

არა, ჯერ დედოფალსა და კარისკაცებს სთხოვე. ჩემს ჭკვიან მასხარას დამიძახე და ყველას ერთგობად წაგიკითხავთ. აი, ვის უპრის გონება, ვინ აფასებს ჩემს ლექსებსა და პოემებს! დიახ, ის ჯუჯა, ის ერთი ციდა, ასე რომ დასცინით თქვენ ჩემო ვეზირებო და კარისკაცებო. ეე, ეს ვინ მოაქროლებს ბე-
დაურს ასე გამალებით! ნუთუ ზურაბია?! იმას ჰგავს!—წამო-
იძახა მეფემ გაკვირვებით და შეცვალა საუბრის კილო.

— დიახ, ნამდვილად ზურაბი გახლავთ, თქვენი სიძე, არაგვის დიდი ერისთავი. მეტად მოიჩქარის, ეტყობა, საშუ-
რი საქმეა.

ამასობაში ზურაბმა შემოაქროლა თავისი მერანი სასახლის ვრცელ ეზოში, მარდად გადმოხტა ცხენიდან და აირბინა კიბე.

— ვაშად მოხველ, ჩემო ძვირფასო სიძე! ფრიად მიამა შენი ნახვა. ესეცაა ჩემი ახალი პოემა „ვარდ-ბულბულიანის“ კითხვას ვაპირებდი და ბარემ შენც დაესწარ. შენ მოგწონს ჩემი „ხილთაქება“. აბა ეხლა ეს ნახე როგორია! ფას ამ ჩემს ლექსთან შენი რუსთველი!

მეფის სიტყვებზე უცნაურად დაიღმეჭა ზურაბ ერისთავი და ოდნავ წყენით მოახსენა:

— ივერიის მეფე! თქვენ ლექსებით, ნადირობით ერთობით, ამ დროს კი ლამის მოურავმა ტახტი გამოგაცალოს ხელი-
დან... რა დროს ლექსებია, დალოცვილო...

ამის გამგონე თეიმურაზი მოიღუშა და შეეკითხა:

— რას მეხუმრებდი, ჩემო სიძე! მოურავი კარგახანია მოვინელეთ და დავასამარეთ; ის უკვე მეოთხე თვეა იმე-
რეთსაა გადახვეწილი ცოლშვილით.

— და აი, სწორედ იქიდან გვპირდება აკლებას.

— რაშია საქმე, ალბათ, გაიგეთ რამე. ხომ? — შეეკითხა მეფე შეკრთომით.

— დიახ, ვიცი ზოგი რამ, ბატონო ჩემო, და გთხოვთ მომისმინო საიდუმლოდ!

თეიმურაზს ეცვალა ფერი. მან უცებ ჩაკეტა მაგიდის ყუთში თავისი ახალი პოემა, მოხვია ხელი ზურაბს და წაიყ-

ვანა სენაკისაკენ. კარებთან მოიბრუნა პირი და მიაძახა სახლთუხუცესს:

— ბიძინა, სუფრა აქ გაშალონ აივანზე და ჩემი საუკეთესო საფერავიც მოხადონ. ჩვენ მალე გამოვალთ. ხვალ დილით სანადიროდ წავალთ, აცნობე ბაზიერთუხუცეს ბარძიმს.

ამ სიტყვებით მეფემ შეიყვანა ზურაბი თავის საიდუმლო სენაკში და გადაარაზა კარები.

— რაშია საქმე, ჩემო სიძეე?

— რაშია და სააკაძე მოდის იმერთა რჩეული ჯარით, მოულოდნელ გვიპირებს თავზე დაცემას, დატყვევებას, სამეფოს წართმევას, განადგურებას და იმერთა გაბატონებას.

— მერე, ეის სთავაზობს ჩემსა ტახტს? იმერთა მეფე გიორგის?

— არა ბატონო, მის ვაჟს ალექსანდრეს!

→ შეუძლებელია, დაუჯერებელი ამბავია ვითარ გაბედავს მოურავი ასეთ რამეებს! ან გიორგი მეფე ვითარ შემეცილება ტახტსა?

— სააკაძეს აქვს საამისო გამბედაობა. მას დიდი ხანია სწლია საქართველოს გაერთიანება; ეს აზრი კიდევ გამცნო. თუ გახსოვს, ამ სამი წლის წინათ და შენ უკუაგდე, არ ისმინე.

— დაუჯერებელი ამბავია... მერე, იმერთა მეფე თანაუგრძნობს?

— რატომაც არა! რას კარგავს! — იძინს კი ბევრს რასმეს. მისი შვილი ჯერ გახდება ქართლ-კახეთის მეფე, შემდეგ მთელი კოლხეთი თავისთავად შეუერთდება, როგორც კანონიერ მემკვიდრეს. რაც შეეხება მესხეთს, იმასაც ადვილად ჩაიგდებენ ხელში, თუ კი დიდი მოურავი გვერდით ეყოლა, მით უმეტეს, რომ ოსმალეთი საკმაოდ დასუსტებულია ამჟამად და არც სპარსეთია უკეთეს ყოფაში. აი, საუკეთესო უამი საქართველოს გაერთიანებისა!

— მერე, ჩვენ რა ვქნათ? როგორ მოვიქცეთ? — შეეკითხა საკმაოდ შეშინებული თეიმურაზ.

— აი ამისთვის მოველ აქ, რომ ესევე შეგეკითხო ივერიის მეფეს.

— აბა მე რა უნდა მკითხო, ჩემო სიძევი ასეთ რამეებში შენ უკეთა ხარ დახელოვნებული მაგ შენი დიდ ნიჭით, გონიერებითა და სიმამაცით აქარბებ კიდევ დიდ მოურავს. და თუ ის გავწირე სასიკვდილოდ უფრორე შენთვის, რათა უმისოდ უფრო გაშლილიყო ივერიაში შენი დიდი ნიჭი და სამხედრო გენიოსობა, ჩემო ალექსანდრე მაკედონელო!

მოუქონა თავი ზურაბ ერისთავს ამ დათაფლული სიტყვებით. — ხოლო ეგ მაუწყე, რა რიგ გაიგე ეს ამბავი, ან რამდენად მართალია იგი?

— გუშინწინ ღამით ერთმა საიმედო პირმა, იმერეთით ჩამოსულმა, მომიღო ეს ამბავი.

— ის პირი სადაა? რად არ მოიყვანე?

— მისი გაშვება, ან აქეთ მოყვანა ყოვლად შეუძლებელია. არ მწადს გახმიანდეს ეს საქმე. აქ საჭიროა დიდი სიფრთხილე და საიდუმლოს დაცვა, რომ არაფერი შივიდეს მოურავის ყურამდე, რაიმე გუმანი არ აილოს. დეე იგი ფიქრობდეს, რომ ჩვენ გვძინავს მოსვენებით, რომ არაფერი ვიცით, რათა თვით გავაბათ ჩვენთვის დაგებულ ხაფანგში ის ოსტატი მელა. და თუ მან იყნოსა, რომ ჩვენ უკვე გავიგეთ ეს ამბავი, ო, მაშინ დაიღუპა ჩვენი საქმე! ის ფიცხლავ შეცვლის თავის გეგმას და ისეთ საქმეს დაგვაცხრობს თავზე, რომ ხარება დღე მოგონილი იყოს მასთან. აი, სწორედ მაშინ დაიღუპა ჩვენი საქმე! ხომ იცი მისი დიდი გონების, ფანდებისა და სამხედრო ნიჭის ამბები!

— მაშ როგორ მოვიქცეთ, სიძევე? გვირჩიე რამე, დიღო სარდალო!

— როგორც გავიგე, ის მოდის მცირე ჯარით, ხუთათას კაცამდე, ალბად, ქართლშიაც მოაგროვებს ხელდახელ სამი-ათასამდე. სულ ეყოლება რვაათასამდე მხედარი. ჩვენ-კი უნდა ვეცადოთ რომ გვეყავდეს არა ნაკლებ 15 ათასი საუკეთესო მებრძოლისა; მასთან უნდა გავმაგრდეთ ბუნებრივად კარგად დაცულ ალაგებში, ვეცადოთ მოვამწყვდილოთ იქა და მივცეთ ცეცხლი ორი მხრივ: ზემოდან მთის ხალხებმა, ხოლო ქვემოდან შენმა ჯარმა. იცოცხლე, ჩვენ მასპინძლობა გავუწიოთ სააკაძის სტუმრებს — თავხედ იმერლებს! ერთ

მთხრობელს არ გავუშვებთ, თუ კაცი ვარ და ეს უღვაში მსხმია! თანაც თვით ჩემს სიძეს, ბატონ მოურავს, ისეთ ხაფანგს უგებ, რომ ცოცხალი იქედან ვერ წამივა!

— რა არის ასეთი, ჩემო დიდებულო სიძევ?

— ჯერ ვერ გეტყვი, სამწუხაროდ, თავის დროზე გამცნევ ყველაფერს.

— ეხლა რა ვიგულოთ, როგორ შევედგეთ სამზადისს?

— დაუყოვნებლივ უნდა შევეკრიბოთ მთისა და ბარის თავი კაცები და ფრიად საიდუმლოდ ვაუწყოთ, რომ თავს გვესხმიან ოსმალნი ახალციხიდან, ამიტომ სწრაფად უნდა შევეკრიბოთ: 15 ან 20 ათასი საუკეთესო მეომარი, ხოლო დიდი მოურავის მიზნებს მათ გავაცნობ მას შემდეგ, როცა იგი უკვე შემოვა ქართლში იმერთა ჯარით. მაშინ ავუხსნი მთელ ჯარს, რომ ივერიის ხალხს უღალატა მისმა მოთავემ გიორგი სააკაძემ, განგვიდგა ჩვენი, მიესყიდა იმერეთის მეფეს და ახლა მოჰყავს იქაური ჯარი, რათა დაიბყროს მთელი ივერი, გადმოაგდოს ტახტიდან ჩვენი კურთხეული მეფე თეიმურაზი, ქეთევან წამებულის ღირსეული ვაჟი, ხოლო მის ნაცვლად სწადია ტახტზე დასვას მეფედ ალექსანდრე ბატონიშვილი. ამრიგად მთელი ქართლ-კახეთი აქციოს იმერთა ყმად და მონად.

• ოო, რა შთაბეჭდილებას მოვახდენ მათზე: ლომებად გავხდები, მგლებად ვაქცივი! სულ მათივე კბილით დაეაგლეჯინებ მოურავსა თავის იმერლებით...

— ო, ვენაცვალე მაგ შენ სიბრძნეს, ივერიის გმირო! — შესძახა ალტაცებულმა მეფემ. — მინდა ვეამბორო იმ შუბლს, სადაც ჩნდება ეგეთი დიადი აზრები.

სიძე-სიმაპრი გრძნობით გადაეხვივნენ ერთმანეთს. შემდეგ ფრიად კმაყოფილნი გავიდნენ აივანზე, სადაც ელოდათ საუკეთესო კახური ღვინოები და ნამზადებით აფერადებულნი სუფრა.

მეორე დღიდანვე შეუდგა ზურაბ ერისთავი მზადებას. მან ყოველ მხრივ აფრინა კაცები. დაიბარა მეთაურნი, ამცნო, თუ რა დიდ განსაცდელშია ჩაყარდნილი ქართლ-კახეთი თურქეთისაგან, რომელნიც ემუქრებიან თავდასხმას ახალ-

ციხიდან. ათ ღღეში შეკრიბა თორმეტიათასი რჩეული ვაჟ-კაცი, კარგად შეიარაღებულნი, და დააბინავა სიმაგრეებში. ბაზალეთის ტბის მახლობლად, ხოლო ხუთიათასამდე კაცი დამალა მარქაფად ზემო-ავეჭალაში. ამრიგად მომზადებული ელოდა სააკაძეს.

მეორე მხრივ იმერთა ჯარები მოგროვდნენ კორტოხთან, გადვიდნენ მთებზე და დაეშენენ ქართლში. მათ მოუძლოდა ჯუბა-ჯავახანში მჯდარი დიდი მოურავი, შავ რაშზე მჯდომარე. იგი განიცდიდა ენით აუწერელ სულიერ ქენჯნას. მისი მიწეზით უნდა მომხდარიყო კოლხ-იმერთა შეტაკებანი, უნდა დაღვრილიყო მოძმეთა სისხლი. გმირს მიჰყავდა იმერთა ჯარი იმ ხალხის წინააღმდეგ, რომლის მრავალჯერ გადასარჩენად მან არ დაზოგა საკუთარი თავი და ცოლშვილი ოცი წლის მანძილზე.

გმირის გულში საშინელი სასმილი ტრიალებდა; ხაშურთან მას შეუერთდა ხუთასი კაცით მესხეთის განთქმული სარდალი, ფრიად მამაცი და ახოვანი დავით გოგორიშვილი.

ქალაქ გორთან სააკაძემ გაიგო, რომ თეიმურაზ მეფემ და ზურაბ ერისთავმა უკვე იციან მისი ფარული გეგმები და კარგად მომზადებულნი დიდი ჯარით ელიან მას სიმაგრეებში ბაზალეთის ზემოთ. ამას კი არ მოელოდა მოურავი; მძიმე საგონებელში ჩავარდა იგი. აშკარად ხედავდა, რომ ეს გარემოება საფრთხეში აყენებდა მის, შედარებით მცირე, ჯარს. იმედი ჰქონდა, რომ მცხეთასთან მას შეუერთდებოდნენ საკმაოდ დიდი ჯარით მისი მომხრენი, ნამდვილად კი მოუვიდა მხოლოდ ათასი კაცი. ასე მცირე ჯარით ის უნდა შებრძოლებოდა თითქმის სამჯერ მეტ მოწინააღმდეგეს, რომელსაც სარდლობდა დიდი სტრატეგი ზურაბ ერისთავი; ამან კი კარგად იცოდა დიდი მოურავის სამხედრო ფანდები. უკან დაბრუნდა ან შეჩერება აღარ შეძლებოდა, რადგან მსუბუქად და მცირე ნუხლით წამოსული იმერნი იჩქაროდნენ ბრძოლას. მოურავმა მცხეთასთან დატოვა ზურავის გასამაგრებლად ქარაღელი რაზმი, ათასი კაცი, იასე ქსნის ერისთავისა და ქაიხოსრო მუხრანბატონის სარდლობით, ხოლო თვითონ ხუთიათას ხუთასი კაცით გასწია ღუშეთისაკენ. სააკა-

ძე შეჩერდა სამუხრანოს ველზე და სცადა როგორმე ჩამო-
ეტყუებინა ზურაბ ერისთავი, მაგრამ იგი არ იძროდა ადგი-
ლიდან. ის მშვენივრად გრძნობდა თავს სიმაგრეებსა და
აგებულ ბინებში ბაზალეთის ტბასთან. ზურაბმა კარგად
იცოდა, რომ გაშლილ ბრძოლაში დამარცხდებოდა თუნდაც
სამჯერ მეტი ჯარითაც. ამიტომ არ ტოვებდა თავის ბანაკს.
აქეთ კი სააკაძეს სულს უწუხებდნენ იმერნი. მოითხოვდნენ
შეტევას და ომის საჩქაროდ გათავებას, მით უმეტეს, უკვე
დადგა ნოემბერი წვიმებითა და ცივი ღლებით. ვერავითრმა
თხოვნა-მუდარამ ვერ შეაჩერა ისინი მოურავი იძულებული
გადხა დაეთმო მათთვის. იგი გაუძღვა თავის მცირე ჯარს
ღუშეთისაკენ. ეს იყო საბედისწერო ნაბიჯი. შფოთარე გუ-
ლი კარგს არას ეუბნებოდა მას.

სულიერი წამების საშინელი ცეცხლი ენთო ამ დიდი ადა-
მიანის არსებაში. მას მიჰყავდა ჯარი იმ ხალხის წინააღმ-
დეგ, რომელიც სამჯერ იხსნა დაღუპვისაგან და იმდენი საგ-
მირო საქმე ჩაიდინა. ღღეს კი თავისი ხელით უნდა დაკლას
ისინი, უნდა გამოჰკრას ყელი, უნდა შეწიროს ზვარაკად...

ამ დიად მსხვერპლს ითხოვს ქართველი ერის გაერთიანე-
ბის საქმე, ერის მომავალი...

— „წავიდე?! ვითარ აღვმართო მახვილი იმ ხალხის წი-
ნააღმდეგ, რომელთაც თავგანწირვით ვგლეჯდი პირიდან
ათეული წლების მანძილზე გაცოფებულ მგლებსა და ვეშა-
პებს?! დავბრუნდე უკან? ხომ დაიმსხვრა მაშინ ეს ჩემი
უზენაესი მიზანი ხომ დაიღუპა ქართველ სამეფო-სამთავ-
როთა გაერთიანების დიადი საქმე! ხომ ჩაუვარდა ქართვე-
ლი ერი პირში ჩასანთქავად ორ მეზობელ ვეშაპს, — თურ-
ქებსა და სპარსებს! რა ვქნა?! როგორ მოვიქცე? რას მამ-
ხელ, ჩემო გონებავ?! რას მეტყვი, გულო?!“

აი, ასეთ მწვავე ფიქრებს, ასეთ სულიერ ტანჯვებს შეეპყ-
რო გამირის არსება და ქენჯნიდა მასი ის საშინელ ტრაგიზმს
განიცდიდა...

— არა, უნდა აღსრულდეს, რაც სწადია დიდსა განგებასი
დეე, მოხდეს ის, რაც უწერია ბედის ეტრატზე ჩვენს უბედურ
ერსა! დიადი საქმე თხოულობს დიად მსხვერპლს ქართველმა

ხალმა თავისი საკუთარი სისხლით უნდა გასქედოს თავისი არსება, თავისუფლება და ამომავალი დიდება!

დაცხრი, შფოთარე სულო ნუ გმინაჲ მწარედ, ჩემო გულო! წამოიძახა გმირმა უნებურად ხმამალა ეს ბოლო სიტყვები, მოიწმინდა თვალებზე მომდგარი ცრემლი, შემოჰკრა დეზი თავის პერანს და გაუდგა გზას დუშეთისაკენ.

მას მიჰყვა მამაცად იმერთა ჯარი...

შუაგზაზე მოიღუშა ცა; დაბერა შემოდგომის ცივმა ქარმა; მთებს მოედო სქელი, შავი ღრუბელი, წამოვიდა თქეში. დასველდა მთლიანად სააკაძის ჯარი. ძლიერი წვიმა სცემდამათ თავსა და პირში. ცივი ქარი უვლიდა ძვალსა და რბილში. ცხენი და კაცი ეფლობოდნენ მუხლამდის ლაფში. ამრიგად ფრიად გაწამებული და დაღლილ-დაქანცული ჯარი მიუახლოვდა ბაზალეთის ტბას, რომლის მეზობლად იყო გამაგრებული ზურაბის ლაშქარი, დასვენებული და თბილ ბინებში შეფარებული. სააკაძემ აქ შეაჩერა თავისი დაქანცულ-დაღუშული ჯარი, მოატანინა ბლომად შეშა და ააგზნებინა რამდენიმე ალაგს დიდი კოცონი კაცისა და ცხენის გასაშრობ-გასათბობად.

მზვერავთა მეოხებით ზურაბმა მაშინვე გაიგო დიდი მოურავის მოსვლა. იგი აშკარად ხედავდა, თუ რა საშინელ ყოფაში იყო ეს ახლადმოსული ჯარი. ამიტომ იმ წამსვე დაძრა თავისი ლაშქარი და გამგელებით შეუტია სააკაძის დაქანცულ მხედართ. შეიქნა ხელჩართული ომი, ბრძოლა მედგარი და საზარელი... ქართველები დაერივნენ ერთიმეორეს გასაჟლეტად. ქართველის მახვილი ჰკლავდა ქართველს. სოველი მიწა წითლად იღებებოდა მოძმეთა სისხლით. ზეცა თითქოს მოთქვამდა ამ საშინელებას და ძირს უშვებდა თქეშსა და ღვართქაფს. აი, ამ დროს იყო საჭირო დიდი მოურავის ბელადობა, მისი მკვექარე ხმა და მედგარი იერიშები. და სწორედ ამ დროს აუჩვილდა გული ამ დევკაცს. მან ძირს დაუშვა ამოწვდილი ხმალი; ვერ გაიმეტა ზურაბის ჯარი, ვერ აღმართა ქართლ-კახთა წინააღმდეგ ის მახვილი, რომელიც თითქმის სამი ათეული წლის მანძილზე ელეტდა ოვერთ მტრებს — ირანელთ და თურქებს.

ეს იყო დიდი მოურავის უდიდესი შეცდომა. ამას კარგად გრძნობდა თვით იგი; მან იცოდა, თუ რა ხიფათში აგდებდა ამ გულუბრყვილობით თავის მხედრობას და მით ერის მოძავალს. მაგრამ, სავალალოდ, გმირის გულმა ამჟამად სძლია გონებას. მან მოახდინა საჭირო განკარგულება ბრძოლის შესახებ და თვით შეეფარა კარავს, რომ არ ემზირა მოძმეთა შორის ბრძოლისათვის. ხოლო ჯარის გასამხნეველად შემოსა თავისი ჩაფხუტითა და ჯუბა-ჯავშნით მესხეთის სახელოვანი ვაჟკაცი, ბუმბერაზი დავით გოგორიშვილი, მისცა თავისი იარაღი, შესვა თავის ცხენზე და უბრძანა ჯარის სარდლობა. გოგორიშვილი თავისი რაზმებით საოცარი რიხით ეძგერა ზურაბის ლაშქარს, რომელიც აირია მის დანახვანზე, რადგან ორივე მხარემ შიილო იგი დიდ მოურავად. გოგორიშვილის სიმამაცემ და თავგანწირვით ბრძოლამ მეტად გაამხნევა სააკაძის ჯარი. ამან მედგარი იერიშით შეუტია ზურაბის ლაშქარს და რამდენიმე ალაგს არია კიდევ მისი რაზმები. მაგრამ ამ დროს მოხდა ერთი საშინელი რამ: ვერაჯ ზურაბ ერისთავს წინასწარ ჩაესაფრა ერთ ფარულ ალაგას სააკაძისათვის მკვლელნი ედიშა ვაჩნაძის თაოსნობით. მათი მიზანი იყო რითიმე მოეტყუებინათ დიდი მოურავი და მოეკლათ. ასეც მოხდა და ზურაბმა ოსტატურად წაიტყუა იმ ალაგისაკენ გოგორიშვილი მარტოდ და შემოახვია მკვლელნი.

—შესდევ მოურავო! — შესძახა მოხევე კობიაშვილმა და ჩასცა შუბი. შეთქმულებმა დაუშინეს. გოგორიშვილს შუბი და ხმალი, მაგრამ იარაღი ვერას აკლებდა მის მაგარ ჯავშანს. მესხეთის გმირი ტრიალებდა მათ შორის და ლომივით იბრძოდა. მან იმსხვერპლა კიდევ რამდენიმე კაცი. ამ დროს უცებ დაეტაკა მას გვერდიდან ხმალამოწვდილი ზურაბ ერისთავი, შემოკჭრა მახვილი იმ ალაგს, სადაც არ იყო ჯავშნით ფარული და გააგდებინა ბარკალი. გულწასულ გოგორიშვილს დაესივნენ შეთქმულები და მთლიანად აჰკაფეს სრული რწმენით, რომ ჰკლავდნენ დიდ მოურავს.

— მოჰკლეს გიორგი! მოჰკლეს დიდი მოურავი! — ეს ხმა გლოვის ზარით მოედო სააკაძის ჯარს. იგი აიტანა შიშმა.

მას მოუკლეს დიდი სარდალი, გმირი, მოთავე. ამ ცნობამ სრულიად დასცა ბრძოლითა და ცუდი ამინდით დაქანცული მხედრობა. იგი აირია და დაიხია უკან. პირიქით, ამ ამბავმა უზომოდ ააფრთოვნა ზურაბის ჯარი. იგი საოცარი იერიშით მიესია მტერს. ამ გაღალღებულ ლაშქარს წინ უძღოდა ვერაგი ზურაბი, მოაპობდა მტრის რაზმებს და ხმლით კაფავდა კაცს და ცხენს.

დადგა განკითხვის უამი. სააკაძე აშკარად ხედავდა, რომ აგებდა ბრძოლას და მით ბოლო ეღებოდა მის უზუნაეს მიზანს. კიდევ, მცირე ხანი და გათავდებოდა ყველაფერი გამწარებული გმირი წამოვარდა, როგორც შეშლილი, ელვის სისწრაფით მოახტა ცხენს, იძრო ხმალი და უჩაფხუტოდ, პირახდილი შეეარდა ზურაბის ჯარში. ცის გრვენივასავით მოედო მიდამოს მისი მკექარე ხმა. ერთი შეტევით არია ერთმანეთში მტრის რაზმები. ადვილად შესაძლოა მოურავის გამარჯვებით დამთავრებულყო საქმე, რომ ხელი არ შეეშალა ორ გარემოებას: ეს იყო თეიმურაზი და ჩასაფრებული მკვლელნი. ცხარე ბრძოლის დროს სააკაძეს წინ შეეფეთა თეიმურაზ მეფე მცველებით, მან მოკურცხლა გმირის დანახვაზე, მოურავს შეეძლო დასწეოდა და მოეკლა იგი, მისი მოკვლით კი თავზარს დასცემდა ივერთა ლაშქარს. მაგრამ, სავალალოდ, აქაც დასძლია გულჩვილობამ. სააკაძემ ვერ გაიმეტა იგი: მან ვერ გაიმეტა მოსაკლავად ვერც თეიმურაზი და ვერც ზურაბი, ამათ კი ორჯერ გაიმეტეს იგი და ახლაც დაასხეს თავზე მკვლელნი.

მოურავის დანახვამ და ასეთმა უმაგალითო იერიშებმა განცვიფრებაში მოიყვანა ორივე მებრძოლი მხარე, შედრკა ზურაბის მხედრობა, გამხნევდა სააკაძის ჯარი. ზურაბმაც იხილა გმირი, მიხვდა თავის შეცდომას. მან სასწრაფოდ მიუსია დიდ მოურავს შეთქმულნი.

— შესდეგ, მოურავო! — შესძანა გმირს ედიშა ვაჩნაძემ და მოუქნია ხმალი. სააკაძე დაიჭრა მკლავში, გამწარებულმა მაშინვე ჩამოაგდო ცხენიდან ედიშა ვაჩნაძე და გაუპო თავი. გმირმა სასწრაფოდ გაფანტა შეთქმულნი და კვლავ შეუტია მტრის რაზმებს.

უჯავშნო მოურავი კიდევ მძიმედ დაიჭრა ორ-სამ ალაგას. ის იცლებოდა სისხლისაგან. კიდევ ორ-სამჯერ გაიჭნია ხმალი და გულწასული დაეცა ძირს. ერთგულმა ვაჟკაცებმა სტაცეს ხელი, უმაგალითო თავგანწირვით გააპეს ზურაბის ჯარი და გაიყვანეს სამშვიდობოს.

გალაღებულმა ზურაბმა მედგრად შეუტია უსარდლოდ დარჩენილ იმერთა მხედრობას...

გადარჩა სიკვდილს დიდი მოურავი, ზოლო დამარცხდა მისი ჯარი.

გმირის გულჩვილობამ იმსხვერპლა დიდი მიზანი. შეწყდა მედგარი ბრძოლა. უსარგებლოდ დაიღვარა მოძმეთა სისხლი. ბაზალეთის ტბის ზვირთებში ჩაიხრჩო საქართველოს ბედის ვარსკვლავი...

XXXV. მქსოღია

ბაზალეთის საბედისწერო მარცხს შემდეგ გიორგი სააკაძეს აღარ ედგომებოდა სამშობლოში. ის უნდა გასცლოდა დროებით მაინც მთელი ოჯახით საქართველოს და შეჰფარებოდა რომელიმე მეზობელ მძლავრ სახელმწიფოს. ასეთი იყვნენ იმ დროს ირანი და თურქეთი. ამათ-კი სისხლი სწყუროდათ დიდი მოურავისა. როგორც ვიცით, 1609 წლის ივნისში ცხირეთ-ტაშისკართან სააკაძემ გაანადგურა თურქთა ლეგიონები 30 ათასი მებრძოლი და გადასცა ქართლის სამეფო ხაზინას ალაფად ჩაგდებული უამრავი განძი, ლარი და სხვა ქონება. ხოლო პირველ გახიზენის დროს ირანში, როგორც შაჰის ჯარების სარდალმა, იმავ თურქეთს მიაყენა უსაზღვრო ზიანი: სასტიკად დაუმარცხა რამდენიმე ალაგას დიდი ჯარები, ჩამოაგლიჯა ერაყი, ქურთისტანი, შუშა-ერევანის სახანოები და მიასაკუთრა ირანს. ამრიგად წააიოკა ზონთქარი ირანის შაჰის წინაშე. სააკაძის ასეთ მოქმედებას განა დაივიწყებდა ოდესმე ოსმალეთის სულთანი?!

დიდი მოურავი ვერ გაბედავდა წასვლას ერანში, სადაც იგი ერთ დროს ზეიმითა და დიდებით მიიღეს. როგორც ვიცით, მან მთლიანად გაანადგურა შაჰის მთავარი ძალები, ივერიაში შემოსულნი 1623 — 24 წლებში, პირველად ხარება დღეს, შემდეგ მარაბდის ველზე და ბოლოს მრავალი სათარეშო თავდასხმით ქართლსა და ჯავახეთში. ამ სახით ხანგრძლივად დაასუსტა დიდი ირანი, მოსპობას გადაარჩინა თა-

ვისი სამშობლო და იხსნა იგი ერანის ბრწყყალებიდან. ხოლო ამავე დროს ასეთი მოქმედებით უნებლიედ დიდად ასიამოვნა თურქეთს. შაჰაბაზი ვერ ინელებდა სააკაძის ასეთ „საშინელ ლალატს“ და მზად იყო თავისივე კბილებით დაეგლიჯა იგი.

მოურავი ვერ შეეფარებოდა აგრეთვე ვერც იმერეთს ან კოლხეთის რომელიმე მთავრის საფარს, რადგან იმერთა ჯარი სანახევროდ დაილუპა ბაზალეთის ტბასთან ბრძოლაში. თანაც კოლხეთში არ მოასვენებდნენ მისი უძინარი მტრები — ზურაბი და თეიმურაზი.

დიდი მოურავი საგონებელში ჩავარდა. როგორც საუკეთესო დიპლომატმა, ცხოვრებაში კარგად ჩახედულმა და ადამიანის სულის ღრმა მცოდნემ, — მალე მოისაზრა ყველაფერი: მთელი ოჯახით და ორმოცამდე საუკეთესო ქართველი ვაჟკაცით გაუდგა გზას თურქეთისაკენ, ხოლო წინასწარ გაუგზავნა სულთანს დიპლომატიური ფანდებით შეზავებული უსტარი, აუწყა თავისი ვითარება და სთხოვა თავშესაფარი.

მიუხედავად საშინელი ხლართისა, რაშიაც ისტორიის ჩარხის უკუღმა ტრიალმა ჩააგდო გიორგი სააკაძე, იგი მაინც არ კარგავდა იმედს, რომ შინა თუ გარე ძალებით ოდესმე შეძლებდა რვა ნაწილად დაფლეთილ საქართველოს გაერთიანებას ერთ მძლავრ სამეფოდ და მით აღადგენდა ქართველი ერის ძველ დიდებას. ეს იყო სააკაძის უმთავრესი მისწრაფება, მისი უზენაესი სანატრიონი. მართალია, იგი ამჟამად მეტად მძიმე პირობებში ჩავარდა, მაგრამ ასეთი მდგომარეობა არ აკრთობდა მას.

ამ რწმენით გაუდგა იგი გზას სტამბოლისაკენ. მას უნდა გადაეელო ახალციხე-ზეკარით იმერეთი, გურია-ქობულეთი და შავი ზღვით წასულიყო სტამბოლს. სააკაძე ამ დროს იყო უკვე 45 წლის ვაჟკაცი, მრავალ ომსა და ცხოვრების უკუღმა ტრიალში გამობრძმედილი. ამიტომაც ამ გაფოლადებულ ადამიანს ლხინად უჩანდა ყოველი ქირი და ვარამი.

სამშობლოდან გასვლის წინაღობებში გმირთან მოვიდნენ ორმოცამდე საუკეთესო ვაჟკაცი და ისურვეს მასთან ერ-

თად წასვლა თურქეთში მთელი ოჯახობით. ესენი იყვნენ განსაკუთრებით დიდი მოურავის უახლოესი მეგობრები და თანამებრძოლნი: კახაბერ ხერხეულიძე, ელია დიასამიძე, გიორგი ქავთარაძე, თამაზ ქარსიძე, ქაიხარო მუხრან-ბატონი და სხვ. სააკაძეს გაჰყვა აგრეთვე იასე ქსნის ერისთავი; მას ბოლო ხანებში დიდად აუმტერდნენ თეიმურაზ მეფე და მეტადრე ზურაბ ერისთავი, რომელიც მეფესთან დამოყვრების გამო შეიქნა უძლიერესი მებატონე მთელ ივერიაში.

მოურავს გაჰყვა კიდევ მისი ძმადფიცული პაპუნა ვაშაყაშვილი. რაც შეეხება დანარჩენ ძმადფიცულთ — პაპუნა ჩივაძე შეეწირა სათარეშო ბრძოლას, ლომი ჩრდილელი და დავით გოგორიშვილი — ბაზალეთს, ხოლო გელა, მძიმედ დაქრილი ამავე ბრძოლაში, გადამალული იყო მოურავის ნაოლიმამასთან სოფ. ვაშლოვანში, სადაც მას ჰკურნავდა განთქმული ჯარა ექიმი თურმან თურმანიძე.

სამშობლოდან გასვლის წინა დღეებში სააკაძემ ფარულად ნახა ცარო, გრძნობით გამოემშვიდობა, დაუტოვა ბლომად ფული, უსურვა მალე მორჩენა და დაევალა მასთან თურქეთს მისვლა, როგორც კი კარგად გახდებოდა.

ცარომ გულში ჩაიკრა დიდი მოურავის მარჯვენა ხელი, ეამწორა გრძნობით და აღუთქვა ყველაფრის შესრულება.

შემდეგ სააკაძემ მოახდინა განკარგულება, სასწრაფოდ მოემზადა ოჯახობით, თანმხლები ქართველებით და თვალცრემლიანი განშორდა ესოდენ ნაამაგარ ივერიას. იმათ ცხენებით გასწიეს ტაშისკარით ახალციხისაკენ, რათა გადაეგლოთ ოცხრეს გზით ღადოს (ზეკარის) უღელტეხილი, იქიდან კი ხანისწყლის ხეობით გაეგლოთ იმერეთზე, შემდეგ გადაეჭრა გურია და ქობულეთი, მიეღწიათ ბათომამდე, სადაც უნდა დაეჭირავებინათ გევი სტამბოლში წასასვლელად.

თუმც უკვე შემოდგომის მიწურული იყო. მაგრამ თბილი, მზიანი დღეები დაიჭირა, რაც არაიშვიათი მოვლენაა კოლხეთში. ერთი კვირის აჩქარებული მგზავრობით ლტოლვილი ქართველნი უკვე მიუახლოვდნენ შავ ზღვას.

ბურუნტაბიეს პაწია კონცხთან მიყუყულა პაწაწინა ქალაქი ბათომი და კოპწიად გამოიყურება დიდებულ პონ-

ტოს კამკამა ზვირთებს შორის, რომელიც ფირუზისფრად
ერთყემის სამი მხრივ, ხოლო ჩრდილო-აღმოსავლეთით გო-
როზად ამართულა აჭარის საკმაოდ მაღალი მთები ფიფქ-
თოვლით უკვე ოდნავ ფარული.

ბათუმის ბოლაზი სავსეა ამჟამად ცარიელი და დატვირ-
თული სხვადასხვა ზომის ნავ-ხომალდებით, როგორცაა:
ნუშა, კაპანო, კარაპა, კარქაპა, ხომალდი და კატარა.

აქვე მახლობლად ნურიის ბაზარზე გურიის თავად-აზნა-
ურთ, ფირალებს და აჭარა-ქობულეთის ბეგებს ბლომად მო-
ეყვანათ მოტაცებული ან ძალით წართმეული სხვადასხვა
ასაკის ქალ-ვაჟნი და ურცხვად ჰყიდდნენ სომხისა და
ლაზ-თურქთა ჩარჩ-ვაჭრებზე, რომლებიც ბლომად ფუსფუ-
სებდნენ აქ ამ დროს, მუშტრის თვალით და ხელის ფათურით
უხეშად სინჯავდნენ. გასაყიდად მოყვანილ ხელფეხგაკრულ
კოლხეთის მშვენიერ ქალ-ვაჟთ. ყურთასმენას ბზარავდა და
სულს აშფოთებდა გასაყიდ და გაყიდულ ტყვეთა უნუგეშო
მოთქმა-ტირილი, რომელთაც გულქვა ვაჭრები ტლანქად
მიათრევდნენ ბოლოზისაკენ და შოლტით ხელში ცხვრის
ფარასავით ერეკებოდნენ იალქნიან ხომალდებზე. ამავე
ბაზარზე მშობლები და ჭირისუფალნი უნაყოფოდ დაეძებ-
დნენ ყაჩაღთა მიერ გატაცებულ თავიანთ შვილებსა და ახ-
ლო ნათესავთ, უიმედონი მოთქვამდნენ მწარე ცრემლებით.

ამ დროს ბაზრის თავში შეიქნა საშინელი წივილ-კივილი.
ორი გულქვა ადამიანი ხელის კვრით მიათრევდა ხელებგაკ-
რულ და ერთიმეორეზე გადაბმულ ორ მშვენიერ მოზარდს,
14-15 წლის და-ძმას. ეს საცოდავი არსებანი გაჰკიოდნენ სა-
შინელი ხმით, იგლეჯდნენ თმებს და იხოკდნენ სახეს.

— შეგვიბრალე, ბატონო, ნუ გაგვყიდი! ნუ მიგვცემ ხელ-
ში სატანჯავად იმ ურჯულოებს! ნუ გაგვყიდი სათათრეში!
აქვე დაგვხოცე და იქ ნუ დაგვკარგავ! შეგვიბრალე ობლები,
გაფიცებთ შენი მიცვალებულების სულსა! გვედრები, წა-
გვიყვანე ისევ ჩვენს გურიაში... მონად გაგიხდებით... შენზე
ვილოცავთ, შეგვიბრალე!

ამ სიტყვებთან ერთად ორივე მოზარდი უკოცნიდა ხე-
ლებს ერთ მრისხანე სახის შავწვერა თავადს და ღვრიდნენ

ცხარე ცრემლებს. ეს მხეცი არსება კი უხმოდ მიათრევდა ორთავეს ბაზრისაკენ, თავისი შვილის, ოცი წლის ქაბუკის, დახმარებით.

ამ ყმაწვილთა უზომო გამწარებამ და უმანკო სიმშვენიერემ მიიზიდა უამრავი ხალხი და სიბრაღულით აავსო მრავალთა გულნი. აქვე მოვიდა დიდი მოურავიც თავისი ცოლ-შვილითა და ქართველებით. ამათაც იხილეს ეს საშინელი სურათი და დაეწვათ გული ამ მოზარდთა სიბრაღულით. აქ, ნურიის ბაზარზე, მხეცად ქცეული გურული თავადი ცხვრებივით ყიდდა თავის ყმებს, კარგავდა მათ შორეულ თურქეთში. ამავე დროს აეღო კიდევ ბევრი ფული, რადგან ეს ყმაწვილნი თავის სინორჩე-სიტურფით წარმოადგენდნენ ძვირფას საქონელს. ლაზ-თურქთა ჩარჩები ძერასავით დასტრიალებდნენ ამ ორ მშვენიერ მოზარდს ხელში ჩასაგდებად.

დიდი მოურავი დინჯად მიუახლოვდა გამყიდველს და შეეკითხა:

— აღამიანო, ნუთუ არ გებრალეხა ეს უმანკო, მშვენიერი ობლები, რომ ასე ცხვრებივით ჰყიდი ოსმალეთში?! რას ერჩი, ასეთი რა დაგიშავეს ამ ბავშვებმა?!

მხეცმა თავადმა ახედა უცებ მრისხანედ და სწაღდა უკმეხად ეპასუხა, ხოლო რა დაინახა მის წინ მდგომარე მამაცი გოლიათი, იარაღში ჩამჯდარი, რომლის არწივის თვალები ხვრეტდნენ მას, შეერთა საშინლად და დარცხვენით უპასუხა:

— აბა რაი ექნა, ბატონო! ბარემ ბრ მინდა გავყიდო ეს ცოდვის შვილები, მარა გაჰირვება მატანს ძალას. ამათი ნენე და ბაბა სახადით დაიხოცნენ და მათი დამარხვა ფული დამიჯდა, ვალებში ჩავვარდი. პაწა ხანი მადროვეს; ახლა კვლავ მომდგომიან და დანას მაჭერენ ყელში, ავი და ჩვენი ფარა მოგვეციო, თვარა ასე და ასე გიზამთო. აბა საიდან უშოვო კილავ, ეს ფარა!

ამ სიტყვებით იცრუა თავადმა, რათა როგორმე გაემართლებინა თავისი ველური საქციელი.

— მაშ არ იშლი გაყიდვას?

— არა, ბატონო, გადაწყვეტილი საქმეა, უნდა გავყიდო ორივე დაძმა, — იყო პასუხი.

— რას აფასებ ორივე ყმაწვილს?

— ათ ოქროდ *, ჩემო ბატონო. ნაკლებ არ შემიძლია. ხომ ხედავთ, როგორი ლამაზებია! მთელს გურიაში ვერ ნახავთ ბადალს, ანგელოზებია, ჩემო ბატონო, ნამდვილი ანგელოზები! — და დაუწყო ქება თავის ყმებს, როგორც გასაყიდ ბატკნებს.

— აჰა ფული! გაუხსენ მალე ხელები, ეს ყმაწვილნი დღე-იდან ჩემია და შვილივით გავზრდი ორთავეს, თუ ცოცხალი დავრჩი.

ამ სიტყვებთან ერთად დიდმოურავმა ამოიღო ქისა და ჩაუთვალა ფული უგულო თავადს, ამავე დროს მისმა შვილმა შეუხსნა ხელები ყმაწვილებს. ისინი მიცვივდნენ სააკაძეს და დაუკოცნეს ხელები და მუხლები.

მოურავმა და მისმა მეუღლემ გულში ჩაიკრეს ეს უმანკო მოზარდნი, დაუკოცნეს სახე და დაამშვიდეს ტკბილი სიტყვებით.

ასეთი აღმაშფოთებელი სურათები მრავლად იყო ამ სამარცხვინო ნურის ბაზარზე თითქმის ყოველდღე. აქ იყო ერთი გაუთავებელი ვაჭრობა, ტყვეთა ყიდვა-გაყიდვა და წივილ-კივილი.

საშინელება იყო ამ შემზარავი სურათის ხილვა. მოურავისა და მის მხლებელთა გულმა ვედარ გაუძლო ასეთ საზიზღარ სანახაობას. აქ, ამ საოცნებო ბუნების წილზე, ქართველი ჰყიდდა ქართველს, აქ ანგართმოყვარე მოძმე-იუდა თავის მოძმეთა სულსა და ხორცში იღებდა ვერცხლს, ოქროს, ბინძურ ქანქარს...

ასეთივე საზარო სურათი იყო იმ ბნელ ხანაში კოლხეთის სხვა ბოლოზებშიაც, მაგ. ფოთში, ყულევში, ოჩემჩირეში, სო-

* იმ დროს ერთი ოქრო (თათრული ლირა), ანუ ცხრა მანეთი, შეიცავდა საგრძნობ საღირაღს, ამ ფასად შეიძლებოდა ორი ძროხის ყიდვა.

ხუმში, ბიჭვინთაში და სსე. ხოლო ბათომსა და ართვინ-გონიაში აწასობით იყიდებოდა იმერეთ-გურია-აქარა-ქობულეთიდან გატაცებული ტურფა ქალ-ვაჟნი, დანარჩენ ბოლოზებში-კი ოდიშისა და აფხაზეთის კიდევე უფრო მშვენიერი ძე და ასულნი. აქედან წაყვანილი ულამაზესი ქალ-ვაჟნი მალალ ფასებში იყიდებოდნენ სტამბოლ-ტრაპიზონის და ქაირო-ბაღდათის დიდ ბაზრებზე.

ამ სამარცხვინო ვაჭრობას აწარმოებდნენ თავადები და აზნაურები. წყეულ ვერცხლსა და ოქროს ცივ ლოდად გარდაეჭმნა მათი გული. ასეთივე საზარო სურათები იყო იმ ბნელ ხანაში ქართლ-კახეთშიაც, საიდანაც საუკეთესო ქალ-ვაჟნი ათასობით იგზავნებოდნენ გასაყიდად ირანში შირაზისა და ისპაან-თეირანის ბაზრებზე.

აი, სანამდე გაიხრწნა თავად-აზნაურობა.

ნურიის ბაზრიდან ივერნი ბოლოზისაკენ გაეშურნენ. აქ მრავალ ხომალდს შორის თვალში მოუვიდათ ერთი, ყველაზე უფრო დიდი, ორანძიანი ხომალდი, რომლის პატრონი სასიამოვნო სახის ქარმაგი მოხუცი ლაზი, იჯდა გემის ბაქანზე ფეხმოკეცით და დინჯად შეექცეოდა ყავასა და ნარგილეს. ხომალდზე ფუსფუსებდნენ ხელმარჯვე მეზღვაურნი. დაინახა თუ არა მისკენ მიმავალი იარაღსმული დიდებული სახის აზოვანი ივერნი, მოხუცი ლამაზი ჰუსეინი მაშინვე წამოდგა, მარდად გადმოხტა ხიღზე, გამოვლო იგი ჰაბუკური სისწრაფით, გადმოვიდა ნაპირზე და ჰკადრა ახლადმოსულთ მდებალი თათრული სალამი გულზე ხელებდადებით.

დიდი მოურავი შეეკითხა ლაზს, შეუძლია თუ არა ყველანი წაიყვანოს სტამბოლს. ლაზმა სიხარულით მისცა დასტური და არც საფასი ითხოვა ბევრი. ისინი მორიგდნენ და ჩასხდნენ ხომალდში, ხოლო ცხენები დილითვე გაყიდეს ნურიის

ბაზარზე და აღებული ფულით მოიმარაგეს საგზაო საჭირო ნუშლი.

მზე ოდნავ გადახრილიყო, ოდეს ლაზ ჰუსეინას აფრებ-გაშლილი ხომალდი თეთრი გედივით, ნელი ტოტმანით გაუდგა გზას. ქართველებმა უკანასკნელი სალაში ჰკადრეს მარად მშვენიერ კოლხეთს და შეცურეს ზღვაში. ამჟამად მეტად წყნარი პონტო თავის პაწაწა ანკარა ტალღებით ნელა ანანავებდა ხომალდს. იგი თანდათან შორდებოდა ბათომის არეს. ივერნი მისჩერებოდნენ ამ კოლხეთის კუნძულს, ეთხოვებოდნენ ცრემლით სავსე თვალებით და გულის კვნესით.

ყველაზე უფრო წუხდა ის ორი მშვენიერი და-ძმა, რომლებიც ამ დილით შეიძინა ბაზარზე დიდმოურავმა. მათ შეეპარათ კიდევ შიში, ხომ არ მიყვავართ გასაყიდადო, მაგრამ ისინი მალე დაამშვიდა მოურავის მეუღლემ — კეთილმა თამარმა, რომელმაც მიიღო მათზე ზრუნვა და მფარველობა.

ნაპირ-ნაპირ ცურვით და თურქთა ბოლახებში შევლით ორი კვირის შემდეგ მიუახლოვდნენ სატანტო ქალაქს. მზიანი დღეები და ამ დროს იშვიათად წყნარი ზღვა ხელს უწყობდა შორეულ მგზავრობას. განვლეს ბოსფორის მშვენიერი სრუტე და აჰა, გამოჩნდა უცებ ზღვის კეკლუცი მზეთუნახავი, კონსტანტინე დიდის გენიოსობით აღმართული დიდებული ქალაქი, თურქთა მიერ სტამბოლად წოდებული! ფართოდ გაშლილა იგი ტურასებად გორაკთა კალთებზე. ცამდე აწვდილან მუქ-მწვანე წოწოლა კიპარისები და ფერადი მარმარის მინარეტები.

თვით ქალაქის შუაგულში კი ამაყად ამართულა აია სოფიას უზარმაზარი ტაძარი, — ეს ბიზანტიური ხუროთმოძღვრების დიდებული ნაშთი, რომლის წვეროზე ოქროს ჯვრის ნაცვლად ბრწყინავს მუსლიმთ ემბლემა — ნახევარი მთვარე. ამ დიდებული ტაძრის მახლობლად აზიდულა აღმოსავ-

ლური სტილის თურქთა მბრძანებლის თეთრი მარმარის
ვრცელი სასახლე, ანუ სერალი, ფერადი მარმარის მაღალი
კოშკებითა და კიპარისებით გარემოცული. ჩამავალი მზის
ოქროვან სხივებზე ლაპლაპებენ ტაძარ-სერალის და კოშკ-
ძინარეთა ოქროს გუმბათნი.

ია-ვარდისფრად აღვივებულა ზღვისა და ზეცის ნაზი ფე-
რები. ლბილი და თბილი ჰაერი ამშვიდებს გულსა და ატკ-
ბობს სუნთქვას. ნაირ-ნაირი ნაეებით და გემ-ზომალღებით
სავსეა ამ დროს ვრცელი ბოლაზი. თვალს იტაცებს ბუნები-
სა და ხელოვნების სიტურფე ჰარმონიულად შეზავებული.
მზად ხარ უცქირო მარადიულად ამ საოცნებო სიმშვენიე-
რეს. თვალი ვერ ძღვება ფერთა სინაზით, ნაზთა და მურთა
ლივლივ-აღერსით...

XXXVI. ბოსფორის პირას

სტამბოლის ბოლოში სულთნის ბრძანებით დიდ მოუ-
რავს ზეიმით შეეგებნენ იანიჩართა საპატიო რაზმი, ცნობი-
ლი ფაშები, ვეზირები და კარისკაცი, აგრეთვე სტამბოლში
მცხოვრები მრავალი ქართველი, რომელთა რიცხვი იმ დროს
30 ათას კაცამდე აღწევდა. ქუჩები, სახლის ბანები და აივან-
წინგარდები აივსო ცნობისმოყვარე ხალხით. წესრიგს იცავ-
დნენ ხელჯოხიანი ბიშბაშები. ვეზირ-ფაშებმა დიდებით
შიიდეს ივერიის უპირველესი გმირი და სულთნის სახელით
მიულოცეს მშვიდობით მობრძანება. შემდეგ ჩასვეს ყველა-
ნი მდიდრულ ეტლებში, გაატარეს რამდენიმე ქუჩა და მიუ-
ჩინეს ბინად შუაგულ ქალაქში საუკეთესო სასტუმრო, მდი-
დრულად მოწყობილი. მსახურებად აახლეს მრავალი ქეშიკ-
ფარეშნი და შიკრიკნი. აქვე ეძლეოდათ სულთნის მიერ
განწესებული უხვი საუკეთესო ულუფა და ბლომად სახარ-
ჯო ფული. ეს საქმე დავალებული ჰქონდა თვით სულთნის
მთავარ მოლარეს, ანუ ფინანსთა ვეზირს, ახალგაზრდა მა-
მუდ ბეგს (აქარელ ქართველს), ის მალე დაუახლოვდა მო-
ურავის ოჯახს და გახდა მისი სიძე, ცოლად შეირთო სააკა-
ძის ასული — ტურფა ქეთინო.

სამი დღის შესვენების შემდეგ სულთანმა ინება მოურა-
ვისა და მისი ქართველების მიღება სასახლეში.

შუჭდღის ჟამს ეროვნული სამოსით ძვირფასად მორთუ-
ლი და იარაღსხმული ივერნი, სააკაძის მეთაურობით, ღია

სამეფო ეტლებში მსხდარნი, ფაშებ-იანიჩართა თანხლებით მიადგნენ სულთნის თეთრი მარმარის სერალს, ვრცელი ბალით, ფერადი მინარეთებითა და წოწოლა კიპარისებით გარემოცულს. სასახლის წინ მათ შეეგება სულთნის მრავალრიცხოვანი ამაღა და შეუძღვა იშვიათი ხელოვნებით შემკულ ვრცელ დარბაზში. შუაგულ ალაგას ამართულ თეთრი მარმარის ამბიონზე იდგა მდიდრული ფარჩის სალაფარდით ფარული და ფასდაუდებელი თვალ-მარგალიტით მოოქცილი ოქროს სევანი. მასზე ფეხმოკეცით იჯდა თურქეთის ხონთქარი ფადიშაჰი.

ქართველთა შესვლის ქამს გაიხსნა შუაზე ფარდა და ივერთა პატივსაცემად მძიმედ წამოდგა ზეზე უკვე ხანშესული სულთანი, მდიდრულად მორთული. მის მოქანცულ სახეს ამკობდა გრძელი თეთრი წვერი და შავი, ოდნავ მიბნედილი თვალები. მათში მოჩანდა მოდუნებულ ვნებასთან ერთად რაღაც მძიმე სევდა... სულთანს თავს უმკობდა დიდებული ჩალმა-გვირგვინი, უძვირფასესი თვლებით შემკული, ხოლო სულ ზემოთ შუაში კიაფობდა თვალწარმტაც ფერებად, ვით შეიდფერი კამკამა ცისარტყელა, ოდნავ მოლურჯო უზარმაზარი ბრილიანტი, დიდ მოლოლალ წოდებული.

დინჯჯად-მიუხალოვდნენ თურქეთის ბატონს დიდი მოურავი და ორმოცამდე ქართველი, ჰკადრეს მდბალი სალამი. ამავე დროს სააკაძემ შესაფერი სიტყვით შეაქო სულთანი, ადიდა მისი ძლევამოსილება, სიუხვე, სევმაღლობა, სულგრძელობა და უსურვა დღევგრძელი, ბედნიერი სიცოცხლე.

მეტად იამა მოხუც ხონთქარს ეს სიტყვები და უბრძანა მადლობა. შემდეგ სულთანის ბრძანებით დასვეს მის სიახლოვეს დიდი მოურავი და მისი ქართველნი ხარისხის მიხედვით. გაიმართა ტკბილი მუსაიფი, რასაც უფრო საამოდ ხდიდა იქვე პაწაწა მაგიდებზე უხვად დალაგებული თურქული სურნელოვანი ყავე, ხილი, პუნგია, რახათლუხუმი, შაქარლამა და სხვა მრავალფერი ტკბილეული.

საუბარი ეხებოდა უმთავრესად საქართველოს ამბებს, ირანსა და კავკასიონის გადაღმა ხალხებს, აგრეთვე „ურუ-

სებს“. ეტყობოდა, რომ სულთანი დიდად ჯავრობდა ერაყ-ქურთისტანის დაკარგვას და მათ შაჰაბაზის ხელში ჩაგდებას ამ ოცი წლის წინათ თვით მოურავის მეოხებით. ახლა კიდევ აჯანყებოდნენ მცირე აზიაში მამაცი ხალხი თოხატნი და იქით კიდევ უფრო მამაკი ხალხი — არაბნი, აგრეთვე განდგომოდა აზრუმის ფაშაც; იგი მოეხიბლა შაჰაბაზის ოქროებსა და დაპირებებს. სულთანს გაეგზავნა უკვე დიდი ჯარები თავისი სიძის (დის ქმარის) ვეზირ-აზამის მთავარსარდლობით და დაეწყო ბრძოლა, მაგრამ უნაყოფოდ, — ორთავე მხარეს მარცხდებოდნენ თურქთა ჯარები; აშკარად ეტყობოდა, რომ სულთნის სიძეს ვერ გამოეჩინა სამხედრო ნიჭი, უნარი და გამჭირახობა, ეს გარემოება კი დიდ სევდა-კაეშანში ხვევდა მოხუც სულთანს. სწორედ ამიტომაც უზომოდ გაახარა იგი ამ მძიმე დროს ივერიის გმირის გადმოხვეწამ მის კარზე თავშესაფარად. დიდი მოურავის სახელი-კი გრგვინავდა მთელ აზიაში.

თვით სულთანმა საკმაოდ იწვინია სააკაძის სამხედრო უნარი და გენიოსობა.

იმ ეამად ფრიად საჭირო იყო მისთვის დიდი მოურავის მკვეთარე ხმალი.

ამიტომაც სულთანი მიეცა უზომო სიხარულს, როს შეიტყო დიდი მოურავის ექსორია და სტამბოლისაკენ გამომგზავრება. ამის გამო მიიღო სააკაძე ასე მეფური დიდებით. დიდ იმედებს ამყარებდა მასზე ბებერი მელა — სწადდა დიდ მოურავთან მოლაპარაკება ფრიად საიდუმლოდ.

ორი დღის შემდეგ სულთანი მართავს სერალში დიდებულ ნადიმს. ვრცელ აივანზე გაშლილ სუფრას, სასმელსაჰმელით აფერადებულს, ამკობენ ივერიიდან გადმოხვეწილი ლამაზი, ახოვანი და დარბაისელი ქართველნი, ხავერდის ფერადოვან ქულაჯებში გამოწყობილნი. სულთანის ახლოს ოქროს ტახტზე ზის დიდი მოურავი და დინჯად ესაუბრება თურქეთის მბრძანებელს. ლხინს აცხოველებს აღმოსავლური საკრავნი და სიმღერები, მუტრიბთა მიერ საამოდ შესრულებულნი, აგრეთვე ვნების აღმძვრელი როკვა-შუშპარი.

თავდება ნადიმი და აჰა, აივანს ქვემოთ, ვრცელ მოედანზე, იმართება თურქთა საყვარელი შეჯიბრება — ქილაობა. ზურნა უკრავს საქიდაოს. კეთდება დიდი წრე. ბიძმაშები იცავენ წესრიგს. ამ დროს წრეში შეეარდება გაცოფებული ბულასავით ბუმბერაზი ქაბუკი თურქი; მისი წელზევით შიშველა სპილენძის ფერი ტანი, ცხერის დუმით გაზიპული, ბზინავს მზის სხივებზე. ის არის მთელ თურქეთში ფრიად განთქმული უპირველესი მოჭიდავე ალიმი. ზურნის ხმაზე თურქი შლის ზორბა მკლავებს და უშნოდ უვლის დავლურს. შემდეგ უახლოვდება წინგარდს და ემხოზა სულთნის წინაშე, როგორც უკანასკნელი მონა, დგება და იწვევს საქიდაოდ ფალავანს.

გავიდა კიდევ რამდენიმე დღე. მიუხედავად ნოემბრის მიწურულისა, მშვენიერი დარები იდგა. ხასხასა მზე ხვევდა დიდებულ ქალაქს ოქროვან სხივებში. ნელინელ ანანაევებდა თავის კამკამა ფირუზა ზვირთებს ტურფა ბოსფორი. ცისა და ზღვის ლაყვარდი უჩინარი ხაზით შეწნოდა ერთიმეორეს. მათ ბზარავდა ზღვაში ახლადჩატურებული დიდი მნათობის მოწითალო შუქი და ია-ვარდისფრად აფერადებდა მომხიბლავ დაისს.

აი აქ, ბოსფორის პირას, სევდიანი სახით სეირნობდნენ საღამო ეამს ივერთ ლტოლვილნი და იგონებდნენ ობლად შთენილ თავის სამშობლოს. აქ, ამ ზღვის პირას. სააზო გოცებით შეცქეროდნენ მათ უცხო ტომები — თურქნი, ბერძნები, არაბ-მისრელნი, ჰაიკნი, ევროპის ხალხნი და ღიმილით აძლევდნენ საღამს „დიდებულ გურჯსა“, მის ასაბიას. იმად ხიბლავდა ივერიელთა აზოვანება, გამირული სახე. იშვიათი სილამაზე და მიმოხვრა დარბაისლური.

ერთი კვირის შემდეგ ივერნი ეწვივნენ სტამბოლშივე ქართველ კათოლიკეთა დიდ მონასტერს, რომლის წინამძღვარი პატრი ნიკოლო მთელი კრებულთა აღტაცებით შეეგება. მათ ალაყაფის კარებთან და მიმართა ქართულად სააკაძეს მშვენიერი სიტყვით:

— უზენაესად ბედნიერი ვარ, როს მზერენ ჩემი თვალე-ბი ქართველი ერის დიდებას და ივერიის ბევრჯერ გადამრჩენს დაღუპვისაგან, უდიდეს სარდალს. დიდ მოურავს! ე-

თილი იყოს თქვენი მობრძანება მამაცი თანამოძმენით ჩვენს წყნარ სავანეში! იკურთხოს შენი მძლავრი მარჯვენა და შენი ბასრი ხმალი, დიდო ქართველო! უკვდავ ჰყოს ღმერთმა შენი სახელი უკუნისამდე!

ამის პასუხად სააკაქემ შემდეგი სიტყვით მიმართა მონასტრის წინამძღვარს:

— მოხარული ვარ ფრიად, რომ ვმზერთ მუსლიმთა დედაქალაქში თქვენი მონასტრის სახით ქართველი ერის სარწმუნოება-განათლების კანდელს, ხოლო შენი სახით — მის ღირსეულ ხელმძღვანელს. მოხარული ვართ ფრიად, როს ამ შორეულ ბოსფორის პირას გვესმის შენს ბაგეთავან, სულიერო მოძღვარო, ტკბილი, საამო ქართული ენა. სჩანს, რომ ქართული სული ჰგებებს და ღვივის აქაც, ამ უცხო მხარეს, და აფრქვევს თავის სითბო-სიამეს სამშობლოდან ძალით თუ ნებით განშორებულ რამდენიმე ათიათას ქართველს. ქება და დიდება იმ ქართველთ, რომელნიც არ ივიწყებენ შორეულ ქვეყნებშიაც კი თავის ენას, სჯულს და მწერლობას, ზნე-ჩვეულებას და თავის ტურთა პატარა სამშობლოს და რომელნიც ცოცხლობენ თავისი მშობელი ერის კირით და ლხინით, მისი ლტოლვით და მისწრაფებით...

ამის შემდეგ წინამძღვარმა თავდაბლად შეიწვია დიდი მოურავი მისი თანმხლებნით მონასტერში, დაატარა და აჩვენა ბევრი რამ საგულისხმო, მათ შორის საუცხოოდ მოწყობილი ქართული სკოლა და სტამბა, სახელოსნო, სამკურნალო, ქსენონი, ხანაგა და სხვ.

აქ პირველად ცვენეს დიდ მოურავმა და მისმა მეგობრებმა, რომ ქრისტიანად დარჩენილ სტამბოლელ ქართველთ, ათიქმის ყველას ჰქონდათ მიღებული კათოლიკთა სჯული, უმთავრესად პოლიტიკური მოსაზრებით, რადგან დასავლეთ ევროპის მორიდებით აქ, თურქეთში, სრულიად არ სდევნიდნენ კათოლიკობის მიმდევართ, აგრეთვე არც სომხების რჯულს. ამიტომაც იყო, რომ დიდი მესხეთის (განსაკუთრებით-კი ახალციხე-ჯავახეთის) ქართველობამ, რომელთაც არ ისურვეს მუსულმანობა, მიიღეს ან სომხის რჯული, ან კათოლიკობა.

საკაცემ უხვი შეწირულება გაიღო მონასტრის სასარგებლოდ, რითაც ფრიად ასიამოვნა წინამძღვარს და მიიღო მისგან დიდი მადლობა. მანვე გააცნო იქ განათლებული იტალიელი პატრი ქრისტეფორე კასტელი, რომელმაც შემდეგ დახატა შავი ფანქრით გვირის ესკიზი ზეწარწერით ლათინურ ენაზე: „დიდი მოურავი, საქართველოს უძლიერესი მთავარი, ამჟამად ღალატით დევნილი“ და სხ. *

ორი დღის შემდეგ ხონტქარმა მიიწვია სერალში დიდი მოურავი, ჩაიკეტა მასთან ერთად თავის საიდუმლო სენაკში, მოისვა ტახტზე გვერდით, დაუყვავა ტკბილად და ანუგეშა იმ საშინელი უმადურობის გამო, რაც შეემთხვა გვირს თავის სამშობლოში. შემდეგ მიუბოძა აზრუმის სიახლოვეს მრავალი დაბა-სოფელი, ციხე-ქალაქი, ვრცელი ტყე და მამული, აგრეთვე მდიდარი განძი და დიდი მოძრავი ქონება. დაჰპირდა კვლად მრავალ წყალობას. ასევე უხვად დააჯილდოვა მასთან ჩასული ქართველებიც.

სულთანის ასეთი სიუხვე შემთხვევითი არ იყო. მას სურდა 'გამოეყენებინა სააკაძე. სულთანმა დიდ მოურავს ამცნო ომის ამბები მცირე აზიასა და არაბისტანში, აზრუმის ფაშის განდგომა, თავისი სიძის ვეზირ აზამის უნიჭობა და თურქთა ჯარების ზედიზედ დამარცხება ორივე ალაგას.

— ამ უამად კი, ამ მძიმე პირობებში ჩავარდნილს, თვით დიდმა ალაჰმა, — იკურთხოს მისი სახელი, ინება და გამოგზავნა შენ ჩემდა საშველად. მწამს, დიდო გვირო და უძლეველო სარდალო, რომ შენ ადვილად შესძლებ ყოველივეს და თვით სასწაულსაც ჩაიდენ. შენ ჩაუდგამ ჩემს მხედრობას გვირობის სულსა, დამიმარცხებ მტერსა და მოღალატეებს, აღადგენ ოსმალეთის ძველსა დიდებას. ჩემი გუ-

* დიდი მოურავის ესკიზი რომის სიძველეთა არქივში ამ 22 წლის წინათ იპოვა განათლებულმა ქართველმა პატრმა და ისტორიკოსმა მიხეილ თამარაშვილმა (თამარატიმ). მან იმავე წელს გამოუგზავნა ამ ესკიზის ასლი ამ სტრიქონების დამწერს. ეს ესკიზი 1912 წელს დაერთო ჩემს „ქართველი ერის ტრაგედია მე-17 საუკუნეში“ და ამჟამად ერთვის ამ ისტორიულ რომანს.

ლითაღი თხოვნაა კიდეც, დიღო სარდალო, არ ჩამატანო საფლავში იმ ბებერი მელასი, ყეინის ჯავრი. შენი ძლიერი მკლავით და ბასრი ხმლით გთხოვთ და გაფიცებ დამიბრუნო ერთ ღროს შენივე მარჯვენით წართმეული და შაპზე გადაცემული დიდი ერაყი ქალაქ ბაღდადით და ქურთისტანი. და თუ ამეებს შემისრულებ, შენ იქნები მაშინ მთელ ოსმალეთში ჩემს შემდეგ პირველი კაცი, შენ გაგზდი დაპყრობილი ქვეყნების ემირად, უხვად აგავსებ ჯილდო-ქონებითა პატივ-დიდებით...

ამ სიტყვებით დააბოლოვა თავისი სურვილი ბებერმა მელამ.

თურქთა უზენაეს ბატონთან საუბრის ღროს ივერიის გმირს თავში გაუელვა ერთმა დიდებულმა აზრმა. მან ისარგებლა ამ შემთხვევით, რადგან უფრო მარჯვე ღროს თავისი უმაღლესი მიზნების მისაღწევად ძნელადლა იპოვიდა. მოურავი წამოდგა ზეზე და დაიწყო:

— ჩემი ფიქრი და ზრუნვა იქნების, თუ რარიგ დაგიმარცხო მტრები, დავამარცხო აჯანყებანი მცირე აზიასა და არაბეთში, აგრეთვე დავამსო შენი ორგული აზრუმის ფაშა. რაკი მოვრჩები ამაებს, დიღო მეუფეც, ჩემი მახვილი შურისძიებით მიადგება მტარვალ შაჰაბაზს, ჩემს პირად მტერსა. მან ბევრჯერ გათელა ფეხქვეშ ჩემი სამშობლო, ტურფა ივერი, და თანაც წამებით მოჰკლა ჩემი პირმშო ვაჟი, ჩემი პაატა...

პაატას ხსენებაზე გმირი აღელდა მეტად. იგი შეჩერდა ერთხანს, დაიცხრო უზომო მწუხარებით სავსე გული და განაგრძო მღელვარე ხმით:

— მზად ვარ, დიღო მეუფეც, ჩემი მარჯვენით გავუპო გული ბოროტ შაჰაბაზს და საკვდავი მახვილი ჩავსცე მკერდში თვით სპარსეთს. უდიდეს ბედნიერად ჩავთვლი იმ დღეს, როს გამოვგლეჯ ხელიდან ცბიერ ყიზილბაშს ერაყს, ქურთისტანს, დიდებულ ბაღდადს და დაეუბრუნებ მათ ისევ ძველ ბატონს! ესეც არ კმარის. მე სხვა მწადია კიდეც, დიღო მეუფეც: ვითარ ამ სამი წლის წინათ წაგვგლიჯე მას დიდი

შესხვითი, ისე მწამს ახლა ჩამოვართვა მთელი ივერი, რათა სრულიად საქართველო გადურჩეს მარად სისხლის მსმელ ყუინს. რაკი მოვრჩები ამ ძნელ საქმესაც და მით დავაუძღურებ სპარსეთს, მაშინ ადვილად მოვგლეჯ მას შირვანს კასპის ზღვამდე, თანაც დაგიპყრობ კავკასიონის ქედის ხალხებს, უკვე მუსულმანთ.

ამის შემდეგ ორთავემ შეფიცეს ერთგულება ერთიმეორეს და შეუდგნენ სამზადისს ომებისათვის.

XXXVII. მტარვალის მკვლელი

ოქტომბრის ბოლო რიცხვები. შაჰაბაზის დიდი ლაშქარი მოადგა ივერიის საზღვრებს. ჯარებს უფროსობდნენ საუკეთესო სარდლები: ყორჩიბაში, ხოსრო-მირზა და როსტომ ხან სააკაძე.

თეიმურაზ მეფემ ადრევე გაიგო ირანელთა ჯარების შემოსევა და კვლავ გადიხვეწა იმერეთისაკენ. მას დაედევნა ათიათასი მხედრით ქუჩუკ-ხანი, მაგრამ უნაყოფოდ.

თბილი, უმთვარო ღამე. ლუში ცა მოქედილა ვარსკვლავებით. მტკვრის პირას ფართო ველზე გაშლილა მტრის უზარმაზარი ბანაკი, ფერადი კარვებით მოფენილა ვრცელი მინდორი. ახლადამოსული ცისკარი მოხდენით კიაფობს აღმოსავლეთით. დროგამოშვებით ისმის გუშაგთა ყვილი.

მდიდრულ კარვებს შორის შუა ალაგს აუმართავთ ყვითელი ფარჩის დიდი კარავი, შიგნით მის კუთხეებში ანთია ოთხი ჩირალი, სიფრიფანა ფერადოვანი ფარჩით ფარული. ოქსინოს მძიმე სალაფარდის წინ ნოხზე მიწოლილა ოთხი იარაღასხმული გუშაგი და ჩაფლულან ღრმა ძილში. ფარდის უკან, ძვირფასი თვლებით მოოქვილ ოქროს ტახტზე, ფარჩის ლოგინში სძინავს ერანის შაჰს. მისი მოგრძო, გამხდარი სახე ილიმება საამო სიზმრების გამო, ალბათ, თუ ხედავს თავისი ჯარების შესევას ადრევე მის მიერ აოხრებულ ქართლსა და კახეთში; ალბათ, თუ ხედავს სპარსელთა ხმლი და თოფ-ზარბაზნებით გაელეტილ ქართველ ხალხს, ივერთ

ასულთა და ყრბათა საშინელ ბილწვას, ღანგრულ ციხე-ქალაქებს, ცეცხლწაკიდებულ სოფლებს, ზვრებსა და ბაღებს. უმზერს ივერიის სრულ დაღუპვას და ამ სურათით ტკებება მტარვალს. ხედავს ასეთ სიზმრებს გაბოროტებულ შაჰს და სიტკბო-სიამით ევსება გული. ის კი არ უწყის, თუ რა ახლოს სდარაჯობს მას შავი სიკვდილი...

დიდი ყეინის კარავს ახვევია ბრწყინვალე ამალის ფარჩის კარვები. ამ დროს ვიღაც შავად მოსილი, წერწეტა ტანის არსება სიბნელეში ფრთხილად უახლოვდება შაჰის კარავს, იძრობს მახვილს, ჩაახვეს კარავს გვედრსა და შედის შიგნით. მიმოიხედავს. ცეცხლს აფრქევს შავი თვალები; მამაც სახეს ემჩნევა განწირულება. გულს სწვავს შურისძიების ცეცხლი, მაგრამ იკავებს თავს. მის წინ ოქროს ტახტზე სძინავს მტარვალს. მწვანე ფარჩის შუქფარის მოსილ ჩირალის შუქზე სიკვდილის ფერი დაჰკრავს მძინარეს. უკვე გამქრალა საამო სიზმრის ღიმილი და მოხუცის სახეს ემჩნევა მძიმე ურვა. გმინავს და შფოთავს იგი.

შავად მოსილი უახლოვდება ყეინს და დასცქერის შფოთვარე სახეს. მარჯვენა ხელში ელვარებს ბასრი ხანჯალი. მზად არის გააელოს გულში ხალიბის რკინა. მაგრამ არ ჩქარობს. რაღაცას ფიქრობს, ხოლო არ ფერობს რაინდს მძინარის მოკვლა. ორი წელია, რაც ელის იგი ამ ბედნიერ წამს. ორი წელია, რაც მას სწყურია იხსნას სამშობლო, მოუღოს ბოლო ქვეყნის დამღუპველს. აჰა, უცქერის იგი მძინარე მტარვალს, უიარაღოს. მაგრამ ამართული მახვილი მძიმედ ეშვება მამაცის ხელში... ფრთხილად აღვიძებს ივერიის მტერს...

— აღსდგე, მტარვალო! იპყარ მახვილი და გაუსწორდი შენს წინ მდგომარეს! აღსდგე, შაჰაბაზ! ამ შენ საწოლთან მოკვდი ბრძოლაში მახვილით ხელში!

ჩასწვდება ყურში ხმა საშინელი... წამოვარდა გაფითრებული ირანის მეფე, ხმალსა იშიშვლებს.

— ვინ ხარ, ბედშავო?! ჩვენება რამე, თუ ხორციელი, ჩემს მოსაკლავად შემოპარულ?!.. შესძახებს შაჰი.

— სისხლისა მსმელო! კარგად შემხედე! მიცან თუ ვერა?!

— გელა?!

— ცდები, მტარვალო! მე ვარ ასული შენგან დატანჯული ივერიისა, შენს მოსაკლავად მოვლინებული! ხოლო ქართველი არ ჰკლავს მძინარეს!

ამის გამგონე შაჰბაზი გამწარებით მოუქნევს ხმალსა. ქალი აიცდენს და გულს გაუბობს ელვის სისწრაფით. ირანის მეფე ეცემა მკვდარი, უხმოდ, უსიტყვოდ... ალუბლის ფერად იღებება ფარჩის საწოლი... იქვე დგას მკვლელი მახვილით ხელში... უბრწყინავს სახე...

— მოკვდა, გათავდა... აჰა, ასრულდა, ცარო მთიელო, ეს შენი ნატვრა, გულის წადილი!.. დაღუპვისაგან იხსენ სამშობლო!.. მოჰკალ მტარვალი! — ფუჩუნებენ ძლივ გასაგონად ქალის ბაგენი...

დააცქერდა, ვით მთვარეული... უცებ გონს მოდის... იქვე გვამთანა დაადგებს ხანჯალს... გადის კარვიდან და ინთქმება ლამის წყვილიაღში...

აჰა, თენდება! ხმა გავარდა: მოჰკლეს შაჰბაზი! მოჰკლეს ირანის დიდი ყეინი!

ელვის სისწრაფით მოედო ბანაკს, დასცა თავზარი...

სწრაფად შევიდნენ შაჰის კარავში იარაღასხმული მთავარსარდლები: ყორჩიბაში, ხოსრო მირზა და როსტომ-ხან სააკაძე. მათ შეუერთდნენ სხვა სარდლებიც. იხილეს გაბედული მკვლელობის საზარო სურათი და მკვლელის მიერ იქვე დაგდებული სისხლიანი ხანჯალი. როსტომ ხანმა მაშინვე შეიცნო იგი, რადგან მუდამ ხედავდა მასთან შეფარებულ გელას ტანზე. დუმდა შორსმკვერეტი ადამიანი. მიხვდა ყველაფერს. მიხვდა, რომ მამაცმა გელამ იძია შური. ეროვნული სიამაყე და სულიერი შვება იგრძნო მისმა არსებამ...

ღიას, მოკვდა შაჰაბაზ და თან წარიღო ის საიდუმლო,
თუ ვინ მოუღო ბოლო ამ ივერიის საშინელ მტარვალს...
მოკვდა შაჰაბაზ და ამ სოკედილმა ჩაფუშა მისი გეგმები
ქართლ-კახეთის მოსპობის შესახებ... მოჰკლეს შაჰაბაზი -
მისი ლაშქარი გარბოდა ირანისაკენ, როგორც ძლეული...

XXXVIII. დიაცის გესლი

თურქეთი. სტამბოლი. ახლად ჩასული დიდი მოურავი თავის ქართველებით. სულთანის მიერ საიდუმლოდ მიღების შემდეგ საჭირო შეიქნა სააკაძის დაჩქარებით მომზადება და წასვლა ბრძოლის ველზე, რადგან დრო აღარ ითმენდა. ორივე მხრიდან მოდიოდა ცუდი ამბები. როგორც თოხატათა ქვეყანაში, ისე არაბეთშიაც აჯანყებულთ გაემართათ სათარეშო ბრძოლა, მოულოდნელად ესხმოდნენ თურქთა ჯარებს, ხოცავდნენ, ელეტდნენ და აცლიდნენ სურსათს, ცხენს, ჯორ-აქლემს და სამხედრო იარაღს. ბრძოლის ასეთ ხასიათს ილაჯი გაეწყვიტა უნიჭო ვეზირ აზამისათვის და დიდ გასაჭირში ჩაეგდო. ამის გამო დიდმოურავმა საჩქაროდ შეაგროვა 3.000-მდე მებრძოლი და გაეშურა თოხატისაკენ, თავისი ვაჟებით და 40 ქართველით; იგი სტამბოლშივე გაეცნო ბრძოლის ხასიათს და ვითარებას, ადგილმდებარეობას, ამიტომ თვითვე არ ისურვა დიდი ჯარის წაყვანა.

ამავე დროს სულთანის ბრძანებით ვეზირ-აზამი თავის მხედრობით მოიხსნა თოხატიდან და გაიგზავნა ბაღდადისაკენ, სადაც ირანის შაჰს მიეცა მაშველი ჯარი აჯანყებულ არაბთათვის.

მას სწადდა თავის გავლენის ფარგალში მოექცია ეს დიდი ქვეყანაც. სააკაძე თავისი რაზმით მიუახლოვდა თოხატათა უმთავრეს ციხე-ქალაქს. მან ფარულად დაათვალიერა იგი და დარწმუნდა, რომ მცირე ჯარის გამო იერიშით მისი აღება იყო შეუძლებელი, ამიტომ მიმართა ხერხს: ქართველებმა გადიცვეს ვაჭრული სამოსი, გაიგდეს წინ საქონელით ტვირ-

აუღლი ჯორ-აქლემნი და ამგვარი თონით შევიდნენ ციხეში, აქ ისინი განთიადის უამს თავს დაესხნენ ციხის გუშაგთ, და-ხოცეს სწრაფად და დაუღეს კარები თავის ჯარს, რომელიც ღამის სიბნელეში სააკაძის ბრძანებით მიახლოვებოდა ციხეს. ენით აუწერელი რისხვა დატრიალდა თოხატთა თავზე. მო-ურავმა გაწყვიტა ნახევარზე მეტი მტერი და აიღო ციხე-ქალაქი. ხელჩართულ ბრძოლაში მამაცად დაიხოცნენ აჯან-ყებულთა მოთავენი. ამ უმთავრეს ციხე-ქალაქის აღებით სააკაძემ ადვილად გატეხა და დაიპყრო სრულიად თოხატის ქვეყანა. „დიდებულმა გურჯმა“ ეს ამბავი აუწყა ხონთ-ქარს, თანაც ფეშქაშად გაუგზავნა მტრის დროშები და სამ-ხედრო ალაფი.

სულთნის გაოცება-სიხარულს არ ჰქონდა საზღვარი.

მთელი სტამბოლი და თურქეთი აღტაცებაში მოიყვანა ამ უჯერო ამბავმა. მცირე რაზმით და ორმოცი ქართველით ერთ თვეში სააკაძემ ჩაიღინა ეს მძიმე საქმე. უსაზღვროდ გახარებულმა სულთანმა დიდი მადლობა შეუთვალა გმირს, უბოძა უამრავი განძი და გახადა დაპყრობილი ქვეყნების გმირად.

თურქეთის ყველა ქალაქში გაიმართა ამ გამარჯვების გა-მო დიდი ზეიმი და დღესასწაული ჩირაღებითა და შუშხუ-ნებით. სტამბოლის მგოსნებმა ნაირნაირი ლექსებით შეამკეს საქართველოს გმირი და იწყეს საკრავებზე მისი ქება-დიდე-ბის დამღერება. ეს ჰანგები შეიჭრა სერალის ჰარემში და აღტაცებაში მოიყვანა სულთნის არიფნი. ფერად მარმარის შადრევან-აუზებთან ლეილად-კიპარისების ჩეროს ქვეშ დამ-ლეკროდნენ ამ ქება-დიდების ჰანგებს სულთნის მშვენიერი შავთვალა არიფნი, თანაც დასცინოდნენ უნიჭო ვეზირ-აზამს. ფრიად ამაყსა და თავმოყვარეს სულთნის დას ფატმა-ხა-ნუმს ესმოდა ეს დაცინვა. მას აბრაზებდა „ვილაც გურჯის“ ქება-დიდება.

ღიაცის გული ივსებოდა შურისძიებით.

კიდევ უარესი დღე დაადგა ვეზირ-აზამს ბაღდადის მხარეს. ირანელებმა სასტიკად დაამარცხეს იგი რამდენჯერმე. ბრაზმორეული სულთანი უგზავნიდა მამველ ჯარებს, მაგ-

რამ უნაყოფოდ. ბოლოს სულთანმა მის შემწედ გაგზავნა სააკაძე 4.000 კაცით. დიდ მოურავეს დიარბეჭირთან დახვდა ერანის ჯარი, რიცხვით 10.000 მებრძოლი. მოხდა მედგარი შეტაკება. სააკაძემ საშინლად დაამარცხა მტერი და თითქმის გაანადგურა მთლიანად. ეს იყო თურქთა ჯარის პირველი გამარჯვება მტერზე.

ჩავიდა სტამბოლში ეს ახალი ამბავიც. სწრაფად მოედო იგი მთელ თურქეთს. „დიდებული გურჯი“ იქცა ხალხის თვალში რაღაც ზღაპრულ პიროვნებად, უძლევე ბუმბერაზად. სერალის ტურფა დიაცნი ოცნებობდნენ ამ შეუღარებელ გმირზე, ხოლო სულთნის და ივსებოდა ბრავით.

ამ ახალმა ამბავმა კიდევ უფრო შელახა მისი სნეული თავმოყვარეობა. ის მზად იყო კბილებით დაეგლოჯა თავისი ლაჩარი ქმარი.

მეტად ცუდი ამბები მოდიოდა არაბეთის მხრიდან. იქ უფრო და უფრო ძლიერდებოდა აჯანყება თურქთა ბატონის წინააღმდეგ. არაბნი აშკარად იხრებოდნენ ერანისაკენ. ექვს გარეშეა, აქ მოქმედებდა შაჰაბაზის ოქრო, უხვი ფეშკაშები და დაპირებანი. საჭირო იყო რითიმე აჯანყების ჩაქრობა და ამ მამაცი ხალხის დაწყნარება. თურქეთი გადაარჩინა ამ ხიფათს ისევე დიდმოურავმა. თავისი მცირე ჯარით მოკლე დროში ჩააქრო აჯანყება და ძლევა მოსილი დაბრუნდა უკან.

ამ დროს სასტიკი ბრძოლა ხდებოდა აზრუმთან. როგორც ვიცით, აზრუმის ფაშა აბასი გადუდგა სულთანს და მიემხრო ირანის ყვინს. გალაღებული ირანელნი შეიჭრნენ შუაგულ თურქეთში. აზრუმს შემოერტყა უამრავი ჯარით ვეზირ-აზამი, მაგრამ ვერაფერს გახდა. ციხე-ქალაქი მაგრად იდგა და თვით აზრუმის ოლქის მცხოვრებნი ფრიალ ავიწროებდნენ სათარეშო ბრძოლით თურქთა ჯარებს. სტამბოლიდან იგზავნებოდა მაშველი ჯარი, ამაოდ. სულთნის გამწრებას არ ჰქონდა საზღვარი.

გავარდა ხმა: დამარცხდა მტერი, აიღეს აზრუმი, ოსმალოს დროშა ფრიალებს ციხის თავზეო.

ვინ ჩაიღინა ეს დიდი საქმე?

აქაც სააკაძის გმირობამ და სამხედრო გენიოსობამ გატეხა მაგარი ციხე, დაამარცხა ორ-სამ ალაგს ირანთა მხედრობა და დასცა გამდგარი ფაშა აბასი.

ასეთი საარაკო ამბები მოდიოდა სტამბოლში და იპყრობდა მსმენელს. სააკაძე იქცა მათ თვალში ლეგენდარულ არსებად. ხალხი აღმერთებდა მას. მოხუცმა სულთანმა აღარ იცოდა რაჩიგად დაეჯილდოებინა ის პირი, რომელმაც მოკლევ ხანში ასე საარაკოდ ასახელა მისი ღრაომა და მოჰფინა მის გვირგვინს ესოდენ დიდების შარავეანდედი; იგი მზად იყო მოეწვია დიდი მოურავი და დაესვა თავის გვერდით სულთანის სევანზე. ხონთქრის ბრძანებით სააკაძეს მიუბოძეს უამრავ სიმდიდრესთან ერთად მის მიერ დაწყენარებული და დაპყრობილი ქვეყნების ამირთ-ამირობა; მისი მამაცი ქართველები ხომ აავსეს ყელთამდე ლარით, ქონებით და სხვადასხვა ჯილდო-წყალობით.

მაგრამ, სავალალოდ, ბოროტი მორიელი ანთხევდა გესლს. ბნელეთის ვეშაპი ჩასანთქავად უახლოვდებოდა სააკაძის მნათობს.

აივსო დიაცის შურისძიების ფიალა. სულთნის და ბორგავდა, როგორც აფთარი. „ვილაც გურჯმა“, სამშობლოდან გაძევებულმა, მეტად დაჩრდილა მისი პატივ-დიდება, სამასხარო ტიკინად აქცია ხალხის თვალში მისი მეუღლე დიდი ვეზირი. ფატმა-ხანუმი გადიქცა სერალში დაცინვის საგნად. აღარ შეეძლო მეტი მოთმენა. უნდა მომკვდარიყო ეს გურჯი, უნდა დაღვრილიყო მისი სისხლი...

ამ ბოროტმა არსებამ მისწერა ქმარს მეტად მკაცრი ბარათი. ის აუწყებდა სულთნის რისხვას, ქალების მიერ დაცინვას, ხალხის თვალში დაცემას და მასხარად აგდებას. „ვილაცა გადმონხეწილმა გურჯმა“ თავისი გმირობით დაჩრდილა დიდი ვეზირი, სულთნის სიძე, დასცა მთელ დუნიაზე მისი სახელი, ტიკინად აქცია იგი სერალის თვალში.

— ამას შემდეგ ან შენ უნდა იყო, ან ეგ გურჯი! მოჰკალა დაღვარე მაგ გიაურის სისხლი და მით აღადგინე დაცემული სახელი!—სწერდა ცოლი ვეზირ-აზაშს.

ამ ბარათმა უზომოდ ააშფოთა დიდი ვეზირი. ცოლი აყვედრიდა უმოქმედობას, სიძაბუნეს.

ქალი ეძახდა ლაჩარს, დიაცი იწვევდა ვაჟეაცს შურის საძიებლად. იგი უკვეთდა უდიდესი გმირის მოკვლას. ასეთი მუხანათობა ფრიად ემძიმა პატიოსან კაცს. საპასუხოდ ბარათში ვეზირ-აზამმა სასტიკად გაკიცხა ცოლის საქციელი.

მოკლე ხანში დიდმა ვეზირმა მიიღო ცოლისაგან მეორე და მესამე წერილი, ლანძღვა-გინებით და მუქარით სავსე.

არ ისვენებდა ბოროტი ვნებით მბორგავი დიაცი. იგი ეძახდა ქმარს ლაჩარს, ჯაბანს, დედაბერს.

— თუ არ მოგიკლავს ეგ გურჯი, საჯაროდ გაგშორდები, ხელს ავიღებ შენს ცოლობაზე, შეგარცხვენ საქვეყნოდ.

ამ ბარათებმა ვეზირ-აზამი ჩააგდო საგონებელში. იგი კარგად იცნობდა თავის ცოლს — ამ ბოროტსა და არჯალღიაცს. სულთნის და ადვილად შეასრულებდა თავის მუქარას. საშინელ ყოფაში ჩაეარდა აზამი, დიდ ვეზირს ან უნდა მოეკლა თავი, ან თავისი მეტოქე. მან კიდევ მისწერა ცოლს დამამშვიდებელი უსტარი.

უზომოდ გააბრაზა სულთნის და ქმრის ბარათმა. არჯალმა დედაკაცმა ზედმეტი გამწარების გამო დაიგლიჯა თმები და დაიკაწრა სახე. აღარ იცოდა რა ექნა. ერთი მხრით აბრაზებდა ქმრის და თავის ასე შერცხვენა და დამცირება მთელი ქვეყნის წინაშე, ასე მასხრად აგდება, მეორე მხრივ უფროსხდა განშორებოდა ქმარს საჯაროდ, რადგან ფრიად ეშინოდა თავის ძმისა. მას არ სურდა ემცნო სულთანს განშორების მიზეზი. იცოდა, რომ სულთანს გადამეტებით უყვარს გურჯი სააკაძე და კარგს არას შეამთხვევდა თავის დას, თუ კი სცნობდა მის ბოროტ ზრახვებს. ამიტომ არჩია ქმართან წასვლა და პირადად მოლაპარაკება.

მან შეიბურა სახე, მოისხა უბრალო აჯილა და, ერთი მოახლის თანხლებით, ფრიად საიდუმლოდ გაიპარა სტამბოლიდან, მივიდა აზრუმს, სადაც ამ დროს იყო მისი ქმარი.

ვეზირ-აზამს ისიც იყო გაეთავებია ვაზში და აპირებდა მოსვენებას, ოდეს ვილაცამ ფრთხილად დაუკაკუნა კარები.

აზამმა თვითონ გაულო კარი, შეუშვა ოთახში შავაჯილამოს-ხმელი ქალი. მის გაოცებას არ ჰქონდა საზღვარი, როცა ქალმა მოიხსნა ჩადრი და პირსაბურავი. მის წინ იდგა ფატმა-ხანუმი, მისი მეუღლე მრისხანე სახით და მოეღვარე თვალებით.

— არ მელოდო, განა, ლაჩარო?!—გაისისინა ქალმა ნელი ხმით. რომ არაღის გაეგონა. — გაგაოცა, განა, ჩემმა აქ მოსვლამ ამ სუსხიან ზამთარში? და ეს ჩამადენინა შენმა უნიჭობამ და სიმბდალემ. შენ შეიქენ შემარცხვენელი მთელი ოჯახის, შენ იქეც დაცინვის საგნად მთელს ოსმალეთში. შენ ეზიზღები უკვე ჩემს ძმას დიდ სულთანს!

ამიერიტ შენ გერთმევა ვეზირ აზამობის * მაღალი წოდება და იგი ეძლევა ივერიიდან გამოძევებულ გურჯ სააკაძეს, რომელმაც ამ მოკლე ხანში ჩაიღინა საარსკო გმრობანი და მთლიანად დაჩრდილა შენი სახელი. იქნებ არ უწყვი, შე საცოდავო, თუ რა იქნები მაშინ! სულთნის მევირე სადლაც შორეულ კუთხეში... და მე, ფატმა ხანუმი, დიდი ფადი-შაპის დაი და მთელი სერალის დედოფალი, ვილაც მევირის ცოლი... აი, რა ჯილდო დაიმსახურე შენი ლაჩრობა-უნიჭობით.

ვეზირ-აზამი ისმენდა ცოლის გესლიან სისინს და თანდათან უფითრდებოდა სახე, უშრებოდა ჩარბები. ის ხელებდაკრეფილი და თავჩაქინდრული იდგა ცოლის წინაშე, რაღაც უზომო შიშით და გულამღვრევით ისმენდა მის შხამიან სიტყვებს.

— რას სდუმხარ, საცოდავო არსება?! რად არ იღებ ხმას?! რად არ მპასუხობ! რას უპირებ შენი დაღუპვის მიზეზს — გურჯ მოურავს?! დასძარი სიტყვა! ხმა ამოიღე. შეჩვენებულო, სამარცხვინო ლაჩარო! — შეუტია გამწარებით დიაცმა.

— რა უნდა გითრხა! ღირსი ვარ მაგ ლანძღვა-ქირღვისა! ღირსი ვარ სულთნის რისხვისა! ღირსი ვარ, რომ გამშორდე საჯაროდ და მისთხოვდე ვისაც გსურს, თუნდაც იმ დიდებულ გურჯს, თუკი დაიტეხს თავზე უბედურებას და აიყვანს ცოლად შენისთანა მგესლავს, ბოროტს და არჯალს...

* მთავარი ვეზირი.

— მაშ ეგ არის შენი პასუხი, საცოდავო? მაშ 'მურს არ იძიებ მოსისხლე მტერზე?!

მივარდა გაკაპასებული ცოლი ვეზირ-აზამს.

— აბა ვინ არის ჩემი მტერი?

— ვინა და გურჯი სააკაძე!

— ის გმირია და არა ჩემი მტერი. ის დიდებული სარდალია. მან საარაკოდ გაიმარჯვა ყველგან ოსმალეთის მტრებზე. მან დაუპყრო სულთანს დიდი ვრაცი, ქურთისტანი და გამდგარი არაბეთი, აზრუმი და თოხატთა ქვეყანა.

— მერე, შენ ხომ მოგსპო ასეთი მოქმედებით!

— სამაგიეროდ ასახელა ფადიშაჰის დროშა და განადიდა მთელ დუნიაზე ოსმალთ სახელი.

— მერე ჩვენ რა ჩვენ შერცხვენა! დამცირება! მასხრად აგდება! არა, გონს მოდი, დიღო ვეზირო! ეგ არ ეგების! ჩვენ ან უნდა მოვიკლათ თავი, რომ გადავრჩეთ ესოდენ სირცხვილს, ან უნდა მოვკლათ ჩვენი მეტოქე. სხვა გზა არ არის. ასე ჩემო მეუღლე, ჩემო ძვირფასო და საყვარელო! — ამ სიტყვებით ცბიერი არსება ჩაეკრა გულში ვეზირ-აზამს და აკოცა სინაზით.

აზამი დაათრო ცოლის ალერსმა, ტკბილმა სიტყვებმა ბანგივით იმოქმედა მასზე. მან ალერსითვე უპასუხა სულთნის დას და შეეკითხა წყნარად:

— რარიგად უნდა ჩავიდინოთ ეს ფრიად მძიმე და სახიფათო საქმე? თუ გავგიგო სულთანმა, ხომ მოგვსპობს ორთავეს! — შეეკითხა ქმარი.

— მაგის ჯავრი ნუ გაქვს, სულთანი ვერაფერს გაიგებს ამ სიშორედან. კიდევ რომ გაიგოს, ვეცდები ცრუ მოწმეებით ბრალი დავდოთ თვით გურჯებს, დავწამოთ სულთნის ღალატი. ეს საკმაოა, სულთანი ჩვენ უფრო დაგვიჯერებს, ვინემ ვილაც გიაურებს. მით უმეტეს გურჯი სააკაძე აწი აღარაა მისთვის საჭირო, მან უკვე შეასრულა თავისი დავალებანი.

— როგორ? შენ მიკვთავ მარტო დიდი მოურავის მოკვლას, თუ ყველა გურჯის დახოცვას, ვინც მას ახლავს? — შეეკითხა გოაცებით ვეზირ-აზამი.

— რასაკვირველია, ყველა გურჯის გაულეტას, ვანც მას-
თან არიან, მათ შორის ერთიც არ უნდა დარჩეს ცოცხალი,
თუ სიცოცხლე გვწადია.

— ეგ, ჩემო ძვირფასო მეუღლე, ფრიად მძიმე საქმეა-
იმდენი უდანაშაულო ხალხის გაულეტა, მათი ცოდვის თაჯ-
ზე დადება! — სწუხდა და ყრყმანობდა პატიოსანი ადამიანი.

— განა რამდენია! სულ ორმოცამდე თუ იქნება, მეტი
ხომ არაა ამ ოთხათეულ კაცზე უეცარ თავდამსხმელად ძი-
ლის დროს ერთი ასეული სრულიად საკმარისია, ხომა მე-
ტადრე თუ რჩეული მხედრები გაგზავნე.

— ერთი ასეული კი არა ხუთი ასეულიც მეცოტაებია,
ისეთ ლომებთან გვაქვს საქმე. ერთი ასეული მარტო დიდ
მოურავს თუ გაუძლებს. შენ არ იცი, რა არიან ეს გურჯე-
ბი! ისინი კაცები კი არა, მდეგები არიან, ნამდვილი მდეგე-
ბი! ერთი გენახა, ნეტა, ბრძოლის ველზე და მაშინ დააფა-
სებდი იმათ. ნამდვილი დელიბაშები. გიჟი, გააფთრებული
მებრძოლნი, ისე შედიან ხელჩართულ ომში და იქნევენ
ხმალსა, თითქოს ცეკვავენო. არა, ასეთი საარაკო მებრძოლ-
ნი არსად მინახავს, თუმცა მთელი დასაელეთი და სამხრეთი
აზია მომივლია და მრავალ ბრძოლას დავსწრებივარ!

— ანებე თავი გურჯების ქებას, ჩემთვის ეგ არაა საჭი-
რო, თუ ერთი ასეული გეცოტაებია, ხუთასი გაგზავნე, რჩე-
ული მეომარნი, საუკეთესო სარდლის მეთაურობით. განა
ცოტა გვყავს ჯარი?!

— ჯარები კი მყავს საკმაოდ, ხოლო მე მაინც ვუფრთხე
ამ ძნელ საქმეს. რა ვიცი, რა მოხდება... რა შედეგი მოჰყვე-
ბა. ეს ტიალი გული უარს მეუბნება, ცუდად მიკვნესის!

— ნუ ხარ მართლაც ლაჩარი, სულთნის სიძე და დიღო
ვეზირო! იყავ მამაცი, მხნე და გულადი გაბედე, ჩაიღინე ეგ
ვაჟკაცური საქმე და ფამარჯვება შენია! აი, მხოლოდ მაშინ
ალიდგენ დაცემულ სახელს! მხოლოდ მაშინ იქნები ფადი-
შაჰის სიძე და ჩემი საყვარელი ქმარი! მაშ გაბედე და ჩაი-
ღინე! ალაჰი იყოს და მისი ფეჰამბარი შენი შემწე, დიღო
ვეზირო! — ამ სიტყვებით ქალი კვლავ ჩაეკრა გულში, და-
ათრო ტყბილი ალერსით, გაიკეთა პირსაბურავი, გაეხვია
მავ ჩადრში, გავიდა ლანდივით...

ბოროტმა ენამ, იქონია თავისი გავლენა. ამ სუსხიან ღამეს გადაწყდა დიდი მოურავის ბედი.

კუნაპეტი ღამე. მოწმენდილ ცაზე ვარსკვლავთა მკრთალი ციმციმი. ირგვლივ სამაჩისებური სიჩუმე. ყინავს. ფიფქი თოვლი თეთრად ალამაზებს მიდამოს. სძინავს თოხატის ციხე-ქალაქს. სძინავს ტკბილად ქართველთ სავანეს, მთის ფერდობზე გოროზად ამართულს თავისი მაღალი ზღუდე-ბურჯებით. არ ისმის გუშაგთ ყვილი. ყველანი შებუდრულან თავიანთ ბინებში და მისცემიან ტკბილ მოსვენებას. არავინ უწყის, რას უქადის მათ ეს ცივი, ბნელი ღამე...

მაგრამ ვინ არიან ის შავი ლანდები, ეგერ მთის კალთაში შეფარებული?! ვინ არიან ის იარაღასხმული ზორბა ვაჟაკანი?! ათი, ოცი, ასი, რამდენიმე ასეული, სულ ექვსასი. რჩეულ შამაცთა რაზმებს ბელადობს უპირველესი სარდალი მუხტარ-ბეი. ფრთხილად, ფარულად, ნელიად უახლოვდებიან ისინი ივერთ სავანეს. იქ ეგულებათ „დიდებული გურჯი“ გიორგი სააკაძე ორმოცამდე ქართველით; ამათ ზომ ფრიად ისახელეს თავი ომებში და განადიდეს ფადიშაჰის დროშა. ხოლო დიდი მოურავი არ ელის ამ ცივ ღამეს დაუპატიჟებელ სტუმრებს, არ ელის ღალატს... სძინავს განცხრომით თბილ ბინაზე ზემო სართულში. იქვე სძინავს მის ორ ვაჟს — ზურაბსა და ავთანდილს. იმავე სახლში სძინავთ ხუთმეტამდე ქართველთ. დანარჩენი კი იმყოფებიან იმავე ზოში აგებულ ორ მომცრო სახლში. ტკბილად სძინავს მოურავს. იგი ჩაფლულია საამო სიზმრებში; უღიმის სახე. არ უწყის გმირმა, რას უქადის ეს საბედისწერო ღამე.

სამშობლოდან დევნილი დიდი მოურავი მოუთმენლად ელის გაზაფხულს, რათა მიიღოს სულთნისაგან დაპირებული ჯარი თავისი უზენაესი მიზნების მისაღწევად. იგი აპირებს კიდევ ამ დღეებში სტამბოლს წასვლას, სურს დატკბეს მეუღლისა და ორი უმცროსი ქალ-ვაჟის ნახვით.

მუხტარ-ბეის რაზმი კი ჯგუფად დაყოფილი ნელი რონინით უახლოვდება ივერთ სავანეს. ამა მიადწიეს მაგარ ზღუდეს ორი მხრივ. მიადგეს ხის გრძელი კიბე. სამი მამაცი თურქი მალე მოექცა გალავნის თავზე. აქ კიბის წვეროზე

გამაგრეს თოკის კიბე და სათითაოდ დაეშვნენ 'შიგნი-
ასევე მოიქცნენ სხვებიც. მალე ორმოცამდე ჯარისკაცი
თვით მუხტარ-ბეის ბელადობით გაჩნდა ეზოში. ისინი სწრა-
ფად მიცვივდნენ საგუშაგოსა და ალაყაფის კარებს; ხანჯ-
ლით მოკლეს მძინარე გუშაგანი, გამოაძვრეს მძიმე ურდუ-
ლები და გააღეს რკინის კარები. იქვე გარეთ მდგარი თურქი
შემოცვივდნენ საშინელი ყიჟინით და თოფების სროლით.

წამოცვივდნენ ზეზე თბილ ბინებში მძინარე ქართველნი.
მალე მოვიდნენ გონს, შეიმოსნენ რკინის ჯუბა-ჯავშნით და
ეცნენ აირალს.

— ლალატია... უეცარი თავდასხმა... მამაცად, ძმებო და
შვილებო! ღირსეულად დაეხვდეთ შემოსეულ მტერთ! ვამც-
ნოთ ჩვენი ძაღლონე! წამოიძახა დიდმოურავმა მღელვარედ.
იგი სწრაფად შეიმოსა რკინის ბეგთარით და ჯუბა-ჯავშან-
მუხარადით, აისხა იარაღი, თოფით ხელში მიიჭრა სარკმელ-
თან. მას მიჰბაძეს სხვებმაც. სამასი კაცი თვით მუხტარ-ბეის
სარდლობით შემოეხვია „დიდი გურჯის“ ბინას და დაუშინა
თოფები. ქვის მაგარ კედლებში ვერ ატანდა ტყვია. სრო-
ლითვე უპასუხეს ქართველებმა სარკმელებიდან. რამდენიმე
თურქი დაეცა მიწაზე მძიმედ დაჭრილი და ზოგიც დახო-
ცილი.

კიდევ სროლა ქვემოდან ასეული თოფით და პასუხი ზე-
მოდან. ივერთა ტყვია იშვიათად აცდენდა ნიშანს. ასევე
ხდებოდა დანარჩენ ბინებთანაც. იქაც მამაცად იბრძოდნენ
გარშემორტყმული ივერნი და ყლუტდნენ თურქებს.

მალე დაიმსხვრა ყველა სარკმლის მინები. აქა-იქ დაიცხ-
რილა კედლებიც. მძიმედ დაიჭრა რამდენიმე ქართველი.
ბედად, ბლომად ჰქონდათ ტყვია-წამალი და იბრძოდნენ
გმირულად, თავგანწირვით.

— დაგვრჩი, მოურავო! დაგვნებდით, გურჯებო!

გაისმა ქვემოდან მუხტარ-ბეის მკექარე ხმა.

— მუხთალნო! უმადურნო! ღამის ქურდებო! ათასი მო-
დიხართ ორმოცზე! წყეულებო! სირცხვილი თქვენდა, ლაჩ-
რებო! მოდით, თუ ძალა შეგწყეთ! მოდით! შელეწეთ ამ
ბინის კარები! აქ დაგხვდებით მასპინძლად... მობრძანდით!
გაისმა ზემოდან მოურავის მგრგვინავი ხმა.

ბრახმორეული თურქნი ჰალლას ძახილით გამოქანდნენ შენობის კარებისაკენ, მაგრამ ქართველია პიერ გასროლილ-მა თოფებმა იმსხვერპლა ათამდე მტერი, ხოლო თორმეტმა თურქმა მოასწრო კარებამდე მისვლა. ისინი შედგრაღ დაეტაყნენ ურდულებით გამაგრებულ რკინის კარებს, მაგრამ ვერას გახდნენ. ასევე მოხდა დანარჩენ ორ სახლთან. იქაც მამაცად იბრძოდნენ ივერნი, თუმც ხუთი მათგანი შეეწირა ოსმალთა ტყვიას...

— ცეცხლი გურჯებს! ცეცხლი მაგ გიაურებს! წაუკიდეთ ცეხლი სახლებს!

დაიქეკა ბრახით მუსტარ-ბეიმ.

თოფების გრიალი უცებ შეიცვალა მშვილდ-ისრის სისინით. კუპრწყაცხებული და ცეცხლანთებული ისრები ათობით შეიჭრა ბინებში შუშადამსხვრეულ სარკმელთაგან, გაერჭო ქერსა და იატაკში.

ამ ველურ ხერხს არ მოელოდნენ ივერნი. მალე გაუჩნდა ცეცხლი ნაშენთა ქერს. იქიდან მოედო სახურავს. კიდეკ მცირე ხანი — და უზარმაზარი უჩნელილების მსგავსად აბრიალდა ეზოში სამი სახლი. ავარდა ბოლი. ალის გრძელმა ენებმა გაანათა მიდამო.

თავზარი დასცა ქართველებს ამ მოვლენამ. თურქთა ეზომო სიხარულის მხეცური ყიჟინით აივსო ეზო...

რავლა რჩებოდათ ქართველთ?! ან ცოცხლად დაწვა, ან ბინებიდან გამოსვლა და იარაღით ხელში ნამუსიანი სიკვდილი. მართლაც, მალე გაიღო სამივე სახლის ქვემო კარები და იარაღჭურვილი ივერნი მწყობრად გამოვიდნენ გარეთ; მათ მამაც სახეს აჩნდა განწირულება. გმირები მზერდნენ აშკარა სიკვდილს.

პირველი გამოვიდა ეზოში დიდი მოურავი.

— მომყევით, ძმებო და შვილებო! გმირულად შევხვდეთ სიკვდილს... ძვირად დავუსვათ მტარვალთ ჩვენი დალუპვა... პირი მტრისაკენ ოთხივე მხრივ!

შესძახა დიდმოურავმა და დადგა წინ. სწრაფად დარაზმდნენ სამივე სახლთან ივერნი თოფებით და შუბებით ხელში.

თურქნი არ მოელოდნენ ივერთაგან ასე მწყობრად გამოსვლას და დაიბნენ უცებ. ამით ისარგებლეს ქართველებმა, მოურავის ბრძანებით დაახალეს თოფები. დაქრილ-დახოცილი თურქნი მრავლად დაცვიდნენ მიწაზე.

— სიკვდილი გურჯ მოურავს!

ამ სიტყვებით მუხტარ-ბეი დელიბაშებით გარემოცული უცებ მივიარდა სააკაძეს და დაახალა დამბაჩა მკერდში. რვალის ბეჭთარმა აირეკლა ტყვია. გმირი გადურჩა აშკარა სიკვდილს.

— სიკვდილი მუხანათსა და მტარვალის მონას!

დასქეპა მოურავმა და გაუტარა გულში ფოლადის შუბი. თურქთა სარდალი დაეცა მკვდარი. მეთაურის სიკვდილმა უფრო გააბრაშა მისი დელიბაშები: ისინი შემოერტყნენ სააკაძის ჯგუფს და დაუშინეს თოფ-დამბაჩები.

შეიქნა მედგარი ხელჩართული ბრძოლა. ისმოდა ლანძღვა, მუქარა, ყიჟინა და უზოგველი ჩახაჩუნხი. დამცემი და დამხვდური, თურქი და ქართველი აირივნენ ერთმანეთში... ხოლო რას გააწყობდნენ ივერნი, როცა თითო მათგანს უტევდა ათი და ოცი მეომარი! წყდებოდა მტერი ათობით და ასობით, მაგრამ წყდებოდნენ ქართველნიც, მათი რიცხვი დნებოდა თანდათან... აჰა, დაეცა მამის გვერდით გულგანგმირული ზურაბ, მას მიჰყვა მეორე ძმა — აფთანდილ სასიკვდილოდ დაქრილი. უშრეტი ცეცხლი აიგზნო მამის გულში... ცრემლით აივსო მისი თვალები. გამწარებით შეუტია გმირმა შვილების მკვლელთ, მაგრამ მტრის ტყვიამ მოსწყვიტა ფეხი. წაბარბაცდა მოურავი და წაინოქა. სისხლი თქრიცხლით წამოვიდა ქრილობიდან და აუვსო წალა. ის მალე დაიჭრა მარჯვენა მკლავშიც. მაგრამ არ გააგლო ხელიდან იარაღი. ცალ მუხლზე დახოქილი გამწარებით იქნევდა შუბს და მუსრავდა მტრებს. მუქქარე მხით ამხნეგებდა ცოცხლად დარჩენილ მოძმეთ, მწარედ დაქანცულთ და არაქათგამოლეულთ. ამ დროს გავარდა ერთად სამი დამბაჩა. ტყვიამ შეუნგრია გულმკერდი მოურავს. ივერიის უდიდესი გმირი დაეცა მკვდარი... იგი დააკვდა დახოცილ ვაჟებს...

მცირე ხანიც — და მთლიანად გაიყლიტნენ ქართველები. ამ თავდასხმამ შეიწირა სამასამდე თურქი.

უკვე გათენებამ მოატანა, აღმოსავლეთით ცაზე აკაშკაშდა შუქურა ცისკარი, ოდეს თურქთა განახევრებული რაზმი განშორდა ივერთ სავანეს. მცირე ხანიც — და იანვრის ციატა მზე სისხლიანი თვალებით დააქჳერდა ბრძოლის ველს, სადაც უშნოდ აყუდულიყო გადამწვარ სადგომთა შავად გარუჯული ჩონჩხები. ადამიანის სისხლით წითლად შეღებილ დატკეპნილ თოვლზე ეყარნენ თურქთა სამი ასეული გვაში და გმირულად დახოცილი ორმოცამდე ქართველი... მათ შორის გადარჩა ერთი — ბეჟან გორგასლიშვილი. თათრულად მოსილი გაუსხლტა იგი მტერს, ჩავიდა სტამბოლს და ამცნო სააკაძის მეუღლეს ქმრისა და შვილების დაღუპვა, ამცნო დიდი მოურავის სიძესა და სტამბოლში მცხოვრებ ქართველთა იანვრის ღამეს თოხატში მომხდარი საშინელი ტრაგედია.

ფრიად ააშფოთა ქართველნი ამ უჯგერო ამბავმა. შეიქნა გლოვა და ტირილი. მალე მივიდა სულთნის ყურამდე ეს საზარო ამბავი: იგი ამცნო მისმა მოლარემ, მოურავის სიძემ. უსაზღვრო იყო ფადიშაჰის რისხვა, მწუხარება.

გამოძიებით მალე აღმოაჩინეს ამ ბოროტების ჩამღენი. სულთნის ბრძანებით თავი მოჰკვეთეს ვეზირ აზამს, სწორედ იმ ალაგს, სადაც ვერაგულად დაიღვარა ორმოც ივერიელთა უმანკო სისხლი.

ბოროტმა დიაცმა ფატმა-ხანუმმა კი მოიწამლა თავი, იგი მოერიდა ძმის რისხვას.

სცნო თუ არა ქმარ-შვილის დაღუპვა, ზარდაცემული თამარ მაშინვე გაეშურა ცხენით თოხატთა ქვეყანაში. მას ეახლნენ თვით ბეჟან გორგასლიშვილი და კიდევ ხუთი ქართველი. ქალი არაფრად იმჩნევდა ამ მძიმე მგზავრობას. არ ეკარებოდა სასმელ-საქმელს, უღრმეს კაეშანში ჩაფლული იგი მთელი არსებით მიისწრაფოდა იქით, სადაც დაატყდა თავზე საშინელი რისხვა. ჩქარი სვლით მესამე დღეს მიადწიეს თოხატთა მთავარ ციხე-ქალაქამდე. აქ შეეგებნენ თამარს ქალაქის მელიქი და ციხისთავი დიდი ამალით, უღრმესი მწუხარება განუცხადეს მომხდარი უბედურების გამო. ყველანი ფრიად გააოცა გაქვავებული ქალის სიჩუმემ. იგი ვერ ახერხებდა ხმის ამოღებას, თითქო ვერ სცნობდა, ვერ ხედავდა ვერაფერს.

ძიუახლოვდნენ ივერთ სავანეს; ჩამოხტნენ ცხეხებიდან. ვუშაგებმა ფართოდ გააღეს ალაყაფის კარები. შევიდნენ. ავალებს შეეფეთა გადაბუგული სახლები და ხროვად დაყრილი მკედრები. დატკეპნილი თოვლი ჭარბად შეეღება ადამიანის სისხლს. ეტყობოდა, რომ აქ გადაეხადა გიჟური ლხინი შავ სიკედილს.


თამარ მივიდა იმ ადგილს, სადაც შეკვდიამოდნენ ბტერას მისი ქმარი და შვილები. საშინელი სურათი დაესახა თვალწინ: სამი ზორბა რაინდი, ერთი ხანშესული, ორი ქაბუკი, იწვა პირადმა გულგანგმირული. ირგვლივ კი გროვად ეყარნენ დახოცილი თურქნი... ქალმა იცნო სამივე. იგი გაშეშდა ამ საზარო სურათის ხილვით. სული შეეხუთა. გაქვავებულ სახეს დაეუფლა უსაზღვრო ჯავრი. გამშრალ თვალებს არ მოსწყდა არც ერთი ცრემლი... იდგა კარგახანს მღუმარედ, გარინდებული, გაშტერებული... შემდეგ დაიხარა, დაემხო, მოხვია ხელი ქმარსა და შვილებს, ჩაიკრა სათითაოდ გულში, შეეხო სამთავეს სახეს მწვავე ამბოროთ... წამოიწია ჩაიჩოქა მათ წინ, მიმოიხედა შეშლილის თვალებით, ისევ დაიხარა მათკენ.

— იღარა მყავხართ, სულზე უტკბენსო! ვერაგის ხელმა მოგიღოთ ბოლო... რაღა მშთენია ბედშავს ქვეყნად?! რად მწადს სიცოცხლე შხამად ქცეული?!

გაისმა თამარის ყრუ ჩურჩული ნაწყვეტ-ნაწყვეტად. კვლავ დაიხარა და მოეხვია სამივეს უსაზღვრო სინაზით.

— აჰა, მოვდივარ მეც თქვენთან, ჩემო ყველავე! მოვდივარ! —

წამოიძახა გამწარებით, დასწვდა, ამოგლიჯა უცებ ქარქაშიდან ქმრის კალდიმი, ელვის სისწრაფით დაიკრა გულში... ივერიის მთების ასული დააკვდა მკერდზე ქმარსა და შვილებს...



ძველი და უხეო სიყვივიის ეხენა

ა.

1. არმადანი — საჩუქარი.
2. აეზაგი — ჯაშუში.
3. ავგაროზი — თილისმა.
4. არიფი — საყვარელი, სასურველი, მეგობარი.
5. აშული — მოლექსე, მოსიმღერე.
6. აბა — კაცის გრძელი მოსასხამი.
7. აშარი — უნამუსო ქალი.
8. აშული — უზენაესი სიამოვნება.
9. ამბიონი — ხელოვნურად ამალღებული ადგილი.
10. აზატი — თავისუფალი.
11. არჯალი — კაპასი.

ბ.

12. ბადიში — შვილიშვილი.
13. ბისიონი — მეფის სამოსელი.
14. ბივრილიონი — ძვირფასი ქვა.
15. ბოლაზი — ნავსადგური.
16. ბიმზოში — თურქეთის პოლიციელი.
17. ბადაზინი — წამალი (ბალზუმი).

გ.

18. გენუკვი — გევედრები.
19. გეთ — წადი.

დ.

20. დაფიონი — ალიონი.
21. დარილი — მწვავე შურისძიება.
22. დენთი — თოფის წამალი.
23. დესპანი — ელჩი.
24. დამარი — აორტა.
25. დარახტული — კარგად შეკაზმული ცხენი.
26. დაბირი — წრე.
27. დელიბაში — თავზეხელაღებული.

ე.

28. ეგზომ — ეგოდენ.
29. ეტრატი — საწერად სახმარი ცხერის ტყავი ქალაქის მაგვარი.
30. ემბაზი — ბავშვის მოსანათლავი ქურქელი.
31. ეჯიბი — სასახლის გუშავი.
32. ერაცი — ირაქი.
33. ექსორია — გადასახლება.
34. ეჯი — დაახლოებით უდრის 1 კილომეტრს.

ვ.

35. ვეჟინი — ხილის დაშაქრული წყალი.

ზ.

36. ზვიგენი — აქულა.

თ.

37. თაჯი — მეფის გვირგვინი.
38. თალარი — პაწია კოშკი.

ი.

39. იუი — არაყი.
40. იფრინდა — მსწრაფლსრბოლელი, შიკრიცი.
41. იჩქითად — უეცრად.
42. იახში — კარგი.

კ.

43. კენარი — კარგი ტანადი.
44. კაპალონი — წიგნი.
45. კვართი — პერანგი.

ლ.

46. ლუმბრა — მორევი.
47. ლაბადა — ქალის ქვედა კაბა.
48. ლალა — აღმზრდელი.
49. ლოლო — ტკბილი ნამცხვარი.
50. ლეილაღები — იასამანი.

ლ

მ.

51. მანდილი — ქალის თავსაბურავი.
52. მათარა — მეშის სასმისი.
53. მუტრიბი — დამკვრელი, მემუსიკე.
54. მუქაფა — სამაგიერო.
55. მუნ — იქ ან აქ.
56. მოოკვილი — შემკული.
57. მოოკავი — მოცეკვავე.
58. მუფტი — მუსულმანთა სამღვდლოთ უფროსი.

ნ.

59. ნატი — სამღვთოდ შეწირულ პირუტყვთა დამკველი.
60. ნატიფი — ლამაზი, ტურფა.

- 61. ნაფირი — პატარა ბუკი.
- 62. ნუზლი — სურსათის მარაგი.
- 63. ნეტარძი — ნეტავ.
- 64. ნუშა, კაპანო, კარაპა, კარქაპა და კატარღა — ნავთი და გემთა სახელები.

ო.

- 65. ოქსინო — ოქრომკედით მოქარგული სქელი ფარჩეული.
- 66. ოქშარი — სპარსული ჰანგი.

პ.

- 67. პატრუცავი — მეფისადმი მიწერილი ბარათი.
- 68. პაემანი — დანიშნული დრო და ადგილი.
- 69. პუნგია — ხალვა.

ჟ.

- 70. ჟოლო — მთის მაცვალი.

რ.

- 71. რააბი — სპარსული ჰიმნი მეფისადმი.
- 72. რაყიფი — მეტოქე.
- 73. რიტორი — ორატორი.

ს.

- 74. საბელი — თოკი.
- 75. სირი — ფრინველი.
- 76. სფერო და ფაენი — მეფის ატრიბუტები.
- 77. სიასამური — ძვირფასი ბეწვეული.
- 78. სინდეთი — ინდოეთის ჩრდილო ნაწილი.
- 79. სუფრაკი — სუფრის გამგე.

- 80. სერობა — ვახშობა.
- 81. სარანგი — პოლიციელი.
- 82. სალაფარდა — ფარდა.
- 83. სევანი — სამეფო ტახტი.

ბ.

- 84. ტარიგი — სამღვთოდ შეწირული პირუტყვი.
- 85. უაზნო — გლეხი.
- 86. უსტარი — ბარათი.
- 87. უამური — უსიამოვნო.
- 88. უსურვაზი — ვაზის მაგვარი მცენარე.
- 89. უნიათო — უეარგისი.
- 90. ურვა — მწუხარება.

ვ.

- 91. ფირმანი — ნებართვა.
- 92. ფეჰამბარი — წინასწარმეტყველი.

ძ.

- 93. ქიმერი — ფანტასტიკური ცხოველი.
- 94. ქუქანგი — წყალსადენის გამყვანი.
- 95. ქაშანი — ცნობილია ქაშანის ნოხი.
- 96. ქირღვა — ლანძღვა.

ღ.

- 97. ღოროტოტო — მაღალხმიანი ბუკი.

ყ.

- 98. ყული — მონა.

შ.

99. შარბათი — ტყბილი სასმელი.
100. შუშპარი — ცეკვა.
101. შუქფარი — აბაყური.
102. შაჰსევანი — სპარსეთის მეფის გვარდია.

ჩ.

103. ჩუბინი — კარგი მსროლელი.
104. ჩაუჭი — მარდი, სწრაფი.

ხ.

105. ხობა — ქება.
106. ხაბიზგინი — ოსური ხაქაპური.
107. ხეიბარი — დავრდომილი.
108. ხანაგა — გლახაკთა თავშესაფარი.
109. ხოჯა — საჭურისი.
110. ხიმსალი — ატომი.

ჯ.

111. ჯილა — გვირგვინი.

ჭ.

112. ჭეველი — მზის ან მთვარის ანარეკლი წყალზე.

კ.

- კური — მუსულმანთა ანგელოზი.
-

რედაქტორი გ. ნატროშვილი
ტექრედაქტორი ბ. გორდეშანი
მხატვარი გ. ჯაფარიძე

გამომშვები გ. დონაძე
კონტროლ.-კორ. ბ. ნახუცრიშვილი
კორექტორი ნ. კაცაძე

ზელმოწერილია დასაბეჭდად 27/IX-49 წ. შპ 04333. შეკვეთის № 929,
ინაწყოების ზომა 5,5 X 9. ქალაქის ზომა 54 X 84. ნაბეჭდ ფორმათა რაოდენობა 25,75. ტირაჟი 7.000.

საქართველოს სსრ მინისტრთა საბჭოსთან არსებული პოლიგრაფიისა და
კამოშემლობის საქმეთა სამმართველოს ბეჭდვითი სიტყვის კომბინატი
თბილისი, მარჯანიშვილის ქ. № 5.